

রেজিস্টার্ড নং ডি এ-১

বাংলাদেশ



গেজেট

অতিরিক্ত সংখ্যা  
কর্তৃপক্ষ কর্তৃক প্রকাশিত

বুধবার, সেপ্টেম্বর ১১, ২০১৯

বাংলাদেশ জাতীয় সংসদ

ঢাকা : ২৭ ভাদ্র, ১৪২৬ মোতাবেক ১১ সেপ্টেম্বর, ২০১৯

নিম্নলিখিত বিলটি ২৭ ভাদ্র, ১৪২৬ মোতাবেক ১১ সেপ্টেম্বর, ২০১৯ তারিখে জাতীয় সংসদে  
উত্থাপিত হইয়াছে :—

বা. জা. স. বিল নং ১৯/২০১৯

**Customs Act, 1969 (Act No. IV of 1969) রহিতপূর্বক যুগোপযোগী করিয়া  
পুনঃপ্রণয়নকল্পে আনীত বিল**

যেহেতু Customs Act, 1969 এর বিধানসমূহ সমন্বিত, সুসংহত ও যুগোপযোগী করিয়া  
পুনঃপ্রণয়ন করা সমীচীন ও প্রয়োজনীয়;

সেহেতু এতদ্বারা নিম্নরূপ আইন করা হইল :—

**প্রথম অধ্যায়  
প্রারম্ভিক**

১। **সংক্ষিপ্ত শিরোনাম ও প্রবর্তন।**—(১) এই আইন কাস্টমস আইন, ২০১৯ নামে অভিহিত  
হইবে।

(২) সরকার, সরকারি গেজেটে প্রজ্ঞাপন দ্বারা, যেই তারিখে নির্ধারণ করিবে, সেই তারিখে এই  
আইন কার্যকর হইবে।

২। **সংজ্ঞা।**—বিষয় বা প্রসঙ্গের পরিপন্থি কোন কিছু না থাকিলে, এই আইনে—

(১) “আপীল ট্রাইব্যুনাল” অর্থ ধারা ২৪০ এর অধীন গঠিত কাস্টমস, এক্সাইজ এবং মূল্য  
সংযোজন কর আপীল ট্রাইব্যুনাল;

( ২২০১১ )

মূল্য : টাকা ১১০.০০

- (২) “আমদানিকারক” অর্থ Imports and Exports (Control) Act, 1950 (Act No. XXXIX of 1950) এর অধীন প্রণীত (Registration) Order, 1981 এর অনুচ্ছেদ ২(এফ) এ সংজ্ঞায়িত এইরূপ কোনো ব্যক্তি, ব্যক্তিসংঘ বা প্রতিষ্ঠান, যিনি স্বয়ং বা যাহার পক্ষে কোনো পণ্য আমদানি করা হয়, এবং উক্ত পণ্য আমদানির সময় হইতে কাস্টমস আনুষ্ঠানিকতা সমাপ্তির পূর্ব পর্যন্ত উহার মালিক বা দখলের অধিকার বা স্বার্থ রহিয়াছে বা থাকিবে, এইরূপ প্রাপক (consignee) বা ব্যক্তিও উহার অন্তর্ভুক্ত হইবে;
- (৩) “আমদানিকৃত” অর্থ, পণ্যের ক্ষেত্রে, বাংলাদেশের বাহির হইতে যে কোনোভাবে বাংলাদেশে আনা হইয়াছে বা প্রবেশ করানো হইয়াছে এমন কোনো পণ্য, এবং বাংলাদেশে আনীত বা আগত কোনো পরিত্যক্ত (derelict) পণ্য, জাহাজ হইতে নিষ্কিপ্ত (jetsam) পণ্য, ডুবন্ত জাহাজের ভাসমান (flotsam) পণ্য বা উহার ধ্বংসাবশেষও (wreck) উহার অন্তর্ভুক্ত হইবে;
- (৪) “আমদানি শুল্ক ও কর” অর্থ পণ্য আমদানির সহিত সম্পর্কিত বা আমদানিকৃত পণ্যের উপর ধারা ২৬, ২৭, ২৮ ও ৩১ এর অধীন আরোপনীয়, ক্ষেত্রমত, কাস্টমস শুল্ক ও অন্য কোন শুল্ক, কর বা চার্জ এবং রেগুলেটরী, কাউন্টারভেইলিং, এন্টি-ডাম্পিং ও সেইফগার্ড শুল্ক; তবে ধারা ৩২ এর অধীন প্রদত্ত কোনো সেবার জন্য ফি বা কোনো সরকারি কর্তৃপক্ষের পক্ষে বোর্ড কর্তৃক সংগৃহীত কোন চার্জ ইহার অন্তর্ভুক্ত হইবে না;
- (৫) “উপকূলীয় পণ্য” অর্থ বাংলাদেশের এক বন্দর হইতে অন্য বন্দরে কোনো নৌযানযোগে পরিবহনকৃত পণ্য; কিন্তু কাস্টমস শুল্ক পরিশোধিত হয় নাই এইরূপ আমদানিকৃত পণ্য উহার অন্তর্ভুক্ত হইবে না;
- (৬) “উপযুক্ত কর্তৃপক্ষ (competent authority)” অর্থ বাংলাদেশে পণ্য আমদানি বা বাংলাদেশ হইতে পণ্য রপ্তানি সম্পর্কিত কার্যাবলী সম্পাদনের জন্য আইন দ্বারা ক্ষমতাপ্রাপ্ত কোনো সরকারি সংস্থা;
- (৭) “এজেন্ট” অর্থ শিপিং এজেন্ট, ক্লিয়ারিং এন্ড ফরোয়ার্ডিং এজেন্ট, কার্গো এজেন্ট এবং ফ্রেইট ফরোয়ার্ডিং এজেন্টসহ ধারা ২৬০ এর অধীন লাইসেন্সপ্রাপ্ত কোনো ব্যক্তি, অথবা ধারা ২৬১ এর অধীন কার্যাবলী পরিচালনা করিবার জন্য অনুমতিপ্রাপ্ত কোনো ব্যক্তি;
- (৮) “ওয়্যারহাউস” অর্থ ধারা ১৩ এর অধীন নিয়োগকৃত বা ধারা ১৪ এর অধীন লাইসেন্সকৃত কোনো স্থান;
- (৯) “ওয়্যারহাউসিং স্টেশন” অর্থ ধারা ১২ এর অধীন ওয়্যারহাউসিং স্টেশন হিসাবে ঘোষিত কোনো স্থান;
- (১০) “কার্গো ঘোষণা” অর্থ, ক্ষেত্রমত, ধারা ৫৭ বা ধারা ৬৪ এর অধীন প্রদত্ত কোনো কার্গো ঘোষণা;
- (১১) “কাস্টমস অভ্যন্তরীণ কন্টেইনার ডিপো” অর্থ ধারা ১০ এর অধীন কাস্টমস অভ্যন্তরীণ কন্টেইনার ডিপো হিসাবে ঘোষিত কোনো এলাকা;
- (১২) “কাস্টমস অভ্যন্তরীণ-নৌ কন্টেইনার টার্মিনাল” অর্থ ধারা ১০ এর অধীন কাস্টমস অভ্যন্তরীণ-নৌ কন্টেইনার টার্মিনাল হিসাবে ঘোষিত কোন এলাকা;
- (১৩) “কাস্টমস এলাকা” অর্থ ধারা ১১ এর অধীন নির্ধারিত কাস্টমস স্টেশনের সীমা, এবং আমদানিকৃত বা রপ্তানির জন্য কোনো পণ্য কাস্টমস কর্তৃপক্ষ কর্তৃক ছাড় প্রদানের পূর্বে যেই এলাকায় সাধারণত রক্ষিত থাকে সেই এলাকাও ইহার অন্তর্ভুক্ত হইবে;

- (১৪) “কাস্টমস কম্পিউটার সিস্টেম” অর্থ এই আইনের উদ্দেশ্য পূরণকল্পে বোর্ড কর্তৃক প্রতিষ্ঠিত বা নিয়োজিত কোনো কাস্টমস কম্পিউটারাইজড প্রক্রিয়াকরণ পদ্ধতি, যাহা এতদসংশ্লিষ্ট অন্যান্য পদ্ধতির সহিত উপযুক্ত বা প্রয়োজনীয়ভাবে আন্তঃসংযোগকৃত (interfaced);
- (১৫) “কাস্টমস কর্মকর্তা” অর্থ ধারা ৪ এর অধীন নিয়োগপ্রাপ্ত কোনো কর্মকর্তা;
- (১৬) “কাস্টমস-বিমানবন্দর” অর্থ ধারা ১০ এর অধীন কাস্টমস-বিমানবন্দর হিসাবে ঘোষিত কোনো বিমানবন্দর;
- (১৭) “কাস্টমস নিয়ন্ত্রণ” অর্থ বাংলাদেশ ও অন্যান্য দেশ বা অঞ্চলের মধ্যে পণ্য আমদানি, রপ্তানি, ট্রানজিট, স্থানান্তর ও মজুদ এবং আমদানিকৃত পণ্যের অবস্থান ও স্থানান্তর সম্পর্কিত এই আইনের বিধানসমূহের প্রতিপালন নিশ্চিত করিবার উদ্দেশ্যে কাস্টমস কর্মকর্তা কর্তৃক গৃহীত (applied) কোন কার্যক্রম;
- (১৮) “কাস্টমস পদ্ধতি” অর্থ কাস্টমস বিষয়ক নিম্নবর্ণিত যে কোনো পদ্ধতি, যথা:—
- (অ) দেশীয় ভোগের জন্য ছাড় প্রদান;
- (আ) সাময়িক আমদানি;
- (ই) ইনওয়ার্ড প্রসেসিং;
- (ঈ) আউটওয়ার্ড প্রসেসিং;
- (উ) কাস্টমস ওয়ারহাউসিং;
- (ঊ) ট্রানজিট;
- (ঋ) ট্রানশিপমেন্ট;
- (এ) রসদ ও ভান্ডার সামগ্রী (stores); বা
- (ঐ) রপ্তানি;
- (১৯) “কাস্টমস বন্দর” অর্থ ধারা ১০ এর অধীন কাস্টমস বন্দর হিসাবে ঘোষিত কোনো এলাকা;
- (২০) “কাস্টমস শুল্ক” অর্থ এই আইনের প্রথম তফসিলে উল্লিখিত কোন শুল্ক, অথবা বাংলাদেশে পণ্য প্রবেশ বা প্রস্থান সংক্রান্ত প্রচলিত অন্য কোন আইনের অধীন প্রদেয় কোনো শুল্ক;
- (২১) “কাস্টমস স্টেশন” অর্থ ধারা ১০ এর অধীন সময়ে সময়ে ঘোষিত কোনো কাস্টমস বন্দর, কাস্টমস বিমানবন্দর, স্থল কাস্টমস স্টেশন, কাস্টমস অভ্যন্তরীণ কন্টেইনার ডিপো, কাস্টমস অভ্যন্তরীণ-নৌ কন্টেইনার টার্মিনাল বা অনুরূপ অন্য কোনো এলাকা;
- (২২) “চোরাচালান” অর্থ আপাতত বলবৎ কোনো আইনের অধীন আরোপিত কোনো নিষেধাজ্ঞা বা বিধি-নিষেধ লংঘন করিয়া অথবা আরোপণীয় কাস্টমস শুল্ক বা কর ফাঁকি দিয়া নিম্নবর্ণিত কোনো পণ্য বাংলাদেশের অভ্যন্তরে আনয়ন করা বা বাহিরে লইয়া যাওয়া, যথা:—
- (অ) মাদক দ্রব্য, নেশাজাতীয় ঔষধ বা সাইকোট্রপিক বস্তু;
- (আ) স্বর্ণবার, রৌপ্যবার, প্লাটিনাম, প্যালাডিয়াম, রেডিয়াম, মহামূল্যবান পাথর, মুদ্রা অথবা স্বর্ণ, রৌপ্য, প্লাটিনাম, প্যালাডিয়াম বা কোনো মহামূল্যবান পাথরের তৈরি অলংকার অথবা সরকার কর্তৃক, সময় সময়, সরকারি গেজেটে প্রজ্ঞাপন দ্বারা নির্ধারিত মূল্যের অধিক মূল্যমানের কোনো পণ্য;

- (ই) কোনো জাহাজ, নৌযান, উড়োজাহাজ বা অন্য কোনো যানবাহনের কোনো স্থানে অথবা কোনো ব্যাগেজ বা কোনো পণ্যের মধ্যে বা কোনো ব্যক্তির দেহে যে কোনো প্রকারে লুকানো (concealed) কোনো পণ্য; বা
- (ঈ) ধারা ১০ বা ধারা ১১ এর অধীন ঘোষিত কোনো রুট ব্যতীত অন্য কোনো রুটে (route) কাস্টমস স্টেশন ব্যতীত অন্য কোন স্থান হইতে আনীত বা বাহিরে লওয়া কোনো পণ্য; এবং উক্ত পণ্য উল্লিখিতভাবে আনয়ন করিবার বা বাহিরে নেওয়ার জন্য কোনো প্রচেষ্টা, পরোচনা বা সমর্থনও উহার অন্তর্ভুক্ত হইবে এবং সকল সমজাতীয় শব্দ ও অভিব্যক্তিসমূহের ব্যাখ্যা তদানুসারে হইবে;
- (২৩) “জেটি (wharf)” অর্থ ধারা ১১ এর দফা (খ) এর অধীন কাস্টমস বন্দরে পণ্য বা কোনো পণ্যশ্রেণী বোকাই ও খালাস করিবার জন্য অনুমোদিত কোনো স্থান;
- (২৪) “দণ্ডবিধি” অর্থ Penal Code, 1860 (Act No. XLV of 1860);
- (২৫) “দেওয়ানী কার্যবিধি” Code of Civil Procedure, 1908 (Act No. V of 1908);
- (২৬) “নির্ধারিত” অর্থ বিধি বা, ক্ষেত্রমত, আদেশ বা প্রজ্ঞাপন দ্বারা নির্ধারিত;
- (২৭) “ন্যায়নির্ণয়ন (adjudication)” অর্থ এই আইনের অধীন জরিমানা আরোপযোগ্য কাস্টমস অপরাধ বিষয়ে যথাযথ কর্মকর্তা কর্তৃক গৃহীত প্রশাসনিক কার্যক্রম;
- (২৮) “পণ্য” অর্থ সকল অস্থাবর পণ্য এবং নিম্নবর্ণিত পণ্যও ইহার অন্তর্ভুক্ত হইবে—
- (অ) যানবাহন;
- (আ) রসদ ও ভান্ডার (stores & materials) সামগ্রী;
- (ই) ব্যাগেজ; এবং
- (ঈ) মুদ্রা এবং বিনিময়যোগ্য দলিলপত্রও (negotiable instruments) উহার অন্তর্ভুক্ত হইবে;
- (২৯) “পণ্য ঘোষণা” অর্থ ধারা ৯১ এর বিধান অনুযায়ী কোনো পণ্যের ঘোষণা;
- (৩০) “প্রেসিডেন্ট” অর্থ আপীল ট্রাইব্যুনালের প্রেসিডেন্ট;
- (৩১) “ফৌজদারী কার্যবিধি” অর্থ Code of Criminal Procedure, 1898 (Act No. V of 1898);
- (৩২) “বাংলাদেশ কাস্টমস জলসীমা” অর্থ বাংলাদেশ সরকার কর্তৃক ঘোষিত টেরিটোরিয়াল জলসীমা;
- (৩৩) “বাংলাদেশে প্রতিষ্ঠিত” অর্থ বাংলাদেশের কোনো স্থায়ী অধিবাসী এবং বাংলাদেশে অবস্থানের অনুমতিপ্রাপ্ত বা আইনগতভাবে ক্ষমতাপ্রাপ্ত ও নিবন্ধিত প্রতিষ্ঠান বা ব্যক্তিসংঘ;
- (৩৪) “বিধি” অর্থ এই আইনের অধীন প্রণীত কোন বিধি;
- (৩৫) “বোর্ড” অর্থ National Board of Revenue Order, 1972 (President’s Order No. 76 of 1972) এর অধীন গঠিত জাতীয় রাজস্ব বোর্ড;
- (৩৬) “ব্যক্তি” অর্থে যে কোনো কোম্পানি, অংশীদারিত্বমূলক কারবার, প্রতিষ্ঠান, সংস্থা, সমিতি বা ব্যক্তিসংঘও উহার অন্তর্ভুক্ত হইবে;

- (৩৭) “ভারপ্রাপ্ত ব্যক্তি” অর্থ—
- (অ) নৌযানের ক্ষেত্রে, নৌযানের মাস্টার;
- (আ) উড়োজাহাজের ক্ষেত্রে, উড়োজাহাজের কমান্ডার বা পাইলট;
- (ই) রেলওয়ে ট্রেনের ক্ষেত্রে, ট্রেনের কন্ডাক্টর, পরিচালক বা পরিচালক হিসাবে নিয়োজিত কোনো ব্যক্তি; বা
- (ঈ) অন্যান্য যানবাহনের ক্ষেত্রে, যানবাহনের ড্রাইভার, চালক বা উহার নিয়ন্ত্রণকারী;
- (৩৮) “মাস্টার” অর্থ, নৌযানের ক্ষেত্রে, পাইলট বা হারবার মাস্টার ব্যতীত উক্ত নৌযানের উপর কর্তৃত্ব বা দায়িত্ব রহিয়াছে এমন কোনো ব্যক্তি;
- (৩৯) “যথাযথ কর্মকর্তা (appropriate officer)” অর্থ এই আইনের অধীন কোন দায়িত্ব পালনের ক্ষেত্রে, এই আইনের দ্বারা বা অধীন, উক্ত দায়িত্ব পালনের জন্য দায়িত্বপ্রাপ্ত কোনো কাস্টমস কর্মকর্তা;
- (৪০) “যানবাহন” অর্থ জলে, স্থলে বা আকাশপথে পণ্য বা যাত্রী পরিবহনের জন্য ব্যবহৃত যে কোনো প্রকারের যান্ত্রিক ও অযান্ত্রিক যানবাহন;
- (৪১) “রপ্তানি শুল্ক ও কর” অর্থ পণ্য রপ্তানির সহিত সম্পর্কিত বা রপ্তানিতব্য পণ্যের উপর আরোপণীয় কাস্টমস শুল্কসহ অন্য সকল প্রকারের শুল্ক, কর বা চার্জ, তবে ধারা ৩২ এর অধীন প্রদত্ত কোনো সেবার জন্য ফি বা অন্য কোনো সরকারি কর্তৃপক্ষের পক্ষে বোর্ড কর্তৃক সংগৃহীত চার্জ উহার অন্তর্ভুক্ত হইবে না;
- (৪২) “রপ্তানিকারক” অর্থ Imports and Exports (Control) Act, 1950 (Act No. XXXIX of 1950 এর অধীন প্রণীত Importers, Exporters and Indentors (Registration) Order, 1981 এর অনুচ্ছেদ ২(এফ) এ সংজ্ঞায়িত এইরূপ কোন ব্যক্তি, ব্যক্তিসংঘ বা প্রতিষ্ঠান, যিনি স্বয়ং বা যাহার পক্ষে কোনো পণ্য রপ্তানি করা হয়, এবং উক্ত পণ্য রপ্তানির ঘোষণা প্রদানের পর এবং রপ্তানির পূর্ব পর্যন্ত উহার মালিক বা দখলের অধিকার বা স্বার্থ রহিয়াছে বা থাকিবে, এইরূপ প্রেরক (consignor) বা ব্যক্তিও উহার অন্তর্ভুক্ত হইবে;
- (৪৩) “রপ্তানি কার্গো ঘোষণা” অর্থ ধারা ৬৪ এর অধীন প্রদত্ত কোনো রপ্তানি কার্গো ঘোষণা;
- (৪৪) “রসদ ও ভান্ডার” অর্থ কোন যানবাহনে ব্যবহারের জন্য বা সঞ্চিত কোনো পণ্য এবং, তাৎক্ষণিকভাবে ব্যবহারের জন্য হটক না হটক, জ্বালানি, খুচরা যন্ত্রাংশ ও অন্যান্য উপকরণ এবং যানবাহনের যাত্রীদের নিকট খুচরা বিক্রয়ের উদ্দেশ্যে উক্ত যানবাহনে বহনকৃত অন্য কোন পণ্যও উহার অন্তর্ভুক্ত হইবে;
- (৪৫) “শুল্ক ও কর” অর্থ আমদানি শুল্ক ও কর অথবা রপ্তানি শুল্ক ও কর;
- (৪৬) “স্থল কাস্টমস স্টেশন” অর্থ ধারা ১০ এর অধীন অভ্যন্তরীণ নদী বন্দরসহ স্থল কাস্টমস স্টেশন হিসাবে ঘোষিত কোনো স্থান।

৩। **আইনের প্রাধান্য।**—আপাতত বলবৎ অন্য কোনো আইনে যাহা কিছুই থাকুক না কেন, এই আইনের বিধানাবলী প্রাধান্য পাইবে।

### দ্বিতীয় অধ্যায়

#### কাস্টমস কর্মকর্তা নিয়োগ এবং ক্ষমতা

৪। কাস্টমস কর্মকর্তা নিয়োগ।—এই আইনের উদ্দেশ্য পূরণকল্পে, বোর্ড, সরকারি গেজেটে প্রজ্ঞাপন দ্বারা, উক্ত প্রজ্ঞাপনে উল্লিখিত কোনো এলাকা বা কার্যক্রমের জন্য যে কোন ব্যক্তিকে নিম্নবর্ণিত পদে নিয়োগ প্রদান করিতে পারিবে, যথা:—

- (ক) কমিশনার অব কাস্টমস;
- (খ) কমিশনার অব কাস্টমস (আপীল);
- (গ) কমিশনার অব কাস্টমস (বন্ড);
- (ঘ) কমিশনার অব কাস্টমস (কাস্টমস মূল্যায়ন ও অভ্যন্তরীণ নিরীক্ষা);
- (ঙ) ডিরেক্টর জেনারেল (কাস্টমস গোয়েন্দা ও তদন্ত);
- (চ) ডিরেক্টর জেনারেল (কাস্টমস রেয়াত ও প্রত্যর্পণ);
- (ছ) ডিরেক্টর জেনারেল (প্রশিক্ষণ);
- (জ) ডিরেক্টর জেনারেল (সেন্ট্রাল ইন্টেলিজেন্স সেল);
- (ঝ) ডিরেক্টর জেনারেল (রিস্ক ম্যানেজমেন্ট);
- (ঞ) এডিশনাল কমিশনার অব কাস্টমস, এডিশনাল ডিরেক্টর জেনারেল বা ডিরেক্টর (সেন্ট্রাল ইন্টেলিজেন্স সেল);
- (ট) জয়েন্ট কমিশনার অব কাস্টমস, ডিরেক্টর বা জয়েন্ট ডিরেক্টর (সেন্ট্রাল ইন্টেলিজেন্স সেল);
- (ঠ) ডেপুটি কমিশনার অব কাস্টমস, ডেপুটি ডিরেক্টর বা ডেপুটি ডিরেক্টর (সেন্ট্রাল ইন্টেলিজেন্স সেল);
- (ড) এসিস্ট্যান্ট কমিশনার অব কাস্টমস, এসিস্ট্যান্ট ডিরেক্টর বা এসিস্ট্যান্ট ডিরেক্টর (সেন্ট্রাল ইন্টেলিজেন্স সেল);
- (ঢ) রাজস্ব কর্মকর্তা (Revenue Officer);
- (ণ) সহকারী রাজস্ব কর্মকর্তা (Assistant Revenue Officer);
- (ত) সহকারী রাজস্ব কর্মকর্তা পর্যায়ের নিম্নে নহে এইরূপ অন্য যে কোনো পদবির কাস্টমস কর্মকর্তা; এবং
- (থ) কেন্দ্রীয় ঝুঁকি ব্যবস্থাপনা ইউনিট (Central Risk Management Unit) এ পদস্থ সহকারী রাজস্ব কর্মকর্তা পর্যায়ের নিম্নে নহে এইরূপ অন্য যে কোনো পদবির কাস্টমস কর্মকর্তা।

৫। **কাস্টমস কর্মকর্তাগণের ক্ষমতা ও কর্তব্য।**—ধারা ৪ এর অধীন নিযুক্ত কোনো কাস্টমস কর্মকর্তা এই আইনের দ্বারা অথবা অধীনে তাহাকে প্রদত্ত ক্ষমতা প্রয়োগ বা তাহার উপর অর্পিত কর্তব্য পালন করিবেন; এবং তিনি, তাহার অধস্তন যে কোনো কর্মকর্তাকে প্রদত্ত সকল ক্ষমতা প্রয়োগ এবং তাহার উপর অর্পিত অথবা আরোপিত সকল কর্তব্য সম্পাদন করিতে ক্ষমতাপর্ণ করিতে পারিবেন:

তবে শর্ত থাকে যে, এই আইন বা তদধীনে প্রণীত বিধিমালায় যাহা কিছুই থাকুক না কেন, বোর্ড, সাধারণ অথবা বিশেষ আদেশ দ্বারা, উক্ত ক্ষমতা প্রয়োগ ও কর্তব্য পালনের উপর যেইরূপ উপযুক্ত বিবেচনা করিবে সেইরূপ সীমা নির্ধারণ এবং শর্ত আরোপ করিতে পারিবে।

৬। **ক্ষমতা অর্পণ।**—বোর্ড, সরকারি গেজেটে প্রজ্ঞাপন দ্বারা, নির্ধারিত সীমা ও শর্ত সাপেক্ষে, যদি থাকে, নাম ও পদবি উল্লেখপূর্বক,—

- (ক) যে কোনো এডিশনাল কমিশনার অব কাস্টমস বা এডিশনাল ডিরেক্টর জেনারেলকে ধারা ৪ এর দফা (ক), (খ), (গ), (ঘ), (ঙ), (চ), (ছ), (জ) এবং (ঝ) তে উল্লিখিত কমিশনার অব কাস্টমস বা ডিরেক্টর জেনারেল;
- (খ) যে কোনো জয়েন্ট কমিশনার অব কাস্টমস বা জয়েন্ট ডিরেক্টরকে ধারা ৪ এর দফা (ঞ) তে উল্লিখিত এডিশনাল কমিশনার অব কাস্টমস, এডিশনাল ডিরেক্টর জেনারেল বা ডিরেক্টর (সেন্ট্রাল ইন্টেলিজেন্স সেল);
- (গ) যে কোনো ডেপুটি কমিশনার অব কাস্টমস বা ডেপুটি ডিরেক্টরকে ধারা ৪ এর দফা (ট) তে উল্লিখিত জয়েন্ট কমিশনার অব কাস্টমস, ডিরেক্টর বা জয়েন্ট ডিরেক্টর (সেন্ট্রাল ইন্টেলিজেন্স সেল);
- (ঘ) যে কোনো এসিস্ট্যান্ট কমিশনার অব কাস্টমস বা এসিস্ট্যান্ট ডিরেক্টরকে ধারা ৪ এর দফা (ঠ) এ উল্লিখিত ডেপুটি কমিশনার অব কাস্টমস, ডেপুটি ডিরেক্টর বা ডেপুটি ডিরেক্টর (সেন্ট্রাল ইন্টেলিজেন্স সেল);
- (ঙ) অন্য যে কোনো কাস্টমস কর্মকর্তাকে ধারা ৪ এর দফা (ড) এ উল্লিখিত এসিস্ট্যান্ট কমিশনার অব কাস্টমস, এসিস্ট্যান্ট ডিরেক্টর বা এসিস্ট্যান্ট ডিরেক্টর (সেন্ট্রাল ইন্টেলিজেন্স সেল)।

এর যে কোনো ক্ষমতা প্রয়োগের কর্তৃত্ব প্রদান করিতে পারিবে।

৭। **কাস্টমস কর্মকর্তার দায়িত্ব অন্য কোন কর্মকর্তার উপর অর্পণ।**—বোর্ড, সরকারি গেজেটে প্রজ্ঞাপন দ্বারা, উপযুক্ত শর্ত ও সীমা সাপেক্ষে, এই আইনের অধীন কোনো কাস্টমস কর্মকর্তার যে কোনো দায়িত্ব অন্য যে কোনো সরকারি কর্মকর্তার উপর অর্পণ করিতে পারিবে।

৮। **কাস্টমস কর্মকর্তাগণকে সহায়তা।**—সরকারি, আধা-সরকারি প্রতিষ্ঠান, স্বায়ত্তশাসিত সংস্থা, বিধিবদ্ধ সংস্থা, আর্থিক প্রতিষ্ঠান, শিক্ষা প্রতিষ্ঠান এবং বেসরকারি প্রতিষ্ঠান বা সংস্থার কর্মকর্তা ও কর্মচারীগণ কাস্টমস কর্মকর্তাগণকে এই আইনের অধীন দায়িত্ব সম্পাদনে সহায়তা করিবেন।

৯। **ইনকোয়েস্ট (inquest) এর দায়িত্ব হইতে অব্যাহতি।**—অন্য কোনো আইনে যাহা কিছুই থাকুক না কেন, বোর্ড বা কমিশনার অব কাস্টমস, সরকারি কর্তব্যের কারণে, বোর্ডের কোনো কর্মকর্তা বা কমিশনার অব কাস্টমস এবং অন্য কোনো কাস্টমস কর্মকর্তাকে, অব্যাহতি প্রদান করা প্রয়োজনীয় গণ্য করিলে, তাহাদিগকে ইনকোয়েস্ট এর দায়িত্ব পালনে বাধ্য করা যাইবে না।

**তৃতীয় অধ্যায়****বন্দর, বিমান বন্দর, স্থল কাস্টমস স্টেশন, ইত্যাদি ঘোষণা**

১০। **কাস্টমস বন্দর, কাস্টমস-বিমানবন্দর, ইত্যাদি ঘোষণা।**—(১) বোর্ড, সরকারি গেজেটে প্রজ্ঞাপন দ্বারা,—

- (ক) যেই সকল বন্দর ও বিমান বন্দরে আমদানিকৃত পণ্য বা পণ্যশ্রেণী নামানো হয় এবং রপ্তানিতব্য পণ্য বা পণ্যশ্রেণী বোঝাই করা হয়, সেই সকল বন্দর ও বিমান বন্দরকে, যথাক্রমে, কাস্টমস বন্দর ও কাস্টমস-বিমানবন্দর হিসাবে;
- (খ) যেই স্থানে স্থলপথে অথবা অভ্যন্তরীণ জলপথে আমদানিকৃত পণ্য নামানো হয় বা রপ্তানিতব্য পণ্য বোঝাই করা হয় অথবা যে কোনো পণ্য বা পণ্যশ্রেণী নামানো বা বোঝাই করা হয়, সেই সকল স্থানকে স্থল কাস্টমস স্টেশন অথবা কাস্টমস অভ্যন্তরীণ কন্টেইনার ডিপো অথবা কাস্টমস অভ্যন্তরীণ-নৌ কন্টেইনার টার্মিনাল হিসাবে; এবং
- (গ) কোন্ কোন্ রুটের মাধ্যমে, সরকারি গেজেটে প্রজ্ঞাপন দ্বারা নির্ধারিত, কোনো পণ্য বা পণ্যশ্রেণী স্থলপথে বা অভ্যন্তরীণ জলপথে বা কোনো স্থল কাস্টমস স্টেশন বা কাস্টমস স্টেশন বা কোনো সীমান্ত দিয়া বাংলাদেশের অভ্যন্তরে আনয়ন বা বাংলাদেশ হইতে বাহিরে প্রেরণ করা যাইবে, উহা নির্ধারণের উদ্দেশ্যে কোনো রুটকে কাস্টমস রুট হিসাবে—

ঘোষণা করিতে পারিবে।

(২) কেবল সেইসকল স্থানই বন্দর হিসাবে ঘোষিত হইবে, যেইসকল স্থান হইতে বাংলাদেশের কোনো নির্ধারিত কাস্টমস বন্দরের সহিত উপকূলীয় বাণিজ্য পরিচালনা করা হয় এবং, এই আইনের উদ্দেশ্য পূরণকল্পে, যাহা কাস্টম হাউস এবং উহার সীমানা হিসাবে গণ্য হয়।

১১। **অবতরণ স্থান অনুমোদন এবং কাস্টমস স্টেশনের সীমানা নির্ধারণ করিবার ক্ষমতা।**— বোর্ড, সরকারি গেজেটে প্রজ্ঞাপন দ্বারা—

- (ক) কোনো কাস্টমস স্টেশনের সীমা নির্ধারণ করিতে পারিবে;
- (খ) কোনো কাস্টমস স্টেশনে পণ্য বা পণ্যশ্রেণী বোঝাই এবং নামানোর জন্য যথাযথ স্থান হিসাবে অনুমোদন করিতে পারিবে; এবং
- (গ) বেসরকারী খাতের সহিত আলোচনা এবং উপযুক্ত কর্তৃপক্ষের সহিত সমন্বয়পূর্বক কাস্টমস স্টেশনের কার্যক্রম পরিচালনার সময়সীমা নির্ধারণ করিতে পারিবে।

১২। **ওয়্যারহাউসিং স্টেশন ঘোষণা করিবার ক্ষমতা।**—বোর্ড, সরকারি গেজেটে প্রজ্ঞাপন দ্বারা, কেবলমাত্র সেইসকল স্থানকে ওয়্যারহাউসিং স্টেশন হিসাবে ঘোষণা করিতে পারিবে, যেইসকল স্থানে সরকারি ওয়্যারহাউস নিয়োগ এবং বেসরকারি ওয়্যারহাউসের লাইসেন্স প্রদান করা যায়।

১৩। **সরকারি ওয়্যারহাউস নিয়োগ ক্ষমতা।**—কমিশনার অব কাস্টমস (বন্ড) অথবা বোর্ড হইতে ক্ষমতাপ্রাপ্ত অন্য কোনো কমিশনার অব কাস্টমস, সময়ে সময়ে, যে কোনো ওয়্যারহাউসিং স্টেশনে সরকারি ওয়্যারহাউস নির্ধারণ করিতে পারিবে, যেইস্থানে শুল্ক আরোপযোগ্য পণ্য কাস্টমস শুল্ক পরিশোধ ব্যতিরেকে জমা রাখা যাইবে।



১৪। **বেসরকারি ওয়্যারহাউসের লাইসেন্স প্রদান।**—(১) কমিশনার অব কাস্টমস (বন্ড) অথবা বোর্ড কর্তৃক ক্ষমতাপ্রাপ্ত অন্য কোনো কমিশনার অব কাস্টমস, উপ-ধারা (২) এর বিধান সাপেক্ষে, কোনো ওয়্যারহাউসিং স্টেশনে, কোনো ভবন বা ভবনের অংশবিশেষ বা আবদ্ধ কোনো স্থানকে (enclosure), নিম্নবর্ণিত উদ্দেশ্যে বেসরকারি ওয়্যারহাউস হিসাবে পরিচালনার জন্য লাইসেন্স প্রদান করিতে পারিবেন, যথা:—

- (ক) লাইসেন্সধারী কর্তৃক বা তাহার পক্ষে আমদানিকৃত শুল্ক আরোপযোগ্য পণ্য মজুদ রাখা;
- (খ) সরকারি ওয়্যারহাউসে মজুদ রাখিবার মত সুবিধা (facility) নাই এমন যে কোনো আমদানিকৃত পণ্য মজুদ রাখা; অথবা
- (গ) আমদানিকৃত শুল্ক আরোপযোগ্য পণ্য হইতে সম্পূর্ণ বা আংশিকভাবে পণ্য প্রক্রিয়াকরণ বা প্রস্তুত করা।

(২) এই ধারার উদ্দেশ্য পূরণকল্পে নিম্নবর্ণিত বিষয়ে বিধি প্রণয়ন করা যাইবে, যথা:—

- (ক) বেসরকারি ওয়্যারহাউসের লাইসেন্স মঞ্জুর ও বেসরকারি ওয়্যারহাউসের ব্যবস্থাপনা;
- (খ) বেসরকারি ওয়্যারহাউসের পরিচালনা ও উহার প্রকৃতি এবং ওয়্যারহাউসে মজুদযোগ্য পণ্যের উপর শর্ত, সীমাবদ্ধতা বা বিধি নিষেধ; এবং
- (গ) ওয়্যারহাউসের আমদানি প্রাপ্যতা।

(৩) কমিশনার অব কাস্টমস (বন্ড) বা বোর্ড কর্তৃক ক্ষমতাপ্রাপ্ত অন্য কোনো কমিশনার অব কাস্টমস, এই ধারার অধীন প্রাপ্ত, লাইসেন্সধারীকে, ওয়্যারহাউসে মজুদকৃত পণ্যের উপর আরোপণীয় শুল্ক ও কর পরিশোধ নিশ্চিত করিবার উদ্দেশ্যে, গ্যারান্টি প্রদানের জন্য নির্দেশ প্রদান করিতে পারিবেন।

(৪) কমিশনার অব কাস্টমস (বন্ড) বা বোর্ড কর্তৃক ক্ষমতাপ্রাপ্ত অন্য কোনো কমিশনার অব কাস্টমস, উপ-ধারা (১) এর অধীন প্রদত্ত লাইসেন্স নিম্নবর্ণিত যে কোনো কারণে স্থগিত বা বাতিল করিতে পারিবেন, যথা:—

- (ক) লাইসেন্সধারী এই আইন বা তদধীন প্রণীত বিধির কোনো বিধান বা লাইসেন্সের কোনো শর্ত ভঙ্গ করিলে; বা
- (খ) জনস্বার্থে কোনো লাইসেন্স স্থগিত বা বাতিল করা উপযুক্ত বিবেচিত হইলে;
- (গ) দফা (খ) এর অধীন লাইসেন্স স্থগিতের ক্ষেত্রে, বিষয়টি নিষ্পত্তি না হওয়া পর্যন্ত লাইসেন্সধারীর অনুকূলে সংশ্লিষ্ট আইনের অধীন ইস্যুকৃত ব্যবসা সনাক্তকরণ নম্বর (বিআইএন) স্থগিত থাকিবে।

১৫। **কাস্টমস কর্মকর্তাগণের আরোহণ ও অবতরণের জন্য স্টেশন।**—কমিশনার অব কাস্টমস, সময়ে সময়ে, কাস্টমস বন্দরে বা উহার নিকটবর্তী স্থানে স্টেশন অথবা উহার সীমা নির্ধারণ করিতে পারিবেন, যে স্থানে অথবা যে সীমার মধ্যে উক্ত বন্দরে আগমনকারী অথবা বন্দর হইতে বহির্গমনকারী জাহাজকে কাস্টমস কর্মকর্তাগণের আরোহণ বা অবতরণের জন্য আনয়ন করিতে হইবে, এবং Ports Act, 1908 (Act No. XV of 1908) এ যদি কোনো ভিন্ন ব্যবস্থা না করা হইয়া থাকে, তাহা হইলে পাইলট কর্তৃক বন্দরে আনীত হয় নাই এমন জাহাজ বন্দরের কোন্ নির্দিষ্ট স্থানে নোঙর করিবে অথবা ভিড়াইবে, তাহার নির্দেশ প্রদান করিতে পারিবেন।

**চতুর্থ অধ্যায়**  
**ইলেকট্রনিক রেকর্ড এবং পেমেন্ট**

১৬। **রেকর্ড এবং পেমেন্ট (payment) নির্দিষ্টকরণ।**—(১) বোর্ড, সরকারি গেজেটে প্রজ্ঞাপন দ্বারা, এই আইন বা তদধীন প্রণীত বিধির অধীন,—

- (ক) কোন কোন দলিল নির্ধারিত ইলেকট্রনিক রেকর্ডের মাধ্যমে প্রেরণ বা দাখিল করিতে হইবে তাহা নির্দিষ্ট করিতে পারিবে; এবং
- (খ) কোন কোন পেমেন্ট নির্ধারিত ইলেকট্রনিক ফরমে প্রেরণ করিয়া কার্যকর করিতে হইবে তাহা নির্দিষ্ট করিতে পারিবে।

(২) বোর্ড এইরূপ কাস্টমস কম্পিউটার সিস্টেম চালু বা প্রবর্তন করিতে পারিবে, যাহার মাধ্যমে উপ-ধারা (১) এর দফা (ক) তে উল্লিখিত দলিল প্রেরণ বা দফা (খ) তে উল্লিখিত পেমেন্ট কার্যকর করা যাইবে।

(৩) ধারা ১৭ এর অধীন কমিশনার অব কাস্টমস কর্তৃক অনুমতি প্রদান সাপেক্ষে এবং বোর্ড কর্তৃক, সরকারি গেজেটে প্রজ্ঞাপন দ্বারা, নির্ধারিত শর্ত সাপেক্ষে, উপ-ধারা (১) এর অধীন নির্দিষ্টকৃত ইলেকট্রনিক পদ্ধতিতে দলিল দাখিল বা পেমেন্ট কার্যকর হইবে।

(৪) বোর্ড, বিধি দ্বারা, নির্ধারিত ব্যতিক্রম সাপেক্ষে, উপ-ধারা (১) এর অধীন নির্দিষ্টকৃত দলিল বা পেমেন্ট ইলেকট্রনিক পদ্ধতিতে প্রেরণ বা কার্যকরের বিধান করিতে পারিবে।

১৭। **অনুমতি প্রদান (authorization)।**—(১) কমিশনার অব কাস্টমস কর্তৃক নির্ধারিত যোগ্যতা পূরণ করিয়াছেন এইরূপ কোনো ব্যক্তি ধারা ১৬ এর অধীন নির্দিষ্টকৃত কোনো দলিল দাখিল বা পেমেন্ট কার্যকর করিবার বাধ্যবাধকতা রহিয়াছে এইরূপ দলিল বা পেমেন্ট, বিধি দ্বারা নির্ধারিত পদ্ধতি অনুযায়ী, ইলেকট্রনিক পদ্ধতিতে দাখিল বা পেমেন্ট করিবার উদ্দেশ্যে অনুমতি (authorization) প্রদানের জন্য কমিশনার অব কাস্টমস এর নিকট লিখিতভাবে আবেদন করিতে পারিবেন।

(২) কমিশনার অব কাস্টমস যদি এই মর্মে সন্তুষ্ট হন যে, উপ-ধারা (১) এর অধীন আবেদনপত্র দাখিলকারী ব্যক্তি উক্ত উপ-ধারায় উল্লিখিত যোগ্যতা পূরণ করিয়াছে, তাহা হইলে তিনি, যে কোনো সময় আরোপিত শর্ত সাপেক্ষে, লিখিতভাবে অনুমতি প্রদানের অনুরোধ মঞ্জুর করিবেন।

১৮। **দাখিলের সময়, স্থান ও পদ্ধতি।**—(১) এই আইন বা বিধির উদ্দেশ্য পূরণকল্পে, যদি কোনো ব্যক্তি নির্ধারিত শর্ত অনুযায়ী কোনো কাস্টমস কম্পিউটার সিস্টেমে ইলেকট্রনিক পদ্ধতিতে বা অন্য কোনোভাবে কোনো দলিল দাখিল বা পেমেন্ট কার্যকর করেন, তাহা হইলে উহা নির্ধারিত পদ্ধতিতে, নির্ধারিত দিনে ও নির্ধারিত স্থানে দাখিল বা প্রেরিত হইয়াছে বলিয়া গণ্য হইবে।

(২) কমিশনার অব কাস্টমস, বোর্ড কর্তৃক নির্দিষ্টকৃত বিশেষ পরিস্থিতিতে, পণ্য ঘোষণা এবং পণ্য ছাড়ের জন্য এই আইনের অধীন নির্ধারিত মেয়াদের মধ্যে, ইলেকট্রনিক পদ্ধতিতে কোনো পণ্য ঘোষণা প্রেরণ করিয়াছেন এমন কোনো আমদানিকারক, বা ক্ষেত্রমত, রপ্তানিকারককে, লিখিতভাবে তৎকর্তৃক বা তাহার নিকট হইতে ক্ষমতাপ্রাপ্ত এজেন্ট কর্তৃক যথাযথভাবে স্বাক্ষরিত কাগজে প্রদত্ত পণ্য ঘোষণা, বোর্ড কর্তৃক নির্ধারিত তথ্য ও দলিলাদি যথাযথ কর্মকর্তার নিকট দাখিলের জন্য নির্দেশ প্রদান করিতে পারিবেন।

১৯। **স্বয়ংক্রিয় (automated) সিদ্ধান্ত এবং তথ্য প্রদান।**—এই আইন বা বিধি অনুযায়ী বোর্ড বা কাস্টমস কর্মকর্তা কর্তৃক কোনো সিদ্ধান্ত জারি বা তথ্য প্রদান বা কার্যক্রম গ্রহণ করিবার ক্ষেত্রে,

কোনো কাস্টমস কম্পিউটার সিস্টেমের মাধ্যমে স্বয়ংক্রিয়ভাবে উৎসারিত উক্ত সিদ্ধান্ত বা তথ্য বা কার্যক্রমের ইলেকট্রনিক রেকর্ড, কোনরূপ রিভিউ বা ইন্টারভেনশনের ক্ষেত্র ব্যতীত, বোর্ড বা উক্ত কাস্টমস কর্মকর্তা কর্তৃক জারীকৃত সিদ্ধান্ত বা প্রদত্ত তথ্য বা গৃহীত কার্যক্রম বলিয়া গণ্য হইবে।

২০। **কাস্টমস কম্পিউটার সিস্টেমে প্রবেশ।**—কোনো ব্যক্তি ধারা ১৭ অনুসারে অনুমতিপ্রাপ্ত না হইলে, কাস্টমস কম্পিউটার সিস্টেমে তথ্য প্রেরণ অথবা উহা হইতে তথ্য গ্রহণ করিতে পারিবেন না।

২১। **অনুমতি প্রত্যাহার।**—কোনো কমিশনার অব কাস্টমস তাহার এখতিয়ারাধীন ক্ষেত্রে যে কোনো সময়ে যদি এই মর্মে সন্তুষ্ট হন যে, কোনো ব্যক্তি—

- (ক) ধারা ১৭ এর অধীন প্রদত্ত অনুমতির কোনো শর্ত প্রতিপালনে ব্যর্থ হইয়াছেন;
- (খ) বোর্ড কর্তৃক ধারা ২৩ এর অধীন ইউনিক ইউজার আইডেন্টিফাইয়ারের ব্যবহার এবং নিরাপত্তা সম্পর্কিত আরোপিত কোনো বিধি পরিপালনে ব্যর্থ হইয়াছেন অথবা উহা লংঘন করিয়াছেন; বা
- (গ) এই আইনের অধীন কাস্টমস কম্পিউটার সিস্টেমে প্রবেশ বা হস্তক্ষেপ সম্পর্কিত কোনো অপরাধে সাজাপ্রাপ্ত হইয়াছেন—

তাহা হইলে তিনি, কারণ উল্লেখপূর্বক, উক্ত ব্যক্তিকে লিখিত নোটিশ প্রদান করিয়া তাহার অনুকূলে প্রদত্ত অনুমতি প্রত্যাহার করিতে পারিবেন।

২২। **ইলেকট্রনিক রেকর্ড সংরক্ষণ।**—বোর্ড, কাস্টমস কম্পিউটার সিস্টেম ব্যবহারকারী কোনো ব্যক্তির নিকট হইতে প্রাপ্ত প্রতিটি তথ্যের নথি নির্দিষ্টকৃত মেয়াদের জন্য সংরক্ষণ করিবে।

২৩। **কারিগরি আবশ্যিকতা।**—বোর্ড নিম্নলিখিত বিষয়গুলি নির্ধারণ করিবে, যথা:—

- (ক) ইলেকট্রনিক রেকর্ড সৃষ্টি, উৎসারণ, প্রেরণ, যোগাযোগ, গ্রহণ ও সংরক্ষণ এবং এতদুদ্দেশ্যে সিস্টেম প্রতিষ্ঠা করিবার পদ্ধতি এবং ফরম্যাট;
- (খ) ইলেকট্রনিক মাধ্যমে ইলেকট্রনিক রেকর্ড স্বাক্ষরিত হইলে, প্রয়োজনীয় ইলেকট্রনিক স্বাক্ষরের ধরন, ইলেকট্রনিক রেকর্ডের সহিত সংযুক্ত ইলেকট্রনিক স্বাক্ষরের পদ্ধতি ও ফরম্যাট, এবং উক্ত প্রক্রিয়া সহজীকরণের উদ্দেশ্যে কোনো ব্যক্তি কর্তৃক নিয়োজিত দলিল দাখিলকারী কোনো তৃতীয় পক্ষের পরিচিতি বা পূরণীয় যোগ্যতা;
- (গ) ইলেকট্রনিক রেকর্ডের পর্যাপ্ত সংরক্ষণ, বিন্যস্তকরণ, শুদ্ধতা, নিরাপত্তা, গোপনীয়তা এবং নিরীক্ষণযোগ্যতা নিশ্চিত করিবার জন্য উপযুক্ত নিয়ন্ত্রণ প্রক্রিয়া এবং পদ্ধতি; এবং
- (ঘ) এই আইনের অধীন কোনো দলিলের ক্ষেত্রে প্রযোজ্য বা কোনো পরিস্থিতিতে যুক্তিসংগতভাবে প্রয়োজনীয়, ইলেকট্রনিক রেকর্ড এর অন্য কোনো বৈশিষ্ট্য।

**ব্যাখ্যা।**—এই অধ্যায়ের উদ্দেশ্য পূরণকল্পে,—

- (ক) “ইলেকট্রনিক রেকর্ড” বা “ইলেকট্রনিক ফরম” অর্থ তথ্য ও যোগাযোগ প্রযুক্তি আইন, ২০০৬ (২০০৬ সনের ৩৯ নং আইন) এ সংজ্ঞায়িত ইলেকট্রনিক রেকর্ড বা ইলেকট্রনিক বিন্যাস (Electronic Form);
- (খ) “দলিল” অর্থে যে কোনো ঘোষণা, প্রতিবেদন, বিবৃতি, রিটার্ন, আবেদনপত্র, প্রজ্ঞাপন ও প্রাপ্তি স্বীকার পত্রসহ যে কোনো লিখিত ডকুমেন্টস অন্তর্ভুক্ত হইবে।

## পঞ্চম অধ্যায়

## আমদানি ও রপ্তানি নিষিদ্ধকরণ এবং নিয়ন্ত্রণ

২৪। **নিষিদ্ধকরণ (prohibition)**।—আপাতত বলবৎ অন্য কোনো আইনে ভিন্নরূপে যাহা কিছুই থাকুক না কেন, নিম্নে উল্লিখিত কোনো পণ্য আকাশ, স্থল, নদী, সমুদ্র বা অন্য কোনো পথে বাংলাদেশে আনয়ন করা যাইবে না,

- (ক) নকল ধাতব মুদ্রা;
- (খ) জাল বা নকল কারেন্সি নোট এবং অন্য কোনো নকল দ্রব্য;
- (গ) কোনো অশ্লীল পুস্তক, পুস্তিকা, কাগজ, ডইং, প্রতিকৃতি, আলোকচিত্র, চলচ্চিত্র বা বস্তু, ভিডিও বা অডিও রেকর্ডিং, সিডি অথবা অন্য কোনো মাধ্যমে রেকর্ডিং;
- (ঘ) বন্যপ্রাণী (সংরক্ষণ ও নিরাপত্তা) আইন, ২০১২ (২০১২ সনের ৩০ নং আইন) এর বিধান লঙ্ঘন করিয়া আনিত পণ্য;
- (ঙ) ভৌগোলিক নির্দেশক পণ্য (নিবন্ধন ও সুরক্ষা) আইন, ২০১৩ (২০১৩ সনের ৫৪নং আইন) এর ধারা ২(১১) এর সংজ্ঞা অনুযায়ী প্রতারণামূলক সাদৃশ্যপূর্ণ ভৌগোলিক নির্দেশকযুক্ত পণ্য;
- (চ) দন্ডবিধির আওতাধীন নকল ট্রেডমার্কযুক্ত পণ্য অথবা ট্রেডমার্ক আইন, ২০০৯ (২০০৯ সনের ১৯ নং আইন) এর ধারা ২(৫) এর সংজ্ঞা অনুযায়ী মিথ্যা ট্রেড বর্ণনা (false trade description) সম্বলিত পণ্য;
- (ছ) বাংলাদেশের বাহিরে প্রস্তুত বা উৎপাদিত পণ্য, যাহাতে বাংলাদেশের কোনো প্রস্তুতকারক, ডিলার বা ব্যবসায়ীর আসল বা দাবীকৃত নাম অথবা ট্রেডমার্ক ব্যবহার করা হইয়াছে, যদি না—
  - (অ) পণ্যটি যে বাংলাদেশের বাহিরে কোনো স্থানে প্রস্তুত বা উৎপাদিত সেই বিষয়টি সম্পর্কে উক্ত নাম বা ট্রেডমার্ক ব্যবহারের প্রতিটি ক্ষেত্রে একটি সুনির্দিষ্ট সূচক থাকে; এবং
  - (আ) যেই দেশে উক্ত স্থান অবস্থিত উহার নাম বা ট্রেডমার্কের যে কোনো অক্ষরের মত বড় অক্ষরে ও স্পষ্টভাবে এবং যেই ভাষায় ও বর্ণমালায় নাম এবং ট্রেডমার্ক লিখিত হইয়াছে, সেইভাবে উক্ত সূচকে দেখানো হয়;
- (জ) বাংলাদেশের বাহিরে প্রস্তুত খন্ড পণ্যসমূহ (piece-goods) (যাহা সাধারণত দৈর্ঘ্য বা খন্ড হিসাবে বিক্রয় করা হয়), যদি না বাংলাদেশে আপাতত প্রযোজ্য প্রমিত (standard) মিটারে বা অন্য কোনো পরিমাপে উহার প্রকৃত দৈর্ঘ্য সংখ্যায় প্রতিটি খন্ডে সুস্পষ্টভাবে স্ট্যাম্পযুক্ত বা অন্য কোনোভাবে মুদ্রিত থাকে;
- (ঝ) বাংলাদেশের বাহিরের কোনো স্থানে বিক্রয়ের উদ্দেশ্যে প্রস্তুতকৃত বা উৎপাদিত কোনো পণ্য অথবা উক্ত পণ্যের শ্রেণিভুক্ত কোনো পণ্য, যাহার ক্ষেত্রে Patents and Designs Act, 1911 (Act No. II of 1911) এর অধীন কোনো কপিরাইট বিদ্যমান এবং এইরূপ ডিজাইনের কোনো প্রতারণাপূর্ণ বা দৃশ্যমান অনুকরণ করা হয়, তবে যখন উক্ত ডিজাইন ইহার নিবন্ধিত স্বত্বাধিকারীর লাইসেন্স বা লিখিত সম্মতিক্রমে প্রয়োগ করা হইয়া থাকে, তখন ইহা ব্যতিক্রম হিসাবে গণ্য হইবে;

- (ঞ) বাংলাদেশের অভ্যন্তরে বাণিজ্যিকভাবে বিক্রয় বা বাণিজ্যিক ব্যবহারের উদ্দেশ্যে বাংলাদেশের বাহিরে উৎপাদিত কোনো পণ্য বা সামগ্রী, যাহাতে কপি রাইট আইন, ২০০০ (২০০০ সনের ২৮ নং আইন) লংঘিত হয় অথবা কোনো ইনটিগ্রেটেড সার্কিটের নক্সাকৃত ডিজাইন লংঘিত হয়; এবং
- (ট) উপরি-উক্ত দফাসমূহে উল্লিখিত আইনসমূহ ব্যতীত অন্য কোনো আইনে নিষিদ্ধকৃত কোনো পণ্য:

তবে শর্ত থাকে যে, সরকার যেইরূপ উপযুক্ত বিবেচনা করিবে সেইরূপ শর্ত, সীমা বা নিয়ন্ত্রণ আরোপ সাপেক্ষে, যে কোনো শ্রেণির পণ্যকে দফা (ঘ), (ঙ), (চ), (ছ), (জ), (ঝ) এবং (ঞ) এর বিধান হইতে অব্যাহতি প্রদান করিতে পারিবে।

**২৫। পণ্য আমদানি রপ্তানি নিয়ন্ত্রণ বা নিষিদ্ধ করিবার এবং আটক ও বাজেয়াপ্তি করিবার ক্ষমতা।**—(১) সরকার, সময়ে সময়ে, সরকারি গেজেটে প্রজ্ঞাপন দ্বারা, কোনো নির্দিষ্ট বর্ণনার পণ্য আকাশ, স্থল, নদী, সমুদ্র বা অন্য কোনো পথে বাংলাদেশের অভ্যন্তরে আনয়ন বা বাংলাদেশের বাহিরে নেওয়া নিয়ন্ত্রণ বা নিষিদ্ধ করিতে পারিবে।

(২) ধারা ২৪ এর বিধান অথবা এই ধারার উপ-ধারা (১) এর অধীন জারীকৃত কোনো প্রজ্ঞাপন লংঘন করিয়া কোনো পণ্য বাংলাদেশের অভ্যন্তরে আনয়ন বা বাংলাদেশের বাহিরে নেওয়া হইলে সে ক্ষেত্রে এই আইন বা অন্যকোনো আইনের অধীন অপরাধী যে দণ্ডে দণ্ডনীয় হইবেন তাহা ক্ষুণ্ণ না করিয়া উক্ত পণ্য আটকযোগ্য এবং বাজেয়াপ্তযোগ্য হইবে।

### ষষ্ঠ অধ্যায়

#### কাস্টমস শুল্ক আরোপ, অব্যাহতি এবং প্রত্যর্পণ

**২৬। শুল্কযোগ্য পণ্য।**—(১) এই আইনের অন্য কোনো ধারায় ভিন্নরূপ কিছু উল্লেখ না থাকিলে, বাংলাদেশে আমদানিকৃত বা বাংলাদেশ হইতে রপ্তানিতব্য সকল পণ্যের উপর প্রথম তফসিলে বা আপাতত বলবৎ অন্য কোনো আইনের অধীন নির্ধারিত হারে কাস্টমস শুল্ক প্রদেয় হইবে:

তবে শর্ত থাকে যে, এই আইন বা আপাতত বলবৎ অন্য কোনো আইনের অধীন কোনো কাস্টমস কর্মকর্তা কর্তৃক আরোপণীয় কোনো শুল্ক ও কর আরোপ বা আদায় করা যাইবে না, যদি—

- (ক) কোনো একটি চালানের পণ্যমূল্য; বা
- (খ) কোনো কাস্টমস কর্মকর্তা কর্তৃক নিরূপিত উক্ত শুল্ক ও করের মোট পরিমাণ,—

দুই হাজার টাকা বা সরকার কর্তৃক, সরকারি গেজেটে প্রজ্ঞাপন দ্বারা, নির্দিষ্টকৃত পরিমাণের অধিক না হয়।

তবে, আরো শর্ত থাকে যে, এই উপ-ধারার শর্তাংশের উদ্দেশ্য পূরণকল্পে বিধি দ্বারা নির্ধারিত পদ্ধতিতে বোর্ড শর্ত আরোপ করিতে পারিবে।

(২) সরকার, সরকারি গেজেটে প্রজ্ঞাপন দ্বারা, যেইরূপ সমীচীন মনে করিবে সেইরূপ শর্ত, সীমা বা বিধি-নিষেধ আরোপ সাপেক্ষে, প্রথম তফসিলে বিনির্দিষ্ট সকল বা যে কোনো পণ্যের উপর উক্ত তফসিলে নির্ধারিত কাস্টমস শুল্কের সর্বোচ্চ হারের দ্বিগুণের অধিক নয়, এমন হারে রেগুলেটরী শুল্ক আরোপ করিতে পারিবে।

**ব্যাখ্যা।**—কোনো পণ্যের উপর রেগুলেটরী শুল্কের হার উক্ত পণ্যের উপর প্রথম তফসিলে নির্ধারিত আরোপযোগ্য কাস্টমস-শুল্ক হারের অধিক হইতে পারিবে, তবে উক্ত রেগুলেটরী শুল্ক উক্ত তফসিলের সর্বোচ্চ কাস্টমস শুল্ক হারের দ্বিগুণের অধিক হইতে পারিবে না।

(৩) উপ-ধারা (২) এর অধীন আরোপিত রেগুলেটরী শুল্ক উপ-ধারা (১) অথবা আপাতত বলবৎ অন্য কোনো আইনের অধীন আরোপিত শুল্কের অতিরিক্ত হইবে।

(৪) উপ-ধারা (২) এর অধীন জারীকৃত কোনো প্রজ্ঞাপন পূর্বে রহিত করা না হইলে, যেই অর্থ-বৎসরে উহা জারি করা হইয়াছে সেই অর্থ-বৎসর সমাপনান্তে (on the expiry) উহা স্বয়ংক্রিয়ভাবে রহিত হইয়া যাইবে।

২৭। **কাউন্টারভেইলিং শুল্ক আরোপ।**—(১) যদি কোনো দেশ বা এলাকা কোনো পণ্যের প্রস্তুতকরণ (manufacturing) বা উৎপাদনে (production) অথবা উক্ত স্থান হইতে রপ্তানিতে প্রত্যক্ষ বা পরোক্ষভাবে, উক্ত পণ্য পরিবহনে ভর্তুকিসহ, কোনো ভর্তুকি প্রদান করে, তাহা হইলে, উক্ত পণ্য যে দেশে প্রস্তুত, উৎপাদিত বা ভিন্নভাবে প্রাপ্ত, সেই দেশ হইতে সরাসরি আমদানি করা হউক বা না হউক এবং উহা প্রস্তুতকৃত বা উৎপাদিত দেশ হইতে রপ্তানির সময়ে যেই অবস্থায় ছিল, সেই অবস্থায় বা প্রস্তুতকরণ, উৎপাদন দ্বারা বা ভিন্নভাবে পরিবর্তিত অবস্থায় আমদানি করা হউক না কেন, উক্ত পণ্য আমদানিতে সরকার, সরকারি গেজেটে প্রজ্ঞাপন দ্বারা, উহার উপর উক্ত ভর্তুকির অধিক নয়, এমন পরিমাণ কাউন্টারভেইলিং শুল্ক আরোপ করিতে পারিবে।

**ব্যাখ্যা।**—এই ধারার উদ্দেশ্য পূরণকল্পে, ভর্তুকি বিদ্যমান রহিয়াছে বলিয়া গণ্য হইবে, যদি—

- (ক) রপ্তানিকারক বা উৎপাদক দেশের অভ্যন্তরে সরকার বা কোনো সরকারি প্রতিষ্ঠান কর্তৃক প্রদত্ত আর্থিক সহায়তা থাকে, যেখানে—
- (অ) সরকারের কোনো প্রচলিত কার্যক্রম, যাহাতে সরাসরি তহবিল হস্তান্তর (কোনো অনুদান, ঋণ এবং অংশীদারি মূলধন প্রবাহসহ) অথবা তহবিল বা দায় বা উভয়ের সম্ভাব্য সরাসরি (potential) হস্তান্তর সংশ্লিষ্ট থাকে;
- (আ) সরকারি রাজস্ব, যাহা অন্যবিধভাবে প্রাপ্য থাকা সত্ত্বেও ছাড় দেয়া হয় (forgone) বা আদায় না করা হয় (আর্থিক প্রণোদনাসহ);
- (ই) সরকার সাধারণ অবকাঠামো ব্যতিরেকে অন্য যে কোনো পণ্য বা সেবা প্রদান করে অথবা পণ্য ক্রয় করে;
- (ঈ) দফা (অ) (আ) বা (ই) তে বর্ণিত এক বা একাধিক ধরনের কার্যক্রম, যাহা সচরাচর সরকারের উপর ন্যস্ত থাকে, তাহা পরিচালনার জন্য সরকার কোনো অর্থায়ন প্রক্রিয়ায় তহবিল সরবরাহ করে অথবা কোনো বেসরকারি সংস্থার উপর দায়িত্ব ন্যস্ত করে অথবা নির্দেশ প্রদান করে, যাহার প্রচলিত পদ্ধতি প্রকৃত অর্থে সরকার কর্তৃক সচরাচর অনুসৃত পদ্ধতি হইতে ভিন্ন না হয়; অথবা

(খ) সরকার যে কোনো ধরনের আয় বা মূল্য সহায়তা প্রদান করে বা বহাল রাখে, যাহা উক্ত দেশ হইতে কোনো পণ্যের রপ্তানি বৃদ্ধি বা উক্ত দেশে কোনো পণ্যের আমদানি হ্রাসে প্রত্যক্ষ বা পরোক্ষভাবে সহায়ক হয় এবং ইহার ফলে কোনো সুবিধা প্রদত্ত হয়।

(২) ভর্তুকির পরিমাণ নির্ধারণ সাপেক্ষে, সরকার, এই ধারার বিধান এবং তদধীন প্রণীত বিধি অনুসারে সাময়িকভাবে প্রাক্কলিত ভর্তুকির অধিক নয় এমন কাউন্টারভেইলিং শুল্ক এই উপ-ধারার অধীনে আরোপ করিতে পারিবে, এবং যদি উক্ত কাউন্টারভেইলিং শুল্ক পরবর্তীকালে নির্ধারিত ভর্তুকির পরিমাণ হইতে অধিক হয়, তাহা হইলে সরকার—

(ক) উক্ত ভর্তুকি নির্ধারণের বিষয় বিবেচনায় রাখিয়া এবং যথাশীঘ্র সম্ভব উক্ত নির্ধারণের পরে উক্ত কাউন্টারভেইলিং শুল্ক হ্রাস করিবে; এবং

(খ) এইরূপ হ্রাস করিবার ফলে যেই পরিমাণ অতিরিক্ত কাউন্টারভেইলিং শুল্ক আদায় হইয়াছে বলিয়া বিবেচিত হইবে, তাহা ফেরত প্রদান করিবে।

(৩) বিধি সাপেক্ষে, উপ-ধারা (১) বা (২) এর অধীন কাউন্টারভেইলিং শুল্ক আরোপিত হইবে না, যদি না ইহা নিরূপিত হয় যে—

(ক) ভর্তুকি কোনো রপ্তানি সক্ষমতার সহিত সম্পর্কিত; বা

(খ) ভর্তুকি রপ্তানিকৃত পণ্য উৎপাদনে ব্যবহারের ক্ষেত্রে আমদানিকৃত কাঁচামালের পরিবর্তে স্থানীয় কাঁচামালের ব্যবহার সম্পর্কিত; অথবা

(গ) পণ্য প্রস্তুতকরণ, উৎপাদন বা রপ্তানিতে নিয়োজিত কতিপয় সীমিত সংখ্যক ব্যক্তিকে ভর্তুকি প্রদান করা হইয়াছে, যদি না উক্ত ভর্তুকি—

(অ) প্রস্তুতকরণ, উৎপাদন বা রপ্তানিতে নিয়োজিত ব্যক্তি কর্তৃক বা তাহার পক্ষে পরিচালিত গবেষণা কার্যের জন্য; বা

(আ) রপ্তানিকারক দেশের অভ্যন্তরে কোনো অনগ্রসর এলাকার সহায়তার জন্য; বা

(ই) নূতন পরিবেশগত আবশ্যিকতার সহিত বিদ্যমান সুবিধাদির অভিযোজন উন্নয়নকল্পে সহায়তার জন্য—

প্রদান করা হয়।

(৪) যদি সরকার এই অভিমত পোষণ করে যে, ভর্তুকি সুবিধাপ্রাপ্ত পণ্য তুলনামূলক স্বল্প সময়ের মধ্যে বিপুল পরিমাণে আমদানির ফলে স্থানীয় শিল্পের স্বার্থহানি হইয়াছে, যাহা পূরণ করা কঠিন এবং যেক্ষেত্রে উক্ত স্বার্থহানির পুনরাবৃত্তি রোধ করিবার জন্য ভূতাপেক্ষভাবে কাউন্টারভেইলিং শুল্ক আরোপ করা প্রয়োজন, তাহা হইলে সেইক্ষেত্রে সরকার, সরকারি গেজেটে প্রজ্ঞাপন দ্বারা, উপ-ধারা (২) এর অধীন কাউন্টারভেইলিং শুল্ক আরোপের পূর্ববর্তী কোনো তারিখ হইতে ভূতাপেক্ষভাবে কাউন্টারভেইলিং শুল্ক আরোপ করিতে পারিবে; তবে উহা উক্ত উপ-ধারার অধীন প্রজ্ঞাপন জারির তারিখ হইতে ৯০ (নব্বই) দিনের পূর্বে হইবে না এবং, আপাতত বলবৎ অন্য কোনো আইনে যাহা কিছুই থাকুক না কেন, উক্ত শুল্ক এই উপ-ধারার অধীন জারীকৃত প্রজ্ঞাপনে উল্লিখিত তারিখ হইতে প্রদেয় হইবে।

(৫) এই ধারার অধীন আরোপযোগ্য কাউন্টারভেইলিং শুল্ক এই আইন অথবা আপাতত বলবৎ অন্য কোনো আইনের অধীন আরোপিত অন্যান্য কোনো শুল্কের অতিরিক্ত হইবে।

(৬) ইতোমধ্যে প্রত্যাহার করা না হইলে, এই ধারার অধীন আরোপিত কাউন্টারভেইলিং শুল্ক, আরোপের তারিখ হইতে ৫ (পাঁচ) বৎসর সমাপ্তির পর অকার্যকর হইয়া যাইবে:

তবে শর্ত থাকে যে, সরকার পুনরীক্ষণ (review) করিয়া যদি এই অভিমত পোষণ করে যে, উক্ত শুল্ক প্রত্যাহারের ফলে ভর্তুকি কার্যক্রম এবং স্বার্থহানি অব্যাহত থাকিতে অথবা উহাদের পুনরাবৃত্তি ঘটিতে পারে, তাহা হইলে সরকার, সময়ে সময়ে, এই শুল্ক আরোপের মেয়াদ অতিরিক্ত ৫ (পাঁচ) বৎসর মেয়াদের জন্য বর্ধিত করিতে পারিবে এবং এইরূপে বর্ধিত অতিরিক্ত মেয়াদ বর্ধিতকরণের তারিখ হইতে কার্যকর হইবে:

আরও শর্ত থাকে যে, যদি উল্লিখিত ৫ (পাঁচ) বৎসর সময়ের মেয়াদ সমাপ্তি হওয়ার পূর্বে আরম্ভ হওয়া কোনো পুনরীক্ষণ কার্যক্রম উক্ত মেয়াদ উত্তীর্ণ হওয়ার পূর্বে চূড়ান্ত না হয়, তাহা হইলে, পুনরীক্ষণের ফলাফল সাপেক্ষে, কাউন্টারভেইলিং শুল্ক ১ (এক) বৎসরের অধিক নয়, এমন অতিরিক্ত সময়ের জন্য বলবৎ থাকিবে।

(৭) সরকার, সময়ে সময়ে, যেইরূপ প্রয়োজন মনে করিবে সেইরূপ তদন্তের পর উপ-ধারা (১) বা (২) এ উল্লিখিত ভর্তুকির পরিমাণ নিরূপণ ও নির্ধারণ করিবে এবং এইরূপ পণ্য সনাক্তকরণ ও আমদানির পর এই ধারার অধীন আরোপিত কাউন্টারভেইলিং শুল্ক নিরূপণ ও আদায় করিবার জন্য বিধি প্রণয়ন করিতে পারিবে।

(৮) এই ধারার অধীন কাইন্টারভেইলিং শুল্ক আরোপের কোনো কার্যধারা আরম্ভ করা যাইবে না, যদি না কোনো স্থানীয় শিল্প কর্তৃক অথবা উহার পক্ষ হইতে পেশকৃত লিখিত আবেদন প্রাপ্তির পর বাংলাদেশ ট্যারিফ কমিশন সরকারকে অবহিত করে যে, কোনো নির্দিষ্ট আমদানিকৃত পণ্যের উপর প্রত্যক্ষ অথবা পরোক্ষ ভর্তুকির কারণে সৃষ্ট স্বার্থহানির দৃশ্যমান প্রমাণ রহিয়াছে।

২৮। **এন্টি-ডাম্পিং শুল্ক আরোপ।**—(১) যদি কোনো দেশ অথবা এলাকা, অতঃপর এই ধারায় রপ্তানিকারক দেশ অথবা এলাকা বলিয়া উল্লিখিত, হইতে কোনো পণ্য উহার স্বাভাবিক মূল্য অপেক্ষা কম মূল্যে বাংলাদেশে রপ্তানি করা হয় তাহা হইলে সরকার, সরকারি গেজেটে প্রজ্ঞাপন দ্বারা, উক্ত পণ্য আমদানির ক্ষেত্রে, ডাম্পিং মার্জিনের অধিক নহে এমন পরিমাণ, এন্টি-ডাম্পিং শুল্ক আরোপ করিতে পারিবে।

**ব্যাখ্যা**—এই ধারার উদ্দেশ্য পূরণকল্পে, কোনো পণ্যের ক্ষেত্রে—

- (ক) “ডাম্পিং মার্জিন” অর্থ উহার রপ্তানি মূল্য এবং স্বাভাবিক মূল্যের মধ্যকার পার্থক্য;
- (খ) “রপ্তানি মূল্য” অর্থ রপ্তানিকারক দেশ বা এলাকা হইতে রপ্তানিকৃত পণ্যের মূল্য এবং যে স্থানে কোনো রপ্তানি মূল্য নাই বা রপ্তানিকারক এবং আমদানিকারক বা কোনো তৃতীয় পক্ষের মধ্যে সম্পৃক্ততা (association) বা কোনো ক্ষতিপূরণ ব্যবস্থার কারণে যখন রপ্তানিমূল্য বিশ্বাসযোগ্য হয় না তখন সেই মূল্যে আমদানিকৃত পণ্য কোনো নিরপেক্ষ ক্রেতার নিকট প্রথম পুনঃবিক্রয় হয় সেই মূল্যের ভিত্তিতে অথবা সেই অবস্থায় পণ্য আমদানি করা হইয়াছে, সেই অবস্থায় যদি কোনো নিরপেক্ষ ক্রেতার নিকট পুনঃবিক্রয় না হয়, তাহা হইলে উপ-ধারা (৬) এর অধীন প্রণীত বিধিমালা অনুসারে নির্ধারণযোগ্য যুক্তিসঙ্গত ভিত্তিতে রপ্তানি মূল্য নির্ণয় করা যাইবে;



## (গ) “স্বাভাবিক মূল্য” অর্থ—

- (অ) উপ-ধারা (৬) এর অধীন প্রণীত বিধিমালা অনুসারে রপ্তানিকারক দেশে অথবা এলাকায় ভোগের জন্য সমজাতীয় পণ্যের (like product) সাধারণ ব্যবসা প্রক্রিয়ায় নিরূপিত তুলনীয় মূল্য; অথবা
- (আ) রপ্তানিকারক দেশের বা এলাকার স্থানীয় বাজারে যখন স্বাভাবিক ব্যবসা প্রক্রিয়ায় সমজাতীয় পণ্যের কোনো বিক্রয় থাকে না, অথবা যখন বিশেষ বাজার পরিস্থিতির কারণে অথবা রপ্তানিকারক দেশের বা এলাকার (territory) স্থানীয় বাজারে স্বল্প পরিমাণ বিক্রয়ের কারণে উক্ত বিক্রয় যথাযথ তুলনা অনুমোদন করে না, তখন স্বাভাবিক মূল্য হইবে—
- (ক) উপ-ধারা (৬) এর অধীন প্রণীত বিধিমালা অনুসারের রপ্তানিকারক দেশ বা এলাকা বা কোনো উপযুক্ত তৃতীয় কোনো দেশ হইতে রপ্তানিকৃত সমজাতীয় পণ্যের নিরূপিত তুলনীয় প্রতিনিধিত্বমূলক মূল্য; অথবা
- (খ) উপ-ধারা (৬) এর অধীন প্রণীত বিধিমালা অনুসারে উক্ত পণ্যের উৎস দেশের উৎপাদন ব্যয়ের সহিত যুক্তিসংগত পরিমাণ প্রশাসনিক, বিক্রয় ও সাধারণ ব্যয় এবং মুনাফা বাবদ যুক্তিসংগত সংযোজনসহ উক্ত পণ্যের উৎপাদন ব্যয়:

তবে শর্ত থাকে যে, উৎস দেশ (country of origin) ব্যতীত অন্য কোনো দেশ হইতে পণ্য আমদানির ক্ষেত্রে যদি রপ্তানিকারক দেশের মাধ্যমে পণ্য শুধুমাত্র স্থানান্তরিত হয় (transhipped) অথবা এইরূপ পণ্য রপ্তানিকারক দেশে উৎপাদিত না হয়, সেই ক্ষেত্রে উৎস দেশের মূল্যের ভিত্তিতে পণ্যের স্বাভাবিক মূল্য নির্ধারিত হইবে।

(২) কোনো পণ্যের ক্ষেত্রে স্বাভাবিক মূল্য এবং ডাম্পিং মার্জিন নিরূপণ না হওয়া পর্যন্ত সরকার এই ধারার বিধান এবং তদধীন প্রণীত বিধি অনুসারে সাময়িকভাবে প্রাক্কলিত উক্ত মূল্য এবং ডাম্পিং মার্জিন ভিত্তিতে এইরূপ পণ্য বাংলাদেশে আমদানির উপর এন্টি-ডাম্পিং শুল্ক আরোপ করিতে পারিবে এবং যদি উক্ত এন্টি-ডাম্পিং শুল্ক পরবর্তীকালে নির্ধারিত মার্জিন হইতে অধিক হয়, তাহা হইলে সরকার—

- (ক) উক্তরূপ নির্ধারণের বিষয় বিবেচনায় রাখিয়া এবং উক্তরূপ নির্ধারণের পর যথাশীঘ্র সম্ভব এই প্রকার এন্টি-ডাম্পিং শুল্ক হ্রাস করিবে; এবং
- (খ) এইরূপ হ্রাস করিবার ফলে আদায়কৃত অতিরিক্ত এন্টি-ডাম্পিং শুল্ক যতটুকু অতিরিক্ত আদায় করা হইয়াছে, ততটুকু ফেরত প্রদান করিবে।

(৩) যদি সরকার তদন্তাধীন ডাম্পকৃত কোনো পণ্যের ক্ষেত্রে এইরূপ অভিমত পোষণ করে যে—

- (অ) ডাম্পিং এর কারণে শিল্পের স্বার্থহানির ইতিহাস রহিয়াছে অথবা রপ্তানিকারক ডাম্পিং চর্চা করে এবং ইহাতে স্থানীয় শিল্পের স্বার্থহানি ঘটে মর্মে আমদানিকারক জানিতেন বা তাহার জানা উচিত ছিল; এবং

(আ) তুলনামূলক স্বল্প সময়ের মধ্যে বিপুল পরিমাণ ডাম্পিং পণ্য আমদানির ফলে স্বার্থহানি ঘটিয়াছে, যাহা ডাম্পকৃত পণ্য আমদানির সময় ও পরিমাণ এবং অন্যান্য পারিপার্শ্বিক পরিস্থিতি বিবেচনায় আরোপযোগ্য এন্টি-ডাম্পিং শুল্কের প্রতিকারমূলক প্রভাব গুরুতরভাবে দুর্বল (undermine) করিতে পারে, তাহা হইলে সরকার, সরকারি গেজেট প্রজ্ঞাপন দ্বারা, উপ-ধারা (২) এর অধীন এন্টি-ডাম্পিং শুল্ক আরোপের পূর্ববর্তী কোনো তারিখ হইতে ভূতাপেক্ষাভাবে এন্টি-ডাম্পিং শুল্ক আরোপ করিতে পারিবে; তবে তাহা উক্ত উপ-ধারার অধীন প্রজ্ঞাপন জারির তারিখ হইতে নব্বই দিনের পূর্বে হইবে না এবং, আপাতত বলবৎ অন্য কোনো আইনে যাহা কিছুই থাকুক না কেন, উক্ত শুল্ক এই উপ-ধারার অধীন জারীকৃত প্রজ্ঞাপনে উল্লিখিত হার ও তারিখ হইতে প্রদেয় হইবে।

(৪) এই ধারার অধীন আরোপযোগ্য এন্টি-ডাম্পিং শুল্ক এই আইন বা আপাতত বলবৎ অন্য কোনো আইনের অধীন আরোপিত অন্যান্য শুল্কের অতিরিক্ত হইবে।

(৫) ইতোপূর্বে প্রত্যাহার করা না হইলে, এই ধারার অধীন আরোপিত এন্টি-ডাম্পিং শুল্ক, আরোপের তারিখ হইতে ০৫ (পাঁচ) বৎসর সমাপ্তির পর অকার্যকর হইয়া যাইবে:

তবে শর্ত থাকে যে, সরকার পুনরীক্ষণ করিয়া যদি এই অভিমত পোষণ করে যে, উক্ত শুল্ক অকার্যকর (cessation) করিবার ফলে ডাম্পিং এবং স্বার্থহানি অব্যাহত থাকিতে অথবা উহাদের পুনারাবৃত্তি ঘটতে পারে, তাহা হইলে সরকার, সময়ে সময়ে, এইরূপ শুল্ক আরোপের মেয়াদ অতিরিক্ত পাঁচ বৎসর মেয়াদের জন্য বর্ধিত করিতে পারে এবং এইরূপ বর্ধিত অতিরিক্ত মেয়াদ বর্ধিতকরণের তারিখ হইতে কার্যকর হইবে :

আরও শর্ত থাকে যে, যদি উল্লিখিত পাঁচ বৎসর সময়ের মেয়াদ সমাপ্তি হওয়ার পূর্বে আরম্ভ হওয়া কোনো পুনরীক্ষণ কার্যক্রম উক্ত মেয়াদ উত্তীর্ণ হওয়ার পূর্বে চূড়ান্ত করা না হয়, তাহা হইলে, পুনরীক্ষণের ফলাফল সাপেক্ষে, এন্টি-ডাম্পিং শুল্ক অনধিক এক বৎসর অতিরিক্ত সময়ের জন্য বলবৎ থাকিবে।

(৬) সরকার, সময়ে সময়ে, যেইরূপ প্রয়োজন মনে করিবে সেইরূপ তদন্তের পর উপ-ধারা (১) বা (২) এ উল্লিখিত ডাম্পিং এর ডাম্পিং মার্জিন (dumping margin) নিরূপণ ও নির্ধারণ করিবে এবং এই ধারার উদ্দেশ্য পূরণকল্পে বিধি প্রণয়ন করিতে পারিবে এবং উপরি-উক্ত ক্ষমতার সামগ্রিকতা ক্ষুণ্ণ না করিয়া, উক্তরূপ বিধিমালায় এই ধারার অধীন এন্টি-ডাম্পিং শুল্ক আরোপযোগ্য পণ্য কোনো উপায়ে শনাক্ত করা যায় এবং উক্ত পণ্য সম্পর্কিত রপ্তানি মূল্য, স্বাভাবিক মূল্য এবং ডাম্পিং মার্জিন কিভাবে নির্ধারণ করা যায়, তাহার পদ্ধতি (manner) এবং উক্ত এন্টি-ডাম্পিং শুল্ক নিরূপণ এবং আদায়ের বিধান করিতে পারিবে।

(৭) এই ধারার অধীন এন্টি-ডাম্পিং শুল্ক আরোপের কোনো কার্যধারা আরম্ভ করা যাইবে না, যদি না কোনো স্থানীয় শিল্প কর্তৃক অথবা উহার পক্ষ হইতে পেশকৃত লিখিত আবেদন প্রাপ্তির পর বাংলাদেশ ট্যারিফ কমিশন সরকারকে অবহিত করে যে, কোনো নির্দিষ্ট আমদানিকৃত পণ্যের ডাম্পিং এর কারণে দেশীয় শিল্পের স্বার্থহানির দৃশ্যমান প্রমাণ রহিয়াছে।

২৯। কতিপয় ক্ষেত্রে ধারা ২৭ বা ২৮ এর অধীন শুল্ক আরোপণীয় নয়।—(১) ধারা ২৭ বা ২৮ এ যাহা কিছুই থাকুক না কেন,—

(ক) ডাম্পিং অথবা রপ্তানি ভর্তুকির অভিন্ন পরিস্থিতিতে ক্ষতিপূরণের জন্য কোনো পণ্যের উপর কাউন্টারভেইলিং শুল্ক বা এন্টি-ডাম্পিং শুল্ক অথবা উভয় প্রকার শুল্ক আরোপ করা যাইবে না।

(খ) সরকার,—

(অ) উৎস দেশে ভোগের জন্য বা রপ্তানির জন্য অনুরূপ পণ্যের উপর প্রযোজ্য শুল্ক বা কর হইতে উক্ত পণ্যকে অব্যাহতি প্রদানের কারণে অথবা রপ্তানির কারণে বা উক্ত শুল্ক বা কর ফেরত (refund) প্রদানের কারণে ধারা ২৭ বা ২৮ এর অধীন কোনো কাউন্টার ভেইলিং শুল্ক বা এন্টি-ডাম্পিং শুল্ক;

(আ) বিশ্ব বাণিজ্য সংস্থার কোনো সদস্য দেশ হইতে বা সরকারের সহিত (Most Favored Nation (MFN) হিসাবে চুক্তিভুক্ত কোনো দেশ, অতঃপর “নির্দিষ্ট দেশ” বলিয়া উল্লিখিত, হইতে কোনো পণ্য আমদানির ক্ষেত্রে যদি নিরূপণ করে যে, উক্ত পণ্য বাংলাদেশে আমদানি করা হইলে উহা বাংলাদেশের কোনো প্রতিষ্ঠিত শিল্পের স্বার্থহানি ঘটাইবে বা বস্তুগতভাবে স্বার্থহানির হুমকি হইয়া দাঁড়াইবে অথবা বাংলাদেশে কোনো শিল্প প্রতিষ্ঠাকে বস্তুগতভাবে বাধাগ্রস্ত করিবে, তাহা হইলে, উপ-ধারা (২) এর অধীন প্রণীত বিধি অনুসরণ ব্যতীত, উক্তরূপ ক্ষেত্রে ধারা ২৭(১) ও ২৮(১) এর অধীন কোন কাউন্টারভেইলিং শুল্ক বা এন্টি ডাম্পিং শুল্ক; এবং

(ই) কোনো নির্দিষ্ট দেশ হইতে বাংলাদেশে কোন পণ্য আমদানির ক্ষেত্রে, যদি ভর্তুকি বা ডাম্পিং এবং উহার পরিণতিতে স্থানীয় শিল্পের স্বার্থহানি হইবে মর্মে প্রাথমিকভাবে নিরূপণ করে, এবং আরও নিরূপণ করে যে, তদন্তকালীন সময়ে উক্ত স্বার্থহানি প্রতিরোধে শুল্ক আরোপ করা প্রয়োজন, তাহা হইলে, উপ-ধারা (২) এর অধীন প্রণীত বিধি অনুসরণ ব্যতীত, উক্তক্ষেত্রে, ধারা ২৭(২) ও ২৮(২) এর অধীন কোন কাউন্টারভেইলিং শুল্ক বা এন্টি ডাম্পিং শুল্ক—

আরোপ করিবে না:

তবে শর্ত থাকে যে, যদি বাংলাদেশে অনুরূপ পণ্য রপ্তানিকারী কোনো তৃতীয় দেশের স্থানীয় শিল্পের স্বার্থহানি বা স্বার্থহানির হুমকি রোধের উদ্দেশ্যে কোনো পণ্যের উপর কাউন্টারভেইলিং শুল্ক বা এন্টি-ডাম্পিং শুল্ক আরোপ করা হইয়া থাকে, তাহা হইলে উপ-দফা (আ) ও (ই) এর বিধান প্রযোজ্য হইবে না।

(গ) সরকার,—

(অ) যে কোনো সময়ে, রপ্তানিকারক দেশ বা অঞ্চলের সরকারের নিকট হইতে ভর্তুকি বিলুপ্ত বা সীমিত করিবার অথবা উহার প্রভাব সম্পর্কিত অন্যান্য ব্যবস্থা গ্রহণের সম্মতি সম্বলিত সন্তোষজনক স্বেচ্ছাপ্রণোদিত অঙ্গীকারনামা প্রাপ্ত হইলে অথবা পণ্যের মূল্য সংশোধনে (revision) রপ্তানিকারক সম্মত হইলে এবং যদি সন্তুষ্ট হয় যে, ইহার ফলে ভর্তুকির ক্ষতিকর প্রভাব তিরোহিত হইবে, তাহা হইলে ধারা ২৭ এর অধীন কোনো কাউন্টারভেইলিং শুল্ক; এবং

(আ) যে কোনো সময়ে, রপ্তানিকারকের নিকট হইতে মূল্য সংশোধনের অথবা ডাম্পকৃত মূল্যে বিবেচ্য এলাকায় রপ্তানি বন্ধ করিবার সন্তোষজনক স্বেচ্ছাপ্রণোদিত অঞ্জীকারনামা প্রাপ্ত হইলে এবং যদি সন্তুষ্ট হয় যে, এইরূপ ব্যবস্থার ফলে ডাম্পিং এর ক্ষতিকর প্রভাব তিরোহিত হইবে, তাহা হইলে ধারা ২৮ এর অধীন কোনো এন্টি-ডাম্পিং শুল্ক—

আরোপ করিবে না।

(২) সরকার, সরকারি গেজেটে প্রজ্ঞাপন দ্বারা, এই ধারার উদ্দেশ্য পূরণকল্পে বিধিমালা প্রণয়ন করিতে পারিবে এবং উপরি-উক্ত ক্ষমতার সামগ্রিকতাকে ক্ষুণ্ণ না করিয়া, এই ধারার উদ্দেশ্যে যেই পদ্ধতিতে তদন্ত অনুষ্ঠিত হইবে সেই পদ্ধতি, উক্ত তদন্তে যেই সকল উপাদান বিবেচনায় আনা হইবে, সেই সকল বিষয় এবং উক্ত তদন্তের সহিত সংশ্লিষ্ট সকল বিষয়, উক্ত বিধিমালায় অন্তর্ভুক্ত করা যাইবে।

৩০। **কাউন্টারভেইলিং অথবা এন্টি-ডাম্পিং শুল্ক আরোপের বিরুদ্ধে আপীল।**—(১) কোনো পণ্য আমদানির সহিত সম্পর্কিত কোনো ভর্তুকি বা ডাম্পিং এর অস্তিত্ব, মাত্রা এবং প্রভাব বিষয়ে নির্ধারণী আদেশ বা উহার পুনরীক্ষণের বিরুদ্ধে আপীল ট্রাইবুনালে আপীল দায়ের করা যাইবে।

(২) এই ধারার অধীন প্রত্যেক আপীল আপীলাধীন আদেশের তারিখ হইতে ৯০ (নব্বই) দিনের মধ্যে দায়ের করিতে হইবে:

তবে শর্ত থাকে যে, আপীলকারী যুক্তিসঙ্গত কারণে সময়মত আপীল দায়েরে বাধাগ্রস্ত হইয়াছে মর্মে আপীল ট্রাইবুনাল সন্তুষ্ট হইলে উপরি-উক্ত ৯০ (নব্বই) দিন সময় সমাপ্তির পরও আপীল গ্রহণ করা যাইবে।

(৩) আপীলের পক্ষসমূহকে শুনানির সুযোগ প্রদান করিবার পর আপীল ট্রাইবুনাল যেই আদেশের বিরুদ্ধে আপীল করা হইয়াছে উহা বহাল রাখিয়া, পরিবর্তন করিয়া বা বাতিল করিয়া ইহার বিবেচনায় সঙ্গত যে কোনো আদেশ প্রদান করিতে পারিবে।

(৪) আপীল ট্রাইবুনালের প্রেসিডেন্ট কর্তৃক উক্ত আপীলসমূহ শুনানির জন্য গঠিত একটি বিশেষ বেঞ্চ উপ-ধারা (১) এর অধীন প্রত্যেক আপীলের শুনানি হইবে এবং উক্ত বেঞ্চ প্রেসিডেন্ট ও অন্যান্য দুইজন সদস্য সমন্বয়ে গঠিত হইবে, যাহাতে একজন টেকনিক্যাল এবং একজন জুডিশিয়াল সদস্য অন্তর্ভুক্ত হইবেন।

৩১। **সেইফগার্ড শুল্ক আরোপ।**—(১) সরকার যেইরূপ সঙ্গত বিবেচনা করিবে, সেইরূপ তদন্ত সম্পাদন করিয়া যদি সন্তুষ্ট হয় যে, কোনো পণ্য বাংলাদেশে এমন বর্ধিত পরিমাণে এবং এমন শর্তে আমদানি করা হইতেছে যাহা স্থানীয় শিল্পের গুরুতর স্বার্থহানি ঘটাইতে পারে অথবা স্বার্থহানি ঘটানোর হুমকির সৃষ্টি করিতে পারে, তাহা হইলে সরকার, সরকারি গেজেটে প্রজ্ঞাপন দ্বারা, উক্ত পণ্যের উপর সেইফগার্ড শুল্ক আরোপ করিতে পারিবে:

তবে শর্ত থাকে যে, সরকার, সরকারি গেজেটে প্রজ্ঞাপন দ্বারা, উহার বিবেচনায় যেইরূপ সঙ্গত মনে হয়, সেইরূপ শর্ত, সীমা বা বিধি-নিষেধ আরোপ সাপেক্ষে, যে কোনো পণ্যকে আরোপণীয় সেইফগার্ড শুল্ক হইতে সম্পূর্ণ বা আংশিক অব্যাহতি প্রদান করিতে পারিবে।

(২) উপ-ধারা (১) এর অধীন স্বার্থহানি বা স্বার্থহানির হুমকি নির্ধারণের বিষয়টি অনিষ্পন্ন থাকা অবস্থায়, যদি বিধিবদ্ধ (prescribed) পদ্ধতিতে পরিচালিত প্রাথমিক নির্ধারণে দেখা যায় যে, বর্ধিত আমদানি স্থানীয় শিল্পের গুরুতর স্বার্থহানি করিয়াছে অথবা স্বার্থহানির হুমকি সৃষ্টি করিয়াছে, তাহা হইলে তত্ত্বিভিতে সরকার সাময়িক সেইফগার্ড শুল্ক আরোপ করিতে পারিবে:

তবে শর্ত থাকে যে, যদি চূড়ান্ত নির্ধারণের পর সরকার এইরূপ অভিমত পোষণ করে যে, বর্ধিত আমদানি কোনো স্থানীয় শিল্পের স্বার্থহানি ঘটায় নাই বা স্বার্থহানির হুমকি সৃষ্টি করে নাই, তাহা হইলে সরকার উক্তরূপে আদায়কৃত শুল্ক ফেরত প্রদান করিবে:

আরও শর্ত থাকে যে, সাময়িক সেইফগার্ড শুল্ক, আরোপের তারিখ হইতে ২০০ (দুই শত) দিবসের অধিক বলবৎ থাকিবে না।

(৩) এই ধারার অধীন আরোপিত শুল্ক এই আইনের অধীন অথবা আপাতত বলবৎ অন্য কোনো আইনের অধীন আরোপিত শুল্কের অতিরিক্ত হইবে।

(৪) এই ধারার অধীন আরোপিত শুল্ক, ইতোমধ্যে প্রত্যাহার করা না হইলে, আরোপের তারিখ হইতে ৪ (চার) বৎসর সমাপ্তির পর অকার্যকর হইয়া যাইবে:

তবে শর্ত থাকে যে, যদি সরকার এই অভিমত পোষণ করে যে, স্থানীয় শিল্প উক্ত স্বার্থহানি অথবা স্বার্থহানির হুমকির সহিত খাপ খাওয়ানোর জন্য ব্যবস্থা গ্রহণ করিয়াছে এবং উক্ত সেইফগার্ড শুল্ক আরোপ বহাল থাকা প্রয়োজন, তাহা হইলে সরকার উক্ত আরোপের মেয়াদ বাড়াইতে পারিবে:

আরও শর্ত থাকে যে, কোনো অবস্থাতেই উক্ত সেইফগার্ড শুল্ক উহা প্রথম আরোপের তারিখ হইতে ১০ (দশ) বৎসর সময়ের অধিক আরোপ করা যাইবে না।

(৫) এই ধারার উদ্দেশ্য পূরণকল্পে সরকার, সরকারি গেজেটে প্রজ্ঞাপন দ্বারা, বিধি প্রণয়ন করিতে পারিবে, এবং উপরি-উক্ত ক্ষমতার সামগ্রিকতা ক্ষুণ্ণ না করিয়া, এইরূপ বিধিমালায় সেইফগার্ড শুল্ক আরোপযোগ্য পণ্য যেই পদ্ধতিতে চিহ্নিত করা হইবে সেই পদ্ধতি এবং যেই উপায়ে উক্ত পণ্যের সাথে সম্পর্কিত গুরুতর স্বার্থহানির অথবা গুরুতর স্বার্থহানির হুমকি সৃষ্টির কারণ নির্ণীত হইবে, সেই উপায় এবং সেইফগার্ড শুল্ক নিরূপণ ও আদায়ের পদ্ধতি অন্তর্ভুক্ত করা যাইবে।

**ব্যাখ্যা।—**এই ধারার উদ্দেশ্য পূরণকল্পে—

(ক) “স্থানীয় শিল্প” অর্থ সেই সকল উৎপাদনকারীগণ—

(অ) যাহারা সম্পূর্ণভাবে কোন অনুরূপ পণ্য বা কোনো প্রত্যক্ষভাবে প্রতিযোগী পণ্য বাংলাদেশে উৎপাদন করেন; অথবা

(আ) যাহাদের বাংলাদেশে কোনো অনুরূপ পণ্যের বা কোনো প্রত্যক্ষভাবে প্রতিযোগী পণ্যের মোট সম্মিলিত উৎপাদনের পরিমাণ বাংলাদেশে উক্ত পণ্যের মোট উৎপাদনের একটি প্রধান হিস্যা গঠন করে;

(খ) “গুরুতর স্বার্থহানি” অর্থ এমন কোনো স্বার্থহানি, যাহা কোনো স্থানীয় শিল্পের অবস্থানকে লক্ষ্যণীয় মাত্রায় ভারসাম্যহীন করে; এবং

(গ) “গুরুতর স্বার্থহানির হুমকি” অর্থ গুরুতর স্বার্থহানির কোনো সুস্পষ্ট এবং অত্যাসন্ন ঝুঁকি।

৩২। **কাস্টমস সেবার জন্য ফি।**—বোর্ড কোনো নির্দিষ্ট ব্যক্তির অনুকূলে প্রদত্ত নিম্নরূপ সেবার জন্য ফি প্রদানের নির্দেশ প্রদান করিতে পারিবে, যথা:—

- (ক) এই আইনের অধীন পণ্য বোঝাই বা খালাসের জন্য নির্ধারিত স্থান ব্যতীত অন্য কোনো স্থানে বা এতদসংক্রান্ত কার্যক্রম পরিচালনার জন্য নির্ধারিত কর্মসময়ের বাহিরে কোনো পণ্য বোঝাই বা খালাস করা;
- (খ) এই আইনের অধীন কার্যক্রম পরিচালনার জন্য নির্ধারিত কর্মসময়ের বাহিরে বা নির্ধারিত কাস্টমস স্টেশন ব্যতীত অন্য কোনো স্থানে কোনো পণ্যের ঘোষণা, সত্যাখ্যান বা ছাড় করা;
- (গ) কাস্টমস কর্মকর্তার তত্ত্ববধানের প্রয়োজনীয়তা রহিয়াছে এমন কোনো কাস্টমস বন্ডেড ওয়্যারহাউস বা অস্থায়ী সংরক্ষণাগারে কোনো পণ্যের মালিক বা আমদানিকারক কর্তৃক প্রবেশ বা পণ্যের হ্যান্ডলিং বা নমুনা সংগ্রহ করা;
- (ঘ) এই আইনের অধীন কোনো বেসরকারি ওয়্যারহাউস প্রতিষ্ঠা বা বন্দরের সীমানার মধ্যে পণ্য নামানো ও জাহাজীকরণের জন্য কার্গো-বোট বা কোনো এজেন্ট হিসাবে বাণিজ্যিক লেনদেনের জন্য কোনো লাইসেন্স প্রদান বা নবায়ন সংক্রান্ত;
- (ঙ) কোন ব্যক্তির অনুরোধের প্রেক্ষিতে তথ্য, ফরম বা দলিল সরবরাহ সংক্রান্ত;
- (চ) সত্যাখ্যানের উদ্দেশ্যে পণ্যের নমুনা সংগ্রহ ও পরীক্ষা করা, বা পণ্য ধ্বংস করিবার জন্য কাস্টমস কর্মকর্তা ব্যবহারের ব্যয় ব্যতীত অন্য কোনো ব্যয় জড়িত থাকার ক্ষেত্রে; এবং
- (ছ) ট্রানজিট বা ট্রানশিপমেন্ট সংক্রান্ত কার্যক্রম:

তবে শর্ত থাকে যে, উক্তরূপে আরোপিত কোনো ফি এর পরিমাণ সম্ভাব্য প্রশাসনিক ব্যয় এবং প্রদত্ত সেবার ব্যয়ের অধিক হইবে না।

(২) উপ-ধারা (১) এর অধীন আরোপিত কোনো ফি এর পরিমাণ, উক্ত ফি পরিশোধের জন্য দায়ী ব্যক্তি এবং উক্ত ফি নির্ধারণের শর্তাবলী ও পদ্ধতি বিধি দ্বারা নির্ধারিত হইবে।

(৩) সুস্পষ্টভাবে ভিন্নরূপ কিছু উল্লেখ না থাকিলে, শুল্ক প্রত্যর্পণ বা পরিশোধ বিলম্বিতকরণ সম্পর্কিত বিধানাবলী ব্যতীত, এই আইন ও বিধির অধীন অন্য সকল প্রশাসনিক ও প্রয়োগ ব্যবস্থা সংক্রান্ত বিধানাবলী, এই ধারার অধীন প্রদেয় ফি এবং উক্ত ফি পরিশোধের জন্য দায়ী ব্যক্তির ক্ষেত্রে, এইরূপে প্রযোজ্য হইবে যেন উক্ত ফি কোনো কাস্টমস শুল্ক, এই ধারার উদ্দেশ্য পূরণকল্পে, কাস্টমস শুল্কের পরিমাণ সংশ্লিষ্ট নিরূপণীয় দণ্ড, উক্ত শুল্ক বাস্তবিক পক্ষে প্রদেয় বা পরিশোধযোগ্য হউক বা না হউক, এই ধারার অধীন প্রদেয় কোনো ফি প্রদানের ক্ষেত্রে প্রযোজ্য একই পদ্ধতি অনুসারে নিরূপিত হইবে।

৩৩। **কাস্টমস শুল্ক হইতে অব্যাহতি প্রদানের সাধারণ ক্ষমতা।**—(১) সরকার, বোর্ডের সহিত পরামর্শক্রমে, যদি সন্তুষ্ট হয় যে জনস্বার্থে করা প্রয়োজন তাহা হইলে, সরকারি গেজেটে প্রজ্ঞাপন দ্বারা, উহার বিবেচনায় যেইরূপ সঙ্গত মনে হয় সেইরূপ শর্ত, সীমা অথবা বিধিনিষেধ, যদি থাকে, আরোপ

সাপেক্ষে, বাংলাদেশে অথবা বাংলাদেশের কোনো বন্দর বা স্টেশনে আমদানিকৃত বা বাংলাদেশ বা বাংলাদেশের কোনো বন্দর বা স্টেশন হইতে রপ্তানিকৃত কোনো পণ্যকে উহার উপর আরোপণীয় কাস্টমস শুল্ক হইতে সম্পূর্ণ অথবা আংশিক অব্যাহতি প্রদান করিতে পারিবে:

তবে শর্ত থাকে যে, যদি কোনো অর্থ-বৎসরে কোনো পণ্যের ক্ষেত্রে শুল্ক অব্যাহতি প্রদান করা হয়, তাহা হইলে সেই বৎসরে একবারের অধিক শুল্কহার বৃদ্ধি করা যাইবে না।

(২) উপ-ধারা (১) এর অধীন প্রদত্ত অব্যাহতি উক্ত উপ-ধারার অধীন জারীকৃত প্রজ্ঞাপনে উল্লিখিত তারিখ হইতে কার্যকর হইবে।

৩৪। **ব্যতিক্রমী ক্ষেত্রে শুল্ক হইতে অব্যাহতি প্রদানের বিশেষ ক্ষমতা।**—ব্যতিক্রমী ক্ষেত্রে, সরকার যদি কোনো পণ্যকে জনস্বার্থে শুল্ক হইতে অব্যাহতি প্রদানের প্রয়োজনীয়তা বোধ করে, তবে উহার বিবেচনায় যেইরূপ সঙ্গত মনে হয় সেইরূপ শর্ত, সীমা বা বিধি-নিষেধ, যদি থাকে, আরোপ সাপেক্ষে, উক্ত ক্ষেত্র লিপিবদ্ধ করিয়া বিশেষ আদেশ দ্বারা উক্ত পণ্যকে উহার উপর আরোপণীয় কাস্টমস-শুল্ক প্রদান হইতে সম্পূর্ণ অথবা আংশিক অব্যাহতি প্রদান করিতে পারিবে।

৩৫। **পণ্যের পুনঃআমদানি।**—যদি নিম্নলিখিত কোন পণ্য বাংলাদেশ হইতে রপ্তানি হওয়ার ২ (দুই) বৎসরের মধ্যে কোনরূপ প্রক্রিয়াকরণ ব্যতীত বাংলাদেশে ফেরত পাঠানো হয়, তাহা হইলে উক্ত পণ্য সহকারী কমিশনার কাস্টমস এর নিম্নে নহে, এমন যথাযথ কর্মকর্তা কর্তৃক কাস্টমস শুল্ক পরিশোধ ব্যতিরেকে দেশে প্রবেশ করিতে দেওয়া যাইবে, যথা:—

- (ক) বাংলাদেশে উৎপাদিত বা প্রস্তুত কোনো পণ্য;
- (খ) বাংলাদেশে দেশীয় ভোগের জন্য ইতিপূর্বে ছাড়কৃত কোনো পণ্য; বা
- (গ) ইনওয়ার্ড প্রসেসিং বা কাস্টমস ওয়্যারহাউস পদ্ধতির অধীন বাংলাদেশে প্রক্রিয়াজাত বা প্রস্তুতকৃত কোনো পণ্য:

তবে শর্ত থাকে যে,

- (ক) উক্ত পণ্য রপ্তানির সময়ে প্রত্যর্পণ প্রদান করা হইলে, উক্ত প্রত্যর্পণ পরিশোধ করিতে হইবে;
- (খ) যদি উক্ত পণ্য ইনওয়ার্ড প্রসেসিং বা কাস্টমস ওয়্যারহাউস পদ্ধতির অধীন বাংলাদেশে প্রক্রিয়াজাত বা প্রস্তুতকৃত হইয়া থাকে এবং নিম্নলিখিত শুল্ক ও কর পরিশোধ ব্যতিরেকে রপ্তানি করা হইয়া থাকে, যথা:—
  - (অ) উক্ত পণ্য প্রক্রিয়াকরণ বা প্রস্তুতকরণে ব্যবহৃত কোনো আমদানিকৃত উপাদান, যদি থাকে, উহার উপর আরোপণীয় শুল্ক ও কর;
  - (আ) উক্ত পণ্য প্রক্রিয়াকরণ বা প্রস্তুতকরণে ব্যবহৃত স্থানীয় কীচামাল, যদি থাকে, উহার উপর আরোপণীয় শুল্ক ও কর; বা
  - (ই) উক্ত স্থানীয় পণ্য, যদি থাকে, উহার উপর আরোপণীয় শুল্ক ও কর,—

তাহা হইলে উক্ত পণ্য আমদানির সময় এবং স্থানে বিদ্যমান হারে হিসাবকৃত সকল শুল্ক ও করের সমপরিমাণ কাস্টমস-শুল্ক পরিশোধ করিতে হইবে।

৩৬। **শুল্কায়নের উদ্দেশ্যে পণ্যের মূল্য।**—(১) কোনো পণ্যের উপর কাস্টমস-শুল্ক উহার মূল্যের ভিত্তিতে আরোপণীয় হইলে, এই ধারা অনুযায়ী নিরূপিত উক্ত পণ্যের মূল্যই হইবে কাস্টমস মূল্য।

(২) এই আইনের অধীন প্রণীত বিধি অনুসারে যখন কোনো আমদানিকৃত পণ্যের উপর কাস্টমস-শুল্ক উহার মূল্যের ভিত্তিতে আরোপণীয় হয়, তখন সেই মূল্য হইবে বিনিময় মূল্য, অর্থাৎ প্রকৃতপক্ষে পরিশোধিত বা পরিশোধযোগ্য মূল্য, বা উক্ত মূল্যের নিকটতম নিরূপণযোগ্য সমতুল্য মূল্য, যেই মূল্যে সম্পূর্ণ প্রতিযোগিতামূলক অবস্থায় আন্তর্জাতিক বাণিজ্য প্রক্রিয়ায় উক্ত পণ্য অথবা অনুরূপ পণ্য আমদানির সময় এবং স্থানে অর্পণের উদ্দেশ্যে সাধারণত বিক্রয় করা হয় বা বিক্রয়ের প্রস্তাব করা হয়, যেখানে বিক্রেতা এবং ক্রেতার মধ্যে একে অন্যের ব্যবসায় কোনো স্বার্থ থাকে না এবং বিক্রয় বা বিক্রয়ের প্রস্তাবই মূল্য নিরূপণের একমাত্র বিবেচ্য বিষয় হয়।

**ব্যাখ্যা।**—এই উপ-ধারার উদ্দেশ্য পূরণকল্পে “আমদানির স্থান” অর্থ কাস্টমস-বন্দর, কাস্টমস-বিমানবন্দর অথবা কাস্টমস স্টেশন, যেখানে ধারা ৯৩ এর অধীন পণ্য ঘোষণা নিবন্ধিত হয়।

(৩) কোনো রপ্তানিকৃত পণ্য বা অনুরূপ পণ্য রপ্তানির সময় যেই মূল্যে সম্পূর্ণ প্রতিযোগিতামূলক অবস্থায় সাধারণ বাণিজ্য প্রক্রিয়ায় বিক্রয় বা বিক্রয়ের প্রস্তাব করা হয়, সেই মূল্য, বাংলাদেশের যেই কাস্টমস স্টেশনের মাধ্যমে পণ্য রপ্তানি হইবে সেই কাস্টমস স্টেশন পর্যন্ত পরিবহন ব্যয়সহ, হইবে রপ্তানিকৃত পণ্যের কাস্টমস মূল্য:

তবে শর্ত থাকে যে, সরকার, সরকারি গেজেটে প্রজ্ঞাপন দ্বারা, কোনো রপ্তানিকৃত পণ্যের রপ্তানি মূল্য নির্ধারণ করিতে পারিবে, যাহা, উক্ত নির্ধারিত মূল্য উক্ত পণ্যের ঘোষিত মূল্য অপেক্ষা অধিক হওয়ার ক্ষেত্রে, উক্ত পণ্যের কাস্টমস মূল্য নিরূপণের উদ্দেশ্যে ব্যবহৃত হইবে।

(৪) কোনো আমদানিকৃত বা রপ্তানিকৃত পণ্যের মূল্য হিসাব করিবার জন্য মুদ্রার বিনিময় হার হইবে, যেই মাসে ধারা ৯৩ এর অধীন পণ্য ঘোষণা নিবন্ধিত হয় উহার পূর্ববর্তী মাসের তৃতীয় সপ্তাহের শেষ কার্যদিবসের পূর্বের ৩০ (ত্রিশ) দিবস সময়ে বিদ্যমান গড় বিনিময় হার এবং উক্ত হার বোর্ড কর্তৃক অথবা এতদুদ্দেশ্যে বোর্ড কর্তৃক ক্ষমতাপ্রাপ্ত কর্মকর্তা কর্তৃক নির্ধারণ করা হইবে।

(৫) এই ধারায় যাহা কিছুই থাকুক না কেন, সরকার, সরকারি গেজেটে প্রজ্ঞাপন দ্বারা, মূল্য ভিত্তিক (ad valorem) কাস্টমস-শুল্ক আরোপযোগ্য হয় এমন কোন আমদানিকৃত অথবা রপ্তানিকৃত পণ্যের উপর কাস্টমস-শুল্ক আরোপণের উদ্দেশ্যে ট্যারিফ মূল্য অথবা ন্যূনতম মূল্য নির্ধারণ করিতে পারিবে:

তবে শর্ত থাকে যে, যেই ক্ষেত্রে আমদানিকৃত বা রপ্তানিকৃত কোন পণ্যের ঘোষিত মূল্য এই উপ-ধারার অধীনে নির্ধারিত ট্যারিফ মূল্য অথবা ন্যূনতম মূল্যের চেয়ে অধিক হয়, সেই ক্ষেত্রে উক্ত পণ্যের কাস্টমস-শুল্ক আরোপিত হইবে পণ্যটির ঘোষিত মূল্যের ভিত্তিতে।

**ব্যাখ্যা।**—এই ধারার উদ্দেশ্য পূরণকল্পে,—

(ক) “বিনিময় হার” বলিতে বাংলাদেশী মুদ্রা বৈদেশিক মুদ্রায় বা বৈদেশিক মুদ্রা বাংলাদেশী মুদ্রায় রূপান্তরের জন্য বিদ্যমান বাজার হার অনুযায়ী নির্ধারিত বিনিময় হারকে বুঝাইবে”;



- (খ) “বৈদেশিক মুদ্রা” এবং “বাংলাদেশ মুদ্রা” বলিতে Foreign Exchange Regulation Act, 1947 (Act No. VII of 1947) এ যথাক্রমে "foreign currency" এবং "Bangladesh currency" যেই অর্থে ব্যবহৃত হইয়াছে সেই অর্থে বুঝাইবে;
- (গ) কোন পণ্যের শুল্কায়নযোগ্য মূল্য নির্ধারণের ক্ষেত্রে উক্ত পণ্যটির বিক্রয় ও আমদানি বা রপ্তানি স্থলে উহার সরবরাহকরণ এর সঙ্গে সম্পর্কিত ভাড়া, বিমা, কমিশন ও অন্যান্য যাবতীয় ব্যয়, চার্জ ও খরচাদি অন্তর্ভুক্ত হইবে।

৩৭। **ক্ষতিগ্রস্ত, অবনতিপ্রাপ্ত, নিখোঁজ অথবা ধ্বংসপ্রাপ্ত পণ্যের শুল্ক হ্রাসকরণ।**—(১) যে ক্ষেত্রে মালিক কর্তৃক আবেদনের সূত্রে কোনো আমদানিকৃত পণ্যের প্রথম পরীক্ষাকালে এসিস্ট্যান্ট কমিশনার অব কাস্টমস পদমর্যাদার নিম্নে নহেন এমন কর্মকর্তা সন্তুষ্ট হন যে —

- (ক) অবতরণকালে অথবা তাহার পূর্বে যে কোনো সময়ে পণ্য ক্ষতিগ্রস্ত বা অবনতিপ্রাপ্ত হইয়াছে; বা
- (খ) অবতরণের পর, কিন্তু উক্ত পরীক্ষার পূর্বে যে কোনো সময় কোনো দুর্ঘটনা অথবা দৈব দুর্বিপাকের দ্বারা, এবং মালিক অথবা তাহার এজেন্টের কোনো ইচ্ছাকৃত কর্ম, অবহেলা অথবা ব্যর্থতার কারণে নয়, পণ্য ক্ষতিগ্রস্ত হইয়াছে ;—

সেই ক্ষেত্রে মালিকের লিখিত আবেদনক্রমে উক্ত পণ্যের মূল্য যথাযথ কর্মকর্তা কর্তৃক নিরূপণ করা হইবে এবং পণ্যের উক্তরূপ হ্রাসকৃত মূল্য নিরূপণের অনুপাত অনুসারে মালিককে শুল্ক অব্যাহতি প্রদান করা হইবে।

(২) যেই ক্ষেত্রে কোনো আমদানিকৃত পণ্যের মালিক কর্তৃক লিখিতভাবে আবেদনের সূত্রে কমিশনার অব কাস্টমস এই মর্মে সন্তুষ্ট হন যে, আমদানির পর কিন্তু দেশীয় ভোগের উদ্দেশ্যে খালাসের পূর্বে দুর্ঘটনার দ্বারা অথবা দৈব দুর্বিপাকের ফলে পণ্য ক্ষতিগ্রস্ত, অবনতিপ্রাপ্ত, নিখোঁজ অথবা ধ্বংসপ্রাপ্ত হইয়াছে সেই ক্ষেত্রে উক্ত ক্ষতি, অবনতি, নিখোঁজ অথবা ধ্বংসের সত্যতা প্রমাণের জন্য সকল প্রয়োজনীয় তথ্য উপস্থাপনপূর্বক পণ্যের মালিক কর্তৃক পেশকৃত আবেদনক্রমে কমিশনার অব কাস্টমস একজন যথাযথ কর্মকর্তা কর্তৃক উক্ত পণ্যের মূল্য নিরূপণের অনুমতি প্রদান করিতে পারিবেন এবং পণ্যের মালিককে উক্তরূপ মূল্য নিরূপণে যেই হারে মূল্য হ্রাস পাইয়াছে সেই আনুপাতিক হারে উক্ত পণ্যের উপর প্রদেয় অথবা পরিশোধিত শুল্ক অব্যাহতি বা ফেরত প্রদান করিতে পারিবেন।

(৩) যেই ক্ষেত্রে কমিশনার অব কাস্টমস এর সন্তুষ্টিমতে দেখা যায় যে, ওয়ারাহাউসকৃত কোনো পণ্য দেশীয় ভোগের জন্য খালাসের পূর্বে কোনো দুর্ঘটনা অথবা দৈব দুর্বিপাকে ক্ষতিগ্রস্ত হইয়াছে, সেই ক্ষেত্রে উক্ত ক্ষতির সত্যতা প্রমাণের জন্য সকল প্রয়োজনীয় তথ্য উপস্থাপনপূর্বক পণ্যের মালিক কর্তৃক পেশকৃত আবেদনক্রমে কমিশনার অব কাস্টমস একজন যথাযথ কর্মকর্তা কর্তৃক উক্ত পণ্যের মূল্য নিরূপণের অনুমতি প্রদান করিতে পারিবেন এবং পণ্যের মালিককে উক্তরূপ মূল্য নিরূপণে যেই হারে মূল্য হ্রাস পাইয়াছে সেই আনুপাতিক হারে শুল্ক অব্যাহতি প্রদান করা হইবে।

**ব্যাখ্যা।**—এই ধারার উদ্দেশ্য পূরণকল্পে “দৈব দুর্বিপাক” বলিতে প্রাকৃতিক দুর্যোগকে (Act of God) বুঝাইবে।

৩৮। **আমদানিকৃত স্পিরিট পরীক্ষা এবং পান করার অনুপযোগী (denature) করিবার ক্ষমতা।**—যখন আপাতত বলবৎ কোনো আইনের দ্বারা পান করার অনুপযোগী করা স্পিরিটের উপর এই আইনে নির্ধারিত শুল্ক হইতে কম শুল্ক আরোপিত থাকে, তখন সেইরূপ স্পিরিট বাংলাদেশে আমদানি করা হইলে উহা, বিধি দ্বারা নির্ধারিত পদ্ধতিতে, কাস্টমস কর্মকর্তা কর্তৃক পরীক্ষা করা যাইবে এবং, প্রয়োজনে, কাস্টমস-শুল্ক আরোপ করিবার পূর্বে উহা আমদানিকারকের খরচে পর্যাপ্তভাবে পানাহার অনুপযোগী করা যাইবে।

৩৯। **পণ্যের শুল্কহার, মূল্য এবং বিনিময় হার নির্ধারণের তারিখ।**—কোনো আমদানিকৃত বা রপ্তানিকৃত পণ্যের উপর প্রযোজ্য শুল্ক ও করের পরিমাণ নিম্নেবর্ণিত তারিখে বলবৎ বিনিময় হার ও বাণিজ্যের শ্রেণী, রুলস অব অরিজিন, এবং উক্ত পণ্যের ক্ষেত্রে প্রযোজ্য শুল্ক ও কর হারের ভিত্তিতে গণনা করিতে হইবে, যথা:—

(ক) ধারা ৯৩ এর অধীন পণ্য ঘোষণা নিবন্ধিত হওয়ার তারিখ; এবং

(খ) অন্যান্য ক্ষেত্রে শুল্ক পরিশোধের তারিখ:

তবে শর্ত থাকে যে, যেই যানবাহনে পণ্য আমদানি করা হইবে উহা আগমনের প্রত্যাশায় যদি ধারা ৯৪ এর উপ-ধারা (২) অনুসারে কোনো পণ্য ঘোষণা দাখিল করা হয়, তাহা হইলে, এই ধারার উদ্দেশ্য পূরণকল্পে পণ্য আগমনের বিষয়ে অবহিতকরণের (notify) তারিখ হইবে প্রাসঙ্গিক তারিখ :

আরও শর্ত থাকে যে, পণ্য ঘোষণা ব্যতীত বা এইরূপ ঘোষণা অর্পণের প্রত্যাশায় কোনো পণ্য রপ্তানি অনুমোদিত হইলে, উক্ত পণ্যের উপর প্রযোজ্য শুল্ক হার এবং মূল্য নিরূপণের জন্য বিনিময় হার হইবে, যেই তারিখ বহির্গমনোদ্যত যানবাহনে পণ্য জাহাজীকরণ আরম্ভ করা হয় সেই তারিখে প্রযোজ্য শুল্ক হার, বা, ক্ষেত্রমত, বিনিময় হার।

৪০। **মূল্য এবং কার্যকর শুল্ক হার।**—আপাতত বলবৎ অন্য কোনো আইন বা কোনো আদালতের সিদ্ধান্তে যাহা কিছুই থাকুক না কেন, ধারা ৩৯ এর উদ্দেশ্য পূরণকল্পে কোনো পণ্যের ক্ষেত্রে প্রযোজ্য মূল্য এবং শুল্ক হারের অন্তর্ভুক্ত হইবে যথাক্রমে ধারা ৩৬ এর অধীন নির্ধারিত মূল্য, এবং ধারা ২৬, ২৭, ২৮ বা ৩১ এর অধীন আরোপিত শুল্কের পরিমাণ এবং কোনো পণ্যের বিক্রয়ের জন্য কন্ট্রাক্ট বা চুক্তি সম্পাদনের অথবা ঋণপত্র খোলার পূর্বে অথবা পরে শুল্ক হইতে অব্যাহতি বা রেয়াত সম্পূর্ণ বা আংশিক প্রত্যাহারের ফলে যেই পরিমাণ শুল্ক প্রদেয় হইত সেই পরিমাণ শুল্ক।

৪১। **শুল্ক, কর ও সুদ পরিশোধের সময়সীমা।**—(১) এই আইনে ভিন্নরূপ কিছু উল্লেখ না থাকিলে, কোনো শুল্ক, কর ও অন্যান্য চার্জ পরিশোধের জন্য দায়ী ব্যক্তিকে উহা অবহিতকরণের বিজ্ঞপ্তিতে অন্য কোনো তারিখ প্রদান করা না হইলে, ১০ (দশ) দিনের মধ্যে উক্ত শুল্ক, কর ও অন্যান্য চার্জ প্রদেয় হইবে।

(২) যদি পেমেন্ট-এর জন্য দায়বদ্ধ কোনো ব্যক্তি ধারা ৪৪ এর উপ-ধারা (২) এর অধীন বিলম্বিত পেমেন্ট-এর জন্য অনুমতিপ্রাপ্ত হন, তাহা হইলে উক্ত উপ-ধারায় উল্লিখিত মেয়াদের মধ্যে পেমেন্ট প্রদেয় হইবে।

(৩) কোনো শুল্ক, কর বা অন্যান্য চার্জ প্রদেয় তারিখের মধ্যে পরিশোধিত না হইলে, উক্ত শুল্ক, কর বা অন্যান্য চার্জের উপর, উহা পরিশোধের সর্বশেষ তারিখ হইতে শুরু করিয়া উহা পরিশোধিত হইবার তারিখ পর্যন্ত মেয়াদের জন্য বার্ষিক ১০ (দশ) শতাংশ সাধারণ সুদের হারে সুদ পরিশোধ করিতে হইবে।

(৪) কোনো শুল্ক, কর বা অন্যান্য চার্জ কোনো পণ্য ছাড়ের পর বকেয়া থাকিলে, উক্ত নির্ধারিত বকেয়ার অতিরিক্ত হিসাবে, উক্ত পণ্য ছাড়ের তারিখ হইতে উক্ত নির্ধারিত বকেয়া অবহিতকরণের তারিখ পর্যন্ত বার্ষিক ১০ (দশ) শতাংশ হারে সুদ ধার্য করা হইবে:

তবে শর্ত থাকে যে, বোর্ড, সরকার কর্তৃক নির্ধারিত নীতিমালা অনুসারে, যদি ইহা নির্ধারণ করে যে, ধার্যকৃত সুদ পরিশোধের ফলে সংশ্লিষ্ট ব্যক্তি গুরুতর অর্থনৈতিক ক্ষতির সম্মুখীন হইবেন, তাহা হইলে বোর্ড উক্তরূপ সুদ ধার্য করা হইতে বিরত থাকিতে পারিবে।

৪২। **অসত্য বিবৃতি, ইত্যাদি।**—(১) যদি কোনো ব্যক্তি কাস্টমস সংশ্লিষ্ট কোনো বিষয়ে,—

- (ক) কোন কাস্টমস কর্মকর্তার নিকট কোনো ঘোষণা, নোটিশ, প্রত্যয়নপত্র অথবা অন্য যে কোন দলিল প্রদান বা স্বাক্ষর করেন অথবা অর্পণ করেন বা অর্পণ করিবার ব্যবস্থা করেন; অথবা
- (খ) এই আইনের দ্বারা বা অধীন কোনো প্রশ্নের উত্তর প্রদানে বাধ্যবাধকতা রহিয়াছে এমন কোনো কাস্টমস কর্মকর্তা কর্তৃক জিজ্ঞাসিত সেইরূপ প্রশ্নের জবাবে কোনো ঘোষণা প্রদান করেন; অথবা
- (গ) ইলেক্ট্রনিক যন্ত্রের মাধ্যমে কোনো ঘোষণা, দলিল, তথ্য অথবা রেকর্ড প্রেরণ করেন অথবা উহাদের সফট কপি উপস্থাপন করেন; এবং
- (ঘ) উপরি-উক্ত দফাসমূহে উল্লিখিত, ক্ষেত্রমত, দলিল বা ঘোষণা বস্তুগত তথ্যে অসত্য হয়—

তাহা হইলে তিনি এই ধারার অধীন অপরাধ সংঘটনের দায়ে দোষী হইবেন।

(২) যেই ক্ষেত্রে উক্তরূপ দলিলের অথবা ঘোষণার কারণে অথবা কোনোরূপ যোগসাজশের কারণে কোনো শুল্ক অথবা চার্জ আরোপ করা হয় নাই অথবা কম আরোপিত হইয়াছে অথবা ভুলক্রমে ফেরত প্রদান করা হইয়াছে, সেইক্ষেত্রে যেই ব্যক্তি উক্ত কারণে কোনো অর্থ পরিশোধের জন্য দায়বদ্ধ তাহার উপর নোটিশে উল্লিখিত পরিমাণ অর্থ তিনি কেন পরিশোধ করিবেন না উহার কারণ দর্শানোর জন্য দাবীনামা সম্বলিত নোটিশ জারি করিতে হইবে।

(৩) উপ-ধারা (২) এ বর্ণিত ব্যক্তির যদি কোনো বক্তব্য থাকে, তাহা হইলে যথাযথ কর্মকর্তা তাহা বিবেচনাপূর্বক উক্ত ব্যক্তি কর্তৃক প্রদেয় শুল্কের পরিমাণ নির্ধারণ করিবেন, যাহা নোটিশে উল্লিখিত অর্থের পরিমাণ হইতে বেশি হইবে না, এবং উক্ত ব্যক্তি এইরূপে নির্ধারিত পরিমাণ অর্থ পরিশোধ করিবেন।

(৪) উপ-ধারা (২) এর অধীন কোনো নোটিশ জারির ক্ষেত্রে কোনো সময়সীমা থাকিবে না।

৪৩। **তিন বৎসরের মধ্যে ফেরত প্রদান দাবী করা।**—(১) অনবধানতা, ভুলবশতঃ, ভুল ব্যাখ্যা বা অন্য কোনোভাবে পরিশোধিত বা অতিরিক্ত পরিশোধিত বলিয়া দাবীকৃত কোনো কাস্টমস শুল্ক বা চার্জ পরিশোধের তারিখ হইতে ৩ (তিন) বৎসরের মধ্যে দাবী করা না হইলে, উহা ফেরত প্রদান করা হইবে না এবং উক্ত দাবীর সত্যতা প্রতিপাদিত হওয়ার সঙ্গে সঙ্গে কোনো অযৌক্তিক বিলম্ব না করিয়া ফেরত প্রদান করিতে হইবে:

তবে শর্ত থাকে যে, উক্তরূপ দাবীকৃত অর্থের পরিমাণ ধারা ২৬ এর উপ-ধারা (১) এর অধীন নির্ধারিত পরিমাণের কম হইলে, ফেরত প্রদান মঞ্জুর করা হইবে না।

(২) ধারা ১০৩ এর অধীন সাময়িক পরিশোধের ক্ষেত্রে, উক্ত ৩ (তিন) বৎসর সময়, চূড়ান্ত শুল্ক নিরূপণের পর শুল্ক সমন্বয় করিবার তারিখ হইতে গণনা করা হইবে।

৪৪। **শুল্ক, কর ও চার্জ জমা এবং বিলম্বিত পেমেন্ট।**—(১) এসিস্ট্যান্ট কমিশনার অব কাস্টমস পদমর্যাদার নিম্নে নহেন এমন কাস্টমস কর্মকর্তা কোনো বাণিজ্যিক প্রতিষ্ঠান বা সরকারি সংস্থার ক্ষেত্রে যদি তাহার বিবেচনায় যথাযথ হয় তাহা হইলে কাস্টমস শুল্ক বা চার্জ যেভাবে এবং যখন প্রদেয় হয় সেইভাবে এবং তখন পরিশোধে বাধ্য করিবার পরিবর্তে উক্ত প্রতিষ্ঠান বা সংস্থার সহিত উক্ত শুল্ক এবং চার্জের চলতি হিসাব রক্ষণ করিতে পারিবেন, যে হিসাব এক মাসের অতিরিক্ত নহে এমন বিরতিতে নিষ্পত্তি করিতে হইবে, এবং উক্ত প্রতিষ্ঠান বা সংস্থা এমন পরিমাণ অর্থ জমা প্রদান করিবে বা জামানত দাখিল করিবে, যাহা সংশ্লিষ্ট কর্মকর্তার বিবেচনায় যে কোনো সময়ে সেই পরিমাণ শুল্ক বা চার্জ প্রদেয় তাহা মিটাইবার জন্য যথেষ্ট হয়।

(২) ধারা ১০৭ অনুসারে অথরাইজড ইকোনমিক অপারেটরের মর্যাদাপ্রাপ্ত কোনো ব্যক্তি, বিধি দ্বারা নির্ধারিত পদ্ধতিতে, পর্যাপ্ত গ্যারান্টি প্রদান সাপেক্ষে, তাহার অনুকূলে ছাড়কৃত পণ্যের ক্ষেত্রে প্রদেয় শুল্ক ও কর পেমেন্ট বিলম্বিত করিবার অনুরোধ জ্ঞাপন করিতে পারিবে, তবে উক্তরূপ বিলম্বের অনুরোধ উক্ত ছাড়ের তারিখ হইতে ১৪ (চৌদ্দ) দিনের অধিক হইবে না:

তবে শর্ত থাকে যে, আবেদনকারী, এই আইনের অধীন পেমেন্ট সংক্রান্ত বাধ্যবাধকতা স্বরিত প্রতিপালন করিয়াছেন মর্মে রেকর্ড প্রদর্শন সাপেক্ষে, পেমেন্ট বিলম্বিত করিবার অনুমোদন লাভ করিবেন।

### সপ্তম অধ্যায় প্রত্যর্পণ

৪৫। **কাস্টমস শুল্ক প্রত্যর্পণ।**—সহজে সনাক্তকরণযোগ্য আমদানিকৃত এমন কোনো পণ্য বাংলাদেশের বাহিরে যে কোনো স্থানে রপ্তানি করা হইলে, বিদেশগামী কোনো যানবাহনে রসদ বা মজুদ সামগ্রী হিসাবে ব্যবহারের জন্য নামানো হইলে, যথাযথ কর্মকর্তার তত্ত্বাবধানে ধ্বংস করা হইলে বা সরকারের নিকট পরিত্যাগ করিলে, উক্ত পণ্যের উপর প্রদত্ত শুল্কের অনধিক সাত-অষ্টমাংশ নিম্নবর্ণিত শর্ত সাপেক্ষে প্রত্যর্পণ হিসাবে ফেরত প্রদান করিতে হইবে—

(ক) বিধি দ্বারা নির্ধারিত ব্যতিক্রম এবং অনুমোদিত ব্যাপ্তি ব্যতীত, উক্ত পণ্য আমদানি এবং পরবর্তীতে রপ্তানি, ধ্বংস, বা পরিত্যাগ করিবার মধ্যবর্তী সময়ে বাংলাদেশে ব্যবহৃত হয় নাই;

- (খ) পদমর্যাদায় এসিস্ট্যান্ট কমিশনার অব কাস্টমসের নিম্নে নহেন এমন কর্মকর্তার সন্তুষ্টিমতে যেই পণ্য আমদানি করা হইয়াছে সেই একই পণ্য হিসেবে উহা কাস্টমস স্টেশনে সনাক্ত করা হয়; এবং
- (গ) উক্ত পণ্য কাস্টমস স্টেশনের নথিতে প্রদর্শিত আমদানির তারিখ হইতে দুই বৎসরের মধ্যে বা যদি উক্ত সময় যুক্তিসংগত কারণে বোর্ড বা কমিশনার অব কাস্টমস কর্তৃক বর্ধিত করা হয়, উক্ত বর্ধিত সময়ের মধ্যে রপ্তানি, ক্ষংস বা পরিত্যাগের জন্য ঘোষণা করা হইয়াছে:

তবে শর্ত থাকে যে, কমিশনার অব কাস্টমস উক্ত পণ্য আমদানির পর ৩ (তিন) বৎসরের অধিক সময় বর্ধিত করিবেন না।

**ব্যাখ্যা।**—এই ধারার উদ্দেশ্য পূরণকল্পে, যথাযথ কর্মকর্তা কর্তৃক ধারা ৯৩ এর অধীন যেই তারিখে রপ্তানির উদ্দেশ্যে কোন পণ্য ঘোষণা নিবন্ধিত করা হয়, সেই তারিখে উক্ত পণ্য রপ্তানির জন্য ঘোষণা করা হইয়াছে বলিয়া গণ্য হইবে।

৪৬। **সনাক্তযোগ্য নয় এমন পণ্যের ঘোষণা প্রদান এবং নির্ধারিত বৈদেশিক অঞ্চলের ক্ষেত্রে প্রত্যর্পণ নিষিদ্ধ করিবার ক্ষমতা।**—(১) বোর্ড, সময়ে সময়ে, সরকারি গেজেটে প্রজ্ঞাপন দ্বারা, এই অধ্যায়ের উদ্দেশ্য পূরণকল্পে যে সকল পণ্য সহজে সনাক্তযোগ্য নয় বলিয়া গণ্য হইবে তাহা ঘোষণা করিতে পারিবে।

(২) সরকার, সময়ে সময়ে, সরকারি গেজেটে প্রজ্ঞাপন দ্বারা, কোনো নির্ধারিত বিদেশী বন্দর অথবা এলাকায় কোনো পণ্য বা নির্দিষ্টকৃত পণ্য বা পণ্য শ্রেণী রপ্তানির উপর প্রত্যর্পণ প্রদান নিষিদ্ধ করিতে পারিবে।

৪৭। **প্রত্যর্পণ মঞ্জুর না করিবার ক্ষেত্রসমূহ।**—পূর্ববর্তী ধারাসমূহে যাহা কিছুই থাকুক না কেন, নিম্নবর্ণিত ক্ষেত্রে কোনো প্রত্যর্পণ মঞ্জুর করা যাইবে না, যথা:—

- (ক) যেই সকল পণ্য রপ্তানি কার্গো ঘোষণায় অন্তর্ভুক্ত করা আবশ্যিক এবং উহার অন্তর্ভুক্ত করা হয় নাই, সেই সকল পণ্যের উপর;
- (খ) কোনো একক চালানের ক্ষেত্রে প্রত্যর্পণ দাবীর অর্থ ২০০০ (দুই হাজার) টাকার নিম্নে হইলে; বা
- (গ) পণ্য রপ্তানি, ক্ষংস বা পরিত্যাগের সময় বা রপ্তানির তারিখ হইতে ছয় মাসের মধ্যে প্রত্যর্পণ দাবী করা এবং উহা প্রতিষ্ঠিত না করিলে।

৪৮। **প্রত্যর্পণ প্রদানের সময়।**—পণ্য রপ্তানির উপর ভিত্তি করিয়া কোনো প্রত্যর্পণের দাবী করা হইলে, উক্ত দাবী অযথা বিলম্ব ব্যতীত পরিশোধ করিতে হইবে, তবে পণ্যবাহী জাহাজ সমুদ্রে যাত্রা বা অন্যান্য যানবাহন বাংলাদেশ হইতে প্রস্থান না করা পর্যন্ত কোনোরূপ প্রত্যর্পণ প্রদান করা যাইবে না।

৪৯। **প্রত্যর্পণ দাবীদার কর্তৃক ঘোষণা।**—যথাযথ কর্মকর্তার তত্ত্বাবধানে যথাযথভাবে ক্ষংস, সরকারের নিকট পরিত্যাগ অথবা রপ্তানিকৃত কোনো পণ্যের জন্য প্রত্যর্পণ দাবীদার প্রত্যেক ব্যক্তি বা তাহার উপযুক্ত ক্ষমতাপ্রাপ্ত এজেন্ট এই মর্মে ঘোষণা প্রদান এবং স্বাক্ষর প্রদান করিবেন যে, উক্ত পণ্য প্রকৃত পক্ষে পরিত্যাগ, ক্ষংস বা রপ্তানি করা হইয়াছে এবং উহা বাংলাদেশের কোনো স্থানে পুনরায় অবতরণ করে নাই এবং পুনরায় অবতরণের অভিপ্রায় নাই এবং পরিত্যাগ, ক্ষংস বা রপ্তানির সময়ে উক্ত ব্যক্তি প্রত্যর্পণ পাইবার অধিকারী এবং তাহার এই অধিকার বহাল রহিয়াছে।

**অষ্টম অধ্যায়**  
**কাস্টমস গ্যারান্টি**

৫০। **গ্যারান্টির প্রকার।**—(১) এই আইন বা তদধীন প্রণীত বিধির অধীন প্রদেয় প্রয়োজনীয় বা অনুমোদিত গ্যারান্টি হইবে নিম্নরূপ, যথা:—

- (ক) বাংলাদেশী মুদ্রায় কৃত কোনো নগদ জমা, বা বোর্ড কর্তৃক স্বীকৃত নগদ জমার সমতুল্য অন্য কোনো প্রকারের পরিশোধ;
- (খ) বোর্ড কর্তৃক নির্ধারিত ফরমে কোনো জামিনদার কর্তৃক প্রদত্ত কোনো ব্যাংক গ্যারান্টি বা নিশ্চয়তা (surety);
- (গ) বোর্ড কর্তৃক নির্ধারিত ফরমে বণ্ড বা অন্যান্য প্রকারের গ্যারান্টি বা অঙ্গীকারনামা, যাহা এই মর্মে নিশ্চয়তা প্রদান করে যে, শুল্ক, কর বা অন্যান্য চার্জ পরিশোধ করা হইবে এবং এই আইন ও তদধীন প্রণীত বিধির অধীন উদ্ভূত অন্য কোনো বাধ্যবাধকতা যথাযথভাবে প্রতিপালিত হইবে।

(২) উপ-ধারা (১) এ উল্লিখিত গ্যারান্টিসমূহের মধ্যে কোন প্রকারের গ্যারান্টি প্রদান করিতে হইবে এবং উক্ত গ্যারান্টি কোনো নির্দিষ্ট মেয়াদের জন্য বহাল রাখিতে হইবে, উহা কমিশনার অব কাস্টমস নির্ধারণ করিবেন।

৫১। **গ্যারান্টিদাতা।**—(১) বাংলাদেশ পক্ষভুক্ত হইয়াছে এমন কোন আন্তর্জাতিক চুক্তির অধীন ভিন্নরূপ কিছু না থাকিলে, কোনো গ্যারান্টিদাতা বাংলাদেশে প্রতিষ্ঠিত কোনো তৃতীয় পক্ষ এবং বোর্ড কর্তৃক অনুমোদিত হইতে হইবে।

(২) গ্যারান্টিদাতা এই আইন ও তদধীন প্রণীত বিধির অধীন প্রিন্সিপালের বাধ্যবাধকতা প্রতিপালন এবং প্রতিপালিত হয় নাই এমন দায় (undischarged obligation) এর নিমিত্তে জামানতকৃত অর্থ পরিশোধের জন্য যৌথভাবে এবং পৃথকভাবে দায়ী থাকিবেন মর্মে লিখিত অঙ্গীকার করিবেন।

(৩) যদি গ্যারান্টিদাতা বা প্রস্তাবিত গ্যারান্টি হইতে ইহা নিশ্চিত না হয় যে, নির্ধারিত সময়ের মধ্যে জামানতকৃত অর্থ পরিশোধিত হইবে, তাহা হইলে বোর্ড উক্ত গ্যারান্টিদাতা বা গ্যারান্টিকে অনুমোদন প্রদানে অস্বীকৃতি জ্ঞাপন করিতে পারিবে।

৫২। **সমষ্টিত (comprehensive) গ্যারান্টি।**—(১) গ্যারান্টি প্রদানের আবশ্যিকতা রহিয়াছে এমন কোনো ব্যক্তির অনুরোধের প্রেক্ষিতে, কমিশনার অব কাস্টমস এই আইন বা বিধির অধীন দুই বা ততোধিক কার্যক্রম, ঘোষণা বা কাস্টমস পদ্ধতি সম্পর্কিত বাধ্যবাধকতা প্রতিপালন নিশ্চিত করিবার জন্য সমষ্টিত গ্যারান্টির অনুমতি প্রদান করিতে পারিবে।

(২) উপ-ধারা (১) এর অধীন প্রদত্ত অনুমতি কেবল নিম্নলিখিত শর্তসমূহ পূরণ করিয়াছে এইরূপ ব্যক্তিকে প্রদান করা যাইবে, যথা:—

- (ক) বাংলাদেশে প্রতিষ্ঠিত হইতে হইবে;
- (খ) কাস্টমস এবং কর সংক্রান্ত বাধ্যবাধকতা প্রতিপালনের রেকর্ড থাকিতে হইবে;
- (গ) কাস্টমস পদ্ধতির একজন নিয়মিত ব্যবহারকারী বা উক্ত পদ্ধতির সহিত সম্পর্কিত বাধ্যবাধকতা পূরণের সক্ষমতা রহিয়াছে মর্মে কমিশনার অব কাস্টমস অবহিত থাকেন।

৫৩। **গ্যারান্টির পর্যায়।**— (১) কমিশনার অব কাস্টমস নিম্নলিখিত বিষয়সমূহ বিবেচনাপূর্বক ঝুঁকি নিরূপণের ভিত্তিতে কোনো গ্যারান্টির প্রয়োজনীয় পর্যায় নির্ধারণ করিবেন, যথা:—

- (ক) সংশ্লিষ্ট ব্যক্তি কর্তৃক যথাসময়ে শুল্ক ও অন্যান্য চার্জ পরিশোধের পূর্ব-রেকর্ড;
- (খ) সংশ্লিষ্ট ব্যক্তি কর্তৃক আমদানি পণ্য হ্যান্ডলিং (comprehensive), স্থানান্তর (movement) এবং ওয়্যারহাউসিং এর জন্য কাস্টমস পদ্ধতি এবং এই আইন ও তদধীন প্রণীত বিধির প্রয়োগ ব্যবস্থা (enforcement) ও প্রশাসন সম্পর্কিত অন্যান্য বাধ্যবাধকতা প্রতিপালনের পূর্ব-রেকর্ড;
- (গ) গ্যারান্টির জন্য বিবেচ্য লেনদেনের সহিত জড়িত পণ্যের মূল্য ও প্রকৃতি এবং শুল্ক ও করের পরিমাণ;
- (ঘ) কাস্টমস কর্মকর্তা কর্তৃক সংশ্লিষ্ট লেনদেনের উপর প্রয়োগযোগ্য তদারকির মাত্রা ও ধরন;
- (ঙ) জামানতকৃত অর্থ পরিশোধসহ বন্ডের শর্তাবলী প্রতিপালনে প্রতিষ্ঠান প্রিন্সিপালের (principal) পূর্ব-রেকর্ড; এবং
- (চ) অন্যান্য প্রাসঙ্গিক বিষয়াদি।

(২) ঝুঁকি নিরূপণের মাধ্যমে ন্যায্যতা প্রতিপাদিত হইলে, কাস্টমস কমিশনার গ্যারান্টি প্রদানের আবশ্যিকতা হইতে অব্যাহতি প্রদান করিতে পারিবেন।

৫৪। **অতিরিক্ত বা প্রতিস্থাপন গ্যারান্টি।**— যেই ক্ষেত্রে কমিশনার অব কাস্টমস এর নিকট প্রতীয়মান হয় যে, প্রদত্ত গ্যারান্টি নির্ধারিত মেয়াদের মধ্যে শুল্ক, কর বা অন্যান্য চার্জ পরিশোধসহ এই আইন বা তদধীন প্রণীত বিধির অধীন প্রিন্সিপালের বাধ্যবাধকতা প্রতিপালনের নিশ্চয়তা প্রদান করে না বা নিশ্চয়তা প্রদানের জন্য নিশ্চিত বা পর্যাপ্ত নহে, সেই ক্ষেত্রে তিনি অতিরিক্ত গ্যারান্টি বা মূল গ্যারান্টির স্থলে নতুন গ্যারান্টি প্রদানের বাধ্যবাধকতা আরোপ করিবেন।

৫৫। **গ্যারান্টি অবমুক্ত এবং চার্জ বাতিলকরণ।**— (১) কমিশনার অব কাস্টমস অথবা তৎকর্তৃক ক্ষমতাপ্রাপ্ত কোনো যথাযথ কর্মকর্তা এই অধ্যায়ের বিধান অনুযায়ী কোনো গ্যারান্টি অবমুক্ত করিবার অনুমতি প্রদান করিতে পারিবেন, অথবা গ্যারান্টির কোনো শর্ত ভঙ্গ হইবার ক্ষেত্রে নিম্নতর পরিমাণ (lesser amount) অর্থ বা জরিমানা পরিশোধ সাপেক্ষে তাহার বিবেচনা মতে অন্য কোনো প্রকার শর্ত ও সীমা আরোপ সাপেক্ষে উক্ত গ্যারান্টির উপর আরোপিত কোনো চার্জ বাতিল করিতে পারিবেন।

(২) কোনো গ্যারান্টি হইতে জামানতকৃত দায় এই আইন ও বিধি অনুযায়ী নিষ্পত্তি হইলে, কমিশনার অব কাস্টমস বা তৎকর্তৃক ক্ষমতাপ্রাপ্ত অন্য কোনো কাস্টমস কর্মকর্তা অবিলম্বে উক্ত গ্যারান্টি অবমুক্ত করিবেন বা নগদ জমা ফেরত প্রদান করিবেন:

তবে শর্ত থাকে যে, উক্ত দায় আংশিক নিষ্পত্তি হইলে জামানতকৃত অর্থের সংশ্লিষ্ট অংশ বা আংশিক উদ্ধৃত হইলে উক্ত দায় সংশ্লিষ্ট অর্থ ব্যতীত জামানতের অবশিষ্ট অংশ সংশ্লিষ্ট ব্যক্তির অনুরোধের প্রেক্ষিতে তদানুযায়ী অবমুক্ত করিতে হইবে, যদি সংশ্লিষ্ট অর্থ উক্তরূপ কার্যক্রমের ন্যায্যতাকে প্রতিপাদন করে।

(৩) অভিন্ন, যুক্তিসংগত ও ন্যায্যানুগ সিদ্ধান্ত নিশ্চিত করিবার উদ্দেশ্যে, সরকার, গ্যারান্টি অবমুক্তকরণ এবং উহার অধীন আরোপিত চার্জ বাতিলের শর্তাবলী নির্ধারণের মানদণ্ড প্রতিষ্ঠাকল্পে বিধি প্রণয়ন করিবে।

**নবম অধ্যায়**  
**যানবাহনের আগমন এবং প্রস্থান**

৫৬। **কাস্টমস এর নিয়ন্ত্রণাধীন পণ্য।**—(১) শুল্ক ও কর প্রদানের জন্য, দায়বদ্ধ হটক বা না হটক, বাংলাদেশে প্রবেশ করে বা বাংলাদেশ হইতে বাহিরে যায় এমন সকল পণ্য কাস্টমস এর নিয়ন্ত্রণাধীন থাকিবে।

(২) আমদানিকৃত পণ্য বাংলাদেশে আগমনের সময় হইতে এই আইন অনুসারে দেশীয় ভোগের জন্য ছাড় বা সরকারের নিকট সমর্পণ না করা পর্যন্ত কাস্টমস এর নিয়ন্ত্রণাধীন থাকিবে।

(৩) আমদানিকৃত পণ্য কাস্টমস ওয়্যারহাউস, অস্থায়ী আমদানি, ইনওয়ার্ড প্রসেসিং, ট্রানশিপমেন্ট, ট্রানজিট বা মজুদের জন্য কাস্টমস পদ্ধতিতে ন্যস্ত থাকিলে, উক্ত পণ্য কাস্টমস এর নিয়ন্ত্রণাধীন থাকিবে এবং কেবলমাত্র উক্ত পণ্য রপ্তানি বা এই আইনের অধীন অনুমোদিত সংশ্লিষ্ট পদ্ধতিতে দেশীয় ভোগের জন্য ছাড় বা সরকারের নিকট পরিত্যাগ করা হইলে উক্ত নিয়ন্ত্রণ সমাপ্ত হইবে।

(৪) রপ্তানিতব্য পণ্য কোনো কাস্টমস এলাকায় আনয়নের সময় হইতে বাংলাদেশের বাহিরে কোনো স্থানে রপ্তানি বা সরকারের নিকট সমর্পণ না করা পর্যন্ত কাস্টমস এর নিয়ন্ত্রণাধীন থাকিবে।

(৫) সরকারী গেজেট প্রজ্ঞাপনের মাধ্যমে স্ক্যানিং করা হইতে অব্যাহতি প্রদান করা হয় নি এমন কোন পণ্য ইলেক্ট্রনিক পদ্ধতিতে স্ক্যানিং করা ব্যতিত দেশীয় ভোগের জন্য বা বাংলাদেশের বাহিরে কোন স্থানে রপ্তানির জন্য কাস্টমস এর নিয়ন্ত্রণ হইতে ছাড় প্রদান করা যাইবে না।

৫৭। **যানবাহন এবং কার্গো ঘোষণা।**—(১) বোর্ড কর্তৃক নির্ধারিত ব্যতিক্রম সাপেক্ষে, বাংলাদেশের বাহির হইতে বাংলাদেশে আগমন করিবে এমন যানবাহনের ভারপ্রাপ্ত ব্যক্তি (person-in-charge), নিম্নলিখিত বিষয়ে বোর্ড কর্তৃক নির্ধারিত ফরম, পদ্ধতি ও সময়সীমার মধ্যে একটি ঘোষণা দাখিল করিবেন, যথা:—

- (ক) যানবাহন আগমনের আসন্ন সময়;
- (খ) ইহার সমুদ্রযাত্রা;
- (গ) ইহার নাবিক (crew);
- (ঘ) ইহার যাত্রী;
- (ঙ) বাংলাদেশে খালাস করিবার লক্ষ্যে হটক বা না হটক, বাংলাদেশে আনয়ন করা হইবে, এইরূপ সকল পণ্যের একটি কার্গো ঘোষণা; এবং
- (চ) যানবাহন আগমনের কাস্টমস স্টেশন।

(২) উপ-ধারা (১) এ উল্লিখিত কোনো যানবাহনের মালিক বা পরিচালনাকারী বা তাহার এজেন্ট, উক্ত যানবাহনের ভারপ্রাপ্ত ব্যক্তির পক্ষে উক্ত উপ-ধারা অনুযায়ী প্রয়োজনীয় ঘোষণা দাখিল করিতে পারিবেন।



(৩) যথাযথ কর্মকর্তা, কোনো যানবাহনের ভারপ্রাপ্ত ব্যক্তি, মালিক বা পরিচালনাকারী বা তাহাদের এজেন্টকে, কোনো সংশোধিত বা সম্পূরক ঘোষণা দাখিল সাপেক্ষে, উপ-ধারা (১) এর অধীন দাখিলকৃত ঘোষণা সংশোধনের অনুমতি প্রদান করিবে:

তবে শর্ত থাকে যে, নিম্নলিখিত ক্ষেত্রে কোনো সংশোধনের অনুমতি প্রদান করা যাইবে না, যথা:—

- (ক) কোন কাস্টমস কর্মকর্তা কর্তৃক, কোনো যানবাহনের ভারপ্রাপ্ত ব্যক্তি, মালিক বা পরিচালনাকারী বা তাহাদের এজেন্টকে যদি এই মর্মে অবহিত করা হয় যে, উক্ত পণ্য পরীক্ষা করা হইবে;
- (খ) কাস্টমস কর্মকর্তা কর্তৃক উক্ত সংশোধনের বিষয়টি ইতিমধ্যে অশুদ্ধ বলিয়া প্রতিষ্ঠিত হইয়াছে;
- (গ) আগমনের স্থান হইতে উক্ত পণ্য অপসারণ করিবার অনুমতি প্রদান করা হইয়াছে; বা
- (ঘ) উক্ত পণ্যের জন্য ইতোমধ্যে একটি পণ্য ঘোষণা দাখিল করা হইয়াছে।

৫৮। **যানবাহন আগমনের স্থান।**—(১) বাংলাদেশের বাহির হইতে বাংলাদেশে প্রবেশকারী যানবাহনের ভারপ্রাপ্ত ব্যক্তি (person-in-charge) কাস্টমস স্টেশন ব্যতীত অন্য কোনো স্থানে যানবাহনটি ভিড়াইবেন না বা অবতরণ করাইবেন না, অথবা ভিড়াইবার বা অবতরণ করাইবার অনুমতি প্রদান করিবেন না।

(২) স্থলপথে বাংলাদেশে প্রবেশকারী যানবাহনের ভারপ্রাপ্ত ব্যক্তি, বোর্ড কর্তৃক নির্ধারিত ব্লুটে বাংলাদেশের যেই স্থানে সীমান্ত অতিক্রম করিবেন, তৎক্ষণাৎ উক্ত স্থানের নিকটবর্তী কাস্টমস স্টেশনে তাহার যানবাহনসহ অগ্রসর হইবেন।

(৩) বাংলাদেশে আগমনের পর, কোনো যানবাহন যথাযথ কর্মকর্তার নিকট হইতে অনুমতি প্রাপ্ত না হইলে আগমনের বন্দর, স্থান বা বিমানবন্দর হইতে প্রস্থান করিবে না বা কোনো পণ্য খালাস করিবে না।

(৪) উপ-ধারা (১), (২) ও (৩) এ যাহা কিছুই থাকুক না কেন, সন্মাস ও ব্যাপক বিধ্বংসী অস্ত্র বিস্তার ও তার অর্থায়ন সন্দেহে আন্তর্জাতিক সংস্থা কর্তৃক তালিকাভুক্ত আমদানি বা রপ্তানি পণ্য বহনকারী কোন বাহন বাংলাদেশের কোন কাস্টমস স্টেশনে ভিড়াইবার বা অবতরণ করাইবার বা বাংলাদেশ হইতে রপ্তানির জন্য প্রস্থান করিবার অনুমতি প্রদান করা যাইবে না।

৫৯। **দৈব দুর্বিপাক।**—যদি কোনো দুর্ঘটনা, খারাপ আবহাওয়া বা অন্য কোনো অনিবার্য কারণে কোনো যানবাহনের ভারপ্রাপ্ত ব্যক্তি (person-in-charge) ধারা ৫৮ তে উল্লিখিত বাধ্যবাধকতা পরিপালনে ব্যর্থ হন, তাহা হইলে উক্ত ভারপ্রাপ্ত ব্যক্তি নিম্নরূপ কার্যক্রম গ্রহণ করিবেন, যথা:—

- (ক) যানবাহনের আগমন নিকটতম কাস্টমস কর্মকর্তা অথবা থানার ভারপ্রাপ্ত কর্মকর্তার নিকট অবিলম্বে রিপোর্ট করিবেন এবং চাহিদামত উক্ত যানবাহনের কার্গোবুক অথবা মেনিফেস্ট অথবা লগ-বুক তাহার নিকট উপস্থাপন করিবেন;
- (খ) উক্ত কর্মকর্তার সম্মতি ব্যতীত যানবাহনটিতে পরিবহনকৃত কোনো পণ্য খালাসের অথবা কোনো ক্রু-সদস্য অথবা যাত্রীকে ঐ এলাকা হইতে প্রস্থানের অনুমতি দিবেন না;

- (গ) উক্ত কর্মকর্তা কর্তৃক কোনো পণ্যের ক্ষেত্রে প্রদত্ত যে কোনো নির্দেশ পরিপালন করিবেন; এবং কোনো যাত্রী বা ক্রু-সদস্য এইরূপ কোনো কর্মকর্তার সম্মতি ব্যতীত যানবাহনটির এলাকা ত্যাগ করিবেন না:

তবে শর্ত থাকে যে, যানবাহনটির যাত্রী অথবা ক্রু-সদস্যদের স্বাস্থ্য, নিরাপত্তা বা জীবন অথবা সম্পত্তি রক্ষার প্রয়োজন হইলে এই ধারার কোনো কিছুই উক্ত যানবাহন এর সংলগ্ন এলাকা হইতে কোনো যাত্রী অথবা ক্রু-সদস্যের প্রস্থান বহির্গমন অথবা যানবাহনটি হইতে কোনো পণ্য খালাসকে বিরত করিবে না।

৬০। **আগমন এবং অন্তর্মুখী (inward) প্রতিবেদন।**—(১) এই আইন বা তদধীন প্রণীত বিধিতে ভিন্নরূপ কিছু না থাকিলে, বাংলাদেশের বাহিরের কোনো স্থান হইতে বাংলাদেশে প্রবেশকারী কোনো যানবাহন বা কাস্টমস নিয়ন্ত্রণের অধীন পণ্য বহনকারী উক্ত যানবাহন বা অন্য কোনো যানবাহনের ভারপ্রাপ্ত ব্যক্তি, মালিক, পরিচালনাকারী, বা ক্ষেত্রমত, তাহাদের এজেন্ট, বোর্ড কর্তৃক নির্ধারিত স্থান, সময়, ফরম ও পদ্ধতিতে সহায়ক দলিল ও বিবরণ সম্বলিত পণ্য আগমন বিষয়ে অন্তর্মুখী (inward) প্রতিবেদন যথাযথ কর্মকর্তার নিকট প্রদান করিবেন এবং অবহিত করিবেন:

তবে শর্ত থাকে যে, ধারা ৫৭ এর উপ-ধারা (১) অনুযায়ী ইতোমধ্যে ঘোষিত তথ্য, এই উপ-ধারায় উল্লিখিত বিবরণ ও সহায়ক দলিলের অন্তর্ভুক্ত করিবার প্রয়োজন হইবে না।

(২) কোনো যানবাহনের ভারপ্রাপ্ত ব্যক্তি (person-in-charge), মালিক, পরিচালনাকারী, বা ক্ষেত্রমত, তাহাদের এজেন্ট—

- (ক) যথাযথ কর্মকর্তার চাহিদামত জাহাজে বোঝাইকৃত কার্গো বা পণ্যের প্রতিটি অংশের জন্য বিল অব লেডিং বা বিল অব ফ্রেইট বা উহাদের কপি, জার্নি লগ-বুক এবং বন্দর ছাড়পত্র, যেই স্থান হইতে যানবাহনটি আসিয়াছে বলিয়া বর্ণিত হইয়াছে, সেই স্থানে প্রদত্ত ডকেট বা অন্যান্য কাগজপত্র উক্ত কর্মকর্তার নিকট অর্পণ করিবেন; এবং
- (খ) কোন কাস্টমস কর্মকর্তা কর্তৃক যানবাহন, বহনকৃত পণ্য, ক্রু, এবং সমুদ্রযাত্রা সম্পর্কে জিজ্ঞাসিত সকল প্রশ্নের উত্তর প্রদান করিবেন; এবং
- (গ) কাস্টমস এলাকার মধ্যে উক্ত যানবাহনের চলাচল এবং উহা হইতে পণ্য খালাস বা ক্রু বা যাত্রীদের অবতরণ সম্পর্কে কোন কাস্টমস কর্মকর্তা কর্তৃক প্রদত্ত নির্দেশনা মানিয়া চলিবেন।

৬১। **রপ্তানি পণ্য বোঝাই করিবার পূর্বে বহির্গমন এন্ট্রি বা পণ্য বোঝাইয়ের আদেশ গ্রহণ।**—(১) যথাযথ কর্মকর্তা ভিন্নরূপ নির্দেশনা প্রদান না করিলে, যাত্রী ব্যাগেজ এবং মেইল ব্যাগ ব্যতীত অন্য কোনো পণ্য কোনো যানবাহনে বোঝাই করা যাইবে না, যতক্ষণ পর্যন্ত না উক্ত পণ্য এই আইন অনুসারে রপ্তানি পদ্ধতির অধীন ন্যস্ত করা হয়; এবং—

- (ক) নৌযানের ক্ষেত্রে, উক্ত নৌযান বহির্গমন এন্ট্রির জন্য যথাযথ কর্মকর্তার নিকট নৌযানের মাস্টার কর্তৃক স্বাক্ষরিত লিখিত আবেদন করা হয় এবং উক্ত এন্ট্রির জন্য উহার উপর আদেশ প্রদান করা হয়; এবং

(খ) অন্য কোনো যানবাহনের ক্ষেত্রে, যানবাহনে পণ্য বোঝাই করিবার অনুমতি পাওয়ার জন্য যথাযথ কর্মকর্তার নিকট যানবাহনের ভারপ্রাপ্ত ব্যক্তি কর্তৃক স্বাক্ষরিত লিখিত আবেদন করা হয় এবং উহার উপর পণ্য বোঝাইয়ের আদেশ প্রদান করা হয়।

(২) এই ধারার অধীন পেশকৃত প্রত্যেক আবেদনপত্রে বোর্ড কর্তৃক নির্ধারিত বিবরণ উল্লেখ থাকিতে হইবে।

৬২। **বন্দর-ছাড়পত্র ব্যতীত কোনো নৌযান প্রস্থান না করা।**—(১) কোনো নৌযান, বোঝাইকৃত অথবা খালি যে অবস্থায় থাকুক না কেন, যথাযথ কর্মকর্তা কর্তৃক বন্দর ছাড়পত্র মঞ্জুর না করা পর্যন্ত কোনো কাস্টমস বন্দর হইতে প্রস্থান করিবে না।

(২) নৌযানের মাস্টার বন্দর ছাড়পত্র পেশ না করিলে কোন পাইলট সাগরমুখী কোনো জাহাজের দায়িত্ব গ্রহণ করিবেন না।

৬৩। **নৌযান ব্যতীত অন্য কোনো যানবাহন বিনা অনুমতিতে প্রস্থান না করা।**—যথাযথ কর্মকর্তা কর্তৃক লিখিত অনুমতি প্রদান না করা পর্যন্ত নৌযান ব্যতীত অন্য কোনো যানবাহন কাস্টমস স্টেশন অথবা কাস্টমস বিমানবন্দর হইতে প্রস্থান করিবে না।

৬৪। **নৌযানের বন্দর ছাড়পত্রের জন্য আবেদন।**—(১) বন্দর ছাড়পত্রের জন্য প্রত্যেক আবেদনপত্র নৌযানের মাস্টার কর্তৃক নৌযানের প্রস্তাবিত প্রস্থানের অন্যান্য চব্বিশ ঘণ্টা পূর্বে পেশ করিতে হইবে:

তবে শর্ত থাকে যে, কমিশনার অব কাস্টমস অথবা তৎকর্তৃক এতদুদ্দেশ্যে ক্ষমতাপ্রাপ্ত কোনো কর্মকর্তা সুনির্দিষ্ট কারণ উল্লেখপূর্বক উক্ত আবেদনপত্র আরও কম সময়ে পেশ করিবার অনুমতি প্রদান করিতে পারিবেন :

আরও শর্ত থাকে যে, যখন মাস্টার একজন নিবন্ধিত ব্যবহারকারী হন তখন তিনি এই উপ-ধারার অধীন আবেদনপত্রটি কাস্টমস কম্পিউটার সিস্টেমে প্রেরণের মাধ্যমে পেশ করিতে পারিবেন এবং এইভাবে পেশকৃত আবেদনপত্র তৎকর্তৃক যথাযথভাবে স্বাক্ষরিত হইয়াছে বলিয়া গণ্য হইবে।

(২) বন্দর ছাড়পত্রের জন্য আবেদন করিবার সময়ে মাস্টার—

(ক) বোর্ড কর্তৃক, সময়ে সময়ে নির্ধারিত ফরমে, নৌযানে রপ্তানি কার্গো ঘোষণা করা হইবে এইরূপ সকল পণ্যের বর্ণনা সম্বলিত উক্ত মাস্টার কর্তৃক স্বাক্ষরিত দুই প্রস্থ রপ্তানি কার্গো ঘোষণা যথাযথ কর্মকর্তার নিকট অর্পণ করিবেন এবং উহাতে আমদানি কার্গো ঘোষণায় প্রদর্শিত সকল পণ্য এবং রসদ ও ভান্ডার, যাহা অবতরণ করা হয় নাই অথবা নৌযানে ভোগ করা হয় নাই অথবা ট্রানশিপ করা হয় নাই, তাহা পৃথক পৃথকভাবে প্রদর্শন করিবেন;

(খ) কমিশনার অব কাস্টমস এর সাধারণ নির্দেশাবলীর আলোকে যথাযথ কর্মকর্তা ও চাহিদা মোতাবেক রপ্তানি পণ্য ঘোষণা অথবা অন্যান্য দলিলপত্র দাখিল করিবেন; এবং

(গ) যথাযথ কর্মকর্তা জাহাজের প্রস্থান এবং গন্তব্যস্থান সম্পর্কে যে সকল প্রশ্ন করিবেন তাহার উত্তর প্রদান করিবেন।

(৩) ধারা ৫৭ এর উপ-ধারা (৩) এর কার্গো ঘোষণার সংশোধন সম্পর্কিত বিধানাবলী, প্রয়োজনীয় অভিযোজন সাপেক্ষে, এই ধারা এবং ধারা ৬৬ এর অধীন রপ্তানি কার্গো ঘোষণা দাখিলের ক্ষেত্রেও প্রযোজ্য হইবে।

৬৫। **নৌযান ব্যতীত অন্যান্য যানবাহন প্রস্থানের পূর্বে দলিলপত্র অর্পণ এবং প্রশ্নের উত্তর প্রদান।**—নৌযান ব্যতীত অন্য কোনো যানবাহনের ভারপ্রাপ্ত ব্যক্তি অথবা তাহার যথাযথ ক্ষমতাপ্রাপ্ত এজেন্ট—

- (ক) বোর্ড কর্তৃক, সময়ে সময়ে নির্ধারিত ফরমে, উক্ত যানে যে সকল পণ্য রপ্তানি হইবে তাহা উল্লেখপূর্বক তাহার অথবা তাহার এজেন্টের স্বাক্ষরযুক্ত দুই প্রস্থ রপ্তানি কার্গো ঘোষণা যথাযথ কর্মকর্তার নিকট অর্পণ করিবেন এবং উক্ত যানবাহনের আমদানি কার্গো ঘোষণায় প্রদর্শিত সকল পণ্য এবং রসদ ও ভান্ডার, যাহা অবতরণ করা হয় নাই অথবা যানবাহনে ভোগ করা হয় নাই অথবা ট্রানশিপ করা হয় নাই, তাহা পৃথক পৃথকভাবে প্রদর্শন করিবেন ;
- (খ) কমিশনার অব কাস্টমস এর সাধারণ নির্দেশাবলীর আলোকে যথাযথ কর্মকর্তার চাহিদা মোতাবেক রপ্তানি পণ্য ঘোষণা অথবা অন্যান্য দলিলপত্র দাখিল করিবেন; এবং
- (গ) যথাযথ কর্মকর্তা যানবাহনটির প্রস্থান এবং গন্তব্যস্থান সম্পর্কে যে সকল প্রশ্ন করিবেন তাহার উত্তর প্রদান করিবেন।

৬৬। **নৌযানের বন্দর ছাড়পত্র বা অন্যান্য যানবাহনের প্রস্থানের অনুমতি প্রত্যাখানের ক্ষমতা।**—(১) যথাযথ কর্মকর্তা নৌযানের বন্দর ছাড়পত্র অথবা অন্যান্য যানবাহনের প্রস্থান সম্পর্কিত অনুমতি প্রদান করিতে প্রত্যাখান করিতে পারিবেন, যতক্ষণ পর্যন্ত না—

- (ক) ধারা ৭৬ অথবা, ক্ষেত্রমত, ধারা ৭৭ এর বিধান পরিপালন করা হয় ;
  - (খ) উক্ত নৌযানের ক্ষেত্রে উহার মালিক অথবা মাস্টার কর্তৃক অথবা অন্য যানবাহনের ক্ষেত্রে উহার মালিক অথবা ভারপ্রাপ্ত ব্যক্তি কর্তৃক নৌযানের জন্য প্রদেয় স্টেশন অথবা বন্দরের সকল পাওনা, অন্যান্য চার্জ বা জরিমানা এবং উহাতে বোঝাইকৃত পণ্যসমূহের উপর প্রদেয় সকল শুল্ক, কর এবং অন্যান্য পাওনা যথাযথভাবে পরিশোধ করা হয় অথবা উক্ত কর্মকর্তা যেরূপ নির্দেশ করেন সেইরূপ গ্যারান্টি দ্বারা অথবা সেইরূপ হারে অর্থ জমা প্রদান দ্বারা নিশ্চিত করা হয়;
  - (গ) যেইক্ষেত্রে দফা (ক) ও (খ) এর বর্ণনামতে প্রদেয় সকল শুল্ক, কর এবং অন্যান্য পাওনা পরিশোধ ব্যতীত অথবা পরিশোধের নিশ্চয়তা প্রদান ব্যতীত অথবা এই আইন বা তদধীন প্রণীত বিধি বা আপাতত বলবৎ পণ্য রপ্তানি সম্পর্কিত অন্য কোনো আইনের বিধান লংঘন করিয়া রপ্তানি পণ্য বোঝাই করা হইয়াছে, সেইক্ষেত্রে—
- (অ) উক্ত পণ্য নামানো হয়; অথবা—

(আ) যথাযথ কর্মকর্তা যদি এই মর্মে সন্তুষ্ট হন যে, উক্ত পণ্য নামানো বাস্তবসম্মত নয়, তাহা হইলে পণ্য বাংলাদেশে ফেরত আনার জন্য ভারপ্রাপ্ত ব্যক্তি বা তাহার যথাযথ ক্ষমতাপ্রাপ্ত এজেন্ট অঙ্গীকারনামা প্রদান করেন অথবা উক্ত কর্মকর্তা যেরূপ নির্দেশ করেন, সেইরূপ গ্যারান্টি বা সেইরূপ পরিমাণ অর্থ জমা প্রদান করেন;

(ঘ) এজেন্ট, যদি থাকেন, যথাযথ কর্মকর্তার নিকট এই মর্মে লিখিত ঘোষণা প্রদান করেন যে, যদি কোন যানবাহনে এমন কোনো পণ্য পাওয়া যায়, যাহা কার্গো ঘোষণায় অন্তর্ভুক্ত বা বর্ণনা করা হয় নাই অথবা কার্গো ঘোষণায় অন্তর্ভুক্ত রহিয়াছে এমন কোনো পণ্য উক্ত যানবাহনে পাওয়া না যায় বা কম পাওয়া যায়, এবং যথাযথ কর্মকর্তার সন্তুষ্টিতে উক্ত অতিরিক্ত বা ঘাটতির কৈফিয়ত প্রদান করা না হয়, তাহা হইলে তিনি, ক্ষেত্রমত, ধারা ১৮১ এর উপ-ধারা (১) এর টেবিলের কলাম (১) এ উল্লিখিত ক্রমিক নম্বর ১১ এর অধীন আরোপনীয় যে কোনো জরিমানার জন্য দায়বদ্ধ থাকিবেন, এবং উহা সম্পাদন করিবার জন্য জামানত পেশ করেন;

(ঙ) এজেন্ট, যদি থাকেন, যথাযথ কর্মকর্তার নিকট এই মর্মে লিখিত ঘোষণা প্রদান করেন যে, আমদানি পণ্যের অন্তর্ভুক্ত কোনো পণ্যের মালিক কর্তৃক উক্ত পণ্যের ক্ষতি হওয়ার অথবা কম পণ্য পাওয়ার (short delivery) দাবী প্রতিষ্ঠিত হইলে তিনি উহা পূরণের জন্য দায়বদ্ধ থাকিবেন।

(২) উপ-ধারা (১) এর দফা (ঘ) এর অধীন ঘোষণা প্রদানকারী এজেন্ট ধারা ১৮১ এর উপ-ধারা (১) এর টেবিলের কলাম (১) এ উল্লিখিত ক্রমিক নম্বর ১১ অধীন আরোপিত সকল জরিমানার জন্য দায়বদ্ধ থাকিবেন এবং উপ-ধারা (১) এর দফা (ঙ) এর অধীন ঘোষণা প্রদানকারী এজেন্ট উক্ত ঘোষণায় বর্ণিত সকল দাবী পূরণ করিতে বাধ্য থাকিবেন।

৬৭। **বন্দর ছাড়পত্র বা প্রস্থানের অনুমতি প্রদান।**—যদি যথাযথ কর্মকর্তা এই মর্মে সন্তুষ্ট হন যে, এই অধ্যায়ের যানবাহন সম্পর্কিত বিধানাবলী যথাযথভাবে পরিপালিত হইয়াছে, তাহা হইলে তিনি নৌযানের মাস্টারকে বন্দর ছাড়পত্র এবং অন্য যানবাহনের ভারপ্রাপ্ত ব্যক্তিকে প্রস্থানের অনুমতি মঞ্জুর করিবেন এবং একই সময়ে তৎকর্তৃক প্রতিস্বাক্ষরিত কার্গো ঘোষণার একটি কপি মাস্টারকে অথবা ভারপ্রাপ্ত কর্মকর্তাকে ফেরত প্রদান করিবেন।

৬৮। **এজেন্টের জামানতের ভিত্তিতে বন্দর ছাড়পত্র বা প্রস্থানের অনুমতি প্রদান।**—ধারা ৬৬ বা ৬৭ তে যাহা কিছুই থাকুক না কেন, বিধি দ্বারা নির্ধারিত শর্ত সাপেক্ষে, যথাযথ কর্মকর্তা নৌযানের ক্ষেত্রে বন্দর ছাড়পত্র এবং অন্যান্য যানবাহনের ক্ষেত্রে প্রস্থানের অনুমতি প্রদান করিতে পারিবেন, যদি ধারা ৬৪ বা, ক্ষেত্রমত, ধারা ৬৫ তে নির্ধারিত রপ্তানি কার্গো ঘোষণা এবং অন্যান্য দলিলপত্র উক্ত মঞ্জুরীর তারিখ হইতে ১০ (দশ) দিবসের মধ্যে যথাযথভাবে অর্পণ করিবার জন্য এজেন্ট এমন জামানত পেশ করেন যাহা উক্ত কর্মকর্তার নিকট পর্যাপ্ত মনে হয়।

৬৯। **বন্দর ছাড়পত্র বা প্রস্থানের অনুমতি বাতিল করিবার ক্ষমতা।**—(১) এই আইন, বিধি বা অন্য কোনো আইনের বিধান পরিপালন নিশ্চিত করিবার উদ্দেশ্যে যদি কোন নৌযান কোনো বন্দর এলাকার মধ্যে থাকে বা অন্য কোনো যানবাহন কোনো স্টেশন বা বিমানবন্দর বা বাংলাদেশ ভূখন্ডের অভ্যন্তরে থাকে, তাহা হইলে যে কোনো সময়ে যথাযথ কর্মকর্তা বন্দর ছাড়পত্র বা প্রস্থানের লিখিত অনুমতি ফেরত প্রদানের দাবী করিতে পারিবেন।

(২) উপ-ধারা (১) এ উল্লিখিত কোনো দাবী লিখিতভাবে করা যাইবে অথবা যানবাহনের ভারপ্রাপ্ত ব্যক্তির নিকট বেতার বার্তাযোগে অবহিত করা যাইবে, এবং লিখিতভাবে করা হইলে, উহা—

- (ক) ভারপ্রাপ্ত ব্যক্তি বা তাহার এজেন্টের নিকট ব্যক্তিগতভাবে অর্পণের মাধ্যমে;
- (খ) উক্ত ব্যক্তির বা এজেন্টের সর্বশেষ জ্ঞাত বাসস্থানে রাখিয়া আসার মাধ্যমে; অথবা
- (গ) যানবাহনটির উপর ভারপ্রাপ্ত বা পরিচালনার দায়িত্বে আছেন বলিয়া প্রতীয়মান ব্যক্তির নিকট রাখিয়া আসার মাধ্যমে—

জারি করা যাইবে।

(৩) যেইক্ষেত্রে উপ-ধারা (২) অনুসারে বন্দর ছাড়পত্র অথবা প্রস্থানের অনুমতি ফেরত প্রদানের দাবী করা হয়, সেইক্ষেত্রে বন্দর ছাড়পত্র অথবা অনুমতি অবিলম্বে বাতিল হইয়া যাইবে।

৭০। **কতিপয় শ্রেণির যানবাহনকে এই অধ্যায়ের কতিপয় বিধান হইতে অব্যাহতি।**—(১) নৌযান ব্যতীত অন্য কোনো যানবাহনে অবস্থানকারীদের ((occupants) ব্যাগেজ ব্যতীত অন্য পণ্য বহন করা না হইলে উহার ক্ষেত্রে ধারা ৫৭, ৬৩ এবং ৬৫ এর বিধানাবলী প্রযোজ্য হইবে না।

(২) সরকার, সরকারি গেজেটে প্রজ্ঞাপন দ্বারা, এই অধ্যায়ের সকল অথবা যে কোনো বিধান হইতে সরকারের অথবা কোনো বিদেশী সরকারের মালিকানাধীন যানবাহনকে অব্যাহতি প্রদান করিতে পারিবে।

## দশম অধ্যায়

### কাস্টমস স্টেশনে যানবাহন সংশ্লিষ্ট সাধারণ বিধানাবলী

৭১। **যানবাহনে আরোহণের জন্য কাস্টমস কর্মকর্তা নিযুক্ত করিবার ক্ষমতা।**—যখন কোনো যানবাহন কোনো কাস্টমস স্টেশনে অবস্থান করে অথবা উক্ত স্টেশন অভিমুখে অগ্রসর হয় তখন যথাযথ কর্মকর্তা যে কোনো সময়ে এক বা একাধিক কাস্টমস কর্মকর্তাকে যানবাহনটিতে আরোহণের জন্য নিযুক্ত করিতে পারিবে, এবং যতক্ষণ পর্যন্ত যথাযথ কর্মকর্তা প্রয়োজন বলিয়া বিবেচনা করিবেন ততক্ষণ পর্যন্ত এইরূপে নিযুক্ত কর্মকর্তা উক্ত যানবাহনে অবস্থান করিবেন।

৭২। **কর্মকর্তাকে গ্রহণ এবং তাহার অবস্থানের ব্যবস্থা করা।**—কোন কাস্টমস কর্মকর্তাকে কোনো যানবাহনে আরোহণের জন্য নিযুক্ত করা হইলে, ভারপ্রাপ্ত ব্যক্তি তাহাকে গ্রহণ, তাহার জন্য উপযুক্ত থাকার ব্যবস্থা এবং পর্যাপ্ত পরিমাণ বিশুদ্ধ পানি সরবরাহ করিতে বাধ্য থাকিবেন।

৭৩। **কর্মকর্তার প্রবেশ, ইত্যাদির ক্ষমতা।**—(১) ধারা ৭১ এর অধীন নিযুক্ত প্রত্যেক কর্মকর্তার যানবাহনের প্রতিটি অংশে প্রবেশের অবাধ অধিকার থাকিবে এবং তিনি—

- (ক) উক্ত যানবাহন হইতে খালাসের পূর্বে যে কোনো পণ্য চিহ্নযুক্ত করাইতে পারিবেন ;
- (খ) যানবাহনে পরিবহনকৃত কোনো পণ্য বা কোনো স্থান বা কন্টেইনার, যাহাতে পণ্য পরিবহন করা হয়, তাহা তালাবদ্ধ, সীলকৃত, চিহ্নযুক্ত অথবা অন্যভাবে নিরাপদ করিতে পারিবেন; অথবা
- (গ) ডেকের ফাঁক অথবা খোলের প্রবেশপথ দৃঢ়ভাবে আবদ্ধ (fasten) করিতে পারিবেন।

(২) যদি সংশ্লিষ্ট যানবাহনে কোনো বাস্ক, স্থান বা বন্ধ পাত্র তালাবদ্ধ থাকে এবং উহার চাবি প্রদান করিতে অস্বীকার করা হয়, তাহা হইলে উক্ত কর্মকর্তা বিষয়টি যথাযথ কর্মকর্তার নিকট রিপোর্ট করিবেন, যিনি তৎপ্রেক্ষিতে যানবাহনে অবস্থানকারী কর্মকর্তা বা তাহার অধীনস্থ অন্য কোনো কর্মকর্তাকে উহা তল্লাশী করিবার লিখিত আদেশ প্রদান করিতে পারিবেন।

(৩) উপ-ধারা (২) এর অধীন প্রাপ্ত আদেশে ক্ষমতাপ্রাপ্ত কর্মকর্তা আদেশটি উপস্থাপন করিয়া উক্ত বাস্ক, স্থান বা বন্ধ পাত্র তাহার সম্মুখে খুলিবার নির্দেশ প্রদান করিতে পারিবেন এবং তাহার নির্দেশ মতে উহা খোলা না হইলে তিনি উহা ভাঙ্গিয়া খুলিতে পারিবেন।

৭৪। **যানবাহন সীলকরণ।**—যেই সকল যানবাহন বাংলাদেশের বাহিরে গন্তব্যস্থলের জন্য ট্রানজিট পণ্য বহন করে অথবা বিদেশী ভূ-খন্ড হইতে কোনো কাস্টমস স্টেশনে অথবা কোনো কাস্টমস স্টেশন হইতে বিদেশী ভূ-খন্ডে পণ্য বহন করে, সেই সকল যানবাহন বিধি দ্বারা নির্ধারিত পদ্ধতিতে সীল করা যাইবে।

৭৫। **কতিপয় স্থান, দিবস এবং সময়ে পণ্য বোঝাই, খালাস বা ছাড় না করা।**—বিধি দ্বারা নির্ধারিত যথাযথ কর্মকর্তা কর্তৃক প্রদত্ত অনুমতি ব্যতীত কোনো কাস্টমস স্টেশনে পণ্য বোঝাই বা খালাসের জন্য নির্ধারিত কার্য ঘন্টা বা স্থানের বাহিরে কোন পণ্য বোঝাই বা খালাস করা যাইবে না।

৭৬। **বোট-নোট।**—(১) যখন কোনো পণ্য জলযান যোগে পরিবহন ও ওয়্যারহাউসিং এর উদ্দেশ্যে কোনো জাহাজ হইতে অবতরণ করা হয় অথবা দেশীয় ভোগের জন্য খালাস করা হয় অথবা রপ্তানির উদ্দেশ্যে কোন জাহাজে বোঝাইয়ের জন্য বহন করা হয় তখন প্রত্যেক বোঝাইকৃত জলযান অথবা অন্য কোন পৃথক চালানের জন্য এইরূপ প্রেরিত প্যাকেজের সংখ্যা এবং মার্কস ও নাম্বার অথবা উহার অন্য প্রকার বর্ণনা উল্লেখপূর্বক একটি বোট-নোট প্রেরণ করিতে হইবে।

(২) পণ্য অবতরণের জন্য প্রতিটি বোট-নোট জাহাজের একজন কর্মকর্তা কর্তৃক স্বাক্ষরিত হইবে এবং যদি জাহাজে কোনো কাস্টমস কর্মকর্তা অবস্থান করেন, তাহা হইলে তৎকর্তৃক উহা অনুরূপভাবে স্বাক্ষরিত হইবে এবং গন্তব্যে পৌঁছার পর উহা গ্রহণ করিবার জন্য ক্ষমতাপ্রাপ্ত কাস্টমস কর্মকর্তার নিকট অর্পণ করিতে হইবে।

(৩) পণ্য রপ্তানির জন্য প্রতিটি বোট-নোট যথাযথ কর্মকর্তা কর্তৃক স্বাক্ষরিত হইবে এবং যদি কোনো কাস্টমস কর্মকর্তা সেই জাহাজে পণ্য রপ্তানি করা হইবে উক্ত জাহাজে অবস্থান করেন তাহা হইলে উহা উক্ত কর্মকর্তার নিকট অর্পণ করা হইবে এবং যদি কোনো কর্মকর্তা জাহাজে অবস্থান না করেন, তাহা হইলে উহা জাহাজের মাস্টার অথবা উহা গ্রহণ করিবার জন্য নিযুক্ত জাহাজের কর্মকর্তার নিকট অর্পণ করা হইবে।

(৪) অবতরণকৃত পণ্যের বোট-নোট গ্রহণকারী কাস্টমস কর্মকর্তা, এবং রপ্তানিকৃত পণ্যের বোট-নোট গ্রহণকারী কাস্টমস কর্মকর্তা অথবা, ক্ষেত্রমত, মাস্টার অথবা অন্য কর্মকর্তা উক্ত বোট-নোট স্বাক্ষর করিবেন এবং কমিশনার অব কাস্টমস যেরূপ নির্দেশ করেন সেইরূপ বিবরণ উহাতে লিপিবদ্ধ করিবেন।

(৫) বোর্ড, সরকারি গেজেটে প্রজ্ঞাপন দ্বারা, সময়ে সময়ে, কোন কাস্টমস-বন্দর অথবা উহার কোনো অংশের জন্য এই ধারার প্রয়োগ স্থগিত রাখিতে পারিবে।

৭৭। **জলপথে পরিবহনকৃত পণ্য অবিলম্বে অবতরণ বা জাহাজজাত করা।**—অবতরণের অথবা জাহাজজাতকরণের উদ্দেশ্যে জলপথে পরিবহনকৃত সকল পণ্য অযথা বিলম্ব না করিয়া অবতরণ অথবা জাহাজজাত করিতে হইবে।

৭৮। **অনুমতি ব্যতিরেকে যানান্তর না করা।**—আসন্ন বিপদের ক্ষেত্র ব্যতীত কাস্টমস কর্মকর্তার অনুমতি ব্যতীত অবতরণের অথবা জাহাজীকরণের উদ্দেশ্যে কোনো নৌকায় খালাসকৃত অথবা বোঝাইকৃত কোনো পণ্য অন্য কোনো নৌকায় যানান্তর করা যাইবে না।

৭৯। **লাইসেন্সবিহীন কার্গো বোট চলাচল নিষিদ্ধ করিবার ক্ষমতা।**—(১) বোর্ড, সরকারি গেজেটে প্রজ্ঞাপন দ্বারা, কোনো কাস্টমস বন্দরের ক্ষেত্রে ঘোষণা করিতে পারিবে যে, প্রজ্ঞাপনে উল্লিখিত তারিখের পর যথাযথভাবে লাইসেন্সকৃত অথবা নিবন্ধিত নয় এমন নৌকাকে উক্ত বন্দর সীমানার মধ্যে পণ্যদ্রব্য অবতরণ অথবা জাহাজীকরণের জন্য কার্গো-বোট হিসাবে চলাচল করিতে দেওয়া হইবে না।

(২) যেই বন্দরের ক্ষেত্রে উপ-ধারা (১) এর অধীন প্রজ্ঞাপন জারি করা হইয়াছে সেই বন্দরের ক্ষেত্রে কমিশনার অব কাস্টমস অথবা এই উদ্দেশ্যে বোর্ড কর্তৃক নিযুক্ত অন্য কোনো কর্মকর্তা, বিধি দ্বারা নির্ধারিত শর্ত সাপেক্ষে, বোর্ড, সরকারি গেজেটে প্রজ্ঞাপন দ্বারা, যে ফিস নির্ধারণ করিবে তাহা পরিশোধ করা হইলে, কার্গো-বোটের জন্য লাইসেন্স প্রদান এবং নিবন্ধন করিতে অথবা উহা বাতিল করিতে পারিবেন।

৮০। **অনধিক একশত টন জাহাজের চলাচল।**—(১) বাংলাদেশী জাহাজের আওতাধীন প্রত্যেক নৌযান (Boat) এবং অনধিক ১০০ (একশত) টনের অন্যান্য প্রতিটি জাহাজ বিধি দ্বারা নির্ধারিত পদ্ধতিতে চিহ্নযুক্ত করিতে হইবে।

(২) বিধি দ্বারা নির্ধারিত শর্ত সাপেক্ষে, অনধিক ১০০ (একশত) টনের সকল বা যে কোনো শ্রেণির বা যে কোনো বর্ণনার নৌযানের চলাচল, সমুদ্রে বা অভ্যন্তরীণ জলপথে হটক না কেন, নিষিদ্ধ, নিয়ন্ত্রিত বা সীমাবদ্ধ করা যাইবে।

### একাদশ অধ্যায়

#### কার্গো খালাস এবং পণ্যের অন্তর্মুখী (inward) এন্ট্রি

৮১। **যথাযথ অনুমতি প্রাপ্তির পর নৌযানের কার্গো খালাস আরম্ভ করা।**—ধারা ৬০ এর অধীন প্রতিবেদন প্রেরণ করা প্রয়োজন এইরূপ কোনো কার্গো, উক্ত ধারার অধীন প্রয়োজনীয় আগমন সংক্রান্ত অবহিতকরণ এবং অন্তর্মুখী প্রতিবেদন প্রেরণ এবং বোর্ড কর্তৃক নির্ধারিত ফরম ও পদ্ধতিতে যথাযথ কর্মকর্তা কর্তৃক কার্গো খালাসের অনুমতি প্রদান না করা পর্যন্ত কোনো যানবাহন হইতে তাহা খালাস করা যাইবে না:



তবে শর্ত থাকে যে, যথাযথ কর্মকর্তা, বিধি দ্বারা নির্ধারিত পদ্ধতিতে, অন্তর্মুখী প্রতিবেদন দাখিলের পূর্বে পচনশীল বা বিশেষ যত্ন নেয়া প্রয়োজন এইরূপ অন্যান্য কার্গো খালাসের অনুমতি প্রদান করিতে পারিবে।

৮২। **নৌযান ব্যতীত অন্যান্য যানবাহনের পণ্য খালাস।**—নৌযান ব্যতীত অন্য কোনো যানবাহন স্থল কাস্টমস স্টেশন বা কাস্টমস বিমানবন্দরে পৌঁছাইবার পর উক্ত যানবাহনের ভারপ্রাপ্ত ব্যক্তি, ধারা ৬০ এর অধীন প্রয়োজনীয় আগমন সংক্রান্ত অবহিতকরণ এবং অন্তর্মুখী প্রতিবেদন প্রেরণ করিলে, তিনি, যথাযথ কর্মকর্তার চাহিদা মোতাবেক, উক্ত যানবাহন অবিলম্বে স্থল কাস্টমস স্টেশন বা কাস্টমস বিমানবন্দরের পরীক্ষাস্থলে লইবেন বা লইবার ব্যবস্থা গ্রহণ করিবেন এবং উক্ত যানবাহনে পরিবহনকৃত সকল পণ্য যথাযথ কর্মকর্তা বা এতদুদ্দেশ্যে যথাযথভাবে ক্ষমতাপ্রাপ্ত অন্য কোনো ব্যক্তির উপস্থিতিতে উক্ত স্থল কাস্টমস স্টেশন বা কাস্টমস বিমানবন্দরে অপসারণ করিবেন বা অপসারণ করিবার ব্যবস্থা করিবেন।

৮৩। **কার্গো ঘোষণার অর্ন্তভুক্ত না হইলে আমদানিকৃত পণ্য খালাস না করা।**—(১) কার্গো ঘোষণায় প্রদর্শন করিবার আবশ্যিকতা রহিয়াছে এইরূপ আমদানিকৃত পণ্য, উক্ত কাস্টমস স্টেশনে নামাইবার জন্য কার্গো ঘোষণায় বা সংশোধিত বা সম্পূরক কার্গো ঘোষণায় উল্লেখ করা না হইলে যথাযথ কর্মকর্তার অনুমতি ব্যতিরেকে কোনো যানবাহন হইতে উক্ত পণ্য নামানো যাইবে না।

(২) এই ধারার কোনো কিছুই কোন যাত্রী বা ক্রু-সদস্যের সহিত আনা ব্যাগেজ বা মেইল ব্যাগ নামানোর ক্ষেত্রে প্রযোজ্য হইবে না।

৮৪। **অনুমোদিত সময়ের মধ্যে নৌযান হইতে খালাস না করা পণ্যের ক্ষেত্রে পদ্ধতি।**—  
(১) যদি-

- (ক) পণ্য খালাসের অনুমতি প্রদানের পর, বোর্ড কর্তৃক নির্দিষ্টকৃত সময়ের মধ্যে নৌযানে আমদানিকৃত পণ্য (নামানো হইবে না বলিয়া কার্গো ঘোষণায় প্রদর্শিত পণ্য ব্যতীত) নামানো না হয়; বা
- (খ) সামান্য পরিমাণ পণ্য ব্যতীত নৌযানের অন্যান্য পণ্য উক্তরূপে নির্দিষ্টকৃত সময় অতিক্রান্ত হওয়ার পূর্বে খালাস করা হয়,-

তাহা হইলে উক্ত নৌযানের মাস্টার বা তাহার আবেদনক্রমে যথাযথ কর্মকর্তা, উক্ত পণ্য কাস্টম হাউসে বহন করিতে পারিবেন এবং উহা উক্ত স্থানে এন্ড্রির অপেক্ষায় থাকিবে।

(২) যথাযথ কর্মকর্তা অতঃপর উক্ত পণ্যের দায়িত্ব গ্রহণ করিবেন এবং উহার জন্য প্রাপ্তি রশিদ প্রদান করিবেন; এবং যদি নৌযানের মাস্টার বা এজেন্ট কর্তৃক উপযুক্ত কর্মকর্তাকে এই মর্মে লিখিত নোটিশ প্রদান করা হয় যে, পণ্যসমূহ ফ্রেইট, প্রাইমেজ, জেনারেল এভারেজ, ডেমায়েজ, কন্টেইনার ডিটেনশন চার্জ, ডেড-ফ্রেইট, টার্মিনাল হ্যান্ডলিং চার্জ, কন্টেইনার সার্ভিস চার্জ বা অন্য কোনো চার্জ এর লিয়েনের অধীন থাকিবে, তাহা হইলে যথাযথ কর্মকর্তা বর্ণিত চার্জসমূহ পরিশোধ করা হইয়াছে মর্মে লিখিত নোটিশ না পাওয়া পর্যন্ত উক্ত পণ্য তাহার দখলে রাখিবেন।

**৮৫। ক্ষুদ্র পার্সেল অবতরণ করানোর এবং দাবীদারবিহীন পার্সেল নিয়ন্ত্রণে রাখার ক্ষমতা।—**

(১) কোনো নৌযান পৌছাইবার পর যে কোনো সময়ে যথাযথ কর্মকর্তা উক্ত নৌযানের মাস্টারের সম্মতিক্রমে পণ্যের কোনো ক্ষুদ্র প্যাকেজ বা পার্সেল কাস্টম স্টেশনে বহন করিবার ব্যবস্থা করিবেন, যেখানে উহা এন্ট্রির জন্য কাস্টমস কর্মকর্তার দায়িত্বে এই আইনের অধীন উক্ত প্যাকেজ বা পার্সেল অবতরণের জন্য অনুমোদিত অবশিষ্ট কার্যদিবস পর্যন্ত রক্ষিত থাকিবে।

(২) যদি কাস্টম স্টেশন বহনকৃত কোনো প্যাকেজ বা পার্সেল নামাইবার জন্য অনুমোদিত সংখ্যক কার্যদিবস উত্তীর্ণ হওয়ার পর বা যেই নৌযান হইতে উহা নামানো হইয়াছে তাহা বহির্গমনের ছাড়পত্র প্রদান করিবার সময় দাবীদারবিহীন থাকে, তাহা হইলে উক্ত নৌযানের মাস্টার ধারা ৮৪ এর বিধানমতে নোটিশ প্রদান করিতে পারিবেন এবং কাস্টম স্টেশনের ভারপ্রাপ্ত কর্মকর্তা অতঃপর উক্ত ধারার ব্যবস্থামতে উক্ত প্যাকেজ বা পার্সেলের দখল গ্রহণ করিবেন।

**৮৬। অবিলম্বে পণ্য খালাসের অনুমতি প্রদানের ক্ষমতা।—**(১) ধারা ৮২, ৮৪ এবং ৮৫ তে যাহা

কিছুই থাকুক না কেন, বোর্ড, সরকারি গেজেটে প্রজ্ঞাপন দ্বারা, যে কাস্টমস স্টেশনের ক্ষেত্রে এই ধারা প্রযোজ্য ঘোষণা করিয়াছে, উক্ত স্টেশনের যথাযথ কর্মকর্তা ধারা ৮১ এর অধীন প্রদত্ত আদেশ প্রাপ্তির সাথে সাথে কোনো নৌযানের মাস্টারকে বা কার্গো ঘোষণা প্রাপ্তির অব্যবহিত পরে, নৌযান ব্যতীত অন্য যানবাহনের ভারপ্রাপ্ত ব্যক্তিকে উক্ত যানবাহনে আমদানিকৃত সকল পণ্য অথবা উহার অংশবিশেষ, তাহার এজেন্টের জিম্মায়, যদি তিনি উহা গ্রহণ করিতে সম্মত থাকেন, নিম্নবর্ণিত স্থানে খালাসের উদ্দেশ্যে নামাইবার অনুমতি প্রদান করিতে পারিবেন—

- (ক) কোনো কাস্টম হাউস, নির্ধারিত কোনো অবতরণ স্থানে বা জেটিতে;
- (খ) বন্দর কর্তৃপক্ষ, স্থল বন্দর কর্তৃপক্ষ, বিমান বন্দর কর্তৃপক্ষ, রেলওয়ে বা অন্য কোনো সরকারি সংস্থা বা কোম্পানীর মালিকানাধীন কোনো অবতরণ স্থান বা জেটিতে; বা
- (গ) জিম্মায় প্রদানের জন্য কমিশনার অব কাস্টমস কর্তৃক অনুমোদিত কোনো ব্যক্তির নিকট।

(২) উপ-বিধি (১) এ উল্লিখিত পণ্য বা উহার অংশবিশেষ গ্রহণকারী কোনো এজেন্ট উক্ত পণ্যের মালিককে এতদসম্পর্কিত কোনো ক্ষতি বা কম সরবরাহের সকল প্রতিষ্ঠিত দাবী মিটাইতে বাধ্য থাকিবেন এবং উক্ত মালিকের নিকট হইতে প্রদত্ত সেবা বাবদ চার্জ আদায় করিবার অধিকারী হইবেন, কিন্তু যেই ক্ষেত্রে উক্ত পণ্য বা উহার অংশবিশেষ নামাইবার জন্য মালিক কর্তৃক কোনো এজেন্ট পূর্বাঙ্কে নিযুক্ত হইয়া থাকেন এবং উক্ত নিযুক্তি বাতিল না হয় সেইক্ষেত্রে উক্ত এজেন্ট কমিশন বা অনুরূপ কোনো কিছু প্রাপ্ত হইবেন না:

তবে শর্ত থাকে যে, যথাযথ কর্মকর্তার লিখিত আদেশ ব্যতীত উক্ত পণ্য বা উহার অংশবিশেষ গ্রহণকারী কোনো এজেন্ট উহা অপসারণ করিতে বা অন্যভাবে ব্যবস্থাপনা করিতে পারিবেন না।

(৩) যথাযথ কর্মকর্তা উপ-ধারা (১) এর দফা (ক) এর অধীন খালাসকৃত সকল পণ্যের দায়িত্ব গ্রহণ করিবেন এবং ধারা ৮৪ এবং ধারা ১০৪ এর বিধান অনুযায়ী উহাদের বিষয়ে ব্যবস্থা গ্রহণ করিবেন।

(৪) উপ-ধারা (১) এর দফা (খ) বা দফা (গ) এর অধীন কোনো বন্দর কর্তৃপক্ষ, স্থল বন্দর কর্তৃপক্ষ, বিমান বন্দর কর্তৃপক্ষ, রেলওয়ে বা অন্য কোনো সরকারি সংস্থা অথবা কোম্পানী বা ব্যক্তির মালিকানাধীন অবতরণ স্থানে অথবা জেটিতে বা মজুদ করিবার স্থানে কোনো পণ্য নামানো হইলে তাহারা যথাযথ কর্মকর্তার লিখিত আদেশ ব্যতিত উহা অপসারণ করিতে অথবা অন্য কোনো ভাবে ব্যবস্থাপনা করিতে পারিবেন না।

৮৭। **পণ্যের অস্থায়ী মজুদ (temporary storage)**।—(১) কোনো কার্গো আগমনের সংবাদ অবহিতকরণের (notify) সময় হইতে কোনো কাস্টমস পদ্ধতির অধীন ন্যস্ত না করা পর্যন্ত, আমদানিকৃত পণ্য অস্থায়ী মজুদের অধীন বলিয়া গণ্য হইবে।

(২) পণ্যের কার্গো ঘোষণাই অস্থায়ী মজুদের ঘোষণা হইবে।

৮৮। **অস্থায়ী মজুদের ওয়্যারহাউস ও স্থান**।—(১) অস্থায়ী মজুদের পণ্য কেবল ধারা ১৩ এর অধীন নিয়োগকৃত বা ধারা ১৪ এর অধীন এতদুদ্দেশ্যে লাইসেন্সকৃত ওয়্যারহাউসে বা বোর্ড কর্তৃক সরকারি গেজেটে প্রজ্ঞাপন দ্বারা নির্ধারিত শর্ত সাপেক্ষে, কমিশনার অব কাস্টমস (বন্ড) বা অন্য কোনো কমিশনার অব কাস্টমস কর্তৃক অনুমোদিত অন্য কোনো স্থানে রাখা যাইবে।

(২) অস্থায়ী মজুদে রক্ষিত পণ্য, ধারা ১০২ অনুসারে ছাড় বা যথাযথ কর্মকর্তা কর্তৃক অন্য কোনো কারণে অপসারণের অনুমতি প্রদান না করা পর্যন্ত, উক্ত স্থান হতে অপসারণ করা যাইবে না।

৮৯। **অস্থায়ী মজুদকৃত (temporary storage) পণ্যে প্রবেশাধিকার**।—পণ্যের আমদানিকারকের অনুরোধের পরিপ্রেক্ষিতে, এসিস্ট্যান্ট কমিশনার অব কাস্টমস পদমর্যাদার নিম্নে নহে এমন কোনো কাস্টমস কর্মকর্তা, অস্থায়ীভাবে মজুদকৃত পণ্য পরীক্ষা বা নমুনা সংগ্রহের অনুমতি প্রদান করিতে পারিবে।

৯০। **অস্থায়ী মজুদে (temporary storage) রক্ষিত পণ্যের ক্ষেত্রে অনুমোদিত কার্যক্রম**।—ধারা ৯৮ এর বিধানকে ক্ষুণ্ণ না করিয়া, অস্থায়ী মজুদে রক্ষিত পণ্য কেবল এইরূপে হ্যান্ডলিং করিতে হইবে যেন, উক্ত পণ্যের বাহ্যিক বা কারিগরী বৈশিষ্ট্যের কোনো পরিবর্তন না হয়।

## দ্বাদশ অধ্যায়

### পণ্যের ঘোষণা এবং ছাড়করণ

৯১। **পণ্যের ঘোষণা**।—(১) বাংলাদেশে আমদানিকৃত সকল পণ্য, উক্ত পণ্যের আমদানিকারক কর্তৃক নিম্নলিখিতভাবে ঘোষণা করিতে হইবে, যথা:—

- (ক) নিম্নলিখিত বিষয় উল্লেখপূর্বক বোর্ড কর্তৃক নির্ধারিত ফরমে ও পদ্ধতিতে, উক্ত পণ্যের জন্য একটি পণ্য ঘোষণা কাস্টমস কম্পিউটার সিস্টেমে ইলেকট্রনিক্যালি প্রেরণ বা, ইলেকট্রনিক ব্যবস্থা না থাকার ক্ষেত্রে, ম্যানুয়ালি (manually) দাখিল করিতে হইবে, যথা:—
  - (অ) উক্ত পণ্যের জন্য প্রযোজ্য কাস্টমস পদ্ধতি;
  - (আ) এই আইন ও তদধীন প্রণীত বিধির বিধানাবলি অনুসারে পণ্যের শ্রেণীবিন্যাস, উৎস দেশ এবং পণ্যের কাস্টমস মূল্য সংক্রান্ত ঘোষণা; এবং
  - (ই) পণ্যের পরিমাণ ও যথাযথ বর্ণনাসহ, বোর্ড কর্তৃক নির্ধারিত অন্য কোনো বিষয়।

(খ) পণ্যের সঠিক শুল্ক নিরূপণ এবং ছাড়ের জন্য বোর্ড বা অন্যান্য উপযুক্ত কর্তৃপক্ষ কর্তৃক নির্ধারিত দলিল ও পর্যাপ্ত তথ্য যথাযথ কর্মকর্তার নিকট দাখিল বা লভ্য করিতে হইবে।

(২) বাংলাদেশ হইতে রপ্তানি বা প্রস্থানের জন্য নির্ধারিত সকল পণ্য, উক্ত পণ্যের রপ্তানিকারক কর্তৃক, বোর্ড যেইরূপ নির্ধারণ করে সেইরূপ ফরমে ও পদ্ধতিতে, কাস্টমস কম্পিউটার সিস্টেমে ইলেকট্রনিক্যালি প্রেরণ বা, ইলেকট্রনিক ব্যবস্থা না থাকার ক্ষেত্রে, ম্যানুয়ালি (manually) দাখিলকৃত পণ্য ঘোষণার মাধ্যমে ঘোষণা করিতে হইবে এবং উপ-ধারা (১) এর বিধানাবলি, প্রয়োজনীয় অভিযোজনসহ, প্রযোজ্য হইবে।

(৩) এই ধারার বিধানাবলি বাংলাদেশ কাস্টমস জলসীমা বা আকাশসীমার মধ্য দিয়া না থামিয়া কেবল অতিক্রমকারী কোনো নৌযান বা উড়োজাহাজ বা উহাতে বহনকৃত পণ্যের ক্ষেত্রে প্রযোজ্য হইবে না।

৯২। **আমদানিকারক এবং রপ্তানিকারকের দায়িত্ব।**—আমদানি বা রপ্তানির জন্য পণ্য ঘোষণাকারী বা যাহার পক্ষে উক্তরূপ ঘোষণা প্রদান করা হইয়াছে এমন ব্যক্তি নিম্নলিখিত বিষয়সমূহের জন্য দায়বদ্ধ থাকিবেন, যথা:—

- (ক) পণ্য ঘোষণায় প্রদত্ত তথ্যের সঠিকতা এবং সম্পূর্ণতা;
- (খ) উপস্থাপিত যে কোনো দলিলের সত্যতা;
- (গ) প্রযোজ্য ক্ষেত্রে, প্রদেয় সকল শুল্ক, কর ও অন্যান্য চার্জ পরিশোধ এবং প্রাসঙ্গিক কাস্টমস পদ্ধতির অধীন সংশ্লিষ্ট পণ্য ন্যস্ত করা সম্পর্কিত অন্যান্য সকল বাধ্যবাধকতা প্রতিপালন; এবং
- (ঘ) যথাযথ কর্মকর্তার অনুরোধে এবং উক্ত কর্মকর্তা কর্তৃক নির্ধারিত সময়সীমার মধ্যে কোনো উপযুক্ত ফরমে চাহিদামত সকল দলিল ও তথ্য দাখিল এবং কাস্টমস আনুষ্ঠানিকতা সম্পন্ন বা নিয়ন্ত্রণের জন্য প্রয়োজনীয় সকল সহায়তা প্রদান:

তবে শর্ত থাকে যে, সংশ্লিষ্ট ব্যক্তির কোনো এজেন্ট কর্তৃক উক্ত ঘোষণা প্রদান করিবার ক্ষেত্রে, উক্ত এজেন্টও উপরি-উক্ত দফা (ক), (খ) ও (ঘ) তে উল্লিখিত বাধ্যবাধকতার জন্য দায়ী থাকিবেন।

৯৩। **নিবন্ধন।**—(১) ইলেকট্রনিক ব্যবস্থায় পণ্য ঘোষণা দাখিলের ক্ষেত্রে ধারা ৯১ অনুযায়ী দাখিলের সংগে সংগে স্বয়ংক্রিয়ভাবে উহা নিবন্ধিত হইয়া যাইবে।

(২) ম্যানুয়ালি কোনো পণ্য ঘোষণা দাখিলের ক্ষেত্রে, ধারা ৯১ এর আবশ্যিকতাসমূহ প্রতিপালন সাপেক্ষে, প্রযোজ্য ক্ষেত্রে, যথাযথ কর্মকর্তা অনতিবিলম্বে উহা নিবন্ধন করিবেন।

৯৪। **পণ্য ঘোষণা দাখিলের সময়।**—(১) কোনো কাস্টমস স্টেশনে পণ্য নামানোর পর, আমদানিকারক, বিধি দ্বারা নির্ধারিত সময়ের মধ্যে, পণ্য ঘোষণা দাখিল করিবেন।

(২) বাংলাদেশে আমদানির জন্য পণ্য বোঝাই করা হইয়াছে এমন কোনো যানবাহন এতদসংক্রান্ত পণ্য ঘোষণা দাখিলের ৩০ (ত্রিশ) দিনের মধ্যে পৌঁছাইবার প্রত্যাশার ক্ষেত্রে, আমদানিকারক উক্ত পণ্যের আমদানির পূর্বেই কোনো পণ্য ঘোষণা দাখিল করিতে পারিবেন:

তবে শর্ত থাকে যে, যদি উক্ত পণ্য উক্ত সময়ের মধ্যে না পৌঁছায়, তাহা হইলে উক্তরূপ পণ্য ঘোষণা দাখিল করা হয় নাই বলিয়া গণ্য হইবে।

৯৫। **পণ্য ঘোষণার প্রতিস্থাপন।**—কোনো আমদানিকারক তৎকর্তৃক কোনো কাস্টমস পদ্ধতির অধীনে প্রদত্ত পণ্য ঘোষণা অন্য কোন কাস্টমস পদ্ধতি দ্বারা প্রতিস্থাপন করিবার লিখিত অনুরোধ করিলে, কমিশনার অব কাস্টমস তাহার অনুমতি প্রদান করিতে পারিবেন যদি তিনি এই মর্মে সন্তুষ্ট হন যে উক্ত অনুরোধ বৈধ কারণে করা হইয়াছে এবং তাহাতে প্রতারণা করিবার কোনো অভিপ্রায় নাই।

৯৬। **দাখিলকৃত পণ্য ঘোষণার সংশোধন।**—(১) লিখিত অনুরোধ এবং নিম্নের দ্বিতীয় শর্তাংশের বিধান সাপেক্ষে, কোনো ব্যক্তি তৎকর্তৃক দাখিলকৃত কোনো পণ্য ঘোষণায় উল্লিখিত এক বা একাধিক বিবরণ সংশোধন করিতে পারিবে:

তবে শর্ত থাকে যে, অনুরোধকৃত সংশোধন মূল দলিলের সহিত সংগতিপূর্ণ হইতে হইবে:

আরও শর্ত থাকে যে, নিম্নলিখিত কোনো ঘটনার পর যদি কোনো সংশোধনের অনুরোধ করা হয়, তাহা হইলে উক্ত সংশোধনের অনুমতি প্রদান করা যাইবে না, যথা:—

- (ক) সংশ্লিষ্ট ব্যক্তিকে যদি ইহা অবহিত করা হয় যে, পণ্য পরীক্ষা করা হইবে;
- (খ) কোনো কাস্টমস কর্মকর্তা কর্তৃক যদি ইহা প্রতিষ্ঠিত হয় যে, সংশ্লিষ্ট বিবরণ সঠিক নয়; অথবা
- (গ) ধারা ১২২ এ উল্লিখিত ব্যতিক্রমী ক্ষেত্র ব্যতীত, পণ্য ছাড় করা হইয়াছে।

(২) উপ-ধারা (১) এর অধীন পণ্য ঘোষণার কোনো সংশোধন মূল পণ্য ঘোষণায় উল্লিখিত পণ্য ব্যতীত অন্য কোনো পণ্যের জন্য প্রযোজ্য হইবে না।

৯৭। **সত্যতা প্রতিপাদন।**—(১) কোনো পণ্য ঘোষণায় বর্ণিত বিবরণের সঠিকতার সত্যতা প্রতিপাদন এবং এই আইন ও বিধি এবং পণ্য আমদানি বা, ক্ষেত্রমত, রপ্তানি সংক্রান্ত অন্যান্য প্রযোজ্য আইনের কোনো নিষেধাজ্ঞা, বিধি-নিষেধ (restriction) বা অন্যান্য আবশ্যিকতা প্রতিপালনের উদ্দেশ্যে এবং ধারা ১০৩ এর বিধানাবলি সাপেক্ষে, যথাযথ কর্মকর্তা নিম্নলিখিত এক বা একাধিক কার্যক্রম গ্রহণ করিতে পারিবেন, যথা:—

- (ক) পণ্য ঘোষণা এবং যে কোনো সহায়ক দলিল পরীক্ষা করা;
- (খ) সংশ্লিষ্ট আমদানিকারক বা রপ্তানিকারককে অন্যান্য দলিল উপস্থাপনের নির্দেশ প্রদান;
- (গ) নন-ইন্ট্রুসিভ (non-intrusive) যন্ত্র ব্যবহারের মাধ্যমে পণ্য পরিদর্শন করা;
- (ঘ) পণ্য পরীক্ষা করা;
- (ঙ) অন্য কোনো উপযুক্ত কর্তৃপক্ষ কর্তৃক পণ্য পরীক্ষা করানো; বা
- (চ) পণ্যের বিশ্লেষণ বা বিস্তারিত পরীক্ষার জন্য নমুনা সংগ্রহ করা।

(২) কোনো কাস্টমস কর্মকর্তা বা অন্য কোনো উপযুক্ত কর্তৃপক্ষ কোনো পণ্য পরীক্ষা বা নমুনা হিসাবে সংগ্রহের জন্য নির্বাচন করিলে, যথাযথ কর্মকর্তা অবিলম্বে উহা সংশ্লিষ্ট আমদানিকারক বা রপ্তানিকারককে অবহিত করিবেন।

(৩) অন্য কোনো সরকারি কর্তৃপক্ষ কর্তৃক বা তাহাদের পক্ষে কোনো পণ্যের পরীক্ষা, নমুনা সংগ্রহ বা অন্যান্য নিয়ন্ত্রণের ক্ষেত্রে, যথাযথ কর্মকর্তা, যেইক্ষেত্রে সম্ভব, সেইক্ষেত্রে ইহা নিশ্চিত করিবেন যে, উক্ত কাস্টমস সংক্রান্ত কার্যাদি এবং অন্যান্য কর্তৃপক্ষ কর্তৃক বা তাহাদের পক্ষে অনুরূপ কার্যাদি একই সময়ে ও স্থানে পরিচালিত হয়।

৯৮। **পণ্যের নমুনা সংগ্রহ ও পরীক্ষা।**—(১) এই আইনের উদ্দেশ্য পূরণকল্পে যথাযথ কর্মকর্তা কোনো পণ্য প্রবেশ অথবা খালাসের সময় অথবা উহা কোনো কাস্টমস এলাকার মধ্য দিয়া অতিক্রম করিবার সময়ে উক্ত পণ্যের নমুনা সংগ্রহ ও প্রয়োজনীয় পরীক্ষা করিতে পারিবেন।

(২) বোর্ড, এই আইনের উদ্দেশ্য পূরণকল্পে, আমদানিকৃত পণ্যের পরীক্ষা বা রাসায়নিক পরীক্ষা পরিচালনা করিবার জন্য যে কোনো পরীক্ষাগারকে দায়িত্ব প্রদান করিতে পারিবে।

(৩) উপ-ধারা (১) ও (২) এর উদ্দেশ্য পূরণকল্পে অনুসরণীয় পদ্ধতিসমূহ বিধি দ্বারা নির্ধারিত হইবে।

৯৯। **আমদানিকারক বা রপ্তানিকারক কর্তৃক সকল ব্যবস্থা গ্রহণ ও ব্যয় বহন করা।**—কোনো কাস্টমস কর্মকর্তা কর্তৃক পরীক্ষার উদ্দেশ্যে বা পরীক্ষার আনুষঙ্গিক কার্যক্রম, যাহার মধ্যে কোনো তদন্ত, বৈজ্ঞানিক অথবা রাসায়নিক পরীক্ষা বা ড্রাফট সার্ভে অন্তর্ভুক্ত, পরিচালনার উদ্দেশ্যে কোনো পণ্য বা উহার কন্টেইনার খোলা, মোড়ক খোলা, বাদ দেওয়া, পরিমাপ করা, পুনঃমোড়কজাত করা, স্তুপ করা, বাছাই করা, বাহির করা, মার্কিং করা, নাম্বারিং করা, উঠানো, নামানো, পরিবহন করা বা বোঝাই করিবার কাজ বা উহার অপসারণ বা ওয়্যারহাউসিং এর জন্য এবং উক্তরূপ পরীক্ষা, তদন্ত, রাসায়নিক পরীক্ষা অথবা সার্ভে করিবার জন্য প্রয়োজনীয় কোনো সুবিধা বা সহায়তা প্রদান উক্ত পণ্যের আমদানিকারক বা রপ্তানিকারক কর্তৃক এবং তাহার নিজ খরচে সম্পন্ন করিতে হইবে।

১০০। **শুল্কায়ন।**—(১) এই আইন এবং বিধি দ্বারা নির্ধারিত পদ্ধতিতে, যথাযথ কর্মকর্তা—

(ক) এই আইন ও বিধির বিধানাবলি এবং অন্যান্য আইনগত বিধানাবলি অনুসরণপূর্বক এইচ.এস. শ্রেণিবিন্যাস, উৎস দেশ এবং পণ্যের কাস্টমস মূল্য নিরূপণ করিবেন; এবং

(খ) উক্ত পণ্যের উপর, প্রযোজ্য ক্ষেত্রে, পরিশোধযোগ্য শুল্ক, কর ও অন্যান্য চার্জের পরিমাণ নির্ধারণ করিবেন।

(২) সংশ্লিষ্ট আমদানিকারক বা রপ্তানিকারককে অনতিবিলম্বে, প্রদেয় শুল্ক করের পরিমাণ নিরূপণ করিয়া, যদি থাকে, ইলেকট্রনিক পদ্ধতিতে বা শুল্কায়ন আদেশ জারি করিয়া অবহিত করিতে হইবে।

(৩) উপ-ধারা (১) এর অধীন যথাযথ কর্মকর্তা কর্তৃক শুল্কায়নের পরিবর্তে পণ্য ঘোষণায় বর্ণিত কাস্টমস মূল্য, এইচ.এস. শ্রেণিবিন্যাস, উৎস দেশ, শুল্ক হার, প্রদেয় শুল্ক, কর ও অন্যান্য চার্জের পরিমাণ গ্রহণ করা যাইবে এবং উক্তরূপ ক্ষেত্রে, প্রদেয় পরিমাণের নোটিশ (notification), এই আইনের উদ্দেশ্য পূরণকল্পে, যথাযথ কর্মকর্তা কর্তৃক কৃত শুল্কায়ন আদেশ বলিয়া গণ্য হইবে।

১০১। **পুনঃশুল্কায়ন।**—(১) ধারা ২১৭ এর উপ-ধারা (৩) অধীন দাবীর উপর প্রযোজ্য সময়সীমা ক্ষুণ্ণ না করিয়া, এসিস্ট্যান্ট কমিশনার পদমর্যাদার নিম্নে নহেন এইরূপ কোনো কাস্টমস কর্মকর্তা, সময়ে সময়ে, কোনো শুল্কায়নের শুদ্ধতা নিশ্চিত করিবার নিমিত্তে শুল্ক, কর ও অন্যান্য চার্জের শুল্কায়ন, গৃহীত এইচ.এস. শ্রেণিবিন্যাস, উৎস দেশ ও কাস্টমস মূল্য পরিবর্তন করিয়া পুনঃশুল্কায়ন করিতে বা করিবার ব্যবস্থা করিতে পারিবেন।

(২) উপ-ধারা (১) এ উল্লিখিত কর্মকর্তা, বিদ্যমান অন্য কোনো আইনের অধীন আরোপিত কোনো নিষেধাজ্ঞা, বিধি-নিষেধ বা লংঘনের বিষয়ে যেরূপ প্রয়োজন মনে করিবেন, সেইরূপ সংশোধন করিতে বা করিবার ব্যবস্থা করিতে পারিবেন, তবে উক্ত শুল্কায়ন সংশ্লিষ্ট পণ্য আর কাস্টমস নিয়ন্ত্রণাধীন না থাকিলে বা উহার উপরে প্রথমে শুল্কায়িত শুল্ককরের পরিমাণ পরিশোধ করা হইলেও উপর্যুক্ত বিধান প্রযোজ্য হইবে।

(৩) যদি এই ধারার অধীন পুনঃশুল্কায়নের ফলে নূতন বা অতিরিক্ত শুল্ক, কর বা ফি পরিশোধের প্রয়োজন হয় বা ভুলক্রমে ফেরত প্রদান করা হইয়াছে এমন শুল্ক, কর বা ফি পুনরায় আদায়ের প্রয়োজন হয় তাহা হইলে যেই কারণের ভিত্তিতে উক্ত পুনঃশুল্কায়নের সিদ্ধান্ত গৃহীত হইয়াছে তাহা লিখিতভাবে সংশ্লিষ্ট ব্যক্তিকে অবহিত করিতে হইবে এবং উক্ত ব্যক্তিকে, উক্তরূপ অবহিতকরণের তারিখ হইতে উহাতে উল্লিখিত সময়ের মধ্যে তাহার মতামত লিখিতভাবে প্রকাশ এবং শুনানির সুযোগ প্রদান করিতে হইবে এবং উক্ত সময়ের পর, পুনঃশুল্কায়ন চূড়ান্ত করিতে হইবে এবং একটি লিখিত দাবীনামা জারি করা হইবে।

(৪) এই ধারার অধীন পুনঃশুল্কায়িত শুল্ককর লিখিত দাবীনামা জারির তারিখ হইতে ৩০ (ত্রিশ) কার্যদিবসের মধ্যে পরিশোধ করিতে হইবে।

১০২। **ছাড়করণ।**—পণ্য ঘোষণায় অন্তর্ভুক্ত কোনো পণ্য নিম্নলিখিত কার্যক্রমসমূহের সমাপনাতে ছাড় করা হইবে, যথা:—

- (ক) যথাযথ কাস্টমস পদ্ধতি অনুযায়ী, শুল্ক, কর ও অন্যান্য চার্জ পরিশোধ বা প্রয়োজনমতে কোন গ্যারান্টি প্রদানসহ, সকল শর্তাবলী, পূরণ করা; এবং
- (খ) যথাযথ কর্মকর্তা কর্তৃক পণ্য ঘোষণার সত্যতা প্রতিপাদিত হওয়া অথবা প্রতিপাদন ব্যতীত গৃহীত হওয়া।

১০৩। **সাময়িক শুল্কায়ন ও ছাড়করণ।**—(১) যদি দেশীয় ভোগের জন্য বা ওয়্যারহাউসিং এর জন্য বা দেশীয় ভোগের উদ্দেশ্যে ওয়্যারহাউস হইতে খালাসের জন্য এন্ট্রি করা কোনো আমদানিকৃত পণ্যের উপর অথবা রপ্তানির জন্য এন্ট্রি করা কোনো পণ্যের উপর প্রদেয় কাস্টমস শুল্ক, পণ্যসমূহের রাসায়নিক বা অন্যান্য পরীক্ষার কারণে বা শুল্কায়নের উদ্দেশ্যে অধিকতর তদন্তের প্রয়োজনে বা উক্ত পণ্য সম্পর্কিত সকল দলিলপত্র অথবা সম্পূর্ণ দলিলপত্র অথবা পূর্ণ তথ্য সরবরাহ না করিবার জন্য অবিলম্বে শুল্কায়ন করা সম্ভব না হয়, তাহা হইলে এসিস্ট্যান্ট কমিশনার পদমর্যাদার নিম্নে নহেন এইরূপ কোন কর্মকর্তা উক্ত পণ্যের উপর প্রদেয় শুল্ক ও কর সাময়িকভাবে শুল্কায়ন এবং উক্ত পণ্য ছাড়ের আদেশ প্রদান করিতে পারিবেন:

তবে শর্ত থাকে যে, সাময়িকভাবে শুল্কায়নের উপর চূড়ান্ত শুল্কায়নের ফলে যে অতিরিক্ত শুল্ক প্রদেয় হইবে উহা পরিশোধ করিবার জন্য উক্ত কর্মকর্তার বিবেচনায় যেরূপ পর্যাপ্ত বিবেচিত হইবে, আমদানিকারক বা রপ্তানিকারক সেইরূপ পরিমাণ গ্যারান্টি দাখিল করিবেন এবং এই ক্ষেত্রে উক্ত পণ্যের আমদানির ক্ষেত্রে কোনো নিষেধাজ্ঞা থাকিবে না এবং ঐ পণ্যের ক্ষেত্রে সকল বিধি-বিধান প্রতিপালিত হইয়াছে মর্মে নিশ্চিত করিতে হইবে।

(২) যদি উপ-ধারা (১) এর অধীন সাময়িক শুল্কায়নের ভিত্তিতে কোনো পণ্য খালাস প্রদান করা হয়, তাহা হইলে উক্ত পণ্যের উপর প্রদেয় প্রকৃত শুল্ক সাময়িক শুল্কায়নের তারিখ হইতে ১২০ (একশত বিশ) কার্যদিবসের মধ্যে এবং যেক্ষেত্রে কোনো আদালত, ট্রাইব্যুনাল অথবা আপীল কর্তৃপক্ষের নিকট কোনো মামলা অনিষ্পন্ন রহিয়াছে সেই ক্ষেত্রে চূড়ান্ত নিষ্পত্তি প্রাপ্তির তারিখ হইতে ১২০ (একশত বিশ) কার্যদিবসের মধ্যে চূড়ান্তভাবে নিরূপণ করিতে হইবে এবং উক্ত শুল্কায়ন সম্পন্ন হওয়ার পর যথাযথ কর্মকর্তা ইতোপূর্বে পরিশোধিত অথবা গ্যারান্টিকৃত অর্থের সহিত চূড়ান্ত শুল্কায়নের ভিত্তিতে প্রদেয় অর্থের বিপরীতে শুল্কের পরিমাণ সমন্বয় করিবার আদেশ প্রদান করিবেন এবং উহাদের মধ্যে পার্থক্যের পরিমাণ আমদানিকারক অথবা রপ্তানিকারক অনতিবিলম্বে পরিশোধ করিবেন অথবা, ক্ষেত্রমত, তাহাদের নিকট ফেরত প্রদান করা হইবে:

তবে শর্ত থাকে যে, বোর্ড, ব্যতিক্রমী পরিস্থিতিতে, উহা লিখিতভাবে লিপিবদ্ধ করিয়া এই উপ-ধারায় বর্ণিত চূড়ান্ত শুল্ক নিরূপণের সময় বর্ধিত করিতে পারিবে।

#### ১০৪। সরকারের নিকট পণ্য পরিত্যাগ (abandonment) ও উহার বিলিবন্দেজ।—(১)

কোনো আমদানিকৃত পণ্য দেশীয় ভোগের জন্য ছাড় করা না হইলে বা কোনো পণ্য রপ্তানির ঘোষণা প্রদানের পর রপ্তানি করা না হইলে, যথাযথ কর্মকর্তার পূর্বানুমোদনক্রমে, উক্ত পণ্যের আমদানিকারক বা রপ্তানিকারক বা, প্রযোজ্য ক্ষেত্রে, হেফাজতকারী ব্যক্তি কর্তৃক উক্ত পণ্য সরকারের নিকট পরিত্যাগ করিতে হইবে।

(২) কোন পণ্য সরকারের নিকট পরিত্যাগকৃত বলিয়া গণ্য হইবে, যদি উক্ত পণ্য—

- (ক) নিম্নলিখিত কারণে পণ্য নামানোর তারিখ হইতে বোর্ড কর্তৃক নির্ধারিত তারিখের মধ্যে, বা যথাযথ কর্মকর্তা কর্তৃক অনুমোদিত অতিরিক্ত সময়ের মধ্যে, ছাড় করা বা জাহাজজাত না হয়—
  - (অ) সংশ্লিষ্ট আমদানিকারক বা রপ্তানিকারকের কারণে নির্ধারিত মেয়াদের মধ্যে উক্ত পণ্য পরীক্ষার জন্য উদ্যোগ গ্রহণ বা পরীক্ষা করা সম্ভব না হইলে;
  - (আ) সংশ্লিষ্ট পণ্য অনুরোধকৃত কাস্টমস পদ্ধতির অধীন ন্যস্ত বা ছাড় করিবার পূর্বে অবশ্য উপস্থাপনীয় দলিল উপস্থাপন না করিলে; বা
  - (ই) শুল্ক ও কর পরিশোধ বা এতদসংক্রান্ত কোনো গ্যারান্টি প্রদানের ক্ষেত্রে, উহা পরিশোধ বা প্রদান করা না হইলে; অথবা
- (খ) ছাড়ের তারিখ হইতে, বা যথাযথ কর্মকর্তা কর্তৃক অনুমোদিত অতিরিক্ত সময়ের মধ্যে, অবিলম্বে কাস্টমস এলাকা হইতে অপসারণ করা না হইলে।

(৩) সরকারের নিকট পরিত্যক্ত (abandoned) পণ্য, উক্ত পণ্যের মালিকের ঠিকানা সংগ্রহ করা সম্ভব হইলে তাহাকে যথাযথ নোটিশ প্রদান করিয়া বা তাহার ঠিকানা সংগ্রহ করা সম্ভব না হইলে উক্ত নোটিশ পত্রিকায় প্রকাশ করিয়া, যথাযথ কর্মকর্তার আদেশক্রমে বিক্রয়, ধ্বংস বা অন্যবিধ উপায়ে বিলিবন্দেজ করিতে হইবে:

তবে শর্ত থাকে যে—

- (ক) জীবজন্তু এবং পচনশীল পণ্য যথাযথ কর্মকর্তার অনুমতিক্রমে যে কোনো সময় বিক্রয় করা যাইবে;



- (খ) অস্ত্র, গোলাবারুদ বা সামরিক সরঞ্জাম ও বিপজ্জনক পণ্য, সরকারের অনুমোদনক্রমে, বোর্ড কর্তৃক নির্দেশিত সময়ে, স্থানে এবং পদ্ধতিতে বিক্রয় বা অন্যবিধ উপায়ে বিলিবন্দেজ করা যাইবে:

আরও শর্ত থাকে যে, দেশীয় ভোগের জন্য শুদ্ধযোগ্য কোনো পণ্য কাস্টমস শুদ্ধ ও কর পরিশোধ না করিয়া অপসারণে এই ধারার কোনো বিধানই ক্ষমতা প্রদান করিবে না।

(৪) যদি ন্যায়নির্ণয়ন, আপীল, পুনরীক্ষণ (revision) বা কোনো আদালতের সিদ্ধান্ত সাপেক্ষে, উপ-ধারা (১) এর অধীন কোনো পণ্য বিক্রয় করা হয়, তাহা হইলে উক্ত বিক্রয়লব্ধ অর্থ সরকারি ট্রেজারীতে জমা করিতে হইবে; এবং যদি উক্ত ন্যায়নির্ণয়নে বা আপীলে বা পুনরীক্ষণে ইহা পরিদৃষ্ট হয় বা আদালত সিদ্ধান্ত প্রদান করে যে, উক্তরূপ বিক্রয়কৃত পণ্য বাজেয়াপ্তযোগ্য নহে, তাহা হইলে বিক্রয়লব্ধ অর্থ হইতে ধারা ২৫৪ এ যে রূপ ব্যবস্থা বর্ণিত রহিয়াছে, সেইরূপ পাওনা, শুদ্ধ বা কর প্রয়োজনীয় কর্তনের পর উহা মালিককে ফেরত প্রদান করিতে হইবে।

১০৫। **নির্ধারিত মেয়াদের মধ্যে শুদ্ধায়ন না করা পণ্যের ক্ষেত্রে পদ্ধতি।**—যদি এই আইনের বিধানাবলীর অধীন আটককৃত, জব্দকৃত, বাজেয়াপ্তকৃত, ন্যায়নির্ণয়নাধীন বা আপীলাধীন পণ্য ব্যতীত, যথাযথভাবে পণ্য ঘোষণা উপস্থাপন করা হইয়াছে এইরূপ অন্য কোনো পণ্য, ৭ (সাত) কার্যদিবসের মধ্যে শুদ্ধায়ন করা না হয়, তাহা হইলে উক্ত পণ্যের আমদানিকারক ৩ (তিন) কার্যদিবসের মধ্যে শুদ্ধায়নের জন্য কমিশনারকে নোটিশ প্রদান করিতে পারিবেন এবং উক্ত কমিশনার বা তাহার পক্ষে ক্ষমতাপ্রাপ্য অন্য কোনো কর্মকর্তা, আমদানি বৈধ হইলে, শুদ্ধায়ন করিবেন অথবা আমদানি বৈধ না হইলে, কারণ দর্শানো নোটিশ জারি করিবেন।

**ব্যাখ্যা।**—এই ধারার উদ্দেশ্য পূরণকল্পে “আটককৃত পণ্য” বলিতে রাসায়নিক পরীক্ষা বা তেজস্ক্রিয়তা পরীক্ষার জন্য বা শ্রেণীবিন্যাস, মূল্য, আমদানিযোগ্যতা বা অন্য কোনো আইনগত বিরোধ নিষ্পত্তির লক্ষ্যে আটককৃত পণ্য অন্তর্ভুক্ত হইবে।

১০৬। **ঘোষণা এবং ছাড় প্রক্রিয়া পরিবর্তনের ক্ষেত্র।**—ছাড় প্রক্রিয়া সহজীকরণ ও দ্রুত করিবার উদ্দেশ্যে, বোর্ড, তৎকর্তৃক নির্ধারিত শর্ত ও পরিসীমা সাপেক্ষে, নিম্নলিখিত পণ্যের ক্ষেত্রে পণ্যের ঘোষণা, সত্যাখ্যান এবং ছাড়ের জন্য এই আইনের অধীন আবশ্যিকতাসমূহ বিধি দ্বারা পরিবর্তন করিতে পারিবে, যথা:—

- (ক) সংশ্লিষ্ট পণ্য চালানের মোট মূল্য বোর্ড কর্তৃক নির্দিষ্টকৃত পরিমাণের অধিক না হইলে;
- (খ) বিদেশে মৃত্যুবরণ করিয়াছে এমন বাংলাদেশী নাগরিকের ব্যক্তিগত পণ্য;
- (গ) একই অবস্থায় অস্থায়ী আমদানি বা পুনঃআমদানিযোগ্য বাণিজ্যিক বাহন;
- (ঘ) দুর্যোগ ব্যবস্থাপনায় নিয়োজিত ত্রাণকর্মীদের দায়িত্ব পালনের জন্য ব্যবহৃত পণ্যসহ, দুর্যোগের ফলে ক্ষতিগ্রস্ত ব্যক্তিদের সহায়তার জন্য আনীত পণ্য;
- (ঙ) জীবিত প্রাণী এবং পচনশীল পণ্য;
- (চ) এক্সপ্রেস (express) পদ্ধতির আওতাভুক্ত চালান; এবং
- (ছ) অন্য কোনো ক্ষেত্রে, যেখানে বিভিন্ন শ্রেণী বা ধরনের পণ্য বা বিভিন্ন শ্রেণীর লেনদেনের জন্য পৃথক হইতে পারে এমন বাণিজ্য সহজীকরণ ও ঝুঁকি বিবেচনার জন্য বিকল্প ঘোষণা বা ছাড়করণ প্রক্রিয়া প্রয়োজন হয়।

১০৭। **অথরাইজড ইকোনমিক অপারেটর (Authorized Economic Operator)**।—(১) বোর্ড, বিধি দ্বারা নির্ধারিত পদ্ধতি সাপেক্ষে, বাংলাদেশে প্রতিষ্ঠিত কোনো ব্যক্তিকে, যিনি এই আইন ও বিধি উপযুক্ত পর্যায় পর্যন্ত প্রতিপালন করিয়াছেন এবং বোর্ড কর্তৃক নির্ধারিত প্রতিপালন বা অ-প্রতিপালনের ঝুঁকি সম্পর্কিত অন্যান্য মাণদণ্ড পূরণ করিয়াছেন, অথরাইজড ইকোনমিক অপারেটর এর মর্যাদা প্রদান করিতে পারিবেন।

(২) অথরাইজড ইকোনমিক অপারেটর, বোর্ড কর্তৃক নির্ধারিত শর্ত সাপেক্ষে সহজীকৃত কাস্টমস আনুষ্ঠানিকতা ব্যবহার করিবার যোগ্যতাসম্পন্ন হইবেন।

(৩) বাংলাদেশ ব্যতীত অন্য দেশে বা ভূখণ্ডে প্রতিষ্ঠিত কোনো ব্যক্তিকে এই ধারার অধীন অথরাইজড ইকোনমিক অপারেটর সুবিধা মঞ্জুর করিবার জন্য সরকার আন্তর্জাতিক চুক্তি করিতে পারিবে, যদি সরকার এই মর্মে সন্তুষ্ট হয় যে, উক্ত দেশ বা ভূখণ্ডের প্রাসঙ্গিক আইনে বর্ণিত শর্তাবলী ও বাধ্যবাধকতা এই ধারার অধীন নির্ধারিত শর্তাবলী ও বাধ্যবাধকতার সমতুল্য হয় এবং উক্ত সুবিধা বাংলাদেশে প্রতিষ্ঠিত ব্যক্তিকে পারস্পরিক ভিত্তিতে প্রদান করা হয়।

(৪) উপ-ধারা (৩) এ উল্লিখিত আন্তর্জাতিক চুক্তি সাপেক্ষে, বোর্ড এই ধারার অধীন অথরাইজড ইকোনমিক অপারেটরকে প্রদত্ত সুবিধা, বিদেশী রাষ্ট্র বা ভূখণ্ডের প্রাসঙ্গিক আইনে বর্ণিত শর্তাবলী পূরণ ও বাধ্যবাধকতা প্রতিপালন করিয়াছে এমন কোনো ব্যক্তিকে, মঞ্জুর করিতে পারিবে।

### ত্রয়োদশ অধ্যায়

#### পণ্যের ছাড় ও ছাড় পরবর্তী নিরীক্ষা

১০৮। **দেশীয় ভোগের জন্য ছাড়পত্র**।—(১) বাংলাদেশে বিক্রয়, ব্যবহার বা ভোগের নিমিত্ত আমদানিকৃত পণ্য, দেশীয় ভোগের জন্য নির্ধারিত কাস্টমস পদ্ধতির অধীন ন্যস্ত করিতে হইবে।

(২) দেশীয় ভোগের জন্য কাস্টমস পদ্ধতির অধীন পণ্য ন্যস্ত করিবার ক্ষেত্রে নিম্নলিখিত শর্তাবলী পূরণ করিতে হইবে, যথা:—

(ক) উক্ত পণ্যের উপর প্রদেয় সকল আমদানি শুল্ক, কর ও অন্যান্য চার্জ পরিশোধ, বা এই আইন বা বিধি অনুযায়ী অনুমোদিত হওয়ার ক্ষেত্রে, উক্ত পরিশোধ নিশ্চিত করিবার জন্য গ্যারান্টি প্রদান করিতে হইবে; এবং

(খ) পণ্য ঘোষণা এবং ছাড়ের জন্য আবশ্যিকীয় আনুষ্ঠানিকতা সম্পন্ন করিতে হইবে।

১০৯। **নথিপত্র নিরীক্ষা বা পরীক্ষা**।—(১) কোনো কাস্টমস কর্মকর্তা যে কোনো সময়ে এবং ধারা ১৮৭ এর বিধানাবলী সাপেক্ষে, ধারা ২৬৩ অনুসারে নথিপত্র যেই স্থানে সংরক্ষণ করা হয় সেই স্থানে বা অঙ্গনে প্রবেশ করিতে পারিবেন এবং যে সকল নথিপত্র হস্তলিখিত বা ইলেকট্রনিক সিস্টেমে প্রস্তুত ও সংরক্ষণ করা হয় উহার পর্যাপ্ততা অথবা সত্যতা সম্পর্কিত বিষয়ে অথবা কোনো সুনির্দিষ্ট লেনদেন সম্পর্কে নিরীক্ষা এবং পরীক্ষা করিতে পারিবেন।

(২) উপ-ধারা (১) এর উদ্দেশ্য পূরণকল্পে কোনো হিসাব পুস্তক, রেকর্ড ও দলিলাদি এবং কোনো সম্পত্তি, পদ্ধতি অথবা বিষয় পরীক্ষা করিবার উদ্দেশ্যে কোনো লাইসেন্সধারী, আমদানিকারক, রপ্তানিকারক অথবা অন্য কোনো ব্যক্তির হেফাজতে অথবা নিয়ন্ত্রণে থাকা সকল ভূমি, ইমারত এবং স্থানে কোনো কাস্টমস কর্মকর্তার প্রবেশের এবং সকল হিসাব পুস্তক, রেকর্ড এবং দলিলপত্র দেখার বা পরীক্ষার সম্পূর্ণ এবং অবাধ অধিকার থাকিবে, যাহা উক্ত কর্মকর্তার বিবেচনায়—

(ক) এই আইনের অধীন কোনো শুল্ক আহরণের জন্য অথবা কর্মকর্তার উপর আইনানুগভাবে অর্পিত কোনো কর্তব্য পালনের উদ্দেশ্যে প্রয়োজনীয় অথবা প্রাসঙ্গিক হইতে পারে; অথবা

(খ) এই আইনের উদ্দেশ্য পূরণকল্পে অথবা এই আইনের অধীন কোনো কর্তব্য সম্পাদনের জন্য অন্যবিধ প্রয়োজনীয় কোনো তথ্য সরবরাহ করিতে পারে।

(৩) কাস্টমস কর্মকর্তা উপ-ধারা (১) এ উল্লিখিত যে কোনো পুস্তক, নথিপত্র অথবা দলিলপত্রের উদ্ধৃতি বা অনুলিপি গ্রহণ করিতে পারিবেন।

(৪) উপ-ধারা (২) এবং (৩) এ যাহা কিছুই থাকুক না কেন, কোনো কাস্টমস কর্মকর্তা কোনো বেসরকারি আবাসস্থলে, উহার বাসিন্দা বা মালিকের সম্মতি ব্যতীত বা এই আইনের অধীন জারীকৃত কোনো পরওয়ানা ব্যতীত, উক্তরূপ আবাসস্থলে প্রবেশ করিতে পারিবেন না।

(৫) নথিপত্র নিরীক্ষা এবং পরীক্ষা সংক্রান্ত প্রয়োজনীয় কার্যক্রম ও পদ্ধতি এতদুদ্দেশ্যে প্রণীত বিধি দ্বারা নির্ধারিত হইবে।

১১০। **নিরীক্ষক, ইত্যাদি নিয়োগের ক্ষমতা।**—বোর্ড, বিশেষ আদেশ জারি করিয়া, যেরূপ উপযুক্ত বিবেচনা করিবে, সেইরূপ শর্তাবলী সাপেক্ষে, কোনো কাস্টমস এ বিষয়ে নিরীক্ষা পরিচালনার জন্য পেশাদার নিরীক্ষক অথবা নিরীক্ষা ফার্ম নিয়োগ করিতে পারিবে এবং উক্ত নিরীক্ষক অথবা নিরীক্ষা ফার্ম, ধারা ১০৯ এর উদ্দেশ্য পূরণকল্পে, একজন কাস্টমস কর্মকর্তা হিসাবে গণ্য হইবেন।

### চতুর্দশ অধ্যায় অস্থায়ী আমদানি

১১১। **অস্থায়ী আমদানি পদ্ধতি।**—(১) এই অধ্যায়ের বিধানাবলী এবং বিধি দ্বারা নির্ধারিত শর্তাবলী ও বিধি-নিষেধ সাপেক্ষে, বিধিতে বর্ণিত আমদানিকৃত পণ্য, বাংলাদেশে অস্থায়ী ব্যবহার এবং পরবর্তীতে পুনঃরপ্তানির উদ্দেশ্যে অস্থায়ী আমদানি পদ্ধতির অধীন আমদানি শুল্ক ও কর পরিশোধ ব্যতীত ছাড় করা যাইবে।

(২) কোনো পণ্য নিম্নলিখিত শর্তাবলী সাপেক্ষে অস্থায়ী আমদানি পদ্ধতির অধীন ন্যস্ত করা যাইবে, যথা:—

(ক) উক্ত পণ্য ব্যবহারের কারণে স্বাভাবিক অবচয় ব্যতীত পণ্যের কোনো পরিবর্তন করা যাইবে না;

(খ) পণ্যের প্রকৃতি বা উহার অভীষ্ট ব্যবহারের কারণে, সনাক্তকরণের উপায়ের অবর্তমানে উল্লিখিত পদ্ধতির কোনোরূপ অপব্যবহারের ক্ষেত্র ব্যতীত, অন্য যে কোনো ক্ষেত্রে ইহা নিশ্চিত করা সম্ভব যে, উক্ত পদ্ধতি সম্পাদনের পর উক্ত পণ্য সনাক্ত করা যাইবে;

- (গ) এই আইন বা তদধীন প্রণীত বিধিতে ভিন্নরূপ কিছু উল্লেখ না থাকিলে, উক্ত পণ্যের উপর আরোপণীয় কোনো শুল্ক ও কর পরিশোধ নিশ্চিত করিবার জন্য কোনো গ্যারান্টি প্রদান;
- (ঘ) বিধিতে উল্লিখিত পদ্ধতিতে সমুদয় শুল্ক অব্যাহতির জন্য আবশ্যিকতাসমূহ পূরণ; এবং
- (ঙ) পণ্য ঘোষণা এবং ছাড়ের জন্য প্রয়োজনীয় আনুষ্ঠানিকতা সম্পন্নকরণ।

(৩) সরকার, বিধি দ্বারা নির্ধারিত পদ্ধতিতে, কোন পণ্যের জন্য, ATA Carnet পদ্ধতিসহ যে কোনো অস্থায়ী আমদানি পদ্ধতির অনুমতি প্রদান করিতে পারিবে।

**ব্যাখ্যা।**—এই ধারায় ATA Carnet বলিতে Istanbul Convention on Temporary Importation এ বর্ণিত Admission Temporaire/Temporary Admission (ATA) Carnet পদ্ধতিকে বুঝাইবে।

১১২। **পদ্ধতির পরিসমাপ্তি ও পরিসমাপ্তির মেয়াদ।**—(১) কোনো পণ্য পুনঃরপ্তানি হওয়ার পর, অস্থায়ী আমদানি পদ্ধতির পরিসমাপ্তি ঘটিবে।

(২) যথাযথ কর্মকর্তা কর্তৃক অনুমতি এবং বোর্ড কর্তৃক নির্ধারিত শর্তাবলী ও বিধিনিষেধ সাপেক্ষে, অস্থায়ী আমদানি পদ্ধতি নিম্নলিখিতভাবে পরিসমাপ্তি ঘটিবে, যথা:—

- (ক) দেশীয় ভোগের জন্য পণ্য ঘোষণা দাখিল; বা
- (খ) সরকারের নিকট পণ্য পরিত্যাগ।

(৩) এই অধ্যায়ে বর্ণিত অস্থায়ী আমদানি পদ্ধতির পরিসমাপ্তির মেয়াদ বিধি দ্বারা নির্ধারিত হইবে:

তবে শর্ত থাকে যে, কতিপয় ব্যতিক্রমী পরিস্থিতিতে, যদি উক্ত মেয়াদের মধ্যে অনুমোদিত ব্যবহার সম্পন্ন করা না যায়, তাহা হইলে কমিশনার অব কাস্টমস, সংশ্লিষ্ট আমদানিকারক কর্তৃক যুক্তিসংগত অনুরোধের প্রেক্ষিতে, উক্ত মেয়াদ অনধিক ৬ (ছয়) মাসের জন্য বৃদ্ধি করিতে পারিবেন।

### পঞ্চদশ অধ্যায়

#### ইনওয়ার্ড ও আউটওয়ার্ড প্রসেসিং পদ্ধতি

১১৩। **পদ্ধতি সমাপ্তির মেয়াদ।**—এই অধ্যায়ে বর্ণিত ইনওয়ার্ড প্রসেসিং (inward processing) এবং আউটওয়ার্ড প্রসেসিং (outward processing) পদ্ধতি, ৬ (ছয়) মাস বা বোর্ড কর্তৃক বর্ধিত মেয়াদের মধ্যে সমাপ্ত করিতে হইবে।

১১৪। **ইনওয়ার্ড প্রসেসিং পদ্ধতি।**—এই আইনের ষোড়শ অধ্যায়ে উল্লিখিত ক্ষেত্র ব্যতীত এবং এই অধ্যায়ে উল্লিখিত আবশ্যিকতা এবং পণ্য ঘোষণা ও ছাড় সংক্রান্ত প্রয়োজনীয় আনুষ্ঠানিকতা সম্পাদন সাপেক্ষে, বিধি দ্বারা নির্ধারিত পদ্ধতিতে, কমিশনার অব কাস্টমস মেরামত, আংশিক পরিবর্তন বা প্রসেসিং এর জন্য বাংলাদেশে অস্থায়ীভাবে আমদানিকৃত পণ্যের উপর প্রযোজ্য আমদানি শুল্ক ও কর পরিশোধ নিশ্চিত করিবার লক্ষ্যে, ব্যাংক গ্যারান্টি প্রদান সাপেক্ষে, উক্ত পণ্য ইনওয়ার্ড প্রসেসিং পদ্ধতির অধীন শুল্ক ও কর পরিশোধ ব্যতিরেকে ছাড় করিতে পারিবেন।

১১৫। **আউটওয়ার্ড প্রসেসিং পদ্ধতি**—(১) এই অধ্যায়ে উল্লিখিত আবশ্যিকতা এবং পণ্য ঘোষণা ও ছাড় সংক্রান্ত প্রয়োজনীয় আনুষ্ঠানিকতা সম্পাদন সাপেক্ষে, বিধি দ্বারা নির্ধারিত পদ্ধতিতে, বাংলাদেশে প্রস্তুত বা উৎপাদিত পণ্য, দেশীয় ভোগের জন্য ছাড় করা আমদানিকৃত পণ্য, যাহা বিদেশে মেরামত, আংশিক পরিবর্তন বা প্রসেসিং এর জন্য অস্থায়ীভাবে রপ্তানির জন্য অভিপ্রেত, তাহা আউটওয়ার্ড প্রসেসিং পদ্ধতির অধীন ন্যস্ত করা যাইবে।

(২) আউটওয়ার্ড প্রসেসিং পদ্ধতির অধীন ন্যস্তকৃত পণ্য হইতে মেরামতকৃত, পরিবর্তিত বা প্রক্রিয়াজাত পণ্য বাংলাদেশে ফেরত আনা হইলে, বাংলাদেশ হইতে উক্ত পণ্য বিদেশে প্রেরণ এবং বাংলাদেশে ফেরত আনার ক্ষেত্রে সংশ্লিষ্ট পরিবহন, বোঝাই, হ্যান্ডলিং চার্জ এবং বীমা ব্যয়সহ বাংলাদেশের বাহিরে গৃহীত উক্ত কার্যক্রমের ব্যয়ের ভিত্তিতে নিরূপিত আমদানি শুল্ক ও করের জন্য দায়ী থাকিবে।

(৩) উপ-ধারা (২) এ যাহা কিছুই থাকুক না কেন, কমিশনার অব কাস্টমস এর সন্তুষ্টি মোতাবেক যদি ইহা প্রতিষ্ঠিত হয় যে, অস্থায়ীভাবে রপ্তানিকৃত পণ্য, কোনো গ্যারান্টি বা ওয়ারেন্টি হইতে উদ্ধৃত কোনো চুক্তিগত বা বিধিবদ্ধ বাধ্যবাধকতা অথবা কোনো প্রস্তুতজনিত বা তাৎপর্যপূর্ণ ত্রুটির কারণে চার্জমুক্তভাবে মেরামত করা হইয়াছে, তাহা হইলে উক্ত পণ্য বাংলাদেশে ফেরত আনা হইলে, উক্ত চুক্তি, ওয়ারেন্টি বা গ্যারান্টির সীমা পর্যন্ত প্রযোজ্য আমদানি শুল্ক ও কর পরিশোধ ব্যতীত ছাড় করা যাইবে।

(৪) অস্থায়ী রপ্তানিকৃত পণ্যের উপর প্রত্যর্পণ পরিশোধিত হইলে আউটওয়ার্ড প্রসেসিং এর অনুমতি প্রদান করা যাইবে না।

১১৬। **ইনওয়ার্ড প্রসেসিং পদ্ধতির পরিসমাপ্তি**—(১) ইনওয়ার্ড প্রসেসিং পদ্ধতির অধীন ন্যস্ত মেরামতকৃত, আংশিক পরিবর্তিত বা প্রক্রিয়াজাত পণ্য একক বা একাধিক পণ্যচালান হিসাবে রপ্তানি করিলে, বা ধারা ১০৪ অনুযায়ী সরকারের নিকট পরিত্যাগ করিলে, ইনওয়ার্ড প্রসেসিং পদ্ধতির পরিসমাপ্তি ঘটিবে।

(২) সংশ্লিষ্ট ব্যক্তির অনুরোধক্রমে ইনওয়ার্ড প্রসেসিং পদ্ধতির পরিসমাপ্তির উদ্দেশ্যে কমিশনার অব কাস্টমস কোনো পণ্য আমদানিকালীন অবস্থার ন্যায় একই অবস্থায় (in the same state) পণ্য রপ্তানি বা পরিত্যাগ করিবার অনুমতি প্রদান করিতে পারিবে।

(৩) ইনওয়ার্ড প্রসেসিং পদ্ধতির অধীন আমদানিকৃত পণ্যের প্রক্রিয়াকরণ হইতে, উদ্ধৃত যেকোন পণ্য, বর্জ্যসহ, যাহা রপ্তানি করা হইবে না, এর উপর আমদানি শুল্ক ও কর প্রদান করিতে হইবে।

১১৭। **আউটওয়ার্ড প্রসেসিং পদ্ধতির পরিসমাপ্তি**—(১) আউটওয়ার্ড প্রসেসিং পদ্ধতির অধীন ন্যস্ত মেরামতকৃত, আংশিক পরিবর্তিত বা প্রক্রিয়াজাত পণ্য, একক বা একাধিক পণ্য চালান হিসাবে, দেশীয় ভোগের জন্য ঘোষণা দাখিল করিলে, আউটওয়ার্ড প্রসেসিং পদ্ধতির পরিসমাপ্তি ঘটিবে।

(২) সংশ্লিষ্ট ব্যক্তির অনুরোধের পরিপ্রেক্ষিতে, কমিশনার অব কাস্টমস আউটওয়ার্ড প্রসেসিং পদ্ধতি, উক্ত পদ্ধতির শর্তাবলী এবং আনুষ্ঠানিকতা প্রতিপালন সাপেক্ষে, স্থায়ী রপ্তানির উদ্দেশ্যে পণ্য ঘোষণার মাধ্যমে পরিসমাপ্তির অনুমতি প্রদান করিতে পারিবে।

**ষোড়শ অধ্যায়**  
**ওয়্যারহাউসিং**

১১৮। **কাস্টমস ওয়্যারহাউস পদ্ধতি**—এই অধ্যায় এবং তদধীন প্রণীত বিধির অধীন আবশ্যিকতা, শর্তাবলী ও বিধি-নিষেধ এবং পণ্য ঘোষণা ও ছাড়ের জন্য প্রয়োজনীয় আনুষ্ঠানিকতা সম্পাদন সাপেক্ষে, আমদানিকৃত পণ্য, এই অধ্যায়ের অধীন প্রদত্ত কোনো উদ্দেশ্যে কাস্টমস ওয়্যারহাউসিং পদ্ধতির অধীন উক্ত উদ্দেশ্য পূরণকল্পে, আমদানি শুল্ক ও কর পরিশোধ ব্যতীত এই আইনের অধীন নিয়োগকৃত বা লাইসেন্সকৃত যে কোনো ওয়্যারহাউসে ন্যস্ত করা যাইবে।

১১৯। **ওয়্যারহাউসিং বন্ড**—(১) এই আইনে যাহা কিছুই থাকুক না কেন, ওয়্যারহাউস পদ্ধতির অধীন কোনো পণ্য ন্যস্ত করিবার ক্ষেত্রে সংশ্লিষ্ট আমদানিকারক, কমিশনার অব কাস্টমস (বন্ড) বা এতদুদ্দেশ্যে ক্ষমতাপ্রাপ্ত অন্য যে কোনো কমিশনার সংশ্লিষ্ট আমদানিকারককে যেরূপ নির্ধারণ করিবে সেইরূপ পরিমাণ অর্থ, শর্ত ও সীমা বা বাধা-নিষেধ সাপেক্ষে একটি সাধারণ বন্ড দাখিল করিবে।

(২) এই ধারার অধীন কোনো আমদানিকারক কর্তৃক কোনো পণ্যের ক্ষেত্রে সম্পাদিত বন্ড উক্ত পণ্য অন্য কোনো ব্যক্তির নিকট হস্তান্তর বা উহা অন্য ওয়্যারহাউসে অথবা ওয়্যারহাউসিং স্টেশনে অপসারণ করা সত্ত্বেও কার্যকর থাকিবে:

তবে শর্ত থাকে যে, যেই ক্ষেত্রে সকল পণ্য বা উহার অংশবিশেষ অন্য ব্যক্তির নিকট হস্তান্তর করা হয়, সেই ক্ষেত্রে যথাযথ কর্মকর্তা হস্তান্তর গ্রহণকারী ব্যক্তির নিকট হইতে একটি নূতন বন্ড গ্রহণ করিতে পারিবেন এবং অতঃপর হস্তান্তর গ্রহণকারী ব্যক্তি কর্তৃক নূতন সম্পাদিত বন্ডের সমপরিমাণ দায় হইতে হস্তান্তর গ্রহণকারী ব্যক্তি কর্তৃক সম্পাদিত বন্ড অবমুক্ত হইয়াছে বলিয়া গণ্য হইবে।

১২০। **ওয়্যারহাউসিং ব্যাংক গ্যারান্টি**—ওয়্যারহাউসিং এর জন্য পণ্য খালাস সম্পর্কিত বন্ড সম্পাদনের বিষয়ে এই আইনে যাহা কিছুই থাকুক না কেন, বোর্ড অথবা বোর্ড হইতে এতদ্বিষয়ে ক্ষমতাপ্রাপ্ত কমিশনার অব কাস্টমস, বন্ড দাখিলের অতিরিক্ত ব্যবস্থা হিসাবে পণ্যের উপর আরোপণীয় শুল্কের অনধিক পরিমাণ অর্থের জন্য নির্ধারিত পদ্ধতিতে ব্যাংক গ্যারান্টি প্রদান করিবার নির্দেশ প্রদান করিতে পারিবেন।

১২১। **ওয়্যারহাউসে পণ্য প্রেরণ**—সংশ্লিষ্ট আমদানিকারক বোর্ড কর্তৃক জারিকৃত এতদসংক্রান্ত বিধির বিধানমতে ওয়্যারহাউসিং এর জন্য খালাসকৃত পণ্য যেই ওয়্যারহাউসে জমা প্রদানের জন্য নির্ধারিত হইবে সেই ওয়্যারহাউসে পণ্য জমা প্রদান নিশ্চিত করিবে।

১২২। **ওয়্যারহাউসে পণ্য গ্রহণ**—বোর্ড কর্তৃক নির্ধারিত কাস্টমস ওয়্যারহাউস পদ্ধতি প্রতিপালনপূর্বক ওয়্যারহাউস রক্ষক কর্তৃক পণ্য গ্রহণ, সংরক্ষণ ও হ্যান্ডলিং এর কার্যক্রম সম্পাদিত হইবে।

১২৩। **ওয়্যারহাউসে রক্ষিত পণ্যের উপর নিয়ন্ত্রণ**—(১) ওয়্যারহাউসকৃত সকল পণ্য যথাযথ কর্মকর্তার নিয়ন্ত্রণে থাকিবে।

(২) নিম্নলিখিত কর্মকর্তাগণের কোনো ওয়ারহাউসের যেকোনো অংশে প্রবেশ এবং উহাতে রক্ষিত পণ্য, রেকর্ড, হিসাবপত্র এবং দলিলপত্র পরীক্ষার এবং, তিনি যেরূপ প্রয়োজন মনে করিবেন, সেইরূপ প্রশ্ন করিবার ক্ষমতা থাকিবে, যথা:—

- (ক) কাস্টমস বন্ড কমিশনারেট, কাস্টমস গোয়েন্দা ও তদন্ত পরিদপ্তর বা শুল্ক মূল্যায়ন ও অভ্যন্তরীণ নিরীক্ষা কমিশনারেটের এসিস্ট্যান্ট কমিশনার অব কাস্টমস পদমর্যাদার নিম্নে নহেন এমন কোনো কর্মকর্তা; বা
- (খ) দফা (ক) তে উল্লিখিত কর্মকর্তা কর্তৃক ক্ষমতাপ্রাপ্ত এসিস্ট্যান্ট কমিশনার অব কাস্টমস পদমর্যাদার নিম্নের উক্ত দপ্তরসমূহের কোনো কর্মকর্তা।

১২৪। **ওয়ারহাউসে রক্ষিত প্যাকেজ খোলা এবং পরীক্ষা করিবার ক্ষমতা।**—(১) যথাযথ কর্মকর্তা যে কোনো সময়ে লিখিত আদেশ দ্বারা নির্দেশ প্রদান করিতে পারিবেন যে, কোনো ওয়ারহাউসে সংরক্ষিত কোনো পণ্য বা প্যাকেজ খোলা, ওজন করা বা পরীক্ষা করা হইবে, এবং উক্ত কোনো পণ্য এইরূপে খোলা, ওজন করা বা পরীক্ষা করিবার পর উহা তিনি যেরূপ উপযুক্ত মনে করিবেন সেইরূপভাবে সীলযুক্ত অথবা মার্কযুক্ত করাইতে পারিবেন।

(২) কোনো পণ্য পরীক্ষার পর উক্তরূপ সীলযুক্ত বা মার্কযুক্ত করা হইলে উহা যথাযথ কর্মকর্তার অনুমতি ব্যতিরেকে পুনরায় খোলা যাইবে না, এবং এইরূপ অনুমতিক্রমে উক্ত পণ্য খোলা হইলে তিনি যদি উপযুক্ত মনে করেন, তাহা হইলে প্যাকেজসমূহ পুনরায় সীলযুক্ত অথবা মার্কযুক্ত করিবার ব্যবস্থা করিবেন।

১২৫। **ওয়ারহাউসে রক্ষিত পণ্যের মালিকের ওয়ারহাউসে প্রবেশাধিকার।**—যথাযথ কর্মকর্তার অনুমতিক্রমে অফিস চলাকালীন যে কোনো সময়ে একজন কাস্টমস কর্মকর্তার উপস্থিতিতে ওয়ারহাউসে সংরক্ষিত পণ্যের মালিকের পণ্যের নিকট যাওয়ার প্রবেশাধিকার থাকিবে এবং যথাযথ কর্মকর্তার নিকট এতদুদ্দেশ্যে লিখিতভাবে আবেদন করা হইলে একজন কাস্টমস কর্মকর্তাকে উক্ত মালিকের সঙ্গী হওয়ার জন্য নিয়োগ করা যাইবে।

১২৬। **ওয়ারহাউসকৃত পণ্যের মালিকের ব্যবস্থা গ্রহণের ক্ষমতা।**—(১) যথাযথ কর্মকর্তার অনুমোদনক্রমে, বিধি দ্বারা নির্ধারিত পদ্ধতিতে, ফি পরিশোধ করিয়া কোনো পণ্যের মালিক উহা ওয়ারহাউসকরণের পূর্বে বা পরে—

- (ক) ক্ষতিগ্রস্ত বা অবনতিগ্রস্ত পণ্য অবশিষ্ট পণ্য হইতে পৃথক করিতে পারিবেন;
- (খ) পণ্যের সংরক্ষণ, বিক্রয়, রপ্তানি অথবা ব্যবস্থিত করিবার উদ্দেশ্যে পণ্য বাছাই করিতে বা উহার পাত্র পরিবর্তন করিতে পারিবেন;
- (গ) পণ্যের অবচয়, অবনতি অথবা ক্ষতি রোধ করিবার জন্য যেমন প্রয়োজন হয় তেমন পদ্ধতিতে পণ্য এবং উহাদের আধারের (container) বিষয়ে ব্যবস্থা গ্রহণ করিতে পারিবেন;
- (ঘ) বিক্রয়ের জন্য পণ্য প্রদর্শন করাইতে পারিবেন; বা
- (ঙ) যথাযথ কর্মকর্তা যেরূপ অনুমোদন করেন পণ্যের সেইরূপ কোনো নমুনা দেশীয় ভোগের জন্য পণ্য ঘোষণা দাখিল অথবা ঘোষণা ব্যতীত এবং শুল্ক পরিশোধপূর্বক অথবা পরিশোধ ব্যতীত, তবে মূল পরিমাণের ঘাটতির উপর শেষ পর্যন্ত প্রদেয় হইলে উহার শুল্ক পরিশোধপূর্বক, গ্রহণ করিতে পারিবেন।

(২) কোন পণ্য উক্তরূপ পৃথককৃত এবং যথাযথ অথবা অনুমোদিত প্যাকেজে পুনঃপ্যাকেটজাত করিবার পর উক্ত পণ্যের মালিকের অনুরোধক্রমে উপযুক্ত কর্মকর্তা এইভাবে পৃথকীকরণ অথবা পুনঃপ্যাকেটজাতকরণের পরে কোনো বর্জ্য, ক্ষতিগ্রস্ত অথবা উদ্ভূত পণ্য অবশিষ্ট থাকিলে উহা, অথবা অনুরূপ অনুরোধক্রমে, শুল্ক আরোপের উপযোগী নয় এমন কোনো পণ্য, ধ্বংস করিবার ব্যবস্থা গ্রহণ করিতে অথবা অনুমতি প্রদান করিতে পারিবেন, এবং উহার উপর প্রদেয় শুল্ক মওকুফ করিতে পারিবেন।

১২৭। **ওয়্যারহাউসে রক্ষিত পণ্যের প্রস্তুতকরণ এবং অন্যান্য কার্যক্রম।**—(১) এই আইনের অধীন প্রণীত বিধি এবং ধারা ১৪ এর আওতায় ইস্যুকৃত লাইসেন্সের শর্ত প্রতিপালন সাপেক্ষে, কোনো ওয়্যারহাউসকৃত পণ্যের মালিক উক্ত পণ্য দ্বারা কোনো প্রস্তুতকরণ প্রক্রিয়া বা অন্য কার্যক্রম পরিচালনা করিতে পারিবেন।

(২) যেই ক্ষেত্রে উপ-ধারা (১) এর অধীন পরিচালিত কার্যক্রম অথবা প্রক্রিয়ায় পণ্যের কোনো অপচয় বা বর্জ্য হয় সেইক্ষেত্রে নিম্নবর্ণিত বিধানাবলী প্রযোজ্য হইবে, যথা:—

(ক) যদি উক্ত কার্যক্রম অথবা প্রক্রিয়া দ্বারা উৎপাদিত পণ্যের সম্পূর্ণ বা আংশিক রপ্তানি করা হয় তাহা হইলে রপ্তানিকৃত পণ্যের ক্ষেত্রে পরিচালিত কার্যক্রম অথবা প্রক্রিয়ায় যে পরিমাণ ওয়্যারহাউসকৃত পণ্য অপচয় বা বর্জ্য হইয়াছে উহার জন্য কোনো শুল্ক আরোপ করা হইবে না:

তবে শর্ত থাকে যে, উক্ত অপচয় বা বর্জ্য, হয় ধ্বংস করিতে হইবে নতুবা উহাদের উপর শুল্ক পরিশোধ করিতে হইবে, যেন উহা উক্ত অবস্থায় বাংলাদেশে আমদানি করা হইয়াছে;

(খ) যদি উক্ত কার্যক্রমে অথবা প্রক্রিয়ায় উৎপাদিত পণ্যের সম্পূর্ণ বা আংশিক দেশীয় ভোগের জন্য ওয়্যারহাউস হইতে খালাস করা হয়, তাহা হইলে দেশীয় ভোগের জন্য উক্ত পণ্যের যে পরিমাণ খালাস করা হয় তাহার উপর, এবং ওয়্যারহাউসকৃত পণ্যের ক্ষেত্রে বিধি দ্বারা নির্ধারিত পদ্ধতিতে পরিচালিত কার্যক্রম বা প্রক্রিয়ায় সৃষ্ট অপচয়কৃত বস্তু বা বর্জ্য দেশীয় ভোগের জন্য খালাস করা হইলে তাহার উপর আমদানি শুল্ক ও কর আরোপ করা হইবে:

তবে শর্ত থাকে যে, এই আইনের অন্য ধারায় ভিন্নরূপ বিধানাবলী সত্ত্বেও কমিশনার অব কাস্টমস (বন্দ) অথবা বোর্ড কর্তৃক ক্ষমতাপ্রাপ্ত অন্য কোনো কমিশনার অব কাস্টমস এই দফার অধীন শুল্কায়নের উদ্দেশ্যে মূল্য নিরূপণ করিবেন।

১২৮। **এই আইনে উল্লিখিত বিধান ব্যতীত ওয়্যারহাউস হইতে কোনো পণ্য বাহির না করা।**— দেশীয় ভোগ বা রপ্তানির জন্য খালাস অথবা অন্য কোনো ওয়্যারহাউসে অপসারণ অথবা এই আইনে ব্যবস্থিত অন্য কোনো প্রক্রিয়া ব্যতীত, ওয়্যারহাউসকৃত কোনো পণ্য ওয়্যারহাউস হইতে বাহিরে লওয়া যাইবে না।

১২৯। **কাস্টমস ওয়্যারহাউসিং এর মেয়াদ।**—(১) বোর্ড, বিধি মোতাবেক, ওয়্যারহাউসে পণ্য সংরক্ষণের মেয়াদ নির্ধারণ করিবে:

তবে শর্ত থাকে যে, বোর্ড বিভিন্ন শ্রেণীর ওয়্যারহাউসের জন্য ওয়্যারহাউসিং পদ্ধতির পরিসমাপ্তির বিভিন্ন মেয়াদ নির্ধারণ করিতে পারিবে।

(২) উপ-ধারা (১) এ বর্ণিত ওয়্যারহাউসিং পদ্ধতির পরিসমাপ্তির মেয়াদ ওয়্যারহাউসিং পদ্ধতির আওতায় আমদানিকৃত পণ্য ছাড়ের তারিখ হইতে গণনা করা হইবে।



১৩০। **লাইসেন্স বাতিল হইলে পণ্য অপসারণ।**—যখন কোনো বেসরকারী ওয়্যারহাউসের লাইসেন্স বাতিল করা হয় তখন উহার অভ্যন্তরে ওয়্যারহাউসকৃত কোনো পণ্যের মালিক উক্ত বাতিলকরণের নোটিশ প্রদানের তারিখ হইতে ১০ (দশ) দিবসের মধ্যে অথবা যথাযথ কর্মকর্তা কর্তৃক অনুমোদিত কোনো বর্ধিত সময়ের মধ্যে ওয়্যারহাউস হইতে পণ্য অন্য কোন ওয়্যারহাউসে অপসারণ করিবেন অথবা উহা দেশীয় ভোগের জন্য অথবা রপ্তানির জন্য খালাস করিবেন।

১৩১। **একই কাস্টমস-স্টেশনে এক ওয়্যারহাউস হইতে অন্য ওয়্যারহাউসে পণ্য অপসারণের ক্ষমতা।**—(১) এই আইনের অধীন ওয়্যারহাউসকৃত পণ্যের কোনো মালিক ধারা ১২৯ এর অধীন ওয়্যারহাউসিং মেয়াদের মধ্যে এবং কমিশনার অব কাস্টমস (বন্ড) অথবা বোর্ড কর্তৃক ক্ষমতাপ্রাপ্ত অন্য কোনো কমিশনার অব কাস্টমস, অথবা কমিশনার অব কাস্টমস (বন্ড) কর্তৃক অথবা বোর্ডের ক্ষমতাপ্রাপ্ত অন্য কোনো কমিশনার কর্তৃক এতদুদ্দেশ্যে ক্ষমতাপ্রাপ্ত অন্য কোনো কর্মকর্তার অনুমতিক্রমে উক্ত কমিশনার যেরূপ নির্দেশ প্রদান করিবেন সেইরূপ শর্তাবলীতে এবং জামানত পেশের পর পণ্য একই কাস্টমস স্টেশনের এক ওয়্যারহাউস হইতে অন্য ওয়্যারহাউসে অপসারণ করিতে পারিবেন।

(২) যখন কোনো মালিক কোনো পণ্য অপসারণ করিতে ইচ্ছা পোষণ করিবেন তখন তিনি এইরূপ করিবার জন্য বোর্ড কর্তৃক নির্ধারিত ফরমে অনুমতির জন্য আবেদন করিবেন।

১৩২। **পণ্য এক ওয়্যারহাউসিং স্টেশন হইতে অন্য ওয়্যারহাউসিং স্টেশনে অপসারণের ক্ষমতা।**—(১) কোনো ওয়্যারহাউসিং স্টেশনে ওয়্যারহাউসকৃত পণ্যের কোনো মালিক, উক্ত পণ্য ধারা ১২৯ এর অধীন ওয়্যারহাউসিং মেয়াদের মধ্যে অন্য কোনো ওয়্যারহাউসিং স্টেশনে ওয়্যারহাউসিং এর উদ্দেশ্যে অপসারণ করিতে পারিবেন।

(২) যদি কোনো মালিক উক্ত উদ্দেশ্যে কোনো পণ্য অপসারণের ইচ্ছা পোষণ করেন, তাহা হইলে তিনি বোর্ড কর্তৃক নির্ধারিত ফরমে এবং পদ্ধতিতে যেই পণ্য অপসারণ করা হইবে তাহার বিবরণ এবং যেই কাস্টমস স্টেশনে অপসারিত হইবে তাহার নাম উল্লেখপূর্বক কমিশনার অব কাস্টমস (বন্ড) অথবা বোর্ড কর্তৃক ক্ষমতাপ্রাপ্ত অন্য কোনো কমিশনারের নিকট আবেদন করিবেন।

১৩৩। **গম্ব্যের কাস্টমস-স্টেশনে পৌছাইবার পর পণ্য প্রথম আমদানির পণ্যের মত একই আইনসমূহের অধীন হইবে।**—ওয়্যারহাউসকৃত পণ্য গম্ব্যের কাস্টমস-স্টেশনে পৌছাইবার পর উহা প্রথম আমদানির পর এন্ট্রি এবং ওয়্যারহাউসিং করিবার অনুরূপ পদ্ধতিতে এন্ট্রি এবং ওয়্যারহাউসিং করা হইবে এবং শেষে উল্লিখিত পণ্যের এন্ট্রি এবং ওয়্যারহাউসিং যে সকল আইন এবং বিধি দ্বারা নিয়ন্ত্রিত হয়, উহা উক্ত আইন এবং বিধি, যতদূর প্রযোজ্য হয়, এর অধীন হইবে।

১৩৪। **ওয়্যারহাউসে রক্ষিত পণ্যের ক্ষতি হইলে বা অবনতি ঘটিলে উহার পুনঃশুদ্ধায়ণ।**—মূল্যভিত্তিক শুল্ক আরোপযোগ্য কোনো পণ্য ওয়্যারহাউসিং এর জন্য ছাড় করিবার পর হইতে দেশীয় ভোগের জন্য খালাস করিবার পূর্ব পর্যন্ত কোনো অনিবার্য দুর্ঘটনা অথবা কারণে যদি ক্ষতিগ্রস্ত অথবা অপচয়িত হয়, তাহা হইলে মালিক ইচ্ছা করিলে ক্ষতিগ্রস্ত অথবা অপচয়িত অবস্থায় উহাদের মূল্য কোন কাস্টমস কর্মকর্তা কর্তৃক নিরূপিত করাইতে পারিবেন এবং তদানুসারে উহাদের উপর আরোপযোগ্য শুল্ক হ্রাসকৃত মূল্যের অনুপাতে হ্রাস করা হইবে এবং মালিকের স্বইচ্ছায় প্রথমে সম্পাদিত বন্ড প্রতিস্থাপন করিবার জন্য হ্রাসকৃত শুল্কের দ্বিগুণ পরিমাণ অর্থের একটি নূতন বন্ড সম্পাদন করা যাইবে।

১৩৫। **উদ্বায়ী (Volatile) পণ্যের ক্ষেত্রে ছাড়।**—যখন এমন কোনো শ্রেণীর এবং বর্ণনার ওয়্যারহাউসকৃত পণ্য, যাহার উদ্বায়িতা এবং উহাদের মজুদ প্রক্রিয়া বিবেচনাপূর্বক বোর্ড, সরকারী গেজেটে প্রজ্ঞাপন দ্বারা, নির্ধারণ করে, তাহা যদি ওয়্যারহাউস হইতে অপসারণের সময় পরিমাণে কম পাওয়া যায় এবং কমিশনার অব কাস্টমস (বন্ড) অথবা বোর্ড কর্তৃক ক্ষমতা প্রাপ্ত অন্য কোনো কমিশনার যদি সন্তুষ্ট হন যে উক্ত ঘাটতি স্বাভাবিক অপচয়ের কারণে ঘটিয়াছে, তখন উক্ত ঘাটতির উপর কোনো শুল্ক আরোপ করা যাইবে না।

১৩৬। **ওয়্যারহাউস হইতে অসঙ্গতভাবে অপসারিত বা নির্দিষ্ট মেয়াদের বেশী সময়ে রাখিবার অনুমোদনপ্রাপ্ত বা ক্ষতিগ্রস্ত বা ধ্বংসপ্রাপ্ত বা নমুনা হিসাবে গৃহীত পণ্যের উপর শুল্ক।**—নিম্নবর্ণিত পণ্যসমূহের ক্ষেত্রে যথাযথ কর্মকর্তা দাবীনামা জারি করিতে পারিবেন এবং এইরূপ দাবীনামার প্রেক্ষিতে পণ্যসমূহের মালিক উহাদের ক্ষেত্রে প্রদেয় সমুদয় ভাড়া, জরিমানা, সুদ এবং অন্যান্য চার্জসহ উহাদের উপর আরোপণীয় সমুদয় পরিমাণ শুল্ক অবিলম্বে পরিশোধ করিবেন, যথা:—

- (ক) ধারা ১২৮ লংঘন করিয়া অপসারিত ওয়্যারহাউসকৃত পণ্য;
- (খ) ধারা ১৩০ এর অধীন অপসারণের জন্য অনুমোদিত সময়ের মধ্যে ওয়্যারহাউস হইতে অপসারণ না করা পণ্য;
- (গ) যেই সকল পণ্যের ক্ষেত্রে ধারা ১১৯ অথবা এই আইনের অধীন প্রণীত বিধিমালা অনুযায়ী বন্ড সম্পাদিত হইয়াছে এবং যাহা দেশীয় ভোগের জন্য অথবা রপ্তানির জন্য খালাস করা হয় নাই অথবা এই আইনের বিধান অনুসারে অপসারণ করা হয় নাই অথবা যাহা ধারা ১২৬ এবং ১২৭ এ ব্যবস্থিত হয় নাই অথবা ধারা ১৩৯ এ উল্লিখিত বিধান ব্যতীত অন্যভাবে ক্ষতিগ্রস্ত অথবা ধ্বংসপ্রাপ্ত হইয়াছে অথবা যথাযথ কর্মকর্তার সন্তুষ্টিমতে যাহার হিসাব প্রদান করা হয় নাই সেই সকল পণ্য; এবং
- (ঘ) ধারা ১২৬ এর অধীন নমুনা হিসাবে গৃহীত পণ্য।

১৩৭। **শুল্ক, ইত্যাদি পরিশোধে ব্যর্থতার ক্ষেত্রে পদ্ধতি।**—(১) যদি কোনো মালিক ধারা ১৩৬ এর অধীন দাবীকৃত কোনো অর্থ পরিশোধ করিতে ব্যর্থ হন, তাহা হইলে যথাযথ কর্মকর্তা ধারা ১১৯ এর অধীন সম্পাদিত বন্ডের উপর অথবা বিধি দ্বারা নির্ধারিত কার্যক্রম গ্রহণ করিতে পারিবেন অথবা ওয়্যারহাউসে রক্ষিত মালিকের পণ্য অথবা পণ্য প্রস্তুতকরণে ব্যবহৃত কোনো কারখানা, যন্ত্রপাতি অথবা মেশিনারী অথবা উক্ত ব্যক্তির মালিকানাধীন অন্য কোনো পণ্য এবং সম্পত্তির এমন অংশ যাহা দাবী আদায়ের জন্য পর্যাপ্ত বিবেচিত হইবে তাহা আটক করাইতে পারিবেন, এবং অবিলম্বে উক্তরূপ আটকের লিখিত নোটিশ মালিককে প্রদান করিতে হইবে।

(২) উপ-ধারা (১) এ উল্লিখিত নোটিশের তারিখ হইতে ১৫ (পনের) দিবসের মধ্যে দাবী পূরণ করা না হইলে উক্তরূপ আটককৃত পণ্য বিক্রয় করা যাইবে।

(৩) উপ-ধারা (২) এর অধীন বিক্রয়লব্ধ অর্থের নীট পরিমাণ লিপিবদ্ধ করিয়া বন্ডের বিপরীতে সমন্বয় করা হইবে এবং বন্ডের দায় সম্পূর্ণ মিটাইবার পর উদ্বৃত্ত, যদি থাকে, ধারা ২৫৪ অনুসারে বিলিবন্ডেজ পদ্ধতিতে ব্যবস্থিত হইবে।

(৪) পণ্যের কোনো হস্তান্তর বা স্বত্ব-নিয়োগ (assignment) এর উপর পাওনা আদায়ের জন্য যথাযথ কর্মকর্তাকে এই ধারায় বর্ণিত পদ্ধতি অনুযায়ী কার্যক্রম গ্রহণ করা হইতে নিবৃত্ত করিতে পারিবে না।

১৩৮। **রেকর্ড সংরক্ষণ।**—(১) ওয়ারহাউস রক্ষক ওয়ারহাউসে প্রবেশকৃত পণ্যের জন্য বোর্ড কর্তৃক নির্ধারিত পদ্ধতিতে স্টক কিপিং এর হিসাবসহ সকল রেকর্ড সংরক্ষণ করিবেন।

১৩৯। **ওয়ারহাউসকৃত নিখোঁজ অথবা ক্ষংসপ্রাপ্ত পণ্যের শুল্ক মওকুফ করিবার ক্ষমতা।**—ধারা ১১৯ এর অধীন বন্দ সম্পাদিত হইয়াছে এবং দেশীয় ভোগের জন্য খালাস করা হয় নাই, এমন কোনো ওয়ারহাউসকৃত পণ্য, যদি কোনো অনিবার্য দুর্ঘটনা বা অনিবার্য কারণে নিখোঁজ বা ক্ষংসপ্রাপ্ত হয়, তাহা হইলে কমিশনার অব কাস্টমস (বন্দ) অথবা বোর্ড কর্তৃক ক্ষমতাপ্রাপ্ত অন্য কোনো কমিশনার অব কাস্টমস তাহার বিবেচনাবলে উহার উপর প্রদেয় শুল্ক মওকুফ করিতে পারিবেন:

তবে শর্ত থাকে যে, যদি বেসরকারি ওয়ারহাউসে উক্ত পণ্য নিখোঁজ বা ক্ষংসপ্রাপ্ত হয়, তাহা হইলে উক্তরূপ নিখোঁজ বা ক্ষংসের ঘটনা উদঘাটনের পর ০৩(তিন) কর্মদিবসের মধ্যে যথাযথ কর্মকর্তার নিকট এতদ্বিষয়ে লিখিত নোটিশ প্রদান করিতে হইবে।

১৪০। **ওয়ারহাউস রক্ষকের দায়িত্ব।**—সরকারী ওয়ারহাউসে রক্ষিত পণ্যের ক্ষেত্রে ওয়ারহাউস রক্ষক এবং বেসরকারি ওয়ারহাউসে রক্ষিত পণ্যের ক্ষেত্রে লাইসেন্সধারী, উক্ত পণ্যের শুল্কায়নকারী কাস্টমস কর্মকর্তা কর্তৃক উল্লিখিত পরিমাণ, ওজন অথবা পরিমাপ অনুসারে, প্রযোজ্য ক্ষেত্রে ধারা ১৩৫ এ ব্যবস্থিত স্বাভাবিক অপচয়ের কারণে পরিমাণে ঘাটতির জন্য ছাড় প্রদানপূর্বক, ওয়ারহাউসে উহাদের যথাযথ গ্রহণ এবং উক্ত স্থান হইতে সরবরাহ এবং উক্ত স্থানে জমা থাকাকালীন সময়ে নিরাপদ হেফাজতের জন্য দায়ী থাকিবেন:

তবে শর্ত থাকে যে, ওয়ারহাউসে পণ্য প্রবেশ করানোর অথবা উক্ত স্থান হইতে বাহিরে লইবার অথবা উক্ত স্থানে জমা থাকাকালীন সময়ে সংঘটিত কোনো অপচয় অথবা ক্ষতির জন্য কোনো মালিক যথাযথ কর্মকর্তা বা কোনো সরকারী ওয়ারহাউসের রক্ষকের নিকট ক্ষতিপূরণ দাবী করিবার অধিকারী হইবেন না, যদি না ইহা প্রমাণিত হয় যে, উক্ত অপচয় বা ক্ষতি ওয়ারহাউস রক্ষক বা কোনো কাস্টমস কর্মকর্তার ইচ্ছাকৃত কর্ম বা অবহেলার কারণে সংঘটিত হইয়াছে।

১৪১। **ওয়ারহাউসের কোথায় এবং যে কোন শর্তে পণ্য জমা রাখা যাইবে তদ্বিষয়ে সিদ্ধান্ত গ্রহণের ক্ষমতা।**—কমিশনার অব কাস্টমস (বন্দ) অথবা বোর্ড কর্তৃক ক্ষমতাপ্রাপ্ত অন্য কোনো কমিশনার অব কাস্টমস ওয়ারহাউসের কোনে অংশে, কোন পদ্ধতিতে এবং কীশর্তে কোনো পণ্য জমা রাখা যাইবে এবং কোন্ কোন্ প্রকারের পণ্য এইরূপ কোনো ওয়ারহাউসে জমা রাখা যাইবে তাহা সময়ে সময়ে নির্ধারণ করিতে পারিবেন।

১৪২। **পরিবহন, প্যাকিং, ইত্যাদির ব্যয় মালিক কর্তৃক বহন।**—সরকারী ওয়ারহাউসে পণ্য গ্রহণ অথবা উক্ত স্থান হইতে উহা অপসারণ বাবদ পরিবহন, প্যাকিং এবং মজুদের ব্যয় যদি যথাযথ কর্মকর্তা অথবা ওয়ারহাউস রক্ষক পরিশোধ করেন, তাহা হইলে উহা পণ্যের উপর আরোপণীয় হইবে এবং মালিক কর্তৃক বহন করা হইবে, এবং ধারা ১৩৭ এ উল্লিখিত পদ্ধতিতে মালিকের নিকট হইতে আদায়যোগ্য হইবে।

১৪৩। **শর্ত সংযোজন, পরিবর্তন, শিথিল করা, ইত্যাদির ক্ষমতা।**—বোর্ড, সরকারি গেজেটে প্রজ্ঞাপন দ্বারা, এই অধ্যায়ের অন্তর্গত কোনো বিধানের কোনো শর্ত অথবা বাধ্যবাধকতা সংযোজন অথবা পরিবর্তন করিতে পারিবে, এবং কোনো বিশেষ প্রয়োজন মিটাইবার জন্য যথাযথ বিবেচনা করিলে উহার কোনো বিধান শিথিল করিতে পারিবে।

১৪৪। **কাস্টমস ওয়ারহাউস পদ্ধতির পরিসমাপ্তি।**—কোন কাস্টমস ওয়ারহাউস পদ্ধতির নিম্নলিখিতভাবে পরিসমাপ্তি ঘটবে, যথা:—

- (ক) উক্ত পদ্ধতির অধীন প্রয়োজনীয় শর্তাবলী ও আনুষ্ঠানিকতা প্রতিপালন সাপেক্ষে, নিম্নলিখিত উদ্দেশ্যে কোনো কাস্টমস পদ্ধতির অধীন পণ্য ছাড়ের মাধ্যমে, যথা:—
  - (অ) দেশীয় ভোগের জন্য পণ্য ছাড়করণ; বা
  - (আ) স্থায়ী রপ্তানিকরণ;
- (খ) সরকারের নিকট পণ্য পরিত্যাগের মাধ্যমে।

### সপ্তদশ অধ্যায় ট্রানশিপমেন্ট

১৪৫। **ব্যাগেজ বা পোস্টাল পণ্যের ক্ষেত্রে এই অধ্যায়ের অপ্রযোজ্যতা।**—এই অধ্যায়ের বিধানাবলী ব্যাগেজ এবং ডাকযোগে আমদানিকৃত পণ্যের ক্ষেত্রে প্রযোজ্য হইবে না।

১৪৬। **শুল্ক পরিশোধ ব্যতিরেকে পণ্য ট্রানশিপমেন্ট।**—(১) ট্রানশিপমেন্ট পদ্ধতির অধীন ন্যস্তকৃত পণ্য, একই কাস্টমস বন্দর বা কাস্টমস বিমানবন্দরের মধ্যে, শুল্ক ও কর পরিশোধ ব্যতিরেকে, কোনো আমদানিকারী নৌযান বা উড়োজাহাজ হইতে কোনো রপ্তানিকারী নৌযান বা উড়োজাহাজে স্থানান্তর করা যাইবে।

(২) বোর্ড কর্তৃক নির্ধারিত নিয়ন্ত্রণ ও শর্তাবলী সাপেক্ষে, ট্রানশিপমেন্ট হওয়া পণ্যের ক্ষেত্রে কোনো কার্গো ঘোষণা ট্রানশিপমেন্ট এর জন্য ঘোষণা হিসাবে কাজ করিবে।

১৪৭। **ট্রানশিপমেন্টের তত্ত্বাবধান।**—(১) ট্রানশিপমেন্ট হওয়া পণ্য এক যানবাহন হইতে অন্য কোনো যানবাহনে অপসারণ কাজ তত্ত্বাবধান করিবার জন্য কোন কাস্টমস কর্মকর্তাকে নিয়োগ করা যাইবে।

(২) বোর্ড—

- (ক) পণ্য ট্রানশিপমেন্ট করিবার কাস্টমস বন্দর বা কাস্টমস বিমানবন্দর চিহ্নিতকরণ;
- (খ) পণ্য আগমনের পর ট্রানশিপমেন্ট পদ্ধতির অধীন ন্যস্তকৃত পণ্যের রপ্তানির জন্য সর্বোচ্চ সময়সীমা নির্ধারণ; এবং
- (গ) এই অধ্যায়ের বিধানাবলী বাস্তবায়নের জন্য—  
প্রয়োজনীয় বিধিমালা প্রণয়ন করিতে পারিবে।

১৪৮। **ট্রানশিপমেন্টের ক্ষেত্রে আমদানিকারকের বাধ্যবাধকতা।**—ট্রানশিপমেন্ট পদ্ধতির অধীন পণ্য ন্যস্ত করিয়াছেন এমন কোনো আমদানিকারক নিম্নলিখিত বিষয়ের জন্য দায়ী থাকিবেন, যথা:—

- (ক) কাস্টমস বন্দর বা কাস্টমস বিমানবন্দরের মধ্যে বোর্ড কর্তৃক এতদুদ্দেশ্যে অনুমোদিত স্থানে আমদানিকারী নৌযান বা উড়োজাহাজ হইতে নামানো পণ্যের নিরাপদ সংরক্ষণ;

- (খ) পণ্য সনাক্তকরণ নিশ্চিত করিবার জন্য কোনো কাস্টমস কর্মকর্তা কর্তৃক গৃহীত কোনো পদক্ষেপ প্রতিপালন;
- (গ) নির্ধারিত সময়সীমার মধ্যে রপ্তানিকারী বাহনে পণ্য বোঝাই ;
- (ঘ) পণ্য ঘোষণা ও ছাড়ের জন্য প্রয়োজনীয় আনুষ্ঠানিকতা সম্পন্ন করা; এবং
- (ঙ) ট্রানশিপমেন্ট পদ্ধতি সম্পর্কিত বিধি-বিধান প্রতিপালন ।

১৪৯। **মেরামতের সময় পণ্য নামানো।**—(১) যাত্রা অথবা সমুদ্রযাত্রা সম্পন্ন করিবার পূর্বে যদি কোন যানবাহন মেরামতের জন্য কোনো কাস্টমস স্টেশনে প্রবেশ করিতে বাধ্য হয়, তাহা হইলে উক্ত যানবাহনের ভারপ্রাপ্ত ব্যক্তির আবেদনক্রমে যথাযথ কর্মকর্তা পণ্য অথবা উহার অংশবিশেষ নামানোর, এবং উক্ত মেরামতকালীন সময়ে উহা একজন যথাযথ কর্মকর্তার তত্ত্ববধানে রাখার, এবং বিনা শুল্কে উহা বোঝাই ও রপ্তানি করিবার অনুমতি প্রদান করিতে পারিবেন।

(২) উপ-ধারা (১) এর অধীন তত্ত্ববধান সংশ্লিষ্ট সমুদয় ব্যয় সংশ্লিষ্ট যানবাহনের ভারপ্রাপ্ত ব্যক্তি বহন করিবেন।

১৫০। **পদ্ধতির পরিসমাপ্তি।**—যেই নৌযানের বা উড়োজাহাজের মাধ্যমে বাংলাদেশ হইতে পণ্য রপ্তানি হইবে, সেই নৌযান বা উড়োজাহাজে পণ্য বোঝাই করা হইলে, সংশ্লিষ্ট আমদানিকারকের বাধ্যবাধকতা পূরণ এবং ট্রানশিপমেন্ট পদ্ধতির পরিসমাপ্ত ঘটিবে।

### অষ্টাদশ অধ্যায় ট্রানজিট বাণিজ্য

১৫১। **ব্যাগেজ বা পোস্টাল পণ্যের ক্ষেত্রে এই অধ্যায়ের অপ্রযোজ্যতা।**—এই অধ্যায়ের বিধানাবলী ব্যাগেজ এবং ডাকযোগে আমদানিকৃত পণ্যের ক্ষেত্রে প্রযোজ্য হইবে না।

১৫২। **একই যানবাহনে পণ্য ট্রানজিট।**—(১) কোনো যানবাহনে আমদানিকৃত এবং বাংলাদেশের কোনো কাস্টমস-স্টেশনে অথবা বাংলাদেশের বাহিরে কোনো গন্তব্যে ট্রানজিটের জন্য কার্গো ঘোষণায় উল্লিখিত কোনো পণ্য ট্রানজিটের কাস্টমস-স্টেশনে উহার উপর আরোপণীয় আমদানি শুল্ক ও কর, যদি থাকে, পরিশোধ ব্যতিরেকে, ধারা ২৪ এর বিধানাবলী এবং বিধিমালার বিধান সাপেক্ষে, উক্তরূপ ট্রানজিটে প্রেরণের অনুমতি প্রদান করা যাইবে।

(২) বাংলাদেশের মধ্য দিয়া বাংলাদেশের বাহিরের কোনো গন্তব্যে ট্রানজিটে চলাচলকারী কোনো যানবাহনে আমদানিকৃত কোনো রসদ ও ভান্ডার সামগ্রী, বিধিমালার বিধান সাপেক্ষে, উহাদের উপর অন্যভাবে আরোপণীয় আমদানি শুল্ক ও করসমূহ পরিশোধ ব্যতিরেকে উক্ত যানবাহনে ভোগের জন্য অনুমতি প্রদান করা যাইবে।

১৫৩। **নির্ধারিত শর্তাবলী সাপেক্ষে কতিপয় পণ্য শ্রেণীর পরিবহন।**—বিদেশী ভূখন্ডের মধ্য দিয়া বাংলাদেশের এক এলাকা হইতে কোনো পণ্য অন্য এলাকায়, গন্তব্যে উহাদের সঠিকভাবে পৌঁছানোর জন্য বিধি দ্বারা নির্ধারিত শর্ত সাপেক্ষে, পরিবহন করা যাইবে।

১৫৪। **বাংলাদেশের মধ্য দিয়া বিদেশী ভূখণ্ডে পণ্য ট্রানজিট।**—(১) যেই ক্ষেত্রে কোনো পণ্য বাংলাদেশের মধ্য দিয়া বাংলাদেশের বাহিরে কোনো গন্তব্যে ট্রানজিটের জন্য এন্ট্রি করা হয় সেই ক্ষেত্রে উপযুক্তকর্মকর্তা, বিধিমালার বিধান সাপেক্ষে, উক্ত পণ্যের উপর অন্যভাবে আরোপণীয় আমদানি শুল্ক ও করসমূহ পরিশোধ ব্যতিরেকে উহাদের ট্রানজিটযোগে প্রেরণের অনুমতি প্রদান করিতে পারিবে:

তবে শর্ত থাকে যে, আইনের ধারা ৫০ মোতাবেক ট্রানজিট এর অধীন পণ্যের আমদানি শুল্ক ও কর এর জন্য নিশ্চয়তা হিসেবে একটি গ্যারান্টি বা নিরাপত্তা সাপেক্ষে উক্তরূপ ট্রানজিট হইতে হইবে।

(২) বোর্ড, সরকারী গেজেটে প্রজ্ঞাপন দ্বারা, বাংলাদেশের মধ্য দিয়া বাংলাদেশের বাহিরে ট্রানজিট এর অধীন পণ্য এবং যানবাহন এর জন্য সেবা জনিত ব্যয় বাবদ ফি নির্ধারণ করিতে পারিবে।

১৫৫। **খালাসের জন্য আমদানিকৃত পণ্য অভ্যন্তরীণ কাস্টম স্টেশনে স্থানান্তর।**—(১) যথাযথ তত্ত্বাবধান এবং নিয়ন্ত্রণ নিশ্চিত করিবার জন্য বোর্ড, বিধি দ্বারা নির্ধারিত পদ্ধতিতে, কোনো আমদানিকৃত পণ্য যে কাস্টমস স্টেশনে আগমন করিয়াছে, উক্ত কাস্টমস স্টেশন হইতে, বাংলাদেশের মধ্যে যে কাস্টমস স্টেশনে উক্ত পণ্য খালাসের জন্য প্রয়োজনীয় আনুষ্ঠানিকতা প্রতিপালন করা হইবে, উক্ত কাস্টমস স্টেশনে পরিবহনের অনুমতি প্রদান করিতে পারিবে।

(২) উপ-ধারা (১) বর্ণিত পদ্ধতির অধীন ন্যস্তকৃত সকল পণ্য গন্তব্য কাস্টমস স্টেশনে পৌঁছাইবার পর, উক্ত পণ্য প্রথম আমদানির সময়ে যেই পদ্ধতিতে ঘোষণা করা হইয়াছে, সেই একই পদ্ধতিতে ঘোষণা করিতে হইবে এবং অনুরূপভাবে ব্যবস্থা গ্রহণ করিতে হইবে।

### উনবিংশ অধ্যায়

#### রপ্তানি বা জাহাজীকরণ এবং পুনরায় নামানো

১৫৬। **রপ্তানি পদ্ধতি।**—(১) নিম্নলিখিত পণ্য ব্যতীত বাংলাদেশ ত্যাগের জন্য নির্ধারিত অন্য সকল পণ্য, পণ্য ঘোষণা দাখিল এবং রপ্তানি পদ্ধতির অধীন ন্যস্ত হওয়া সাপেক্ষে, রপ্তানি করা যাইবে, যথা:—

- (ক) ট্রানজিট পদ্ধতির অধীন বাংলাদেশের মধ্য দিয়া অতিক্রমকারী পণ্য;
- (খ) ট্রানজিট পদ্ধতির অধীন বাংলাদেশের এক স্থান হইতে কোনো সংলগ্ন দেশের মাধ্যমে অন্য কোনো স্থানে স্থানান্তরিত পণ্য; এবং
- (গ) ট্রানশিপমেন্ট বা ভান্ডার পদ্ধতির অধীন পুনঃরপ্তানিকৃত পণ্য।

(২) রপ্তানি পদ্ধতির অধীন কোনো পণ্য ন্যস্তকরণের ক্ষেত্রে নিম্নলিখিত শর্তাবলী প্রতিপালন করিতে হইবে, যথা:—

- (ক) সংশ্লিষ্ট পণ্যের উপর প্রদেয় সকল রপ্তানি শুল্ক ও কর, এবং অন্যান্য চার্জ পরিশোধ বা এই আইন বা বিধির অধীনে অনুমোদিত হইলে, উক্ত পরিশোধ নিশ্চিত করিবার জন্য গ্যারান্টি প্রদান করিতে হইবে;

- (খ) বিধি দ্বারা নির্ধারিত পদ্ধতি এবং যথাযথ কর্মকর্তার চাহিদা সাপেক্ষে, পণ্যের প্রকৃত রপ্তানি সম্পন্ন প্রমাণ দাখিল নিশ্চিত করিবার জন্য প্রয়োজ্য ক্ষেত্রে গ্যারান্টি প্রদান করিতে হইবে; এবং
- (গ) পণ্য ঘোষণা এবং খালাসের জন্য প্রয়োজনীয় আনুষ্ঠানিকতা সম্পন্ন করিতে হইবে।

১৫৭। **পণ্য বোঝাই না করা অথবা পুনরায় নামানোর নোটিশ এবং উহাদের উপর শুল্ক ফেরত।**—(১) যদি রপ্তানি পণ্য ঘোষণা অথবা কার্গো ঘোষণায় উল্লিখিত পণ্য বোঝাই না করা হয় অথবা কম বোঝাই করা হয় অথবা বোঝাই করিবার পর উহা নামানো হয়, তাহা হইলে যেই যানবাহনে উক্ত পণ্য বোঝাই করিবার অভিপ্রায় ছিল অথবা যেই যানবাহন হইতে উহা নামানো হইয়াছে সেই যানবাহনটি কাস্টমস স্টেশন ত্যাগ করিবার ১৫ (পনের) কার্যদিবস অতিবাহিত হওয়ার পূর্বে পণ্যের রপ্তানিকারক যথাযথ কর্মকর্তার নিকট, যেই ক্ষেত্রে কর্মকর্তা নিজেই পণ্য ঘোষণা অপেক্ষা কম বোঝাই করেন অথবা পুনরায় নামানোর ব্যবস্থা করিয়াছেন সেইক্ষেত্রে ব্যতীত, অন্যান্য ক্ষেত্রে, উক্ত কম বোঝাই অথবা পুনরায় নামানোর সংবাদ প্রদান করিবেন।

(২) উপ-ধারা (১) এর অধীন পণ্য-বোঝাই অথবা কম বোঝাই অথবা পুনরায় নামানোর এক বৎসরের মধ্যে যথাযথ কর্মকর্তার নিকট আবেদন করা হইলে বোঝাই করা হয় নাই অথবা কম বোঝাইকৃত অথবা বোঝাই করিবার পর পুনরায় নামানো পণ্যের উপর আরোপিত শুল্ক যেই ব্যক্তির পক্ষে উহা পরিশোধ করা হইয়াছিল তাহাকে ফেরত প্রদান করা হইবে:

তবে শর্ত থাকে যে, যেই ক্ষেত্রে উল্লিখিত ১৫ (পনের) কার্যদিবস সময়ের মধ্যে পণ্য বোঝাই করা হয় নাই অথবা কম বোঝাই অথবা পুনরায় নামানোর প্রয়োজনীয় সংবাদ প্রদান করা না হয়, সেইক্ষেত্রে যথাযথ কর্মকর্তা যেরূপ উপযুক্ত বিবেচনা করেন সেইরূপ জরিমানা, যদি হয়, আরোপ সাপেক্ষে শুল্ক ফেরত প্রদান করিতে পারিবেন।

১৫৮। **কোনো কাস্টমস স্টেশনে প্রত্যাবর্তনকারী অথবা অন্য কাস্টমস স্টেশনে প্রবেশকারী যানবাহন হইতে পুনরায় নামানো অথবা ট্রানশিপকৃত পণ্য।**—(১) কোনো কাস্টমস স্টেশন হইতে ছাড়িয়া যাওয়ার পর কোনো যানবাহন যদি পণ্য খালাস না করিয়া উক্ত কাস্টমস স্টেশনে প্রত্যাবর্তন করে অথবা অন্য কোনো কাস্টমস স্টেশনে প্রবেশ করে এবং উক্ত যানবাহনে পরিবহনকৃত পণ্যের কোনো মালিক যদি উহা অথবা উহার অংশবিশেষ পুনরায় রপ্তানির উদ্দেশ্যে নামানো অথবা ট্রানশিপ করিবার ইচ্ছা পোষণ করেন, তাহা হইলে তিনি যানবাহনের ভারপ্রাপ্ত ব্যক্তির সম্মতিক্রমে এতদুদ্দেশ্যে যথাযথ কর্মকর্তার নিকট আবেদন করিতে পারিবেন।

(২) যথাযথ কর্মকর্তা যদি উপ-ধারা (১) এর অধীন প্রাপ্ত আবেদনপত্র মঞ্জুর করেন, তাহা হইলে অতঃপর তিনি যানবাহনটির উপর সতর্ক দৃষ্টি রাখার জন্য এবং উক্তরূপ নামানো অথবা ট্রানশিপমেন্টের সময় উক্ত পণ্যের দায়িত্ব গ্রহণ করিবার জন্য একজন কাস্টমস কর্মকর্তা প্রেরণ করিবেন।

(৩) ইতোপূর্বে প্রথম রপ্তানির সময় শুল্ক নিষ্পত্তি করিবার যুক্তিতে কোনো পণ্য শুল্ক-মুক্তভাবে ট্রানশিপ অথবা পুনরায় রপ্তানির জন্য অনুমতি প্রদান করা যাইবে না, যদি না উহা পুনরায় রপ্তানির সময় পর্যন্ত একজন কাস্টমস কর্মকর্তার তত্ত্বাবধানে যথাযথ কর্মকর্তা কর্তৃক নির্ধারিত স্থানে প্রবেশ করানো এবং রক্ষিত হয় অথবা উক্তরূপ তত্ত্বাবধানে ট্রানশিপ করা হয়।

(৪) উপ-ধারা (৩) এ উল্লিখিত তত্ত্বাবধান সংশ্লিষ্ট সমুদয় ব্যয় মালিক কর্তৃক বহন করা হইবে।

১৫৯। **কাস্টমস স্টেশনে প্রত্যাবর্তনকারী যানবাহনের প্রবেশ এবং পণ্য নামানো।**—(১) ধারা ১৫৮ এ উল্লিখিত দুইটি ক্ষেত্রের মধ্যে যে কোনো একটি ক্ষেত্রে যানবাহনের ভারপ্রাপ্ত ব্যক্তি সংশ্লিষ্ট যানবাহন কাস্টমস স্টেশনের অভ্যন্তরে প্রবেশ করানোর জন্য এন্ট্রি করিতে পারিবেন এবং পণ্যের মালিক অতঃপর, যানবাহনটির ভারপ্রাপ্ত ব্যক্তির সম্মতিক্রমে, এই আইন এবং প্রণীত বিধিমালার বিধান অনুসারে উহা নামাইতে পারিবেন।

(২) প্রত্যেক ক্ষেত্রে কোনো পরিশোধিত রপ্তানি শুল্ক সংশ্লিষ্ট পণ্যের মালিকের আবেদনক্রমে, উহা নামানোর এক বৎসরের মধ্যে, ফেরত প্রদান করা হইবে এবং শুল্ক, কাস্টমস শুল্ক বা অন্য কোনো কর হটক না কেন, প্রত্যর্পণ অথবা শুল্ক ফেরত (repayment) প্রদান হিসাবে মালিককে প্রদত্ত কোনো অর্থ তাহার নিকট হইতে আদায় করা হইবে অথবা ফেরতযোগ্য অর্থের সহিত সমন্বয় করা হইবে।

১৬০। **ফ্রাস্ট্রেটেড (frustrated) কার্গো।**—(১) যেই ক্ষেত্রে কোনো পণ্য অসাবধানতাবশত, গন্তব্য ভুল হওয়া অথবা উহার প্রাপকের সন্ধান না পাওয়ার কারণে কোনো কাস্টমস স্টেশনে আনীত হয়, সেই ক্ষেত্রে উক্ত পণ্য আনয়নকারী যানবাহনের ভারপ্রাপ্ত ব্যক্তির অথবা উহা প্রেরণকারীর আবেদনক্রমে এবং বিধিমালার বিধান সাপেক্ষে কমিশনার অব কাস্টমস উক্ত পণ্যের উপর আরোপণীয় শুল্ক, আমদানি শুল্ক কিংবা রপ্তানি শুল্ক, যাহাই হটক না কেন, পরিশোধ ব্যতিরেকে উহা এই শর্তে রপ্তানি করিবার অনুমতি প্রদান করিতে পারিবেন, যে, উক্ত পণ্য একজন কাস্টমস কর্মকর্তার তত্ত্বাবধানে রাখিয়া রপ্তানি করিতে হইবে।

(২) উপ-ধারা (১) এ উল্লিখিত কারণ ব্যতীত অন্য কোনো কারণে কোনো কাস্টমস স্টেশনে কোনো পণ্য আনয়ন করা হইলে, বোর্ডের পূর্বানুমতিক্রমে, কমিশনার অব কাস্টমস উক্ত পণ্য, উহার উপর আরোপণীয় শুল্ক পরিশোধ ব্যতিরেকে, পুনরায় রপ্তানির অনুমতি প্রদান করিতে পারিবেন।

(৩) উপ-ধারা (১) এ উল্লিখিত তত্ত্বাবধানের সহিত সংশ্লিষ্ট সমুদয় ব্যয় আবেদনকারীকে বহন করিতে হইবে।

### বিংশ অধ্যায়

#### রসদ ও ভান্ডার সামগ্রী

১৬১। **আগমনকারী যানবাহনের রসদ ও ভান্ডার সামগ্রী।**—(১) বোর্ড কর্তৃক নির্ধারিত শর্তাবলী ও বিধি-নিষেধ এবং পণ্য ঘোষণা এবং ছাড়ের জন্য প্রয়োজনীয় আনুষ্ঠানিকতা সম্পাদন সাপেক্ষে, এবং এই অধ্যায়ের অধীন ভিন্নরূপ কিছু উল্লেখ না থাকিলে, বাংলাদেশের বাহিরের কোনো স্থান হইতে আগমনকারী কোন যানবাহনের রসদ ও ভান্ডার হিসাবে বহনকৃত কোন পণ্য, নিম্নলিখিত শর্ত সাপেক্ষে, কাস্টমস শুল্ক হইতে অব্যাহতি পাইবে, যথা:—

- (ক) উক্ত রসদ ও ভান্ডার সামগ্রী, উল্লিখিত যানবাহন বাংলাদেশে উহার প্রস্থানের সর্বশেষ বন্দর, বিমানবন্দর, বা কাস্টমস স্টেশন হইতে প্রস্থানের পূর্বে, উক্ত যানবাহন ও যানবাহনের যাত্রী বা ক্রুদের ব্যবহার বা সেবার জন্য ব্যবহার ব্যতীত, ভিন্ন কোনো উদ্দেশ্যে ব্যবহার করা যাইবে না; এবং
- (খ) উক্ত রসদ ও ভান্ডার সামগ্রী যানবাহন হইতে নামানো যাইবে না।



(২) কোনো কাস্টমস কর্মকর্তা, প্রয়োজনে, উপ-ধারা (১) এ উল্লিখিত যানবাহনের ভারপ্রাপ্ত ব্যক্তিকে, রসদ ও ভান্ডার সামগ্রী সীলমোহর করা সহ, উহার যে কোনো অননুমোদিত ব্যবহার রোধকল্পে যথার্থ পদক্ষেপ গ্রহণের জন্য নির্দেশ প্রদান করিতে পারিবেন।

১৬২। **রসদ ও ভান্ডার সামগ্রীর অন্যান্য বিলি বন্দেজ।**—ধারা ১৬১ তে যাহা কিছুই থাকুক না কেন, বাংলাদেশের বাহিরের কোনো স্থান হইতে আগমনকারী কোন যানবাহনে রসদ ও ভান্ডার সামগ্রী হিসাবে বহনকৃত এবং আগমনের পর যথাযথভাবে রিপোর্টকৃত পণ্য, যথাযথ কর্মকর্তা কর্তৃক অনুমোদন এবং বোর্ড কর্তৃক নির্ধারিত শর্তাবলী ও নিয়ন্ত্রণ সাপেক্ষে,—

- (ক) বোর্ড কর্তৃক অনুমোদিত নিরাপদ স্থানে অস্থায়ীভাবে তত্ত্বাবধানের জন্য নামানো বা খালাস করা যাইবে এবং বাংলাদেশের বাহিরে সম্ভাব্য কোনো গন্তব্যস্থলে যাওয়ার প্রাক্কালে ব্যবহারের জন্য একই যানবাহনে পুনরায় বোঝাই করা যাইবে;
- (খ) বাংলাদেশের বাহিরে সম্ভাব্য কোনো গন্তব্যস্থলে যাওয়ার প্রাক্কালে ব্যবহারের জন্য, শুল্ক ও কর পরিশোধ ব্যতিরেকে, একই স্থানে একই যাত্রা পথের অন্য যানবাহনে অবিলম্বে স্থানান্তরের জন্য নামানো বা খালাস করা যাইবে।

১৬৩। **শুল্ক ও কর অব্যাহতি প্রাপ্ত রসদ ও ভান্ডার সামগ্রী সরবরাহ।**—বাংলাদেশে উৎপাদিত অথবা প্রস্তুতকৃত পণ্য, যাহা কোনো বৈদেশিক বন্দর, বিমানবন্দর অথবা স্টেশনের গন্তব্যে যাত্রার জন্য উদ্যত কোনো যানবাহনে রসদ ও ভান্ডার সামগ্রী হিসাবে প্রয়োজন, উক্ত যানবাহনের আয়তন, যাত্রী ও ক্রুগণের সংখ্যা এবং যাত্রা বা ভ্রমণের মেয়াদ বিবেচনাপূর্বক যথাযথ কর্মকর্তা যেই পরিমাণ নির্ধারণ করিবে, সেই পরিমাণে শুল্ক ও কর পরিশোধ ব্যতিরেকে রপ্তানি করা যাইবে।

### একবিংশ অধ্যায়

**ব্যাগেজ এবং ডাকযোগে আমদানিকৃত অথবা রপ্তানিকৃত পণ্য সম্পর্কিত বিশেষ বিধানাবলী**

১৬৪। **যাত্রী অথবা ক্রু কর্তৃক ব্যাগেজ ঘোষণা।**—বাংলাদেশে আগমনকারী কোন যাত্রী অথবা ক্রু তাহার ব্যাগেজ বা ব্যাগেজের পণ্য খালাসের উদ্দেশ্যে, বিধি দ্বারা নির্ধারিত পদ্ধতিতে, যথাযথ কর্মকর্তার নিকট একটি মৌখিক বা লিখিত ঘোষণা প্রদান করিবেন এবং তাহার ব্যাগেজ এবং ব্যাগেজের পণ্য অথবা তাহার সহিত বহনকৃত পণ্য সম্পর্কে উক্ত কর্মকর্তার সকল প্রশ্নের জবাব প্রদান করিবেন এবং উক্ত ব্যাগেজ বা ব্যাগেজের পণ্য পরীক্ষার জন্য উপস্থাপন করিবেন।

১৬৫। **ব্যাগেজের ক্ষেত্রে শুল্কহার নির্ধারণ।**—ধারা ১৬৪ এর অধীন ব্যাগেজের ক্ষেত্রে প্রযোজ্য শুল্কহার, যদি থাকে, উক্ত ব্যাগেজ সম্পর্কে যেই তারিখে ঘোষণা প্রদান করা হয়, সেই তারিখে বলবৎ শুল্কহার প্রযোজ্য হইবে।

১৬৬। **প্রকৃত ব্যাগেজ শুল্ক হইতে অব্যাহতি।**—যথাযথ কর্মকর্তা যদি এইমর্মে সন্তুষ্ট হন যে, যাত্রীর অথবা ক্রুর কোনো ব্যাগেজ প্রকৃত ব্যবহারের অথবা উপহার প্রদানের উদ্দেশ্যে আণয়ন করা হইয়াছে, তাহা হইলে তিনি উহা, বিধি দ্বারা নির্ধারিত সীমা, শর্ত ও বিধি-নিষেধ সাপেক্ষে, শুল্কমুক্তভাবে খালাস প্রদান করিতে পারিবেন।

১৬৭। **ব্যাগেজের সাময়িক আটক।**—যেই ক্ষেত্রে কোন যাত্রীর ব্যাগেজের কোন পণ্য শুল্কযোগ্য হয় অথবা উহার আমদানি নিষিদ্ধ বা নিয়ন্ত্রিত হয় এবং যেই ক্ষেত্রে উহার বিষয়ে ধারা ১৬৪ এর অধীন সঠিক ঘোষণা প্রদত্ত হয়, সেইক্ষেত্রে যাত্রীর আবেদনক্রমে যথাযথ কর্মকর্তা উক্ত পণ্য তাহাকে বাংলাদেশ ত্যাগের প্রাক্কালে ফেরত প্রদানের উদ্দেশ্যে আটক রাখিতে পারিবেন।

১৬৮। **ট্রানজিট যাত্রী অথবা ক্রু সদস্যগণের ব্যাগেজের ব্যবস্থাপনা।**—ধারা ১৬৪ এর অধীন ঘোষণা প্রদান করা হইয়াছে, ট্রানজিট যাত্রী অথবা ক্রু সদস্যগণের এইরূপ ব্যাগেজ, বিধি দ্বারা নির্ধারিত সীমা, শর্ত ও বিধি-নিষেধ সাপেক্ষে, শুল্ক পরিশোধ ব্যতিরেকে যথাযথ কর্মকর্তা কর্তৃক উক্তরূপ ট্রানজিটে প্রেরণের অনুমতি প্রদান করা যাইবে।

১৬৯। **ডাকযোগে আমদানিকৃত বা রপ্তানিকৃত পণ্যের ক্ষেত্রে লেবেল বা ঘোষণাকে পণ্য ঘোষণা হিসাবে গণ্য করা।**—ডাকযোগে আমদানিকৃত অথবা রপ্তানিকৃত পণ্যের ক্ষেত্রে উহার বর্ণনা, পরিমাণ এবং মূল্য সম্বলিত লেবেল অথবা ঘোষণাকে এই আইনের উদ্দেশ্য পূরণকল্পে আমদানি অথবা, ক্ষেত্রমত, রপ্তানির জন্য ঘোষণা হিসাবে গণ্য করা হইবে।

১৭০। **ডাকযোগে আমদানিকৃত অথবা রপ্তানিকৃত পণ্যের ক্ষেত্রে শুল্কের হার।**—(১) ডাকযোগে আমদানিকৃত কোনো পণ্যের উপর প্রযোজ্য শুল্কের হার হইবে উহার উপর শুল্ক নিরূপণের জন্য ধারা ১৬৯ এ উল্লিখিত ঘোষণা অথবা লেবেল যেই তারিখে ডাক কর্তৃপক্ষ যথাযথ কর্মকর্তার নিকট উপস্থাপন করেন সেই তারিখে বলবৎ শুল্কহার।

(২) ডাকযোগে রপ্তানিকৃত কোনো পণ্যের উপর প্রযোজ্য শুল্কহার হইবে রপ্তানিকারক যে তারিখে উক্ত পণ্য রপ্তানির জন্য ডাক কর্তৃপক্ষের নিকট অর্পণ করেন সেই তারিখে বলবৎ শুল্কহার।

## দ্বাবিংশ অধ্যায়

### উপকূলীয় পণ্য এবং নৌযান সম্পর্কিত বিধানাবলী

১৭১। **ব্যাগেজের ক্ষেত্রে এই অধ্যায়ের অপ্রযোজ্যতা।**—এই অধ্যায়ের বিধানাবলী ব্যাগেজের ক্ষেত্রে প্রযোজ্য হইবে না।

১৭২। **উপকূলীয় পণ্যের এন্ট্রি।**—(১) উপকূলীয় পণ্যের প্রেরক বোর্ড কর্তৃক নির্ধারিত ফরমে যথাযথ কর্মকর্তার নিকট উক্ত পণ্য সম্পর্কিত একটি বিল পেশ করিবেন।

(২) উপ-ধারা (১) এ উল্লিখিত প্রত্যেক প্রেরক তাহার পেশকৃত উপকূলীয় পণ্য সম্পর্কিত বিল এ উহার অন্তর্ভুক্ত পণ্যের সত্যতা সম্পর্কে একটি ঘোষণা প্রদান করিবেন।

১৭৩। **উপকূলীয় পণ্য সম্পর্কিত বিল ছাড় না হওয়া পর্যন্ত উহা বোঝাই না করা।**—যথাযথ কর্মকর্তা কর্তৃক উপকূলীয় পণ্য সম্পর্কিত বিল ছাড় না হওয়া পর্যন্ত এবং উহা পণ্যের প্রেরক কর্তৃক নৌযানের মাস্টারের নিকট অর্পণ না করা পর্যন্ত কোনো নৌযান উপকূলীয় পণ্য গ্রহণ করিবে না:

তবে শর্ত থাকে যে, ব্যতিক্রমী অবস্থায় নৌযানের মাস্টার কর্তৃক লিখিত আবেদনক্রমে যথাযথ কর্মকর্তা উক্ত পণ্য সম্পর্কিত বিলের উপস্থাপন এবং ছাড় প্রদান অপেক্ষমান রাখিয়া উপকূলীয় পণ্য বোঝাই করিবার অনুমতি প্রদান করিতে পারিবেন।

১৭৪। **গন্তব্যস্থলে উপকূলীয় পণ্যের ছাড়পত্র।**—(১) উপকূলীয় পণ্য বহনকারী নৌযানের মাস্টার ধারা ১৭৩ এর অধীন তাহার নিকট অর্পিত সকল বিল নৌযানে বহন করিবেন এবং উক্ত নৌযান কোনো কাস্টমস বন্দর অথবা উপকূলীয় বন্দরে পৌঁছাইবার ২৪ (চব্বিশ) ঘন্টার মধ্যে যেই পণ্য উক্ত বন্দরে নামানো হইবে সেই পণ্য সম্পর্কিত সকল বিল যথাযথ কর্মকর্তার নিকট অর্পণ করিবেন।

(২) যেই ক্ষেত্রে কোনো উপকূলীয় পণ্য কোনো বন্দরে নামানো হয় সেই ক্ষেত্রে যথাযথ কর্মকর্তা যদি এইমর্মে সন্তুষ্ট হন যে, উক্ত পণ্য উপ-ধারা (১) এর অধীন তাহার নিকট অর্পিত বিলের অন্তর্ভুক্ত রহিয়াছে, তাহা হইলে তিনি উহা খালাসের অনুমতি প্রদান করিবেন।

১৭৫। **উপকূলীয় নৌযানের বিদেশী বন্দর স্পর্শ করা সম্পর্কিত ঘোষণা।**—উপকূলীয় পণ্য বহনকারী নৌযান বাংলাদেশের কোনো বন্দরে পৌঁছার অব্যবহিত পূর্বে কোনো বিদেশী বন্দর স্পর্শ করিয়া থাকিলে উহার মাস্টার ধারা ১৭৪ এ উল্লিখিত বিলসমূহের সহিত উক্ত ঘটনা বিবৃত করিয়া এবং উক্ত বিদেশী বন্দরে খালাসকৃত অথবা সেইস্থান হইতে নৌযানে বোঝাইকৃত পণ্যের, যদি থাকে, বিবরণ এবং বিনির্দেশ উল্লেখ করিয়া একটি ঘোষণা প্রদান করিবেন।

১৭৬। **কার্গো বুক।**—(১) প্রত্যেক উপকূলীয় নৌযানে নৌযানের নাম, যেখানে নিবন্ধিত সেই বন্দরের নাম এবং মাস্টারের নাম উল্লেখপূর্বক একটি কার্গো বুক সংরক্ষণ করিতে হইবে।

(২) প্রত্যেক উপকূলীয় নৌযানের মাস্টারের কর্তব্য হইবে নিম্নলিখিত বিষয়াদি কার্গো বুক লিপিবদ্ধকরণের ব্যবস্থা করা—

- (ক) নৌযানের গন্তব্য বন্দর এবং প্রতিটি সমুদ্রযাত্রা;
- (খ) প্রত্যেক পণ্য বোঝাই করা বন্দর হইতে প্রস্থানের এবং প্রত্যেক পণ্য খালাস হওয়া বন্দরে পৌঁছার ভিন্ন ভিন্ন সময়;
- (গ) প্রত্যেক পণ্য বোঝাই করা বন্দরের নাম এবং নৌযানে বোঝাইকৃত প্যাকেজসমূহের বর্ণনা ও পরিমাণ এবং উহাতে ধারণকৃত অথবা খোলা সাজানো পণ্যের বর্ণনাসহ সকল পণ্যের হিসাব এবং রপ্তানিকারকের এবং প্রাপকের নামসমূহ এবং বর্ণিত তথ্যাদি যতখানি নিরূপণ সম্ভবপর হয়;

(ঘ) প্রত্যেক পণ্য খালাসে প্রতিটি বন্দরের নাম এবং উক্ত নৌযান হইতে প্রতিটি পণ্য খালাসের তারিখ।

(৩) পণ্য বোঝাই এবং খালাস সম্পর্কিত এন্ট্রিসমূহ যথাক্রমে বোঝাই এবং খালাস করিবার বন্দরে সম্পন্ন করিতে হইবে।

(৪) যথাযথ কর্মকর্তার পরিদর্শনের জন্য চাহিবামাত্র প্রত্যেক মাস্টার কার্গো বুক উপস্থাপন করিবেন এবং উহাতে উক্ত কর্মকর্তা যেরূপ আবশ্যিক বিবেচনা করিবেন সেইরূপ নোট অথবা মন্তব্য লিপিবদ্ধ করিতে পারিবেন।

১৭৭। **কাস্টমস বন্দর অথবা উপকূলীয় বন্দর ব্যতীত অন্যত্র উপকূলীয় পণ্য বোঝাই অথবা খালাস না করা।**—ধারা ১০ এর অধীন ঘোষিত কাস্টমস বন্দর অথবা উপকূলীয় বন্দর ব্যতীত অন্য কোনো বন্দরে কোনো উপকূলীয় পণ্য কোনো নৌযানে বোঝাই অথবা নৌযান হইতে খালাস করা যাইবে না।

১৭৮। **প্রস্থানের পূর্বে উপকূলীয় নৌযান কর্তৃক লিখিত আদেশ গ্রহণ।**—(১) যথাযথ কর্মকর্তা কর্তৃক লিখিত আদেশ না পাওয়া পর্যন্ত কোনো কাস্টমস বন্দরে অথবা উপকূলীয় বন্দরে উপকূলীয় পণ্য আনয়নকারী অথবা বোঝাইকারী কোনো উপকূলীয় নৌযান উক্ত বন্দর হইতে প্রস্থান করিতে পারিবে না।

(২) উপ-ধারা (১) এ উল্লিখিত কোনো আদেশ প্রদান করা যাইবে না, যতক্ষণ পর্যন্ত না—

(ক) নৌযানের মাস্টার তাহার নিকট জিজ্ঞাসিত প্রশ্নের, যদি থাকে, উত্তর প্রদান করেন;

(খ) উক্ত নৌযান সম্পর্কিত অথবা উহার মাস্টার কর্তৃক প্রদেয় সকল চার্জ এবং জরিমানা, যদি থাকে, পরিশোধ করা হয় অথবা যথাযথ কর্মকর্তা কর্তৃক নির্দেশিত গ্যারান্টি দ্বারা উহার পরিশোধ নিশ্চিত করা হয়।

১৭৯। **উপকূলীয় পণ্যের ক্ষেত্রে এই আইনের কতিপয় বিধানের প্রয়োগ।**—(১) আমদানিকৃত পণ্য অথবা রপ্তানিতব্য পণ্যের ক্ষেত্রে ধারা ৭৫ যেরূপ প্রযোজ্য হয় সেইরূপ, যতদূর সম্ভব, উপকূলীয় পণ্যের ক্ষেত্রে প্রযোজ্য হইবে।

(২) আমদানিকৃত পণ্য অথবা রপ্তানিতব্য পণ্য বহনকারী নৌযানের ক্ষেত্রে ধারা ৬০ এর উপ-ধারা (২), ধারা ৬১ এবং ধারা ৬৯ যেইরূপ প্রযোজ্য হয় সেইরূপ, যতদূর সম্ভব, উপকূলীয় পণ্য বহনকারী নৌযানের ক্ষেত্রে প্রযোজ্য হইবে।

(৩) সরকার, গেজেটে প্রজ্ঞাপন দ্বারা, নির্দেশ প্রদান করিতে পারিবে যে, নবম অধ্যায়ের সকল বিধানাবলী অথবা যে কোনো বিধান এবং ধারা ৮৬ এর বিধানাবলী প্রজ্ঞাপনে যেইরূপ উল্লেখ থাকে সেইরূপ ব্যতিক্রম এবং পরিবর্তনসহ উপকূলীয় পণ্যের ক্ষেত্রে অথবা উপকূলীয় পণ্য বহনকারী নৌযানের ক্ষেত্রে প্রযোজ্য হইবে।

১৮০। **কতিপয় পণ্যের উপকূলীয় বাণিজ্য নিষিদ্ধ।**—কোন আইন দ্বারা অথবা আইনের অধীন আরোপিত নিষিদ্ধকরণ অথবা বিধি-নিষেধ লংঘন করিয়া উপকূলবাহী কোনো পণ্য অথবা রসদ ও ভান্ডার সামগ্রী হিসাবে কোনো পণ্য উপকূলীয় নৌযানে বহন করা যাইবে না অথবা উক্ত পণ্য অথবা রসদ ও ভান্ডার সামগ্রী এইরূপ বহন করিবার উদ্দেশ্যে বাংলাদেশের কোনো স্থানে আনয়ন করা যাইবে না।

১৮১। **অপরাধসমূহের জরিমানা বা দন্ড।**—(১) যদি কোন ব্যক্তি নিম্নের টেবিলের কলাম (৩) এ বর্ণিত কোন অপরাধ সংঘটন করেন, তাহা হইলে উক্ত অপরাধের জন্য তাহার বিরুদ্ধে কলাম (৪) এ বর্ণিত জরিমানা বা দন্ড আরোপনীয় হইবে, যথা:—

**টেবিল**

ক্রমিক নম্বর	সংশ্লিষ্ট ধারা অধ্যায় ইত্যাদি	অপরাধ	জরিমানা/ দন্ড
(১)	(২)	(৩)	(৪)
১	১০ ও ১১	যদি কোন ব্যক্তি- (ক) সমুদ্রপথে বা আকাশপথে আমদানিকৃত কোনো পণ্য খালাসের জন্য ধারা ১০ এর অধীন ঘোষিত কাস্টমস বন্দর অথবা কাস্টমস বিমানবন্দর ব্যতীত অন্য কোনো স্থানে নামান বা নামানোর চেষ্টা করেন; (খ) স্থলপথে বা অভ্যন্তরীণ জলপথে আমদানিকৃত কোনো পণ্য উহা আমদানির জন্য ধারা ১০ এর দফা (গ) এর অধীন ঘোষিত বুট ব্যতীত অন্য কোনো বুটের মাধ্যমে আমদানি করেন; (গ) রপ্তানি পণ্য বোঝাই করিবার জন্য নির্ধারিত কাস্টমস বন্দর অথবা কাস্টমস বিমানবন্দর ব্যতীত অন্য কোনো স্থান হইতে উহা সমুদ্রপথে অথবা আকাশপথে রপ্তানি করিবার চেষ্টা করেন;	(ক) সংশ্লিষ্ট ব্যক্তির বিরুদ্ধে পণ্য- মূল্যের অনূন্য সমপরিমাণ কিন্তু অনধিক দ্বিগুণ পরিমাণ অর্থ জরিমানা আরোপনীয় হইবে এবং সংশ্লিষ্ট পণ্য বাজেয়াপ্তিযোগ্য হইবে;  অথবা  (খ) বিচারিক আদালতি কর্তৃক দোষী সাব্যস্ত হইলে, সংশ্লিষ্ট ব্যক্তি অনূন্য ১(এক) বৎসর কিন্তু অনধিক ৬(ছয়) বৎসর মেয়াদের কারাদন্ডে এবং পণ্য মূল্যের অনূন্য সমপরিমাণ কিন্তু অনধিক দ্বিগুণ পরিমাণ অর্থদন্ডে দন্ডনীয় হইবেন এবং সংশ্লিষ্ট পণ্য বাজেয়াপ্তিযোগ্য হইবে।

ক্রমিক নম্বর	সংশ্লিষ্ট ধারা অধ্যায় ইত্যাদি	অপরাধ	জরিমানা/ দন্ড
(১)	(২)	(৩)	(৪)
		<p>(ঘ) ধারা ১০ এর দফা (গ) এর অধীন রপ্তানির জন্য নির্ধারিত ব্লুটের মাধ্যমে ব্যতীত অন্য কোনো ব্লুটে স্থলপথে অথবা অভ্যন্তরীণ জলপথে কোনো পণ্য রপ্তানির চেষ্টা করেন;</p> <p>(ঙ) কোন আমদানিকৃত পণ্য কাস্টমস বন্দর ব্যতীত অন্য কোন স্থানে নামানোর উদ্দেশ্যে উপসাগর, খাঁড়ি অথবা নদীতে আনয়ন করেন; বা</p> <p>(চ) কাস্টমস স্টেশন ব্যতীত অথবা ধারা ১১ এর দফা (খ) এর অধীন পণ্য বোঝাইয়ের জন্য অনুমোদিত স্থান ব্যতীত অন্য কোনো স্থান হইতে রপ্তানি করার জন্য কোনো পণ্য বাংলাদেশের স্থল সীমান্তে অথবা উপকূলের নিকটে অথবা কোনো উপসাগর, খাঁড়ি বা নদীর নিকটে আনয়ন করেন।</p>	
২	১৪, ষোড়শ অধ্যায় ও ২৮১	যদি কোন ব্যক্তি কমিশনার অব কাস্টমস কর্তৃক অনুমোদিত কোনো কাস্টমস ওয়্যারহাউসে নির্ধারিত কোনো শর্ত বা বাধ্যবাধকতা প্রতিপালন করিতে ব্যর্থ হন।	সংশ্লিষ্ট ব্যক্তির বিরুদ্ধে অনূ্যন ৫০ (পঞ্চাশ) হাজার কিন্নু অনধিক ৩ (তিন) লক্ষ টাকা জরিমানা আরোপনীয় হইবে।
৩	১৫	যদি কোন ব্যক্তি ধারা ১৫ এর অধীন কাস্টমস কর্মকর্তাদের আরোহন বা অবতরণের উদ্দেশ্যে কাস্টমস স্টেশনের নির্ধারিত স্থানে আগমনকারী বা বহির্গমনমুখী কোনো জাহাজ আনয়ন করিতে বা যথাযথ কর্মকর্তার নির্দেশ অনুযায়ী উক্ত স্টেশনের নির্ধারিত এলাকার মধ্যে উক্ত জাহাজ চলাচল বা অবস্থান করাইতে ব্যর্থ হন।	সংশ্লিষ্ট ব্যক্তির বিরুদ্ধে অনূ্যন ২০ (বিশ) হাজার টাকা কিন্নু অনধিক ৫০ (পঞ্চাশ) হাজার টাকা জরিমানা আরোপনীয় হইবে।

ক্রমিক নম্বর	সংশ্লিষ্ট ধারা অধ্যায় ইত্যাদি	অপরাধ	জরিমানা/ দন্ড
(১)	(২)	(৩)	(৪)
৪	চতুর্থ অধ্যায়	<p>(১) যদি কোন ব্যক্তি-</p> <p>(ক) আইনানুগ কর্তৃত্ব ব্যতীত অবৈধভাবে কাস্টমস কম্পিউটার সিস্টেমে প্রবেশ করেন বা প্রবেশের চেষ্টা করেন অথবা উক্ত কম্পিউটার সিস্টেম হইতে প্রাপ্ত তথ্য অননুমোদিত উদ্দেশ্যে ব্যবহার বা প্রকাশ করেন;</p> <p>(খ) কাস্টমস কম্পিউটার সিস্টেমে আইনানুগ প্রবেশাধিকার প্রাপ্ত হইয়া উক্ত কম্পিউটার সিস্টেম হইতে প্রাপ্ত তথ্য অননুমোদিত উদ্দেশ্যে ব্যবহার বা প্রকাশ করেন; অথবা</p> <p>(গ) কর্তৃত্বপ্রাপ্ত না হইয়াও কাস্টমস কম্পিউটার সিস্টেম হইতে প্রাপ্ত তথ্য গ্রহণ করেন, এবং উক্ত তথ্য ব্যবহার, প্রকাশ বা প্রচার করেন অথবা উহা বিতরণের জন্য অনুমোদন প্রদান করেন।</p> <p>(২) যদি কোনো ব্যক্তি—</p> <p>(ক) কাস্টমস কম্পিউটার সিস্টেমে সংরক্ষিত কোনো রেকর্ড বা তথ্য প্রতারণামূলকভাবে পরিবর্তন করেন;</p> <p>(খ) কাস্টমস কম্পিউটার সিস্টেম ক্ষতিগ্রস্ত বা বিকল করেন; অথবা</p> <p>(গ) কাস্টমস কম্পিউটার সিস্টেম হইতে প্রাপ্ত তথ্য কোনো ডুল্লিকেট টেপ, ডিস্ক বা অন্য কোনো মাধ্যমে ধারণ করেন অথবা উক্ত সংরক্ষিত তথ্য বোর্ডের অনুমতি ব্যতীত অন্যভাবে ক্ষতিগ্রস্ত বা বিকল করেন।</p>	<p>(ক) সংশ্লিষ্ট ব্যক্তির বিরুদ্ধে অনূ্যন ১ (এক) লক্ষ টাকা কিন্তু অনধিক ৫ (পাঁচ) লক্ষ টাকা জরিমানা আরোপনীয় হইবে।</p> <p>অথবা</p> <p>(খ) বিচারিক আদালত কর্তৃক দোষী সাব্যস্ত হইলে, সংশ্লিষ্ট ব্যক্তি অনূ্যন ৬ (ছয়) মাস কিন্তু অনধিক ২ (দুই) বৎসর মেয়াদের কারাদন্ডে, অথবা অনূ্যন ১ (এক) লক্ষ টাকা কিন্তু অনধিক ৫ (পাঁচ) লক্ষ টাকা অর্থদন্ডে, অথবা উভয়বিধ দন্ডে দন্ডনীয় হইবেন।</p>

ক্রমিক নম্বর	সংশ্লিষ্ট ধারা অধ্যায় ইত্যাদি	অপরাধ	জরিমানা/ দন্ড
(১)	(২)	(৩)	(৪)
		<p>(৩) যদি কোনো ব্যক্তি, ধারা ২০ এর অধীন—</p> <p>(ক) কোনো অনুমোদিত ব্যবহারকারী না হইয়াও কাস্টমস কম্পিউটার সিস্টেমে কোনো তথ্য প্রেরণ প্রমাণীকরণের উদ্দেশ্যে কোনো ইউনিক ইউজার আইডেন্টিফাইয়ার ব্যবহার করেন; অথবা</p> <p>(খ) কোনো নিবন্ধিত ব্যবহারকারী হইয়া কাস্টমস কম্পিউটার সিস্টেমে কোনো তথ্য প্রেরণ প্রমাণীকরণের জন্য অন্য কোন অনুমোদিত ব্যবহারকারীর ইউনিক ইউজার আইডেন্টিফাইয়ার ব্যবহার করেন।</p> <p>ব্যাখ্যা।- এন্ট্রি (৩) এ উল্লিখিত “অনুমোদিত ব্যবহারকারী ” বলিতে এই আইনের ধারা ১৭ এর অধীন অনুমতি প্রাপ্তব্যবহারকারী (authorized user) কে বুঝাইবে।</p> <p>(ক) সংশ্লিষ্ট ব্যক্তির বিরুদ্ধে অনূ্যন ১ (এক) লক্ষ টাকা কিন্তু অনধিক ৫ (পাঁচ) লক্ষ টাকা জরিমানা আরোপনীয় হইবে।</p> <p>অথবা</p> <p>(খ) বিচারিক আদালত কর্তৃক দোষী সাব্যস্ত হইলে, সংশ্লিষ্ট ব্যক্তি অনূ্যন ৬ (ছয়) মাস কিন্তু অনধিক ২ (দুই) বৎসর মেয়াদের কারাদন্ডে, অথবা অনূ্যন ১ (এক) লক্ষ টাকা কিন্তু অনধিক ৫ (পাঁচ) লক্ষ টাকা অর্থদন্ড, অথবা উভয়বিধ দন্ডে দন্ডনীয় হইবেন।</p>	



ক্রমিক নম্বর	সংশ্লিষ্ট ধারা অধ্যায় ইত্যাদি	অপরাধ	জরিমানা/ দন্ড
(১)	(২)	(৩)	(৪)
৫	২৪ ও ২৫	যদি কোন ব্যক্তি ধারা ২৪ বা ২৫ এর বিধান লংঘন করিয়া কোনো পণ্য আমদানি বা রপ্তানি করেন বা করার চেষ্টা করেন।	সংশ্লিষ্ট ব্যক্তির বিরুদ্ধে পণ্য-মূল্যের অন্যান্য সমপরিমাণ কিন্তু অনধিক দ্বিগুণ পরিমাণ অর্থ জরিমানা আরোপনীয় হইবে এবং সংশ্লিষ্ট পণ্য বাজেয়াপ্তযোগ্য হইবে।
৬	সাধারণ	যদি কোন ব্যক্তি কোনো পণ্য চোরাচালান করিয়া বাংলাদেশের অভ্যন্তরে আনয়ন করেন বা বাংলাদেশের বাহিরে লইয়া যান।	(ক) সংশ্লিষ্ট ব্যক্তির বিরুদ্ধে পণ্য-মূল্যের অন্যান্য সমপরিমাণ কিন্তু অনধিক দ্বিগুণ পরিমাণ অর্থ জরিমানা আরোপনীয় হইবে এবং সংশ্লিষ্ট পণ্য বাজেয়াপ্তযোগ্য হইবে;  অথবা  (খ) বিচারিক আদালত কর্তৃক দোষী সাব্যস্ত হইলে, সংশ্লিষ্ট ব্যক্তি অন্যান্য ১ (এক) বৎসর কিন্তু অনধিক ৬ (ছয়) বৎসর মেয়াদের কারাদন্ড এবং পণ্য-মূল্যের অন্যান্য সমপরিমাণ কিন্তু অনধিক দ্বিগুণ পরিমাণ অর্থদন্ডে দন্ডনীয় হইবেন এবং সংশ্লিষ্ট পণ্য বাজেয়াপ্তযোগ্য হইবে।
৭	সাধারণ	যদি কোন ব্যক্তি কোনো বৈধ কারণ ব্যতীত, যাহা প্রমাণের দায়িত্ব উক্ত ব্যক্তির উপর বর্তাইবে, চোরাচালানকৃত পণ্য অথবা চোরাচালানকৃত বলিয়া যুক্তিসঙ্গতভাবে সন্দেহ হয় এইরূপ অন্যান্য ৫০ (পঞ্চাশ) হাজার টাকা মূল্যমানের কোনো পণ্য দখলে আনেন অথবা যে কোনো উপায়ে	(ক) সংশ্লিষ্ট ব্যক্তির বিরুদ্ধে পণ্য-মূল্যের অন্যান্য সমপরিমাণ কিন্তু অনধিক দ্বিগুণ পরিমাণ অর্থ জরিমানা আরোপনীয় হইবে এবং সংশ্লিষ্ট পণ্য বাজেয়াপ্তযোগ্য হইবে;  অথবা

ক্রমিক নম্বর	সংশ্লিষ্ট ধারা অধ্যায় ইত্যাদি	অপরাধ	জরিমানা/ দন্ড
(১)	(২)	(৩)	(৪)
		<p>উহা বহন করা, অপসারণ করা, জমা রাখা, আশ্রয়ে রাখা, সংরক্ষণ করা, লুকাইয়া রাখা বা অন্য কোনো প্রকার ব্যবস্থা গ্রহণ করিবার সহিত সংশ্লিষ্ট থাকেন।</p> <p>ব্যাখ্যা- এই এন্ড্রির অধীন বিবেচ্য পণ্য যদি স্বর্ণ বুলিয়ন বা রৌপ্য বুলিয়ন হয় এবং কোন ব্যক্তি যদি এইমর্মে দাবী করেন যে, পণ্যটি চোরাচালানকৃত নয়, উহা বাংলাদেশে প্রক্রিয়াকরণের মাধ্যমে বা অন্য কোনো উপায়ে সংগৃহীত, তাহা হইলে বিষয়টি প্রমাণ করিবার দায়িত্ব সংশ্লিষ্ট ব্যক্তির উপর বর্তাইবে।</p>	(খ) বিচারিক আদালত কর্তৃক দোষী সাব্যস্ত হইলে, সংশ্লিষ্ট ব্যক্তি অনূন ১ (এক) বৎসর কিন্তু অনধিক ৬ (ছয়) বৎসর মেয়াদের কারাদন্ডে এবং পণ্য-মূল্যের অনূন সমপরিমাণ কিন্তু অনধিক দ্বিগুণ পরিমাণ অর্থদন্ডে দন্ডনীয় হইবেন এবং সংশ্লিষ্ট পণ্য বাজেয়াপ্তযোগ্য হইবে।
৮	৩৩ ও ৩৪	যদি কোন ব্যক্তি কাস্টমস শুল্ক পরিশোধ হইতে অব্যাহতিপ্রাপ্ত কোনো পণ্যের ক্ষেত্রে ধারা ৩৩ বা ৩৪ এর অধীন আরোপিত শর্ত, সীমা বা বিধি-নিষেধ লংঘন করেন।	সংশ্লিষ্ট ব্যক্তির বিরুদ্ধে সংশ্লিষ্ট পণ্যের উপর আরোপনীয় স্বাভাবিক (০ঃ০ঃ০ঃডু) শুল্ক-করাদির অনূন সমপরিমাণ কিন্তু অনধিক দ্বিগুন পরিমাণ অর্থ জরিমানা আরোপনীয় হইবে এবং সংশ্লিষ্ট পণ্য বাজেয়াপ্তযোগ্য হইবে।
৯	৪২	যদি কোন ব্যক্তি ধারা ৪২ এর অধীনে কাস্টমস সম্পর্কিত কোনো বিষয়ে অসত্য বিবৃতি প্রদান বা দলিলপত্র দাখিল করেন।	(ক) সংশ্লিষ্ট ব্যক্তির বিরুদ্ধে অপরাধ সংশ্লিষ্ট পণ্য-মূল্যের অনূন সমপরিমাণ কিন্তু অনধিক তিনগুণ পরিমাণ অর্থ জরিমানা আরোপনীয় হইবে এবং সংশ্লিষ্ট পণ্য বাজেয়াপ্তযোগ্য হইবে।

ক্রমিক নম্বর	সংশ্লিষ্ট ধারা অধ্যায় ইত্যাদি	অপরাধ	জরিমানা/ দন্ড
(১)	(২)	(৩)	(৪)
			অথবা (খ) বিচারিক আদালত কর্তৃক দোষী সাব্যস্ত হইলে, সংশ্লিষ্ট ব্যক্তি অনধিক ৫ (পাঁচ) বৎসর মেয়াদের কারাদন্ড বা পণ্য-মূল্যের অনূন্য সমপরিমাণ কিন্তু অনধিক তিনগুণ পরিমাণ অর্থদন্ড অথবা উভয়বিধ দন্ডে দন্ডনীয় হইবেন এবং সংশ্লিষ্ট পণ্য বাজেয়াপ্তিযোগ্য হইবে।
১০	সপ্তম অধ্যায়	যদি কোন ব্যক্তি কোনো পণ্যের উপর প্রত্যর্পন দাবী করেন অথবা প্রত্যর্পণ গ্রহণ করিয়াছেন যাহা যথাযথভাবে রপ্তানি করা হয় নাই অথবা এই আইনের বিধান লংঘন করিয়া জাহাজীকরণের পর সংশ্লিষ্ট পণ্য পুনরায় বাংলাদেশে নামান বা অবতরণ করান।	সংশ্লিষ্ট ব্যক্তির বিরুদ্ধে, প্রযোজ্য ক্ষেত্রে, সংশ্লিষ্ট প্রত্যর্পনকৃত অর্থ ফেরত প্রদানসহ উক্ত পণ্যের উপর আরোপনীয় শুল্ক-করের সমপরিমাণ অর্থ জরিমানা আরোপনীয় হইবে এবং, ক্ষেত্রমত, সংশ্লিষ্ট পণ্য বাজেয়াপ্তিযোগ্য হইবে।
১১	৫৭	(১) যদি কোন ব্যক্তি ধারা ৫৭ এর বিধান অনুযায়ী নির্ধারিত সময়সীমা ও পদ্ধতিতে যানবাহন ও কার্গো ঘোষণা দাখিল করিতে ব্যর্থ হন।  (২) যদি কোন ব্যক্তি ধারা ৫৭ এর বিধান অনুযায়ী কার্গো ঘোষণায় অন্তর্ভুক্ত বা বর্ণনা করিবার আবশ্যকতা থাকা সত্ত্বেও কোন পণ্য উক্ত ঘোষণায় অন্তর্ভুক্ত বা বর্ণনা করিতে ব্যর্থ হন, যাহা যানবাহনে থাকা অবস্থায় বা উক্ত যানবাহন হইতে নামানোর সময় পাওয়া যায়।	(১) সংশ্লিষ্ট ব্যক্তির বিরুদ্ধে অনূন্য ৫০ (পঞ্চাশ) হাজার টাকা কিন্তু অনধিক ১ (এক) লক্ষ টাকা জরিমানা আরোপনীয় হইবে।  (২) সংশ্লিষ্ট ব্যক্তির বিরুদ্ধে অনূন্য ৫০ (পঞ্চাশ) হাজার টাকা কিন্তু অনধিক ১ (এক) লক্ষ টাকা জরিমানা আরোপনীয় হইবে এবং সংশ্লিষ্ট পণ্য বাজেয়াপ্তিযোগ্য হইবে।

ক্রমিক নম্বর	সংশ্লিষ্ট ধারা অধ্যায় ইত্যাদি	অপরাধ	জরিমানা/ দন্ড
(১)	(২)	(৩)	(৪)
		(৩) যদি কোন ব্যক্তি ধারা ৫৭ এর বিধান অনুযায়ী কার্গো ঘোষণায় যে পণ্য অন্তর্ভুক্ত বা বর্ণনা করেন, তাহা পাওয়া না যায় বা কম পাওয়া যায়।	(৩) সংশ্লিষ্ট ব্যক্তির বিরুদ্ধে সংশ্লিষ্ট পণ্যের উপর আরোপনীয় শুল্ক-করের অন্যান্য সমপরিমাণ কিন্তু অনধিক দ্বিগুণ পরিমাণ অথবা, উক্ত পণ্য শুল্ক-করযোগ্য না হইলে বা উহার উপর শুল্ক-কর নিরূপন করা সম্ভব না হইলে, প্রতিটি নিখোঁজ বা ঘাটতি প্যাকেজ (package) বা পৃথক বস্তুর জন্য অনধিক ৫০ (পঞ্চাশ) হাজার টাকা এবং, বাক্স পণ্যের ক্ষেত্রে, অন্যান্য সংশ্লিষ্ট পণ্য-মূল্যের সমপরিমাণ অথবা ১ (এক) লক্ষ টাকা, যাহাই অধিকতর হয়, জরিমানা আরোপনীয় হইবে।
১২	৫৮, ৫৯, ৬০, ৭৫, ৭৮, ৮১, ৮২ ও ৮৩	যদি কোন ব্যক্তি ধারা ৫৮, ৫৯, ৬০, ৭৫, ৭৮, ৮১, ৮২ বা ৮৩ এর বিধান অনুযায়ী যথাযথ কর্মকর্তার অনুমতি ব্যতিরেকে কোনো যানবাহন হইতে কাস্টমস আনুষ্ঠানিকতা প্রযোজ্য এমন কোনো পণ্য খালাস করেন এবং বাংলাদেশ হইতে গমনোদ্যত কোনো যানবাহনে পণ্য বোঝাই করেন।	সংশ্লিষ্ট ব্যক্তির বিরুদ্ধে অন্যান্য ১ (এক) লক্ষ টাকা কিন্তু অনধিক ৫ (পাঁচ) লক্ষ টাকা জরিমানা আরোপনীয় হইবে এবং সংশ্লিষ্ট পণ্য বাজেয়াপ্তযোগ্য হইবে।
১৩	৬০	যদি কোন ব্যক্তি ধারা ৬০ এর বিধান অনুযায়ী পণ্য আগমন সম্পর্কে অবহিত করিতে এবং অন্তর্মুখী প্রতিবেদন প্রেরণ করিতে ব্যর্থ হন।	সংশ্লিষ্ট ব্যক্তির বিরুদ্ধে অন্যান্য ৫০ (পঞ্চাশ) হাজার টাকা কিন্তু অনধিক ১ (এক) লক্ষ টাকা জরিমানা আরোপনীয় হইবে।
১৪	৬২ ও ৬৩	যদি কোন ব্যক্তি ধারা ৬২ বা ৬৩ এর অধীন পোর্ট ক্লিয়ারেন্স বা যথাযথ কর্মকর্তার অনুমতি ব্যতীত কোন যানবাহন কাস্টমস স্টেশন হইতে নির্গমন করান বা নির্গমন করাইতে উদ্যত হন।	সংশ্লিষ্ট ব্যক্তির বিরুদ্ধে অন্যান্য ১ (এক) লক্ষ টাকা কিন্তু অনধিক ৫ (পাঁচ) লক্ষ টাকা জরিমানা আরোপনীয় হইবে।

ক্রমিক নম্বর	সংশ্লিষ্ট ধারা অধ্যায় ইত্যাদি	অপরাধ	জরিমানা/ দন্ড
(১)	(২)	(৩)	(৪)
১৫	৭১ ও ৭২	যদি কোন ব্যক্তি ধারা ৭১ বা ৭২ এর অধীন কাস্টমস স্টেশনে আগমনকারী বা কাস্টমস স্টেশন হইতে বহির্গমনমুখী জাহাজে অবতরণের উদ্দেশ্যে কাস্টমস কর্মকর্তাকে গ্রহণ করিতে কিংবা জাহাজে অবস্থানকারী কাস্টমস কর্মকর্তাকে তার প্রয়োজন অনুযায়ী পণ্য বা সেবা সরবরাহ করিতে ব্যর্থ হন।	সংশ্লিষ্ট ব্যক্তির বিরুদ্ধে অন্যান্য ২৫ (পঁচিশ) হাজার টাকা কিন্তু অনধিক ৫০ (পঞ্চাশ) হাজার টাকা জরিমানা আরোপনীয় হইবে।
১৬	৭৬	যদি কোন ব্যক্তি ধারা ৭৬ এর অধীন বোট নোট ব্যতীত অথবা বোট নোট এ উল্লিখিত পরিমাণের অধিক কোনো পণ্য কোনো কার্গো বোটের মাধ্যমে কোনো জাহাজ হইতে বা জাহাজে পরিবহন করেন।	সংশ্লিষ্ট ব্যক্তির বিরুদ্ধে সংশ্লিষ্ট পণ্যের উপর আরোপনীয় শুল্ক-করাদির অনধিক দ্বিগুণ পরিমাণ এবং, সংশ্লিষ্ট পণ্য শুল্ক-করযোগ্য না হইলে, অন্যান্য ১ (এক) লক্ষ টাকা কিন্তু অনধিক ৫ (পাঁচ) লক্ষ টাকা জরিমানা আরোপনীয় হইবে এবং সংশ্লিষ্ট পণ্য বাজেয়াপ্তযোগ্য হইবে।
১৭	৮০	যদি কোন ব্যক্তি ধারা ৮০ এর অধীন প্রণীত বিধি-বিধান পরিপালন না করিয়া বাংলাদেশী জাহাজের মালিকানাধীন প্রত্যেক নৌকা এবং অনধিক ১০০ (একশত) টনের অন্যান্য প্রত্যেক নৌযান চলাচল করান।	সংশ্লিষ্ট নৌযান বাজেয়াপ্তযোগ্য হইবে।
১৮	৯১ ও ৯২	যদি কোন ব্যক্তি ধারা ৯১ বা ৯২ এর বিধান অনুযায়ী এবং নির্ধারিত সময়সীমার মধ্যে, পণ্য ঘোষণা দাখিল করিতে ব্যর্থ হন।	সংশ্লিষ্ট ব্যক্তির বিরুদ্ধে অন্যান্য ৫ (পাঁচ) হাজার টাকা কিন্তু অনধিক ৫০ (পঞ্চাশ) হাজার টাকা জরিমানা আরোপনীয় হইবে।

ক্রমিক নম্বর	সংশ্লিষ্ট ধারা অধ্যায় ইত্যাদি	অপরাধ	জরিমানা/ দন্ড
(১)	(২)	(৩)	(৪)
১৯	৯২	যদি কোন ব্যক্তি ধারা ৯২ এর বিধান অনুযায়ী কাস্টমস আনুষ্ঠানিকতা সম্পন্ন বা কাস্টমস নিয়ন্ত্রণ পরিচালনা করিবার জন্য কোনো কাস্টমস কর্মকর্তা কর্তৃক আইনসংগতভাবে যাচিত কোনো দলিল বা তথ্য প্রদান করিতে ব্যর্থ হন।	সংশ্লিষ্ট ব্যক্তির বিরুদ্ধে অন্যান্য ৫০ (পঞ্চাশ) হাজার টাকা কিন্তু অনধিক ২ (দুই) লক্ষ টাকা জরিমানা আরোপনীয় হইবে এবং, প্রযোজ্য ক্ষেত্রে, সংশ্লিষ্ট পণ্য বাজেয়াপ্তযোগ্য হইবে।
২০	১০২	যদি কোন ব্যক্তি যথাযথ কর্মকর্তার অনুমতি ব্যতীত অস্থায়ী মজুদ (Temporary Storage) হইতে ধারা ১০২ এর অধীন ছাড় করা হয়নি, এমন পণ্য অপসারণ করেন।	সংশ্লিষ্ট ব্যক্তির বিরুদ্ধে সংশ্লিষ্ট পণ্যের উপর আরোপনীয় সমুদয় শুল্ক-কর পরিশোধ ছাড়াও উক্ত আরোপনীয় শুল্ক-করের অন্যান্য সমপরিমাণ কিন্তু অনধিক দশ গুণ পরিমাণ অর্থ জরিমানা আরোপনীয় হইবে।
২১	চতুর্দশ অধ্যায়	যদি কোন ব্যক্তি চতুর্দশ অধ্যায়ের অধীন অস্থায়ী আমদানির ক্ষেত্রে এই আইন বা তদধীন প্রণীত বিধি দ্বারা নির্ধারিত কোনো শর্ত বা বিধিনিষেধ পরিপালন করিতে ব্যর্থ হন।	সংশ্লিষ্ট পণ্যের উপর আরোপনীয় সমুদয় শুল্ক-কর পরিশোধ করা ছাড়াও সংশ্লিষ্ট ব্যক্তির বিরুদ্ধে প্রদেয় শুল্ক-কর এর অন্যান্য এক লক্ষ টাকা কিন্তু পণ্যের মূল্যের অনধিক তিনগুণ, যাহাই অধিকতর হয়, জরিমানা আরোপনীয় হইবে এবং সংশ্লিষ্ট পণ্য বাজেয়াপ্তযোগ্য হইবে।
২২	পঞ্চদশ অধ্যায়	যদি কোন ব্যক্তি ষোড়শ অধ্যায়ের অধীন কোন ওয়ারহাউসে এই আইন বা তদধীন প্রণীত বিধির বিধানাবলী লংঘন করিয়া বা কোন যথাযথ কর্মকর্তার অনুমতি ব্যতিরেকে কোনো কার্যক্রম পরিচালনা করেন।	সংশ্লিষ্ট ব্যক্তির বিরুদ্ধে অন্যান্য ৫০ (পঞ্চাশ) হাজার টাকা কিন্তু অনধিক ৩ (তিন) লক্ষ টাকা জরিমানা আরোপনীয় হইবে।

ক্রমিক নম্বর	সংশ্লিষ্ট ধারা অধ্যায় ইত্যাদি	অপরাধ	জরিমানা/ দন্ড
(১)	(২)	(৩)	(৪)
২৩	ষোড়শ অধ্যায়	(১) যদি কোনো ওয়্যারহাউস রক্ষক কোনো পণ্য ষোড়শ অধ্যায়ের বিধান অনুযায়ী ওয়্যারহাউসে সংরক্ষণ করিতে ব্যর্থ হন অথবা কাস্টমস শুল্ক ও কর ফাঁকি দেয়ার উদ্দেশ্যে ওয়্যারহাউস সুবিধার অপব্যবহার করেন।	(ক) সংশ্লিষ্ট ব্যক্তির বিরুদ্ধে সংশ্লিষ্ট পণ্যের উপর আরোপনীয় সমুদয় শুল্ক-করাদির অন্যান্য সমপরিমাণ কিন্তু অনধিক দ্বিগুণ পরিমাণ অর্থ জরিমানা আরোপনীয় হইবে এবং সংশ্লিষ্ট পণ্য বাজেয়াপ্তিযোগ্য হইবে;  অথবা  (খ) বিচারিক আদালত কর্তৃক দোষী সাব্যস্ত হইলে, সংশ্লিষ্ট ব্যক্তি অন্যান্য ৬ (ছয়) মাস কিন্তু অনধিক ৩ (তিন) বৎসর মেয়াদের সশ্রম কারাদন্ড অথবা আরোপনীয় শুল্ক-করের অন্যান্য সমপরিমাণ কিন্তু অনধিক দ্বিগুণ পরিমাণ অর্থদন্ড অথবা উভয়বিধ দন্ড দন্ডনীয় হইবেন এবং সংশ্লিষ্ট পণ্য বাজেয়াপ্তিযোগ্য হইবে।
		(২) যদি কোনো ওয়্যারহাউস রক্ষক কোনো ওয়্যারহাউস হইতে কোনো পণ্য শুল্ক পরিশোধ ব্যতিরেকে অবৈধভাবে বাহিরে লইয়া যান, বা উহাতে সহায়তা করেন বা অন্য কোনোভাবে সংশ্লিষ্ট থাকেন।	(ক) সংশ্লিষ্ট ব্যক্তির বিরুদ্ধে সংশ্লিষ্ট পণ্যের উপর আরোপনীয় সমুদয় শুল্ক-করাদির অন্যান্য সমপরিমাণ কিন্তু অনধিক দ্বিগুণ পরিমাণ অর্থ জরিমানা আরোপনীয় হইবে এবং সংশ্লিষ্ট পণ্য বাজেয়াপ্তিযোগ্য হইবে;  অথবা  (খ) বিচারিক আদালত কর্তৃক দোষী সাব্যস্ত হইলে, সংশ্লিষ্ট ব্যক্তি অন্যান্য ৩ (মাস) কিন্তু অনধিক ৩ (তিন) বৎসর মেয়াদের সশ্রম কারাদন্ড অথবা আরোপনীয় শুল্ক-করের অন্যান্য সমপরিমাণ কিন্তু অনধিক দ্বিগুণ পরিমাণ অর্থদন্ডে অথবা উভয়বিধ দন্ডে দন্ডনীয় হইবেন এবং সংশ্লিষ্ট পণ্য বাজেয়াপ্তিযোগ্য হইবে।

ক্রমিক নম্বর	সংশ্লিষ্ট ধারা অধ্যায় ইত্যাদি	অপরাধ	জরিমানা/ দন্ড
(১)	(২)	(৩)	(৪)
২৪	সপ্তদশ অধ্যায়	যদি কোন ব্যক্তি সপ্তদশ অধ্যায়ের ধারা ১৪৬, ১৪৭, ১৪৮, ১৪৯ বা ১৫০ এর বিধান অনুযায়ী ট্রান্সশিপমেন্ট সম্পর্কিত কোনো বিধি-বিধান লংঘন করেন বা ট্রান্সশিপমেন্টযোগ্য নয় এমন পণ্য ট্রান্সশিপ করেন।	সংশ্লিষ্ট ব্যক্তির বিরুদ্ধে অনূন ৫০ (পঞ্চাশ) হাজার টাকা কিন্তু অনধিক ১ (এক) লক্ষ টাকা জরিমানা আরোপনীয় হইবে এবং সংশ্লিষ্ট পণ্য বাজেয়াপ্তযোগ্য হইবে।
২৫	অষ্টাদশ অধ্যায়	যদি কোন ব্যক্তি অষ্টাদশ অধ্যায়ের ধারা ১৫২, ১৫৩, ১৫৪ বা ১৫৫ এর বিধান অনুযায়ী ট্রানজিট পদ্ধতির অধীন ন্যস্তকৃত পণ্য এবং প্রযোজ্য দলিল, উক্ত পদ্ধতি অনুযায়ী গন্তব্য কাস্টমস স্টেশনে উপস্থাপন করিতে ব্যর্থ হন অথবা ট্রানজিট সংক্রান্ত বিধি-বিধান লংঘন করেন।	শুল্ক-কর ফাঁকিজনিত অপরাধের ক্ষেত্রে, সংশ্লিষ্ট পণ্যের উপর আরোপনীয় সমুদয় শুল্ক-কর পরিশোধ করা ছাড়াও সংশ্লিষ্ট ব্যক্তির বিরুদ্ধে প্রদেয় শুল্ক-কর এর অনূন সমপরিমান কিন্তু অনধিক পাঁচগুণ পরিমান অর্থ জরিমানা আরোপনীয় হইবে এবং, প্রযোজ্য ক্ষেত্রে, উক্ত পণ্য বাজেয়াপ্তযোগ্য হইবে, তবে শুল্ক-কর ফাঁকির ক্ষেত্র ব্যতীত অন্যান্য ক্ষেত্রে উক্ত ব্যক্তির বিরুদ্ধে অনূন ৫০ (পঞ্চাশ) হাজার টাকা কিন্তু অনধিক ৩ (তিন) লক্ষ টাকা জরিমানা আরোপনীয় হইবে।
২৬	১৫৭	যদি কোন ব্যক্তি ধারা ১৫৭ এর অধীন রপ্তানি পণ্য বোঝাই না করার অথবা কম বোঝাই করার অথবা বোঝাই করিবার পর উহা পুনরায় নামানোর সংবাদ যথাযথ কর্মকর্তাকে অবহিত করিতে ব্যর্থ হন।	সংশ্লিষ্ট ব্যক্তির বিরুদ্ধে অনূন ২৫ (পঁচিশ) হাজার টাকা কিন্তু অনধিক ১ (এক) লক্ষ টাকা জরিমানা আরোপনীয় হইবে এবং, প্রযোজ্য ক্ষেত্রে, সংশ্লিষ্ট পণ্য বাজেয়াপ্তযোগ্য হইবে।
২৭	১৫৮	যদি কোন ব্যক্তি ধারা ১৫৮ এর অধীন যথাযথ কর্মকর্তার অনুমতি ব্যতিরেকে যানবাহন হইতে কোনো রপ্তানি পণ্য, রসদ বা ভান্ডারসামগ্রী পুনরায় নামান।	সংশ্লিষ্ট ব্যক্তির বিরুদ্ধে অনূন ২৫ (পঁচিশ) হাজার টাকা কিন্তু অনধিক ১ (এক) লক্ষ টাকা জরিমানা আরোপনীয় হইবে এবং সংশ্লিষ্ট পণ্য বাজেয়াপ্তযোগ্য হইবে।



ক্রমিক নম্বর	সংশ্লিষ্ট ধারা অধ্যায় ইত্যাদি	অপরাধ	জরিমানা/ দন্ড
(১)	(২)	(৩)	(৪)
২৮	বিংশ অধ্যায়	যদি কোন ব্যক্তি বিংশ অধ্যায়ের অধীন রসদ ও ভান্ডার সামগ্রীর ক্ষেত্রে এই আইন বা তদধীন প্রণীত বিধি দ্বারা নির্ধারিত কোনো শর্ত বা বিধি-নিষেধ পরিপালন করিতে ব্যর্থ হন।	সংশ্লিষ্ট পণ্যের উপর আরোপনীয় সমুদয় শুল্ক-কর পরিশোধ করা ছাড়াও সংশ্লিষ্ট ব্যক্তির বিরুদ্ধে প্রদেয় শুল্ক-কর এর অন্যান্য ১ (এক) লক্ষ টাকা কিন্তু পণ্যের মূল্যের অনধিক তিনগুণ, যাহাই অধিকতর হয়, জরিমানা আরোপনীয় হইবে এবং সংশ্লিষ্ট পণ্য বাজেয়াপ্তযোগ্য হইবে।
২৯	১৬৪	যদি কোন ব্যক্তি বাংলাদেশে আগমনের পর ধারা ১৬৪ এর বিধান অনুযায়ী তাহার সহিত বহনকৃত বা তাহার ব্যাগেজের ভিতরে রক্ষিত কোনো পণ্য সম্পর্কে, ব্যাগেজ পরীক্ষা আরম্ভ হইবার পূর্বে, নির্ধারিত পদ্ধতিতে ঘোষণা প্রদান করিতে ব্যর্থ হন।	সংশ্লিষ্ট ব্যক্তির বিরুদ্ধে অন্যান্য ৫০ (পঞ্চাশ) হাজার টাকা কিন্তু অনধিক ১ (এক) লক্ষ টাকা জরিমানা আরোপনীয় হইবে এবং সংশ্লিষ্ট পণ্য বাজেয়াপ্তযোগ্য হইবে।
৩০	১৭২, ১৭৩, ১৭৪, ১৭৫, ১৭৬ ও ১৭৮	যদি কোন ব্যক্তি উপকূলীয় পণ্য বহনকারী নৌযানের মাস্টার হিসেবে ধারা ১৭২, ১৭৩, ১৭৪, ১৭৫, ১৭৬ বা ১৭৮ এর বাধ্যবাধকতা প্রতিপালন করিতে ব্যর্থ হন।	সংশ্লিষ্ট ব্যক্তির বিরুদ্ধে অন্যান্য ২৫ (পঁচিশ) হাজার টাকা কিন্তু অনধিক ৫০ (পঞ্চাশ) হাজার টাকা জরিমানা আরোপনীয় হইবে।
৩১	সাধারণ	যদি কোন ব্যক্তি স্থায় হেফাজতে রক্ষিত কোনো পণ্য রাজস্ব ফাঁকি দেওয়ার উদ্দেশ্যে বন্দর এলাকা হইতে অপসারণ করেন অথবা অপসারণের চেষ্টা করেন।	(ক) সংশ্লিষ্ট ব্যক্তির বিরুদ্ধে সংশ্লিষ্ট পণ্যের উপর আরোপনীয় সমুদয় শুল্ক-কর পরিশোধ ছাড়াও উক্ত আরোপনীয় শুল্ক-করের অন্যান্য সমপরিমাণ কিন্তু অনধিক পাঁচ গুণ পরিমাণ অর্থ জরিমানা, অথবা সংশ্লিষ্ট পণ্য শুল্ক-করযোগ্য না হইলে বা উহার উপর শুল্ক-কর নিরূপণ করা সম্ভব না হইলে, প্রতিটি নিখোঁজ বা

ক্রমিক নম্বর	সংশ্লিষ্ট ধারা অধ্যায় ইত্যাদি	অপরাধ	জরিমানা/ দন্ড
(১)	(২)	(৩)	(৪)
			<p>ঘাটতি প্যাকেজ (package) বা পৃথক বস্তুর জন্য অনধিক ৫০ (পঞ্চাশ) হাজার টাকা জরিমানা এবং, বাক্স পণ্যের ক্ষেত্রে, অনূন ৫০ (পঞ্চাশ) হাজার টাকা জরিমানা বা সংশ্লিষ্ট পণ্য-মূল্যের অনধিক দশগুণ পরিমাণ, যাহাই অধিকতর হয়, অর্থ জরিমানা আরোপনীয় হইবে এবং সংশ্লিষ্ট পণ্য বাজেয়াপ্তিযোগ্য হইবে;</p> <p>অথবা</p> <p>(খ) বিচারিক আদালত কর্তৃক দোষী সাব্যস্ত হইলে, সংশ্লিষ্ট ব্যক্তি অনূন ১ (এক) বৎসর কিন্তু অনধিক ৬ (ছয়) বৎসর মেয়াদের কারাদন্ড এবং সংশ্লিষ্ট পণ্যের উপর আরোপনীয় সমুদয় শুল্ক-করাদি পরিশোধসহ প্রদেয় শুল্ক-করাদির অনূন সমপরিমাণ কিন্তু অনধিক পাঁচগুণ পরিমাণ অর্থদন্ড, অথবা যদি উক্ত পণ্য শুল্ক-করযোগ্য না হয় কিংবা শুল্ক-কর নির্ধারণ করা না যায়, তাহা হইলে প্রত্যেকটি নিখোঁজ বা ঘাটতি পণ্যের জন্য বা স্বতন্ত্র পণ্যের জন্য অনধিক ৫০ (পঞ্চাশ) হাজার টাকা অর্থদন্ড, এবং বাক্স পণ্যের ক্ষেত্রে অনূন ৫০ (পঞ্চাশ) হাজার টাকা কিন্তু অনধিক পণ্য-মূল্যের পাঁচগুণ, যাহা অধিকতর হয়, পরিমান অর্থদন্ডে দন্ডনীয় হইবেন এবং সংশ্লিষ্ট পণ্য বাজেয়াপ্তিযোগ্য হইবে।</p>

ক্রমিক নম্বর	সংশ্লিষ্ট ধারা অধ্যায় ইত্যাদি	অপরাধ	জরিমানা/ দন্ড
(১)	(২)	(৩)	(৪)
৩২	সাধারণ	<p>যদি কোন ব্যক্তি জ্ঞাতসারে -</p> <p>(ক) এই আইনের দ্বারা বা অধীন অর্পিত বা প্রদত্ত কোনো কর্তব্য পালনে অথবা ক্ষমতা প্রয়োগে যথাযথভাবে নিয়োজিত কোনো ব্যক্তিকে অথবা তাহার সহায়তায় কর্মরত কোনো ব্যক্তিকে বাধা প্রদান করেন, বিঘ্নিত করেন, নিগূহীত করেন অথবা আক্রমণ করেন;</p> <p>(খ) এই আইনের অধীন বাজেয়াপ্তযোগ্য কোনো জিনিসের জন্য কোনো তল্লাশি পরিচালনা করিতে বা উক্ত জিনিস আটক, জব্দ অথবা অপসারণ করিতে এমন কিছু করেন যাহা উক্ত কার্যকে বাধা সৃষ্টি করে অথবা বাধা সৃষ্টির উদ্দেশ্যে করা হয়;</p> <p>(গ) এই আইনের অধীন বাজেয়াপ্তযোগ্য কোনো জিনিস নিজ দখলে নেন অথবা ক্ষতিগ্রস্ত বা ধ্বংস করেন অথবা কোনো জিনিস বাজেয়াপ্তযোগ্য কিনা তাহার সাক্ষ্য সংগ্রহ করা হইতে বা সাক্ষ্য দেওয়া হইতে বিরত রাখার জন্য উদ্দেশ্যমূলকভাবে কোনো কিছু করেন;</p>	<p>(ক) সংশ্লিষ্ট ব্যক্তির বিরুদ্ধে অনূন্য ১ (এক) লক্ষ টাকা কিন্তু অনধিক ৫ (পাঁচ) লক্ষ টাকা জরিমানা আরোপনীয় হইবে;</p> <p>অথবা</p> <p>(খ) বিচারিক আদালত কর্তৃক দোষী সাব্যস্ত হইলে, সংশ্লিষ্ট ব্যক্তি অনূন্য ৬ (ছয়) মাস কিন্তু অনধিক ৩ (তিন) বৎসর মেয়াদের কারাদন্ডে এবং অনূন্য ১ (এক) লক্ষ টাকা কিন্তু অনধিক ৫ (পাঁচ) লক্ষ টাকা অর্থদন্ড অথবা উভয়বিধ দন্ডে দন্ডনীয় হইবেন।</p>

ক্রমিক নম্বর	সংশ্লিষ্ট ধারা অধ্যায় ইত্যাদি	অপরাধ	জরিমানা/ দন্ড
(১)	(২)	(৩)	(৪)
		<p>(ঘ) এই আইনের অধীন নিয়োজিত বা কর্মরত কোনো ব্যক্তি কর্তৃক কোনো ব্যক্তিকে আটক করিতে বাধা প্রদান করেন বা উক্তরূপ আটককৃত কোনো ব্যক্তিকে ছিনাইয়া নেন; অথবা</p> <p>(ঙ) উপরোল্লিখিত এন্ট্রিসমূহের যে কোনো একটি কার্য বা বিষয় করিতে চেষ্টা করেন অথবা উহাদের যে কোনো একটি করিতে সহায়তা বা সহযোগিতা করেন অথবা সহায়তা বা সহযোগিতা করিবার চেষ্টা করেন।</p>	
৩৩	২০৫	যদি ধারা ২০৫ এর উপ-ধারা (২) এর অধীন কোনো লিখিত নোটিশ প্রদান করা অথবা কোনো শুল্ক ভবন বা শুল্ক স্টেশনে পণ্য পৌছাইয়া দেওয়া যেই পুলিশ অফিসারের দায়িত্ব, তিনি উক্তরূপ কর্তব্য প্রতিপালন করিতে যদি অবহেলা করেন।	সংশ্লিষ্ট অফিসার অনূন ১০ (দশ) হাজার টাকা কিন্তু অনধিক ২৫ (পঁচিশ) হাজার টাকা অর্থদন্ডে দন্ডনীয় হইবেন।
৩৪	২২৬	যদি কোন ব্যক্তি ধারা ২২৬ এর উপ-ধারা (২) এর অধীন দন্ডদেশের নোটিশ প্রদর্শন করিতে ব্যর্থ হন।	<p>(ক) সংশ্লিষ্ট ব্যক্তির বিরুদ্ধে অনূন ১ (এক) লক্ষ টাকা কিন্তু অনধিক ৫ (পাঁচ) লক্ষ টাকা জরিমানা আরোপনীয় হইবে;</p> <p>অথবা</p> <p>(খ) বিচারিক আদালত কর্তৃক দোষী সাব্যস্ত হইলে, সংশ্লিষ্ট ব্যক্তি অনূন ৬ (ছয়) মাস কিন্তু অনধিক ৩ (তিন) বৎসর মেয়াদের কারাদন্ড অথবা অনূন ১ (এক) লক্ষ টাকা কিন্তু অনধিক ৫ (পাঁচ) লক্ষ টাকা অর্থদন্ড অথবা উভয়বিধ দন্ডে দন্ডনীয় হইবেন।</p>

ক্রমিক নম্বর	সংশ্লিষ্ট ধারা অধ্যায় ইত্যাদি	অপরাধ	জরিমানা/ দন্ড
(১)	(২)	(৩)	(৪)
৩৫	২২৯	যদি কোন ব্যক্তি এই আইনের অধীন কোনো অপরাধ সংঘটিত হওয়ার অথবা উক্তরূপ অপরাধ সংঘটিত করিবার কোনো চেষ্টা বা সম্ভাব্য চেষ্টার বিষয় অবগত হইয়া নিকটতম কাস্টম হাউস অথবা কাস্টমস স্টেশনের ভারপ্রাপ্ত কর্মকর্তার নিকট অথবা, যুক্তিসঙ্গত সুবিধাজনক দূরত্বে কোনো কাস্টম হাউস বা কাস্টমস স্টেশন না থাকিলে, যদি নিকটতম থানার ভারপ্রাপ্ত কর্মকর্তার নিকট লিখিতভাবে উহার সংবাদ প্রদান করিতে ব্যর্থ হন,	(ক) সংশ্লিষ্ট ব্যক্তির বিরুদ্ধে অনধিক ১ (এক) লক্ষ টাকা জরিমানা আরোপনীয় হইবে;  অথবা  (খ) বিচারিক আদালত কর্তৃক দোষী সাব্যস্ত হইলে, সংশ্লিষ্ট ব্যক্তি তিনি অনধিক ১ (এক) বৎসর মেয়াদের কারাদন্ড অথবা অনধিক ১ (এক) লক্ষ টাকা অর্থদন্ড অথবা উভয়বিধ দন্ডে দন্ডনীয় হইবেন।
৩৬	সাধারণ	সাধারণযদি কোন ব্যক্তি কোনো বৈধ কারণ, যাহা প্রমাণের দায়িত্ব উক্ত ব্যক্তির উপর বর্তাইবে, ব্যতীত, কোনো বিল-হেডিং বা কোনো হেডিং সদৃশ অন্য কোনো কাগজ বা ফাঁকা কাগজ বাংলাদেশে আনয়ন করেন অথবা উহা আনয়ন করিবার সহিত সংশ্লিষ্ট থাকেন অথবা উহা দখলে রাখেন এবং ধারণা করা হয় যে, যেই ব্যক্তির দখল হইতে উহা উদ্ধার করা হইয়াছে অথবা যেই ব্যক্তি উহা বাংলাদেশে আনিয়াছেন অথবা যাহার পক্ষে উহা বাংলাদেশে আনয়ন করা হইয়াছে তাহারা ব্যতীত অন্য কোনো ব্যক্তি অথবা ফার্ম কর্তৃক অথবা তাহার পক্ষে উহা চালানপত্র হিসাবে পূরণ এবং ব্যবহার করা সম্ভব।	(ক) সংশ্লিষ্ট ব্যক্তির বিরুদ্ধে অনধিক ১ (এক) লক্ষ টাকা জরিমানা আরোপনীয় হইবে এবং সংশ্লিষ্ট পণ্য বাজেয়াপ্তিযোগ্য হইবে;  অথবা  (খ) বিচারিক আদালত কর্তৃক দোষী সাব্যস্ত হইলে, সংশ্লিষ্ট ব্যক্তি অনধিক ১ (এক) বৎসর মেয়াদের কারাদন্ড অথবা অনধিক ১ (এক) লক্ষ টাকা অর্থদন্ড অথবা উভয়বিধ দন্ডে দন্ডনীয় হইবেন এবং সংশ্লিষ্ট পণ্য বাজেয়াপ্তিযোগ্য হইবে।

ক্রমিক নম্বর	সংশ্লিষ্ট ধারা অধ্যায় ইত্যাদি	অপরাধ	জরিমানা/ দন্ড
(১)	(২)	(৩)	(৪)
৩৭	সাধারণ	<p>যদি কোন ব্যক্তি ছদ্মবেশ ধারণপূর্বক অথবা আক্রমণাত্মক অস্ত্রে সজ্জিত হইয়া এই আইনের যে কোনো বিধান দ্বারা বা অধীন অর্পিত বা প্রদত্ত কোনো কর্তব্য পালনরত বা ক্ষমতা প্রয়োগরত কোনো ব্যক্তিকে অথবা তাহার সহায়তাকারী কোনো ব্যক্তিকে ভীতি প্রদর্শন বা উক্ত অস্ত্র বর্ণিত ব্যক্তির বিরুদ্ধে ব্যবহার করেন, যখন-</p> <p>(ক) তিনি কোনো পণ্য আমদানি বা রপ্তানির উপর এই আইন অথবা অন্য কোনো আইন দ্বারা আরোপিত নিষিদ্ধকরণ বা নিয়ন্ত্রণ লংঘন করিবার উদ্দেশ্যে অথবা উহার উপর আরোপণীয় শুল্ক ও কর পরিশোধ না করিবার অভিপ্রায়ে অথবা ইহা পরিশোধের জন্য জামানত প্রদান ব্যতীত উক্ত পণ্যের চলাচল, পরিবহন বা লুকাইবার সহিত সংশ্লিষ্ট থাকেন;</p> <p>অথবা</p> <p>(খ) তিনি এই আইনের অধীন বাজেয়াপ্তিযোগ্য কোনো পণ্য দখলে রাখেন।</p>	<p>(ক) সংশ্লিষ্ট ব্যক্তির বিরুদ্ধে অনূন ১ (এক) লক্ষ টাকা কিন্তু অনধিক ৫ (পাঁচ) লক্ষ টাকা জরিমানা আরোপনীয় হইবে;</p> <p>অথবা</p> <p>(খ) বিচারিক আদালত কর্তৃক দোষী সাব্যস্ত হইলে, সংশ্লিষ্ট ব্যক্তি অনূন ৬ (ছয়) মাস কিন্তু অনধিক ৩ (তিন) বৎসর মেয়াদের কারাদন্ড অথবা অনূন ১ (এক) লক্ষ টাকা কিন্তু অনধিক ৫ (পাঁচ) লক্ষ টাকা অর্থদন্ড অথবা উভয়বিধ দন্ডে দন্ডনীয় হইবেন।</p>

ক্রমিক নম্বর	সংশ্লিষ্ট ধারা অধ্যায় ইত্যাদি	অপরাধ	জরিমানা/ দন্ড
(১)	(২)	(৩)	(৪)
৩৮	সাধারণ	<p>যদি কোন ব্যক্তি বাংলাদেশের ভিতরে বা বাহিরে চোরাচালানের অথবা অভিষ্ট চোরাচালানের সহিত সম্পৃক্ত কোনো সংকেত বা সংবাদ হিসাবে বাংলাদেশের কোনো এলাকা হইতে অথবা কোনো জাহাজ বা উড়োজাহাজ হইতে কোনো জাহাজে বা কোনো উড়োজাহাজে অথবা সীমান্তের ওপারে অবস্থানরত কোনো ব্যক্তির অবগতির জন্য যে কোনো মাধ্যমে কোনো সংকেত বা সংবাদ প্রেরণ করেন, যেই ব্যক্তির উদ্দেশ্যে উক্ত সংকেত বা সংবাদ প্রেরিত হয় তিনি উহা গ্রহণ করিবার অবস্থায় অথবা সেই সময়ে প্রকৃতপক্ষে চোরাচালানে নিয়োজিত থাকুক বা না থাকুক।</p> <p>ব্যাখ্যা।- এই দফার অধীন কোনো কার্যধারায় যদি এইরূপ কোনো প্রশ্ন উত্থাপিত হয় যে কোনো সংকেত বা সংবাদ পূর্বোল্লিখিত সংকেত বা সংবাদ কিনা, তাহা হইলে উহা প্রমাণ করিবার দায় বিবাদীর উপর বর্তাইবে।</p>	<p>(ক) সংশ্লিষ্ট ব্যক্তির বিরুদ্ধে অনূন ১ (এক) লক্ষ টাকা কিন্তু অনধিক ৫ (পাঁচ) লক্ষ টাকা জরিমানা আরোপনীয় হইবে;</p> <p>অথবা</p> <p>(খ) বিচারিক আদালত কর্তৃক দোষী সাব্যস্ত হইলে, সংশ্লিষ্ট ব্যক্তি অনূন ৬ (ছয়) মাস কিন্তু অনধিক ৩ (তিন) বৎসর মেয়াদের কারাদন্ডে অথবা অনূন ১ (এক) লক্ষ টাকা কিন্তু অনধিক ৫ (পাঁচ) লক্ষ টাকা অর্থদন্ড অথবা উভয়বিধ দন্ডে দন্ডনীয় হইবেন।</p>

ক্রমিক নম্বর	সংশ্লিষ্ট ধারা অধ্যায় ইত্যাদি	অপরাধ	জরিমানা/ দন্ড
(১)	(২)	(৩)	(৪)
৩৯	সাধারণ	যদি কোন ব্যক্তি কোনো শুল্কযোগ্য পণ্য, যাহার উপর শুল্ক পরিশোধ করা হয় নাই, অথবা এই আইন বা অন্য কোনো আইনের যে কোনো বিধান লংঘনপূর্বক আমদানিকৃত পণ্য বাংলাদেশ এবং অন্য কোনো বিদেশী রাষ্ট্রের সীমান্ত হইতে বাংলাদেশের এক মাইল সীমানার মধ্যে অবস্থিত কোনো ইमारতের মধ্য দিয়া অথবা ইमारতের ভিতরে বা ইमारতের সহিত সংযুক্ত কোনো আজিনার মধ্য দিয়া অথবা আজিনার ভিতরে জমা রাখেন, ন্যস্ত করেন বা বহন করেন অথবা জমা রাখা, ন্যস্ত করা বা বহন করিবার ব্যবস্থা করেন।	(ক) সংশ্লিষ্ট ব্যক্তির বিরুদ্ধে অনূন ১ (এক) লক্ষ টাকা কিন্তু অনধিক ৫ (পাঁচ) লক্ষ টাকা জরিমানা আরোপনীয় হইবে এবং সংশ্লিষ্ট পণ্য বাজেয়াপ্তযোগ্য হইবে; অথবা (খ) বিচারিক আদালত কর্তৃক দোষী সাব্যস্ত হইলে, সংশ্লিষ্ট ব্যক্তি অনূন ৬ (ছয়) মাস কিন্তু অনধিক ৩ (তিন) বৎসর মেয়াদের কারাদন্ড অথবা অনূন ১ (এক) লক্ষ টাকা কিন্তু অনধিক ৫ (পাঁচ) লক্ষ টাকা অর্থদন্ড অথবা উভয়বিধ দন্ডেদন্ডনীয় হইবেন এবং সংশ্লিষ্ট পণ্য বাজেয়াপ্তযোগ্য হইবে।
৪০	২৬০	যদি কোন ব্যক্তি ধারা ২৬০ এর বিধান অনুযায়ী কোনো বৈধ লাইসেন্স ব্যতীত, কোন যানবাহনে প্রবেশ বা প্রস্থান অথবা পণ্য আমদানি, রপ্তানি বা ব্যাগেজ সংক্রান্ত কোনো কাস্টমস কার্যক্রম পরিচালনা করেন।	সংশ্লিষ্ট পণ্য শুল্ক-করযোগ্য হইলে সংশ্লিষ্ট ব্যক্তির বিরুদ্ধে সংশ্লিষ্ট পণ্যের উপর আরোপনীয় শুল্ক-করাদির দ্বিগুন পরিমাণ অর্থ অথবা, উক্ত পণ্য শুল্ক-করযোগ্য না হইলে, উক্ত ব্যক্তির বিরুদ্ধে অনূন ৫০ (পঞ্চাশ) হাজার টাকা কিন্তু অনধিক ২ (দুই) লক্ষ টাকা জরিমানা আরোপনীয় হইবে।
৪১	২৬৩	যদি কোন ব্যক্তি ধারা ২৬৩ এর বিধান অনুযায়ী কোন ব্যবসায়িক রেকর্ড বা কোন বিশেষ কাস্টমস পদ্ধতির জন্য নির্ধারিত রেকর্ড সংরক্ষণ করিতে, বা উক্ত রেকর্ড কোনো কাস্টমস কর্মকর্তার নিকট লভ্য বা উপস্থাপন করিতে বা কাস্টমস কর্মকর্তা কর্তৃক জিজ্ঞাসিত যে কোনো প্রশ্নের উত্তর প্রদান করিতে ব্যর্থ হন।	সংশ্লিষ্ট ব্যক্তির বিরুদ্ধে অনূন ১ (এক) লক্ষ টাকা কিন্তু অনধিক ২ (দুই) লক্ষ টাকা আরোপনীয় হইবে।



ক্রমিক নম্বর	সংশ্লিষ্ট ধারা অধ্যায় ইত্যাদি	অপরাধ	জরিমানা/ দন্ড
(১)	(২)	(৩)	(৪)
৪২	২৬৪	যদি কোন ব্যক্তি ধারা ২৬৪ এর অধীন কোনো প্রজ্ঞাপনের বিধানাবলী অথবা বাংলাদেশের সীমান্তের ১৫ (পনের) মাইলের মধ্যে স্বর্ণ, রৌপ্য বা মহামূল্যবান পাথর অথবা স্বর্ণ, রৌপ্য বা মহামূল্যবান পাথরের তৈরী অলংকারের সহিত সম্পর্কিত ব্যবসার বিধি-নিষেধমূলক বিধানসমূহ লঙ্ঘন করেন।	(ক) সংশ্লিষ্ট ব্যক্তির বিরুদ্ধে অনূন ১ (এক) লক্ষ টাকা কিন্তু অনধিক ৫ (পাঁচ) লক্ষ টাকা জরিমানা আরোপনীয় হইবে এবং সংশ্লিষ্ট পণ্য বাজেয়াপ্তিযোগ্য হইবে;  অথবা  (খ) বিচারিক আদালত কর্তৃক দোষী সাব্যস্ত হইলে, সংশ্লিষ্ট ব্যক্তি অনূন ৬ (ছয়) মাস কিন্তু অনধিক ৩ (তিন) বৎসর মেয়াদের কারাদন্ড এবং অনূন ১ (এক) লক্ষ টাকা কিন্তু অনধিক ৫ (পাঁচ) লক্ষ টাকা অর্থদন্ডে দন্ডনীয় হইবেন এবং সংশ্লিষ্ট পণ্য বাজেয়াপ্তিযোগ্য হইবে।
৪৩	সাধারণ	যদি কোন ব্যক্তি উপরোল্লিখিত এন্ট্রিসমূহে উল্লিখিত কার্য ব্যতীত এই আইনে বারিত করা হইয়াছে এইরূপ কোনো কার্য করেন অথবা এই আইনের অধীন করণীয় এইরূপ কোন কার্য করা হইতে বিরত থাকেন।	সংশ্লিষ্ট ব্যক্তির বিরুদ্ধে অনূন ৫০ (পঞ্চাশ) হাজার টাকা কিন্তু অনধিক ১ (এক) লক্ষ টাকা জরিমানা আরোপনীয় হইবে এবং, প্রযোজ্য ক্ষেত্রে, সংশ্লিষ্ট পণ্য বাজেয়াপ্তিযোগ্য হইবে।

(২) উপ-ধারা (১) এর টেবিলের কলাম (১) এ উল্লিখিত ক্রমিক নম্বর ১৮ ও ২৯ এর বিপরীতে কলাম (৪) এ যাহা কিছুই থাকুক না কেন, যদি কোনো ব্যক্তি পণ্য ঘোষণায় উল্লিখিত পণ্যের পরিমাণ, গুণাগুণ, প্রকৃতি, ট্যারিফ শ্রেণীকরণ, কাস্টমস মূল্য বা উৎস দেশের বিষয়ে সঠিক, সত্য বা সম্পূর্ণ বিবরণের ধারণা প্রদান করিতে ব্যর্থ হন বা সকল পণ্য ঘোষণা করিতে ব্যর্থ হন, যাহার ফলে শুল্ক ও কর বা অন্যান্য চার্জ প্রকৃত পরিমাণ হইতে কম পরিমাণে নিরূপিত বা পরিশোধিত হয়, তাহা হইলে

উক্ত ক্ষেত্রে সংশ্লিষ্ট ব্যক্তি যদি নিম্নরূপ যে কোন বিষয় অবহিতকরণের (notify) পূর্বেই সংশ্লিষ্ট লঙ্ঘন সম্পর্কে স্বেচ্ছায় উপযুক্ত কাস্টমস কর্মকর্তার নিকট তাহা প্রকাশ করেন, তাহা হইলে তাহার বিরুদ্ধে এই ধারার অধীন কোনো জরিমানা আরোপ করা হইবে না, যথা:—

- (ক) সংশ্লিষ্ট ঘোষণা বা উক্ত ঘোষণা সম্পর্কিত পণ্য পরীক্ষার জন্য নির্ধারিত হইলে;
- (খ) সংশ্লিষ্ট ঘোষণা সম্পর্কিত দলিল উপস্থাপনের জন্য আবশ্যিকতা থাকিলে; বা
- (গ) নিরীক্ষা বা তদন্ত পরিচালনার জন্য সংশ্লিষ্ট ঘোষণা বাছাইকৃত হইলে :

তবে শর্ত থাকে যে, উক্তরূপ প্রকাশের সময় বা যথাযথ কর্মকর্তা কর্তৃক অবহিত হইবার ১০ (দশ) কার্যদিবসের মধ্যে বা কমিশনার কর্তৃক অনুমোদিত বর্ধিত সময়ের মধ্যে উক্ত অপরিশোধিত শুল্ক, কর ও ফি এবং উহা হইতে উদ্ধৃত কোনো সুদ সম্পূর্ণ পরিশোধ করিতে হইবে।

(৩) যথাযথ কর্মকর্তা, উপ-ধারা (১) এর টেবিলের কলাম (৩) এ বর্ণিত যে কোন অপরাধ তদন্ত করিতে পারিবে এবং সেইক্ষেত্রে ফৌজদারি কার্যবিধির অধীন তদন্ত অনুষ্ঠানের জন্য সাব-ইন্সপেক্টর অব পুলিশ পদের নিম্নে নহে এইরূপ কোন কর্মকর্তা যেই সকল ক্ষমতা প্রয়োগ করিতে পারেন, সেই একই ক্ষমতা উক্ত যথাযথ কর্মকর্তা প্রয়োগ করিতে পারিবে।

১৮২। **দণ্ড আরোপ কার্যক্রমের দায় ও পরিধি।**—(১) যদি কোনো ব্যক্তি ধারা ১৮১ এর উপ-ধারা (১) এর টেবিলের কলাম (৩) এ বর্ণিত কোনো অপরাধ সংঘটন করেন বা সংঘটনে সহায়তা করেন, তাহা হইলে তিনি, উহার জন্য অন্য কোনো আইনে দণ্ডযোগ্য হইলে তাহা ক্ষুণ্ণ না করিয়া, অতিরিক্ত হিসাবে এই আইনের অধীন দণ্ডিত হইবেন।

(২) যদি কোন ব্যক্তি এমন কোনো পণ্য, যাহা এই আইনের বিধি-বিধান লংঘনের কারণে ধারা ১৮১ এর আওতায় জরিমানা আরোপযোগ্য অপরাধ সংঘটিত হইয়াছে জানিয়াও অথবা জানিবার যথেষ্ট সুযোগ থাকা সত্ত্বেও, দখলে রাখেন বা গ্রহণ করেন, তাহা হইলে উক্ত অপরাধ তিনি নিজেই সংঘটন করিয়াছেন বলিয়া গণ্য হইবে এবং তজ্জন্য তাহার বিরুদ্ধে সংশ্লিষ্ট ধারার অধীনে জরিমানা আরোপণীয় হইবে।

(৩) ধারা ১৮১ এর উপ-ধারা (১) এর টেবিলের কলাম (৩) এ উল্লিখিত অপরাধের জন্য, ক্ষেত্রমত, প্রশাসনিক ব্যবস্থা অথবা বিচারিক কার্যক্রম গ্রহণ করা যাইবে।

(৪) ধারা ১৮১ এর উপ-ধারা (১) এর টেবিলের কলাম (৩) এ উল্লিখিত অপরাধের জন্য কোন ব্যক্তির বিরুদ্ধে একাধিক ধারার অধীন প্রশাসনিক ব্যবস্থা গ্রহণ করা যাইবে না।

(৫) যদি কোনো ব্যক্তি দ্বিতীয়বার বা পরবর্তীতে একই অপরাধ সংঘটনের দায়ে অভিযুক্ত হন, তাহা হইলে তাহার বিরুদ্ধে প্রথমবারের অপরাধের জন্য আরোপিত, ক্ষেত্রমত, জরিমানা বা অর্থদণ্ডের দ্বিগুণ পরিমাণ জরিমানা বা অর্থদণ্ড আরোপ করা যাইবে।

১৮৩। **বাজেয়াপ্তির সীমা।**—ধারা ১৮১ এর উপ-ধারা (১) এর টেবিলের কলাম (৩) এ বর্ণিত অপরাধ সংশ্লিষ্ট পণ্যসহ নিম্নবর্ণিত পণ্য বাজেয়াপ্তিযোগ্য হইবে, যথা :—

- (ক) কোনো পণ্যের সহিত মিশ্রিত, মোড়কজাত বা প্রাপ্ত কোনো পণ্য যাহা ধারা ১৮১ এর উপ-ধারা (১) এর সহিত সম্পর্কিত;
- (খ) এই অধ্যায়ের অধীন কোনো লংঘনের সহিত সংশ্লিষ্ট কোনো যানবাহন এবং উহার কপিকল, আবরণ, ফার্নিচার, হার্নেস বা যন্ত্রপাতি;
- (গ) কোন যানবাহনসহ কোনো পণ্য গোপন করিবার উদ্দেশ্যে যে কোনো পদ্ধতিতে বিশেষভাবে প্রস্তুতকৃত, অভিযোজিত (adapted), পরিবর্তিত বা সংযুক্ত যে কোনো পণ্য;
- (ঘ) এই আইন বা তদধীন প্রণীত বিধির অধীন কোনো লংঘনের সহিত সংশ্লিষ্ট এই অধ্যায়ের অধীন সংঘটিত জরিমানা আরোপণীয় অপরাধ বা বিচারিক আদালতে বিচার্য অপরাধ সংশ্লিষ্ট কোন দলিল।

(২) উপ-ধারা (১) এ যাহা কিছুই থাকুনা কেন, যেই সকল যানবাহন ব্যক্তি বা পণ্য পরিবহন কাজের জন্য ভাড়ায় ব্যবহৃত হয়, সেই সকল যানবাহনকে নিম্নবর্ণিত পণ্য সংশ্লিষ্ট লংঘনের জন্য এই আইনের অধীন দায়ী বা বাজেয়াপ্ত করা যাইবে না, যথা :—

- (ক) কোন যাত্রীর নিকট রক্ষিত পণ্য;
- (খ) উক্ত যানবাহনে আইনগতভাবে পরিবহনকৃত কোনো যাত্রীর ব্যাগেজ বা উহার সহিত বহনকৃত কোনো পণ্য; বা
- (গ) যদি কোনো যানবাহনের পণ্য, কার্গো ঘোষণাভুক্ত হয় এবং বাহিরের মোড়ক বা ধারকের চিহ্ন, সংখ্যা, ওজন ও পরিমাণ উক্ত কার্গো ঘোষণার সহিত সংগতিপূর্ণ হয়, তাহা হইলে উক্ত যানবাহনের কার্গোতে উল্লিখিত পণ্য, যদি না উক্ত যানবাহনের মালিক বা ভারপ্রাপ্ত ব্যক্তি উক্ত লংঘনে অংশগ্রহণ করিয়া থাকেন বা লংঘন সম্পর্কে অবহিত থাকেন বা উক্ত লংঘন প্রতিরোধ বা উদঘাটন করিতে তিনি গুরুতর অবহেলা করিয়া থাকেন।

১৮৪। **ফৌজদারী অপরাধ সাপেক্ষে পণ্য বাজেয়াপ্তকরণ।**—(১) যেই ক্ষেত্রে কোনো অপরাধের জন্য এই আইনের অধীন কোন আদালতের বিচার করিবার এবং দণ্ড আরোপের বিধান রহিয়াছে, সেই ক্ষেত্রে এই আইনের বিধানাবলী অনুসারে যথাযথ কর্মকর্তা পণ্যের বিলিবন্দেজের ব্যবস্থা গ্রহণ করিতে পারিবেন, এবং এইক্ষেত্রে আদালতের এখতিয়ার কেবলমাত্র পণ্য সম্পর্কে গঠিত ফৌজদারী কার্যধারার মধ্যে সীমাবদ্ধ থাকিবে।

(২) ফৌজদারী কার্যবিধি অথবা আপাতত বলবৎ অন্য কোনো আইনে যাহা কিছুই থাকুক না কেন, আদালতের কার্যধারা, যদি থাকে, অনিষ্পন্ন থাকা অবস্থায় যেইক্ষেত্রে বাস্তবসম্মত হয়, সেইক্ষেত্রে যথাযথ শনাক্তকরণ চিহ্নসহ নমুনা সংরক্ষণ করিবার পর কাস্টমস কর্তৃপক্ষ জন্মকৃত পণ্য বিক্রয় অথবা অন্যভাবে বিলিবন্দেজ করিতে পারিবে এবং যদি আদালত কর্তৃক সিদ্ধান্ত হয় যে, কোনো অপরাধ সংঘটিত হয় নাই, তাহা হইলে কাস্টমস কর্তৃপক্ষ, যেক্ষেত্রে মালিক অথবা যথাযথ দাবীদার পাওয়া যায় সেই ক্ষেত্রে, পণ্য অথবা পণ্যের বিক্রয়লব্ধ অর্থ মালিক অথবা দাবীদারকে ফেরত প্রদান করিবে, যদি উহা অন্য কোনো কারণে বাজেয়াপ্তযোগ্য না হয়।

১৮৫। **বাজেয়াপ্তিযোগ্য যানবাহনের ছাড়**।—যদি বাজেয়াপ্তিযোগ্য যানবাহন কোনো কাস্টমস্ কর্মকর্তা কর্তৃক জব্দ করা হয়, তাহা হইলে এসিস্ট্যান্ট কমিশনার অব কাস্টমস পদমর্যাদার নিম্নে নহেন এমন কোনো কর্মকর্তা ইহার বাজেয়াপ্তি সংশ্লিষ্ট মামলা বিচারাধীন থাকা অবস্থায়, বিধি দ্বারা নির্ধারিত ক্ষেত্রে, ইহা খালাসের আদেশ প্রদান করিতে পারিবেন, যদি উক্ত যানবাহনের মালিক উক্ত কর্মকর্তাকে,—

(ক) যেই ক্ষেত্রে উক্ত যানবাহন কোনো বাস, মিনিবাস বা ট্রাক অথবা অন্য কোনো মোটরযান হয়, সেই ক্ষেত্রে সরকার কর্তৃক স্বীকৃত এবং এতদ্বিষয়ে সরকার কর্তৃক নির্ধারিত কোনো কর্তৃপক্ষের সহিত নিবন্ধিত সংশ্লিষ্ট যানবাহন মালিক সমিতি দ্বারা যথাযথভাবে সত্যায়িত এবং সঠিকভাবে সীল মোহরকৃত ব্যক্তিগত অঙ্গীকারনামা প্রদান করেন; অথবা

(খ) অন্য কোনো যানবাহনের ক্ষেত্রে, এসিস্ট্যান্ট কমিশনার অব কাস্টমস পদমর্যাদার নিম্নে নহেন এমন কর্মকর্তা কর্তৃক নির্দেশিত সময়ে এবং স্থানে উক্ত যানবাহন যথাযথভাবে উপস্থাপন করিবার জন্য এসিস্ট্যান্ট কমিশনার অব কাস্টমস পদমর্যাদার এর নিম্নে নহেন এমন কর্মকর্তার নিকট যেরূপ গ্রহণযোগ্য হয়, কোনো তফসিলী ব্যাংকের সেইরূপ ব্যাংক গ্যারান্টি প্রদান করেন,—

তাহা হইলে, উক্তরূপ আদেশ প্রদানের পর উক্ত অঙ্গীকারনামা অথবা, ক্ষেত্রমত, ব্যাংক গ্যারান্টি প্রদানের ৭২ (বাহাত্তর) ঘণ্টার মধ্যে আদেশটির সাথে সম্পর্কিত যানবাহনটির খালাস প্রদান করা হইবে।

186। **কাস্টমস নিয়ন্ত্রণের প্রয়োগ**।—(১) বোর্ড কর্তৃক নির্দেশনা সাপেক্ষে, কোনো কাস্টমস কর্মকর্তা, তাহার আইনগত ক্ষমতার মধ্যে, তাহার বিবেচনায় প্রয়োজনীয় সকল কাস্টমস নিয়ন্ত্রণ পরিচালনা করিতে পারিবেন।

(২) দৈবচয়নের ভিত্তিতে পরীক্ষাসহ কাস্টমস্ নিয়ন্ত্রণের নিমিত্তে জাতীয়, স্থানীয় ও আন্তর্জাতিক মানদণ্ড অনুসরণ করিয়া, যেক্ষেত্রে ইলেক্ট্রনিক তথ্য প্রক্রিয়াকরণের ব্যবস্থা রহিয়াছে সেইক্ষেত্রে তথ্যাদি প্রক্রিয়াকরণের মাধ্যমে, ঝুঁকি পর্যালোচনা ও মূল্যায়নপূর্বক ঝুঁকি নিরূপণ করা হইবে এবং যথাযথ প্রতিরক্ষা ব্যবস্থা গ্রহণ করা হইবে।

১৮৭। **কাস্টমস কর্মকর্তা কর্তৃক দলিল ও নথিপত্র দখলে নেওয়া এবং রাখা**।—(১) কোনো কাস্টমস কর্মকর্তা, কোনো ঘোষণা প্রসঙ্গে উপস্থাপিত অথবা এই আইনের অধীন আবশ্যিকতার কারণে দাখিলকৃত কোনো দলিলপত্র অথবা রেকর্ডপত্র দখলে লইতে এবং তত্তাবধানে রাখিতে পারিবেন।

(২) যেইক্ষেত্রে একজন কাস্টমস কর্মকর্তা, এই ধারার উপ-ধারা (১) এর অধীন, কোনো দলিল বা রেকর্ড দখলে নেন, সেই ক্ষেত্রে উক্ত দলিল বা রেকর্ডের স্বত্ব সংরক্ষণ করেন এমন ব্যক্তির অনুরোধক্রমে উক্ত কর্মকর্তা তৎকর্তৃক অথবা তাহার পক্ষে প্রত্যায়িত দলিলের কাস্টমস্ সিলযুক্ত একটি কপি অবিকল নকল হিসাবে সেই ব্যক্তিকে প্রদান করিবেন।

(৩) উপ-ধারা (২) এর অধীন প্রত্যায়িত প্রতিটি কপি সকল আদালতে এইরূপে সাক্ষ্য হিসাবে গ্রহণযোগ্য হইবে, যেন উহাই মূল কপি।

১৮৮। **যুক্তিসঙ্গত কারণে তল্লাশীর ক্ষমতা**।—(১) যদি যথাযথ কর্মকর্তার বিশ্বাস করিবার কারণ থাকে যে, কোনো ব্যক্তি বাজেয়াপ্তিযোগ্য পণ্য অথবা এতদসম্পর্কিত কোনো দলিলপত্র স্বয়ং বহন করিতেছেন, তাহা হইলে তিনি উক্ত ব্যক্তিকে বাংলাদেশের কাস্টমস্ জলসীমার মধ্যে অবস্থানকারী কোনো জাহাজ হইতে অবতরণ অথবা জাহাজে আরোহণ করিবার সময়ে অথবা বাংলাদেশে আগমনকারী অথবা বাংলাদেশ হইতে গমনোদ্যত অন্য কোনো যানবাহন হইতে নামার অথবা যানবাহনে ওঠার সময়ে অথবা বাংলাদেশে প্রবেশ অথবা বাংলাদেশ হইতে প্রস্থানোদ্যত হওয়ার সময়ে তাহাকে তল্লাশী করিতে পারিবেন।

(২) উপ-ধারা (১) এর বিধানাবলী ক্ষুণ্ণ না করিয়া যথাযথ কর্মকর্তা কোনো ব্যক্তিকে তল্লাশী করিতে পারিবেন, যদি তাহার বিশ্বাস করিবার কারণ থাকে যে উক্ত ব্যক্তি স্বয়ং চোরাচালানকৃত প্লাটিনাম, কোনো রেডিও এ্যাকটিভ খনিজদ্রব্য, স্বর্ণ, রৌপ্য, মহামূল্যবান পাথর, অথবা প্লাটিনামের, রেডিও এ্যাকটিভ খনিজদ্রব্যের, স্বর্ণের, রৌপ্যের অথবা মহামূল্যবান পাথরের তৈরি দ্রব্য, অথবা মুদ্রা, অথবা সরকার কর্তৃক গেজেটে প্রজ্ঞাপিত অন্য কোনো পণ্য অথবা পণ্যশ্রেণি অথবা পূর্বোল্লিখিত এক বা একাধিক কোনো পণ্যের সহিত সংশ্লিষ্ট কোনো দলিলপত্র বহন করিতেছেন।

১৮৯। **কাস্টমস কর্মকর্তাকে নির্বাহী ম্যাজিস্ট্রেটের কতিপয় ক্ষমতা অর্পণ।**—সরকার, এই আইনের অধীন প্রবেশ, তল্লাশী, আটক এবং গ্রেফতারের উদ্দেশ্যে পূরণকল্পে, গেজেটে প্রজ্ঞাপন দ্বারা, ফৌজদারী কার্যবিধির তৃতীয় তফসিলে বর্ণিত নির্বাহী ম্যাজিস্ট্রেটের ক্ষমতা এসিস্ট্যান্ট কমিশনার অব কাস্টমস পদমর্যাদার নিম্নে নহেন এইরূপ কোনো কর্মকর্তার উপর অর্পণ করিতে পারিবে।

১৯০। **তল্লাশী করা হইবে এইরূপ ব্যক্তির কাস্টমস কর্মকর্তা বা নির্বাহী ম্যাজিস্ট্রেটের সম্মুখে নেওয়ার অভিপ্রায়।**—(১) ধারা ১৮৮ এর অধীন যখন কোনো কাস্টমস কর্মকর্তা কোনো ব্যক্তিকে তল্লাশী করিতে উদ্যত হইবেন, তখন তিনি উক্ত ব্যক্তিকে এসিস্ট্যান্ট কমিশনার অব কাস্টমস পদমর্যাদার কাস্টমস কর্মকর্তা অথবা নির্বাহী ম্যাজিস্ট্রেটের নিকট লইবার অধিকারের বিষয়ে অবহিত করিবেন, এবং উক্ত ব্যক্তি তেমন অভিপ্রায় ব্যক্ত করিলে তাহাকে তল্লাশী করিবার পূর্বে নিকটতম এসিস্ট্যান্ট কমিশনার অব কাস্টমস পদমর্যাদার কাস্টমস কর্মকর্তা অথবা নির্বাহী ম্যাজিস্ট্রেটের সম্মুখে অবিলম্বে লইয়া যাইবেন এবং উক্তরূপ না লওয়া পর্যন্ত তাহাকে সাময়িক আটক (Detain) রাখিতে পারিবেন।

(২) উপ-ধারা (১) এ উল্লিখিত কাস্টমস কর্মকর্তা বা নির্বাহী ম্যাজিস্ট্রেটের সম্মুখে উক্ত উপ-ধারায় উল্লিখিত ব্যক্তিকে আনয়ন করা হইলে, যদি তিনি তাহাকে তল্লাশী করিবার জন্য যুক্তিসঙ্গত কারণ না দেখেন, তাহা হইলে উক্ত ব্যক্তিকে অবিলম্বে মুক্তি প্রদান করিবেন এবং এইরূপ করিবার কারণ লিপিবদ্ধ করিবেন অথবা, অন্যথায়, তল্লাশী করিবার নির্দেশ প্রদান করিবেন।

(৩) ধারা ১৮৮ এর অধীন তল্লাশী করিবার পূর্বে কাস্টমস কর্মকর্তা দুই বা ততোধিক ব্যক্তিকে তল্লাশীর সময়ে উপস্থিত থাকার এবং সাক্ষী থাকার জন্য ডাকিয়া লইবেন এবং এইরূপ করিবার জন্য তাহাদিগকে অথবা তাহাদের যে কোনো একজনকে লিখিত আদেশ প্রদান করিতে পারিবেন, এবং উক্ত ব্যক্তিগণের সম্মুখে তল্লাশী অনুষ্ঠিত হইবে এবং তল্লাশী কার্যক্রমের সময়ে আটককৃত সকল বস্তুর একটি তালিকা উক্ত কর্মকর্তা অথবা অন্য ব্যক্তি কর্তৃক প্রস্তুত করা হইবে এবং উক্ত সাক্ষীগণ কর্তৃক স্বাক্ষরিত হইবে।

(৪) কোনো মহিলাকে কোনো মহিলা ব্যতীত তল্লাশী করা যাইবে না।

(৫) কোনো আইনী কার্যধারার উদ্দেশ্যে অথবা এই আইনের অন্য কোনো উদ্দেশ্যে বাস্তবসম্মত ক্ষেত্রে, যথাযথ সনাক্তকরণ চিহ্নসহ সংশ্লিষ্ট নমুনা সংরক্ষণ করা যাইবে।

১৯১। **লুকানো পণ্য উদঘাটনের জন্য সন্দেহভাজন ব্যক্তির দেহ স্ক্রীন বা এক্স-রে করিবার ক্ষমতা।**—(১) যেই ক্ষেত্রে যথাযথ কর্মকর্তার বিশ্বাস করিবার কারণ থাকে যে, ধারা ১৮৮ এর অধীন তল্লাশীযোগ্য কোনো ব্যক্তি তাহার দেহের অভ্যন্তরে কোনো বাজেয়াপ্তযোগ্য পণ্য লুকাইয়া রাখিয়াছেন সেই ক্ষেত্রে তিনি উক্ত ব্যক্তিকে আটক করিতে পারিবেন এবং অনতিবিলম্বে তাহাকে এসিস্ট্যান্ট কমিশনার অব কাস্টমস পদমর্যাদার কর্মকর্তার নিম্নে নহেন এইরূপ কাস্টমস কর্মকর্তার সম্মুখে উপস্থিত করিবেন।

(২) যদি উপ-ধারা (১) এ উল্লিখিত এসিস্ট্যান্ট কমিশনার অব কাস্টমস এর বিশ্বাস করিবার যুক্তিসঙ্গত কারণ থাকে যে, উক্ত ব্যক্তির দেহের অভ্যন্তরে উক্তরূপ পণ্য লুকানো রহিয়াছে এবং উক্ত ব্যক্তির দেহ স্ক্রীন অথবা এক্স-রে করানো আবশ্যিক, তাহা হইলে তিনি সেই মর্মে আদেশ প্রদান করিতে পারিবেন অথবা, অন্যথায়, উক্ত ব্যক্তি অন্য কোনো কারণে আটককৃত না হইলে, তাহাকে অবিলম্বে মুক্তির আদেশ প্রদান করিবেন।

(৩) যেইক্ষেত্রে উপ-ধারা (২) এ উল্লিখিত এসিস্ট্যান্ট কমিশনার অব কাস্টমস কোন ব্যক্তিকে স্ক্রীন বা এক্স-রে করানোর জন্য আদেশ প্রদান করেন সেই ক্ষেত্রে যথাযথ কর্মকর্তা যথাশীঘ্র সম্ভব এতদুদ্দেশ্যে সরকার কর্তৃক যেরূপ স্বীকৃত হয় সেইরূপ যোগ্যতাসম্পন্ন রেডিওলজিস্টের নিকট উক্ত ব্যক্তিকে লইয়া যাইবেন এবং উক্ত ব্যক্তি রেডিওলজিস্টকে তাহার দেহ স্ক্রীন বা এক্স-রে করাইতে দিতে বাধ্য থাকিবেন।

(৪) রেডিওলজিস্ট সংশ্লিষ্ট ব্যক্তির দেহ স্ক্রীন অথবা এক্স-রে করিবেন এবং উপ-ধারা (২) এ উল্লিখিত কর্মকর্তার নিকট তাহার গৃহীত স্ক্রীন অথবা এক্স-রে ছবিসহ অনতিবিলম্বে এতদ্বিষয়ে তাহার প্রতিবেদন প্রেরণ করিবেন।

(৫) যেইক্ষেত্রে রেডিওলজিস্টের প্রতিবেদনের ভিত্তিতে অথবা অন্যভাবে উপ-ধারা (২) এ উল্লিখিত কর্মকর্তা সন্তুষ্ট হন যে, কোনো ব্যক্তির দেহের অভ্যন্তরে বাজেয়াপ্তিযোগ্য কোনো পণ্য লুকানো রহিয়াছে সেই ক্ষেত্রে তিনি কোনো নিবন্ধিত পেশাজীবী চিকিৎসকের পরামর্শ এবং তত্ত্বাবধানে তাহার দেহ হইতে উক্ত পণ্য বাহির করিয়া আনার জন্য যথাযথ ব্যবস্থা গ্রহণের নির্দেশ প্রদান করিতে পারিবেন এবং উক্ত ব্যক্তি এইরূপ নির্দেশ পালনে বাধ্য থাকিবেন :

তবে শর্ত থাকে যে, কোনো মহিলার ক্ষেত্রে কোনো নিবন্ধিত পেশাজীবী মহিলা চিকিৎসকের পরামর্শ এবং তত্ত্বাবধান ব্যতীত উক্তরূপ কোনো কার্যক্রম গ্রহণ করা যাইবে না।

(৬) যেইক্ষেত্রে উপ-ধারা (২) এ উল্লিখিত কর্মকর্তার নিকট উক্তরূপ কোনো ব্যক্তিকে আনয়ন করা হয়, সেই ক্ষেত্রে তিনি এই ধারার অধীন সকল কার্যক্রম সম্পূর্ণ না হওয়া পর্যন্ত উক্ত ব্যক্তিকে আটক রাখিবার জন্য নির্দেশ প্রদান করিতে পারিবেন।

(৭) যদি কোনো ব্যক্তি স্বীকার করেন যে তাহার দেহের অভ্যন্তরে বাজেয়াপ্তিযোগ্য পণ্য লুকানো রহিয়াছে এবং যদি তিনি তাহার নিজ সম্মতিতে উক্ত পণ্য বাহির করিয়া আনার উপযুক্ত পদক্ষেপ গ্রহণে রাজী থাকেন, তাহা হইলে তাহাকে স্ক্রীনিং অথবা এক্স-রে করা হইবে না।

১৯২। **গ্রেফতার করিবার ক্ষমতা**।—(১) এতদুদ্দেশ্যে ক্ষমতাপ্রাপ্ত কোনো কাস্টমস কর্মকর্তার যদি বিশ্বাস করিবার কারণ থাকে যে, কোনো ব্যক্তি এই আইনের অধীন কোন অপরাধ সংঘটন করিয়াছেন, তাহা হইলে তিনি উক্ত ব্যক্তিকে গ্রেফতার করিতে পারিবেন।

(২) চোরাচালান নিরোধ কাজে যথাযথভাবে ক্ষমতাপ্রাপ্ত কোনো কাস্টমস কর্মকর্তার যদি এইরূপ বিশ্বাস করিবার কারণ থাকে যে, কোনো ব্যক্তি এই আইনের অধীন কোনো চোরাচালানের অপরাধ সংঘটন করিয়াছেন, তাহা হইলে তিনি উক্ত ব্যক্তিকে গ্রেফতার করিতে পারিবেন।

(৩) এই আইনের অধীন গ্রেফতারকৃত প্রত্যেক ব্যক্তিকে গ্রেফতারের সঙ্গে সঙ্গে, এইরূপ মামলায় ব্যবস্থা গ্রহণের জন্য, কমিশনার অব কাস্টমস কর্তৃক ক্ষমতাপ্রাপ্ত নিকটতম কাস্টমস কর্মকর্তার সম্মুখে উপস্থিত করিতে হইবে অথবা, যদি যুক্তিসঙ্গত দূরত্বের মধ্যে কোনো কাস্টমস কর্মকর্তা না থাকেন তাহা হইলে নিকটতম থানার ভারপ্রাপ্ত কর্মকর্তার নিকট লইয়া যাইতে হইবে।

(৪) এই ধারার অধীন কোনো ব্যক্তিকে কাস্টমস কর্মকর্তা অথবা থানার ভারপ্রাপ্ত কর্মকর্তার সম্মুখে আনয়ন করা হইলে এবং সংশ্লিষ্ট অপরাধটি জামিনযোগ্য হইলে, উক্ত কর্মকর্তা, তাকে এখতিয়ারভুক্ত প্রথম শ্রেণির জুডিশিয়াল ম্যাজিস্ট্রেটের সম্মুখে জামিনের জন্য উপস্থিত হওয়ার অনুমতি প্রদান করিবেন অথবা তাকে উক্ত ম্যাজিস্ট্রেটের তত্ত্বাবধানে প্রেরণ করিবেন।

(৫) উপ-ধারা (৪) এর অধীন কোনো ব্যক্তিকে পূর্বোল্লিখিত কোনো কাস্টমস কর্মকর্তার সম্মুখে আনয়ন করা হইলে, উক্ত কর্মকর্তা উক্ত ব্যক্তির বিরুদ্ধে আনীত অভিযোগ তদন্ত করিবার কার্যক্রম গ্রহণ করিবেন।

(৬) উপ-ধারা (৫) এর অধীন কোনো তদন্তের উদ্দেশ্যে কাস্টমস কর্মকর্তা, কোনো আমলযোগ্য অপরাধ তদন্তের ক্ষেত্রে থানার ভারপ্রাপ্ত কর্মকর্তা ফৌজদারী কার্যবিধির অধীন যেই ক্ষমতা প্রয়োগ করিতে পারেন এবং যেই বিধানসমূহের আওতাধীন থাকেন, সেই একই ক্ষমতা প্রয়োগ করিতে পারিবেন এবং সেই একই বিধানসমূহের আওতাধীন থাকিবেন :

তবে শর্ত থাকে যে, কাস্টমস কর্মকর্তা যদি এই অভিমত পোষণ করেন যে, অভিযুক্ত ব্যক্তির বিরুদ্ধে যথেষ্ট সাক্ষ্য রহিয়াছে অথবা সন্দেহের যুক্তিসঙ্গত কারণ রহিয়াছে, তাহা হইলে তিনি, অপরাধটি যদি জামিনযোগ্য হয়, তাকে এখতিয়ারসম্পন্ন প্রথম শ্রেণির জুডিশিয়াল ম্যাজিস্ট্রেটের সম্মুখে হাজির হইবার জন্য অনুমতি প্রদান করিবেন অথবা উক্ত ম্যাজিস্ট্রেটের তত্ত্বাবধানে প্রেরণ করিবেন।

(৭) যদি কাস্টমস কর্মকর্তার নিকট এইরূপ প্রতীয়মান হয় যে, অভিযুক্ত ব্যক্তির বিরুদ্ধে যথেষ্ট সাক্ষ্য নাই অথবা সন্দেহের যুক্তিসঙ্গত কারণ নাই, তাহা হইলে উক্ত কর্মকর্তা কর্তৃক নির্দেশিত জামানত সহকারে অথবা জামানত ব্যতীত, একটি বন্ড সম্পাদন সাপেক্ষে, এখতিয়ারসম্পন্ন প্রথম শ্রেণির জুডিশিয়াল ম্যাজিস্ট্রেট তলব করিলে তৎক্ষণাৎ তাহার সম্মুখে হাজির হইবার জন্য উক্ত ব্যক্তিকে জামিনে মুক্তি প্রদান করিবেন এবং মামলাটির একটি পূর্ণাঙ্গ প্রতিবেদন তাহার পরবর্তী ধাপের উর্ধ্বতন কর্মকর্তার নিকট পেশ করিবেন।

**১৯৩। তল্লাশী পরোয়ানা জারি করিবার ক্ষমতা।—**(১) এই আইনের অধীন গৃহীত কার্যধারায় সাক্ষ্য হিসাবে ব্যবহার উপযোগী বাজেয়াপ্তযোগ্য পণ্য অথবা দলিলপত্র অথবা জিনিসপত্র কোনো প্রথম শ্রেণির জুডিশিয়াল ম্যাজিস্ট্রেটের এখতিয়ারসম্পন্ন এলাকার সীমানার মধ্যে কোনো স্থানে লুকাইয়া রাখা হইয়াছে বলিয়া অভিমত পোষণকারী কোন কাস্টমস কর্মকর্তার উক্তরূপ বিশ্বাস করিবার কারণ সম্বলিত আবেদনক্রমে, উক্ত ম্যাজিস্ট্রেট উক্তরূপ পণ্য, দলিলপত্র অথবা জিনিসপত্র তল্লাশী করিবার জন্য পরোয়ানা জারি করিতে পারিবেন।

(২) ফৌজদারী কার্যবিধির অধীন জারীকৃত তল্লাশী-পরোয়ানা যেভাবে কার্যকর করা হয় এবং উহার সেইরূপ কার্যকারিতা থাকে, উক্তরূপ জারীকৃত পরোয়ানা সেইভাবে কার্যকর করা যাইবে এবং উহার সেইরূপ কার্যকারিতা থাকিবে।

১৯৪। পরোয়ানা ব্যতীত তল্লাশী এবং গ্রেফতারের ক্ষমতা।—(১) এসিস্ট্যান্ট কমিশনার অব কাস্টমস পদমর্যাদার নিম্ন নহেন এমন কোনো কাস্টমস কর্মকর্তা অথবা চোরাচালান নিরোধে নিয়োজিত অন্য কোনো কর্মকর্তার নিকট যদি এই মর্মে বিশ্বাস করিবার যুক্তিসঙ্গত কারণ থাকে যে, বাজেয়াপ্তযোগ্য কোনো পণ্য অথবা কোনো দলিলপত্র অথবা কোনো জিনিসপত্র, যাহা তাহার মতে এই আইনের অধীন গৃহীত কোনো কার্যধারার জন্য ব্যবহার উপযোগী অথবা প্রাসঙ্গিক, তাহা কোনো স্থানে লুকানো বা রক্ষিত রহিয়াছে এবং ধারা ১৯৩ এর অধীন তল্লাশী কার্যকর করিবার পূর্বে উহা অপসারিত হওয়ার আশংকা রহিয়াছে, তাহা হইলে তিনি তাহার বিশ্বাসের কারণসমূহের, এবং তল্লাশী করা হইবে সেইরূপ পণ্যসমূহ, দলিলপত্র অথবা জিনিসপত্রের একটি লিখিত বিবরণ প্রস্তুতপূর্বক ঐ স্থানে উক্ত পণ্য, দলিলপত্র অথবা জিনিসপত্রের জন্য তল্লাশী করিবেন অথবা করাইবেন।

(২) উপ-ধারা (১) এর অধীন যেই কর্মকর্তা বা ব্যক্তি তল্লাশী করিবেন অথবা করাইবেন তিনি পূর্বোল্লিখিত বিবরণের একখানি স্বাক্ষরিত কপি তল্লাশকৃত স্থানে অথবা উহার নিকট রাখিয়া আসিবেন এবং তল্লাশী করিবার সময়ে অথবা ইহার পর যথাশীঘ্র সম্ভব উক্ত বিবরণের আরও একটি স্বাক্ষরিত অনুলিপি স্থানটির বাসিন্দার সর্বশেষ জ্ঞাত ঠিকানায় প্রেরণ করিবেন।

(৩) এই ধারার অধীন সকল তল্লাশী ফৌজদারী কার্যবিধির বিধান অনুসারে, প্রয়োজনীয় অভিযোজনসহ, পরিচালিত হইবে।

(৪) পূর্বোল্লিখিত উপ-ধারায় যাহা কিছুই থাকুক না কেন, এসিস্ট্যান্ট কমিশনার অব কাস্টমস পদমর্যাদার নিম্নে নহেন এমন কর্মকর্তার পূর্বানুমোদন সাপেক্ষে, কোনো কাস্টমস কর্মকর্তা অথবা এইরূপ ক্ষমতাপ্রাপ্ত কোনো ব্যক্তি কোনো চোরাচালান অপরাধের ক্ষেত্রে,—

- (ক) উক্ত অপরাধের সহিত সংশ্লিষ্ট কোনো ব্যক্তিকে, অথবা যাহার বিরুদ্ধে যুক্তিসঙ্গত সন্দেহ বিদ্যমান যে তিনি উক্ত অপরাধের সহিত সহসা সংশ্লিষ্ট হইবেন তাহাকে বিনা পরোয়ানায় গ্রেফতার করিতে পারিবেন;
- (খ) দফা (ক) এর অধীন গ্রেফতার করিতে বিনা পরোয়ানায় কোনো আঞ্জিনায় প্রবেশ এবং তল্লাশী করিতে পারিবেন অথবা আপাতত বলবৎ নিষিদ্ধকরণ অথবা বিধি-নিষেধের পরিপন্থিভাবে চোরাচালান হইতে পারে এইরূপ যুক্তিসঙ্গত সন্দেহযুক্ত কোনো পণ্য, এবং এই আইনের অধীন কোনো কার্যধারায় তাহার বিবেচনায় প্রাসঙ্গিক অথবা উপযোগী হইতে পারে এমন সকল দলিলপত্র অথবা জিনিসপত্র আটক করিতে পারিবেন; এবং
- (গ) উক্ত অপরাধের সহিত সংশ্লিষ্ট অথবা সংশ্লিষ্ট হওয়ার সম্ভাবনা রহিয়াছে এইরূপ ব্যক্তিকে গ্রেফতার করা, আটক করা বা তত্ত্বাবধানে লওয়া অথবা তাহার পলায়ন রোধ করিবার উদ্দেশ্যে অথবা যেই পণ্যের ক্ষেত্রে উক্তরূপ কোনো অপরাধ সংঘটিত হইয়াছে অথবা সংঘটিত হইবার সম্ভাবনা রহিয়াছে, উহা আটক করিবার অথবা উহার অপসারণ রোধ করিবার উদ্দেশ্যে, প্রয়োজনবোধে মৃত্যু সংঘটিত হইতে পারে এমন মাত্রায়, বল প্রয়োগ করিতে অথবা করাইতে পারিবেন।

(৫) উপ-ধারা (৪) এর বিধানাবলী কেবল বাংলাদেশের স্থল সীমান্তের ৫ (পাঁচ) মাইলের মধ্যবর্তী এলাকায়, এবং বাংলাদেশের জলসীমা বরাবর ২৪ (চব্বিশ) নটিক্যাল মাইলের (Contiguous Zone-সহ) মধ্যবর্তী বলয়ের মধ্যে প্রযোজ্য হইবে।



(৬) উপ-ধারা (১) বা (২) এর অধীন অথবা উপ-ধারা (৫) এ উল্লিখিত এলাকাসমূহে উপ-ধারা (৪) এর অধীন অর্পিত ক্ষমতা প্রয়োগে কোনো ব্যক্তি কর্তৃক কোনো কিছু করিবার জন্য অথবা করিবার অভিপ্রায়ের জন্য, সরকারের লিখিত অনুমোদন ব্যতিরেকে, তাহার বিরুদ্ধে কোনো দেওয়ানী মোকদ্দমা, ফৌজদারী মামলা অথবা অন্য কোনো আইনগত কার্যধারা গ্রহণ করা যাইবে না।

১৯৫। **তল্লাশীর সময় সংগৃহীত দলিল কপি করা।**—(১) এই আইনের অধীন যদি কোনো কাস্টমস কর্মকর্তা বা ক্ষমতাপ্রাপ্ত ব্যক্তি কোনো আইনানুগ তল্লাশী, পরিদর্শন, নিরীক্ষা বা পরীক্ষা পরিচালনা করেন এবং যুক্তিসঙ্গত কারণে যদি তাহার ইহা বিশ্বাস হয় যে, উক্ত তল্লাশী, পরিদর্শন, নিরীক্ষা বা পরীক্ষাকালে হস্তগত হওয়া দলিলপত্র এই আইনের অধীন সংঘটিত কোনো অপরাধের সাক্ষ্য হইবে, তাহা হইলে তিনি উক্ত দলিলপত্র কপি করিবার উদ্দেশ্যে অপসারণ করিতে পারিবেন।

(২) উপ-ধারা (১) অনুযায়ী অপসারিত দলিলপত্র বা নথিপত্র যথাশীঘ্র সম্ভব অনুলিপি করিয়া উহা পাইবার অধিকারী ব্যক্তির নিকট ফেরত প্রদান করিতে হইবে।

(৩) কাস্টমস কর্মকর্তা কর্তৃক অথবা তাহার পক্ষে প্রত্যায়িত কাস্টমস সিলযুক্ত উক্ত দলিলপত্রের কোনো অনুলিপি সকল আদালতে এইরূপে সাক্ষ্য হিসাবে গ্রহণীয় হইবে যেন উহাই মূল কপি।

১৯৬। **তল্লাশীর সময় সংগৃহীত দলিল ও পণ্য সংরক্ষণ করা।**—(১) এই আইনের অধীন যদি কোনো কাস্টমস কর্মকর্তা অথবা ক্ষমতাপ্রাপ্ত ব্যক্তি কোন আইনানুগ তল্লাশী, পরিদর্শন, নিরীক্ষা অথবা পরীক্ষা পরিচালনা করেন এবং যুক্তিসঙ্গত কারণে যদি তাহার এই বিশ্বাস জন্মে যে, উক্ত তল্লাশী, পরিদর্শন, নিরীক্ষা অথবা পরীক্ষাকালে তাহার হস্তগত হওয়া দলিলপত্র ও পণ্য এই আইনের অধীন সংঘটিত কোনো অপরাধের সাক্ষ্য হইবে অথবা এই আইনের অধীন কোনো অপরাধ সংঘটনের উদ্দেশ্যে ব্যবহৃত হইবে, তাহা হইলে উক্ত কর্মকর্তা অথবা তদকর্তৃক ক্ষমতাপ্রাপ্ত ব্যক্তি দলিলপত্রের বা, ক্ষেত্রমত, পণ্যের কর্তৃত্ব গ্রহণ এবং সংরক্ষণ করিতে পারিবেন।

(২) যদি কোনো কাস্টমস কর্মকর্তা অথবা তদকর্তৃক ক্ষমতাপ্রাপ্ত ব্যক্তি উপ-ধারা (১) এর অধীন কোনো দলিলের কর্তৃত্ব গ্রহণ করেন, তাহা হইলে উক্ত দলিলের স্বত্ব সংরক্ষণ করেন এমন ব্যক্তির অনুরোধক্রমে, তিনি তৎকর্তৃক অথবা তাহার পক্ষে প্রত্যায়িত উহার কাস্টমস সীলযুক্ত একটি কপি অবিকল কপি হিসাবে উক্ত ব্যক্তিকে প্রদান করিবেন।

১৯৭। **যানবাহন খামাইবার এবং তল্লাশী করিবার ক্ষমতা।**—(১) যদি উপযুক্ত কর্মকর্তার ইহা বিশ্বাস করিবার যুক্তিসঙ্গত কারণ থাকে যে, বাংলাদেশের রাষ্ট্রীয় ভূখণ্ডের মধ্যে, রাষ্ট্রীয় জলসীমা এবং আকাশসীমাসহ, কোন যানবাহন কোনো পণ্য চোরাচালান করিবার জন্য অথবা কোনো চোরাচালানকৃত পণ্য পরিবহনে ব্যবহৃত হইয়াছে অথবা হইতেছে অথবা হইতে যাইতেছে, তাহা হইলে তিনি যে কোনো সময়ে উক্তরূপ কোনো যানবাহন খামাইতে পারিবেন অথবা, উড়োজাহাজের ক্ষেত্রে, উহাকে অবতরণে বাধ্য করিতে পারিবেন, এবং—

- (ক) যানবাহনটির যে কোনো অংশ তন্ন-তন্ন করিয়া খুঁজিতে (rummage) বা তল্লাশী করিতে পারিবেন;
- (খ) উহার উপরে রক্ষিত যে কোনো পণ্য পরীক্ষা এবং তল্লাশী করিতে পারিবেন; এবং
- (গ) তল্লাশী করিবার জন্য যে কোনো দরজার তালা, সাজ-সরঞ্জাম অথবা মোড়ক ভাঙিয়া খুলিতে পারিবেন।

## (২) উপ-ধারা (১) এ উল্লিখিত অবস্থায়—

- (ক) যদি কোনো জাহাজকে থামাইতে অথবা কোন উড়োজাহাজকে অবতরণ করিতে বাধ্য করা আবশ্যিক হয়, তাহা হইলে সরকারি কার্যে নিয়োজিত নিজস্ব পতাকাবাহী কোনো জাহাজ অথবা নিজস্ব পতাকা চিহ্নধারী কোনো উড়োজাহাজ অথবা এতদুদ্দেশ্যে সরকার হইতে ক্ষমতাপ্রাপ্ত কর্তৃপক্ষের জন্য কোনো আন্তর্জাতিক সংকেত অথবা কোড দ্বারা অথবা অন্য কোনো স্বীকৃত পন্থায় উক্ত জাহাজকে থামাইতে অথবা উড়োজাহাজকে অবতরণ করিতে তলব করানো বৈধ হইবে, এবং ইহাতে উক্ত জাহাজ অবিলম্বে থামিবে এবং উক্ত উড়োজাহাজ সংগে সংগে অবতরণ করিবে, এবং যদি উহা উক্তরূপ করিতে ব্যর্থ হয়, তাহা হইলে কোনো জাহাজ অথবা উড়োজাহাজ দ্বারা উক্ত জাহাজ বা উড়োজাহাজকে ধাওয়া করা যাইবে, এবং সংকেত হিসাবে একবার গুলি বর্ষণ করিবার পর জাহাজটি থামিতে বা উড়োজাহাজটি অবতরণ করিতে ব্যর্থ হইলে উহার উপর গুলিবর্ষণ করা যাইবে;
- (খ) যেইক্ষেত্রে কোনো জাহাজ অথবা উড়োজাহাজ ব্যতীত অন্য কোনো যানবাহনকে থামানো আবশ্যিক হয়, সেই ক্ষেত্রে যথাযথ কর্মকর্তা উহা থামাইতে অথবা উহার পলায়ন রোধ করিতে সকল আইনসম্মত পন্থা অবলম্বন করিতে বা করাইতে পারিবেন, যাহার মধ্যে, অন্য সকল পন্থা ব্যর্থ হইলে, গুলিবর্ষণ অন্তর্ভুক্ত হইবে।

১৯৮। **ব্যক্তিকে পরীক্ষা করিবার ক্ষমতা।**—(১) কোনো পণ্য চোরাচালানের সহিত সংশ্লিষ্ট কোনো তদন্ত অনুষ্ঠিত হইবার সময়ে যথাযথ কর্মকর্তা—

- (ক) কোনো ব্যক্তিকে কোনো দলিলপত্র অথবা জিনিস উক্ত কর্মকর্তার নিকট উপস্থাপন অথবা প্রদান করিতে বাধ্য করিতে পারিবেন; এবং
- (খ) মামলার ঘটনা এবং পরিস্থিতি বিষয়ে অবগত কোনো ব্যক্তিকে পরীক্ষা করিতে পারিবেন।

(২) যথাযথ কর্মকর্তা উপ-ধারা (১) এর অধীন প্রয়োগযোগ্য ক্ষমতা কেবল তাৎক্ষণিকভাবে পাওয়া ব্যক্তির অথবা তাহার সম্মুখে উপস্থিত হওয়া ব্যক্তির ক্ষেত্রে প্রয়োগ করিবেন এবং থানার ভারপ্রাপ্ত কর্মকর্তা কোনো আমলযোগ্য অপরাধ তদন্তের ক্ষেত্রে ফৌজদারী কার্যবিধির অধীন যেই বিধানাবলীর আওতাধীন থাকেন সেই একই বিধানবলীর আওতাধীন থাকিবেন।

১৯৯। **দলিল উপস্থাপনের জন্য চাহিদা প্রদান।**—(১) যদি—

- (ক) কোনো কাস্টমস কর্মকর্তার ইহা বিশ্বাস করিবার যুক্তিসঙ্গত কারণ থাকে যে, কোনো পণ্য বেআইনীভাবে আমদানি, রপ্তানি, অবমূল্যায়ন, অধিমূল্যায়ন, প্রবেশ, অপসারণ অথবা এই আইনের পরিপন্থি প্রক্রিয়ায় কোনো ব্যক্তি দ্বারা অবৈধভাবে লেনদেন করা হইয়াছে অথবা কোনো ব্যক্তি উক্ত পণ্য আমদানি, রপ্তানি, অবমূল্যায়ন, অধিমূল্যায়ন, প্রবেশ, অপসারণ অথবা অন্য কোনোভাবে লেনদেন করিবার চেষ্টা করিয়াছে; অথবা

(খ) এই আইনের অধীন কোনো পণ্য আটক করা হয়,—

তাহা হইলে এসিস্ট্যান্ট কমিশনার অব কাস্টমস পদমর্যাদার নিম্নে নহেন এমন কোনো কাস্টমস কর্মকর্তা, লিখিত নোটিশ প্রদান করিয়া, উক্ত ব্যক্তিকে অথবা অন্য কোনো ব্যক্তি, যাহাকে উক্ত কর্মকর্তা সংশ্লিষ্ট পণ্যের মালিক, আমদানিকারক অথবা রপ্তানিকারক বলিয়া সন্দেহ করেন, তাহাকে অথবা, ক্ষেত্রমত, তাহার এজেন্টকে, যেভাবে এবং যখন প্রয়োজন মনে করিবেন সেই ভাবে এবং তখন উক্ত কর্মকর্তার নিকট অথবা অন্য কোনো নির্ধারিত কর্মকর্তার নিকট সকল হিসাব পুস্তক, রেকর্ডপত্র অথবা দলিলপত্র, যাহাতে নোটিশ প্রদানের তারিখ হইতে ৩ (তিন) বৎসর পূর্ব পর্যন্ত সময়ের ক্রয়, আমদানি, রপ্তানি, ব্যয় অথবা মূল্য অথবা পরিশোধ সম্পর্কিত এন্ট্রি অথবা স্মারক লিপিবদ্ধ থাকে অথবা লিপিবদ্ধ থাকার কথা, তাহা পেশ এবং অর্পণ করিবার নির্দেশ প্রদান করিতে পারিবেন।

(২) এসিস্ট্যান্ট কমিশনার পদমর্যাদার নিম্নে নহেন এমন কাস্টমস কর্মকর্তা উপ-ধারা (১) এর অধীন আবশ্যিকতার অতিরিক্ত উক্তরূপ পণ্যের মালিক বা আমদানিকারক বা রপ্তানিকারক অথবা, ক্ষেত্রমত, এজেন্টকে নিম্নলিখিত নির্দেশ প্রদান করিতে পারিবেন, যথা:—

(ক) উক্ত কর্মকর্তার অথবা অন্য কোনো নির্দিষ্ট কাস্টমস কর্মকর্তার পরিদর্শনের জন্য উপ-ধারা (১) এ উল্লিখিত দলিলপত্র, পুস্তক অথবা নথিপত্র উপস্থাপন করিতে এবং উহার কপি করিতে অথবা উহা হইতে উদ্ধৃতি লইবার জন্য কর্মকর্তাকে অনুমতি প্রদান করিতে;

(খ) ইলেকট্রনিক অথবা অন্য কোনো মাধ্যম মারফত উক্ত দলিলপত্র, পুস্তক অথবা রেকর্ডপত্রের ধারণকৃত তথ্য সঞ্চারণ অথবা প্রেরণ করিতে; এবং

(গ) উক্ত দলিলপত্র, পুস্তক বা নথিপত্র সম্পর্কে কোনো প্রশ্নের উত্তর প্রদান করিতে।

২০০। **দলিল সম্পর্কিত অতিরিক্ত ক্ষমতা।**—(১) জয়েন্ট কমিশনার অব কাস্টমস পদমর্যাদার নিম্নে নহেন এমন কাস্টমস কর্মকর্তা, নোটিশ দ্বারা, কোনো সরকারি বিভাগে, কর্পোরেশনে, স্থানীয় সংস্থায়, ব্যাংকে অথবা বাংলাদেশ টেলিযোগাযোগ নিয়ন্ত্রণ আইন, ২০০১ এর ধারা ২(১৯) এ সংজ্ঞায়িত পরিচালনাকারী বা যে কোন সংবিধিবদ্ধ কর্তৃপক্ষ কর্তৃক নিযুক্ত কোনো কর্মকর্তাসহ কোনো ব্যক্তিকে যেভাবে এবং যখন প্রয়োজন তখন—

(ক) টেলিযোগাযোগ বা বেতার যন্ত্রপাতি ব্যবহারের মাধ্যমে যে কোনো ধরনের যোগাযোগ ব্যবস্থাসহ কোনো দলিলপত্র বা নথিপত্র, যাহা জয়েন্ট কমিশনার অব কাস্টমস কোনো তদন্ত বা নিরীক্ষার জন্য আবশ্যিক বা প্রাসঙ্গিক বলিয়া মনে করেন, তাহা একজন কাস্টমস কর্মকর্তার পরিদর্শনের জন্য উপস্থাপন করিতে;

(খ) উক্ত দলিলপত্র বা রেকর্ডপত্রের কপি বা অংশবিশেষের উদ্ধৃতি লইবার জন্য কাস্টমস কর্মকর্তাকে অনুমতি প্রদান করিতে; এবং

(গ) কোনো পণ্য সম্পর্কিত বা উক্ত তদন্তাধীন পণ্যের বিনিময় সম্পর্কিত অথবা উক্ত তদন্তের সহিত সংশ্লিষ্ট দলিলপত্র বা রেকর্ডপত্র সম্পর্কিত বিষয়ে সকল প্রশ্নের উত্তর প্রদানের জন্য জয়েন্ট কমিশনারের সম্মুখে উপস্থিত হইতে—

বাধ্য করিতে পারিবেন।

(২) উক্ত-ধারা (১) এ উল্লিখিতভাবে প্রত্যাখিত প্রতিটি কপি সকল আদালতে এইরূপ সাক্ষ্য হিসাবে গ্রহণযোগ্য হইবে যেন উহাই মূল কপি।

**২০১। সাক্ষ্য প্রদান এবং দলিল বা পণ্য উপস্থাপন করিবার জন্য ব্যক্তির উপর সমন জারির ক্ষমতা**—(১) কোনো গেজেটেড কাস্টমস কর্মকর্তা কোনো পণ্য চোরাচালানের সহিত সংশ্লিষ্ট তৎকর্তৃক পরিচালিত কোনো তদন্তে সাক্ষ্য প্রদান বা দলিলপত্র অথবা অন্য কোনো জিনিসপত্র উপস্থাপন করিবার জন্য কোনো ব্যক্তির উপস্থিতি আবশ্যিক বলিয়া বিবেচনা করিলে, সেই ব্যক্তির উপর তাহার সমন জারি করিবার ক্ষমতা থাকিবে।

(২) দলিলপত্র বা অন্য কোনো জিনিসপত্র উপস্থাপন সম্পর্কিত সমন তলবকৃত ব্যক্তির দখলে বা নিয়ন্ত্রণে থাকা কোনো নির্দিষ্ট দলিলপত্র বা জিনিসপত্র অথবা কতিপয় বর্ণনার সকল দলিলপত্র বা জিনিসপত্র সম্পর্কে হইতে পারিবে।

(৩) উক্ত-ধারা (১) এর অধীন সমনকৃত সকল ব্যক্তি সংশ্লিষ্ট কর্মকর্তার নির্দেশ মোতাবেক সশরীরে অথবা ক্ষমতাপ্রাপ্ত প্রতিনিধির মাধ্যমে উপস্থিত হইতে বাধ্য থাকিবেন; এবং উক্তভাবে সমনকৃত সকল ব্যক্তি যে কোনো বিষয় সম্পর্কে তাহাদের পরীক্ষা করিবার সময়ে সত্য বলিতে অথবা বিবৃতি প্রদান করিতে এবং যে রূপ আবশ্যিক হইতে পারে সেইরূপ দলিলপত্র এবং জিনিসপত্র উপস্থাপন করিতে বাধ্য থাকিবেন:

তবে শর্ত থাকে যে, দেওয়ানী কার্যবিধির ধারা ১৩২ এর অধীন প্রদেয় অব্যাহতি এই ধারার অধীন উপস্থিতির জন্য তলবের ক্ষেত্রেও প্রযোজ্য হইবে।

(৪) এই ধারায় উল্লিখিত প্রতিটি তদন্ত দণ্ডবিধির ধারা ১৯৩ এবং ধারা ২২৮ এর মর্মানুযায়ী বিচারিক কার্যধারা হিসাবে গণ্য হইবে।

**২০২। পলাতক ব্যক্তিকে পরবর্তীকালে গ্রেফতার করা**—যদি এই আইনের অধীনে গ্রেফতারযোগ্য কোনো ব্যক্তি যেই অপরাধের জন্য দায়ী তাহা সংঘটনের সময় গ্রেফতার না হন অথবা গ্রেফতারের পরে পলায়ন করেন, তাহা হইলে তাহাকে পরবর্তীকালে যে কোনো সময়ে গ্রেফতার করা যাইবে এবং ধারা ১৯২ এর উপ-ধারা (৩) হইতে (৭) এর বিধানাবলী অনুসারে তাহার বিরুদ্ধে এমনভাবে ব্যবস্থা গ্রহণ করা হইবে, যেন তিনি উক্ত অপরাধ সংঘটনের সময়ে গ্রেফতার হইয়াছেন।

**২০৩। বাজেয়াপ্তিযোগ্য পণ্য জন্ম**—(১) যথাযথ কর্মকর্তা এই আইনের অধীনে বাজেয়াপ্তিযোগ্য কোনো পণ্য জন্ম করিতে পারিবেন, এবং যেই ক্ষেত্রে উক্তরূপ কোনো পণ্য জন্ম করা বাস্তবে সম্ভব নহে, সেই ক্ষেত্রে তিনি উক্ত পণ্যের মালিক অথবা উহা যেই ব্যক্তির দখলে বা তত্ত্বাবধানে রহিয়াছে সেই ব্যক্তিকে উক্ত কর্মকর্তার পূর্ব অনুমতি ব্যতীত উহা অপসারণ, হস্তান্তর অথবা প্রকারান্তরে বিলিবন্দেজ না করিবার নির্দেশ প্রদান করিতে পারিবেন।

(২) যেইক্ষেত্রে উপ-ধারা (১) এর অধীনে কোনো পণ্য জন্ম করা হয় এবং উহার উপর ধারা ২১৫ এর অধীনে পণ্য জন্ম করার ২ (দুই) মাসের মধ্যে কারণ দর্শানো নোটিশ প্রদান করা না হয়, সেই ক্ষেত্রে উক্ত পণ্য যেই ব্যক্তির দখল হইতে জন্ম করা হইয়াছিল তাহাকে ফেরত প্রদান করিতে হইবে:

তবে শর্ত থাকে যে, কমিশনার অব কাস্টমস কারণ লিপিবদ্ধ করিয়া উপরি-উক্ত ২ (দুই) মাসের মেয়াদ অনধিক ২ (দুই) মাসের জন্য বর্ধিত করিতে পারিবেন।

(৩) যথাযথ কর্মকর্তা কোনো দলিলপত্র অথবা জিনিসপত্র, যাহা তাহার মতে এই আইনের অধীনে গৃহীত কোনো কার্যধারায় সাক্ষ্য হিসাবে ব্যবহার উপযোগী হইবে, আটক করিতে পারিবেন।

(৪) যেই ব্যক্তির তত্ত্বাবধান হইতে উপ-ধারা (৩) এর অধীনে কোনো দলিলপত্র আটক করা হয় তিনি কোনো কাস্টমস কর্মকর্তার উপস্থিতিতে উহার কপি অথবা উহা হইতে উদ্ধৃতি গ্রহণ করিতে পারিবেন।

২০৪। **জব্দকৃত পণ্যের ব্যবস্থাপনা।**—(১) এই আইনের অধীনে বাজেয়াপ্তিযোগ্য হওয়ার কারণে জব্দকৃত সকল পণ্য, উহা গ্রহণ করিবার জন্য ক্ষমতাপ্রাপ্ত কাস্টমস কর্মকর্তাকে অনতিবিলম্বে অর্পণ করিতে হইবে।

(২) যদি উপ-ধারা (২) এ উল্লিখিত কোনো কর্মকর্তা নিকটে না থাকেন, তাহা হইলে উক্ত সকল পণ্য আটককৃত স্থানের নিকটতম কাস্টমস গুদামে জমা প্রদানের জন্য বহন করিতে হইবে।

(৩) যদি সুবিধাজনক দূরত্বে কোনো কাস্টমস গুদাম না থাকে, তাহা হইলে উক্তরূপ জব্দকৃত পণ্য জমা প্রদানের জন্য কমিশনার অব কাস্টমস কর্তৃক নির্ধারিত নিকটতম স্থানে উক্ত পণ্য জমা করিতে হইবে।

(৪) যদি কমিশনার অব কাস্টমস অথবা তাহার দ্বারা এতদুদ্দেশ্যে ক্ষমতাপ্রাপ্ত অন্য কোনো কাস্টমস কর্মকর্তার বিবেচনায় কোন পণ্য পচনশীল অথবা দ্রুত অবনতিশীল হয়, তাহা হইলে তিনি উহা ধারা ২৫৪ এর বিধানাবলী অনুসারে অবিলম্বে বিক্রয়ের ব্যবস্থা করিবেন এবং মামলার ন্যায়নির্ণয়ন অনিষ্পন্ন থাকা পর্যন্ত বিক্রয়লব্ধ অর্থ জমা রাখার ব্যবস্থা করিবেন:

তবে শর্ত থাকে যে, কোনো আইনী কার্যধারার অথবা এই আইনের অন্য কোনো উদ্দেশ্য পূরণকল্পে যেই ক্ষেত্রে বাস্তবসম্মত হয় সেই ক্ষেত্রে যথাযথ সনাক্তকরণ চিহ্নসহ উক্ত পণ্যের নমুনা সংরক্ষণ করা যাইবে।

(৫) যদি উক্ত ন্যায়নির্ণয়নের পর দেখা যায় যে উক্তরূপ বিক্রয়কৃত পণ্য বাজেয়াপ্তিযোগ্য ছিল না, তাহা হইলে ধারা ২৭১ এর বিধান অনুসারে সকল শুল্ক, কর অথবা অন্যান্য পাওনা প্রয়োজনীয় কর্তনের পর বিক্রয়লব্ধ অবশিষ্ট অর্থ মালিককে ফেরত প্রদান করা হইবে।

২০৫। **পুলিশ কর্তৃক সন্দেহবশতঃ জব্দকৃত পণ্যের ক্ষেত্রে পদ্ধতি।**—(১) এই আইনের অধীনে বাজেয়াপ্তযোগ্য কোনো জিনিসপত্র যখন কোনো পুলিশ কর্মকর্তা কর্তৃক চোরাই মাল সন্দেহে জব্দ করা হয় তখন তিনি যেই থানায় অথবা আদালতে উক্ত জিনিসপত্র চুরি হওয়া বা উক্তরূপ জব্দকরণ সম্পর্কিত অভিযোগ দায়ের করেন অথবা যেস্থানে চুরি বা উক্তরূপ জব্দকরণ সম্পর্কে কোনো তদন্ত চলমান থাকে, সেই থানা বা আদালতে উহা হেফাজত করিবেন এবং সংশ্লিষ্ট অভিযোগ খারিজ না হওয়া পর্যন্ত বা তদন্ত অথবা উহা হইতে উদ্ধৃত কোনো বিচার সমাপ্ত না হওয়া পর্যন্ত উক্তস্থানে উহা আটক রাখিতে পারিবেন।

(২) উপ-ধারা (১) এ উল্লিখিত প্রত্যেক ক্ষেত্রে জিনিসপত্র জব্দকারী পুলিশ কর্মকর্তা উহাদের জব্দকরণের এবং আটক রাখার একটি লিখিত নোটিশ নিকটতম কাস্টমস গুদামে প্রেরণ করিবেন এবং অভিযোগ খারিজ অথবা তদন্ত বা বিচার সমাপ্ত হওয়ার অব্যবহিত পর উক্ত জিনিসপত্র নিকটতম কাস্টমস গুদামে বহন এবং জমাদানের ব্যবস্থা করাইবেন, যাহাতে আইন অনুসারে যথাযথ কার্যধারা গ্রহণের জন্য উহা উক্তস্থানে রক্ষিত থাকে।

২০৬। জন্ম বা গ্রেফতারের সময়ে ইনভেন্টরিসহ লিখিতভাবে উহার কারণ প্রদান করা।—এই আইনের অধীনে কোনো কিছু জন্ম বা কোনো ব্যক্তিকে গ্রেফতার করা হইলে, উক্তরূপ জন্মকারী বা গ্রেফতারকারী কর্মকর্তা অথবা ব্যক্তি জন্ম বা গ্রেফতার করিবার সময়ে উক্তরূপ গ্রেফতারকৃত ব্যক্তিকে বা যেই ব্যক্তির দখল হইতে জিনিসপত্র জন্ম করা হইয়াছে তাহাকে উক্ত জন্ম বা গ্রেফতারের কারণ সম্পর্কে লিখিতভাবে অবহিত করিবেন এবং কোনো কিছু জন্ম করিবার ক্ষেত্রে যেই ব্যক্তির দখল হইতে উহা জন্ম করা হইয়াছে তাহাকে এতদ্ব্যঙ্গি একটি ইনভেন্টরি প্রদান করিবেন:

তবে শর্ত থাকে যে, যদি জন্ম করিবার সময়ে উক্ত ইনভেন্টরি প্রদান করা সম্ভবপর না হয়, তাহা হইলে জন্ম করিবার তারিখ হইতে ৭ (সাত) কার্যদিবসের মধ্যে উহা প্রদান করিতে হইবে।

২০৭। বাংলাদেশে আমদানিকৃত কতিপয় প্রকাশনা সম্বলিত ধারণকৃত মোড়ক জন্ম করিবার ক্ষমতা।—(১) কমিশনার অব কাস্টমস হইতে যথাযথভাবে ক্ষমতাপ্রাপ্ত কোনো কাস্টমস কর্মকর্তা অথবা এতদবিষয়ে সরকারের নিকট হইতে ক্ষমতাপ্রাপ্ত অন্য কোনো কর্মকর্তা স্থল, জল, আকাশ বা সমুদ্রপথে বাংলাদেশে আনীত কোনো মোড়ক আটক করিতে পারিবেন, যদি তিনি সন্দেহ পোষণ করেন যে উহাতে,—

(ক) Printing Presses and Publications (Declaration and Registration) Act, 1973 (Act No. XXIII of 1973) অনুযায়ী কোনো নিষিদ্ধ খবরের কাগজ বা পুস্তক রহিয়াছে; অথবা

(খ) রাষ্ট্রদ্রোহিতামূলক বা রাষ্ট্রবিরোধী তথ্য বা বস্তু সম্বলিত দলিলপত্র মোড়কজাত অবস্থায় রহিয়াছে, যাহার প্রকাশনা দলবিধির ধারা ১২৩এ বা, ক্ষেত্রমত, ১২৪এ অনুযায়ী শাস্তিযোগ্য,—

তাহা হইলে তিনি উক্ত মোড়ক এতদবিষয়ে সরকার কর্তৃক নিযুক্ত কর্মকর্তার নিকট প্রেরণ করিবেন।

(২) উপ-ধারা (১) এর অধীন মোড়ক আটককারী কোনো কর্মকর্তা, যে ক্ষেত্রে সম্ভব, অবিলম্বে উক্ত মোড়কের প্রাপক অথবা গ্রহীতার নিকট ডাকযোগে উক্ত আটকের ঘটনা সম্বলিত নোটিশ প্রেরণ করিবেন।

(৩) সরকার উপ-ধারা (১) এ উল্লিখিত মোড়কের ভিতরের সকল বিষয়বস্তু পরীক্ষা করাইবেন এবং যদি সরকারের নিকট ইহা প্রতীয়মান হয় যে উক্ত মোড়কে উক্ত উপ-ধারায় উল্লিখিত খবরের কাগজ, পুস্তক বা দলিলপত্র রহিয়াছে, তাহা হইলে সরকার যেরূপ যথাযথ বিবেচনা করিবে সেইরূপে উহা বিলিবন্দেজ করিবার জন্য আদেশ প্রদান করিতে পারিবে, এবং উক্তরূপ প্রতীয়মান না হইলে, আপাতত বলবৎ অন্য কোনো আইনের অধীনে উহা আটকযোগ্য না হইলে, মোড়কসহ উহার অভ্যন্তরস্থ বস্তুসমূহ ছাড় প্রদান করিবে:

তবে শর্ত থাকে যে, এই ধারার বিধানাবলীর অধীন আটককৃত কোনো মোড়কের বিষয়ে আগ্রহী কোনো ব্যক্তি উহা ছাড় করানোর জন্য উক্তরূপ আটকাদেশের তারিখ হইতে ২ (দুই) মাসের মধ্যে সরকারের নিকট আবেদন করিতে পারিবেন, এবং সরকার উক্ত আবেদনপত্র বিবেচনা করতঃ যেরূপ যথাযথ বিবেচনা করিবে, উহার উপর সেইরূপ আদেশ প্রদান করিবে:

আরও শর্ত থাকে যে, যদি উক্ত আবেদনপত্র সরকার কর্তৃক প্রত্যাখ্যাত হয়, তাহা হইলে আবেদনকারী আবেদনপত্রটি প্রত্যাখ্যাত হইবার তারিখ হইতে ২ (দুই) মাসের মধ্যে মোড়কটি অথবা উহার ভিতরের বস্তুসমূহ খালাসের জন্য হাইকোর্ট বিভাগে আবেদন করিতে পারিবেন।

(৪) উপ-ধারা (৩) এর দ্বিতীয় শর্তাংশে উল্লিখিত বিধানে ব্যতীত, এই ধারার অধীনে প্রদত্ত আদেশ বা গৃহীত কোন কার্যক্রমের বিষয়ে কোনো আদালতে প্রশ্ন উত্থাপন করা যাইবে না।

ব্যাখ্যা।—এই ধারায় “দলিলপত্র” অর্থে কোনো লেখা, চিত্র, উৎকীরণ, অংকন বা আলোকচিত্র অথবা অন্য কোনো দৃশ্যমান প্রতীকও অন্তর্ভুক্ত হইবে।

২০৮। **জন্মকৃত মোড়ক খালাসের জন্য দাখিলকৃত আবেদনপত্র নিষ্পত্তির ক্ষেত্রে হাইকোর্ট বিভাগ কর্তৃক অনুসরণীয় পদ্ধতি**।—ফৌজদারী কার্যবিধির ধারা ৯৯ডি হইতে ৯৯এফ এ বর্ণিত পদ্ধতিতে, উক্ত কার্যবিধির ধারা ৯৯সি এর বিধান অনুযায়ী গঠিত হাইকোর্ট বিভাগের বিশেষ বেঞ্চ কর্তৃক ধারা ২০৭ এর উপ-ধারা (৩) এর দ্বিতীয় শর্তাংশের অধীন পেশকৃত প্রতিটি আবেদনপত্রের উপর শুনানী গ্রহণ এবং নিষ্পত্তি করা হইবে।

২০৯। **স্থলপথে আমদানিকৃত বা রপ্তানিকৃত পণ্য ছাড়পত্রের অনুমতি সংক্রান্ত দাখিলে বাধ্য করানোর ক্ষমতা**।—কোনো পণ্য কোনো বিদেশি ভূখন্ড হইতে স্থলপথে আমদানি করা হইয়াছে বলিয়া অথবা উক্ত ভূখন্ডে রপ্তানি হইতে পারে বলিয়া বিশ্বাস করিবার যুক্তিসঙ্গত কারণ থাকিলে যথাযথ কর্মকর্তা উক্ত পণ্যের তত্ত্বাবধানকারী ব্যক্তিকে ধারা ১০২ এর অধীন পণ্য ছাড়ের আদেশ দাখিল করিবার জন্য নির্দেশ প্রদান করিতে পারিবেন:

তবে শর্ত থাকে যে, এই ধারার কোনো কিছুই ধারা ১০ এর দফা (গ) এর অধীন নির্ধারিত বুটে বিদেশি সীমান্ত হইতে কোনো অভ্যন্তরীণ কাস্টমস স্টেশনে আমদানিকৃত পণ্য চলাচলের ক্ষেত্রে প্রযোজ্য হইবে না:

আরও শর্ত থাকে যে, বোর্ড, সরকারি গেজেটে প্রজ্ঞাপন দ্বারা, নির্দেশ প্রদান করিতে পারিবে যে, এই ধারার বিধানাবলী বিদেশি সীমান্তের সহিত সংযুক্ত কোনো বিশেষ এলাকায় কোনো নির্ধারিত বর্ণনার অথবা মূল্যের পণ্যের ক্ষেত্রে প্রযোজ্য হইবে না।

২১০। **কতিপয় সংকেত বা সংবাদ প্রস্তুত বা প্রেরণ নিরোধ করিবার ক্ষমতা**।—যদি কোনো কাস্টমস বা পুলিশ কর্মকর্তা বা বাংলাদেশ সশস্ত্র বাহিনীর কোনো সদস্যের সন্দেহ করিবার যুক্তিসঙ্গত কারণ থাকে যে, কোনো পণ্য বাংলাদেশের অভ্যন্তরে অথবা বাংলাদেশ হইতে বাহিরে চোরাচালানের বা চোরাচালানের অভিপ্রায়ে অথবা অভিসন্ধির সহিত সম্পৃক্ত কোনো সংকেত বা সংবাদ কোনো যানবাহন, গৃহ বা স্থানে প্রস্তুত অথবা উক্ত স্থান হইতে প্রেরণ করা হইতেছে অথবা প্রস্তুত বা প্রেরণের উপক্রম হইতেছে, তাহা হইলে তিনি উক্ত যানবাহনে আরোহণ বা উক্ত গৃহে অথবা স্থানে প্রবেশ করিতে পারিবেন এবং সংকেত বা সংবাদটি প্রস্তুত বা প্রেরণ বন্ধ অথবা নিরোধ করিবার জন্য যুক্তিসঙ্গতভাবে প্রয়োজনীয় পদক্ষেপ গ্রহণ করিতে পারিবেন।

২১১। **কতিপয় কারখানায় কর্মকর্তা মোতায়েনের ক্ষমতা**।—(১) এসিস্ট্যান্ট কমিশনার অব কাস্টমস পদমর্যাদার নিম্নে নহেন এমন কর্মকর্তা যদি উপযুক্ত বিবেচনা করেন, তাহা হইলে তিনি বাংলাদেশের সীমান্তের ৫ (পাঁচ) মাইলের মধ্যে অবস্থিত এবং বাণিজ্যিক উদ্দেশ্যে ব্যবহৃত কোন কারখানা বা ইमारতে কোনো কাস্টমস কর্মকর্তাকে ইহা নিশ্চিত করিবার লক্ষ্যে মোতায়েন করিতে পারিবেন যেন উক্ত কারখানা বা ইमारতটি কোনো অবৈধ বা অনিয়মিত পণ্য আমদানি বা রপ্তানির জন্য কোনোভাবে ব্যবহৃত না হয়।

(২) উপ-ধারা (১) এর অধীন মোতায়েনকৃত কর্মকর্তার যে কোনো যুক্তিসঙ্গত সময়ে সংশ্লিষ্ট কারখানার রেকর্ডপত্র অথবা ইमारতে পরিচালিত ব্যবসা পরিদর্শন করিবার ক্ষমতাসহ, বিধিমালা দ্বারা নির্ধারিত, অন্যান্য ক্ষমতা থাকিবে।

২১২। **কতিপয় এলাকায় পণ্য দখলে রাখিবার ক্ষেত্রে বিধি-নিষেধ।**—(১) বোর্ড কর্তৃক, সময়ে সময়ে, সরকারি গেজেটে প্রজ্ঞাপন দ্বারা নির্ধারিত, বাংলাদেশের সীমান্ত সংলগ্ন এলাকাসমূহে এই ধারা প্রযোজ্য হইবে।

(২) এই ধারা যে এলাকায় প্রযোজ্য হইবে, সেই এলাকায় কোনো ব্যক্তি সরকার কর্তৃক অথবা সরকার হইতে ক্ষমতাপ্রাপ্ত কোনো কর্মকর্তা কর্তৃক নির্ধারিত পণ্য বা পণ্যশ্রেণির ক্ষেত্রে প্রদত্ত পারমিট ব্যতীত সরকার কর্তৃক গেজেটে প্রজ্ঞাপন দ্বারা নির্ধারিত পরিমাণ বা মূল্যের অতিরিক্ত কোনো পণ্য অথবা পণ্যশ্রেণি স্থায়ী দখলে বা নিয়ন্ত্রণে রাখিতে পারিবেন না।

২১৩। **বাজেয়াপ্তযোগ্য পণ্য দখলে রাখিয়াছেন এমন ব্যক্তির সজ্জীর দন্ড।**—যদি দুই অথবা ততোধিক ব্যক্তিকে সজ্জী হিসেবে একত্রে পাওয়া যায় এবং তাহাদের বা তাহাদের যে কোনো একজনের নিকট এই আইনের অধীন কোন বাজেয়াপ্তযোগ্য পণ্য পাওয়া যায়, তাহা হইলে উক্ত ঘটনা সম্পর্কে জ্ঞাত রহিয়াছেন এইরূপ প্রত্যেক ব্যক্তি উক্ত অপরাধে দোষী হইবেন এবং উহা এই আইনের বিধান অনুযায়ী এইরূপে শাস্তিযোগ্য হইবে, যেন উক্ত পণ্য উক্ত ব্যক্তির নিকট হইতে পাওয়া গিয়াছে।

২১৪। **ন্যায়নির্ণয়ন (adjudication) করিবার ক্ষমতা।**—(১) এই আইনের অধীন পণ্য বাজেয়াপ্তি ও জরিমানা আরোপের ক্ষেত্রে কাস্টমস্ কর্মকর্তাগণের অধিক্ষেত্র এবং ক্ষমতা হইবে নিম্নরূপ, যথা:—

### টেবিল

নং	মামলার প্রকৃতি	কর্মকর্তাগণের পদবী	অধিক্ষেত্র ও ক্ষমতা
(১)	(২)	(৩)	(৪)
১।	পণ্য বাজেয়াপ্তিকরণ বা জরিমানা আরোপ অথবা উভয় ক্ষেত্রে ন্যায়নির্ণয়ন।	কমিশনার অব কাস্টমস, কমিশনার অব কাস্টমস (বন্ড) এবং ডিরেক্টর জেনারেল (কাস্টমস রেয়াত ও প্রত্যর্পণ)	পণ্যের মূল্য ২০ (বিশ) লক্ষ টাকার অধিক।
		এ্যাডিশনাল কমিশনার অব কাস্টমস	পণ্যের মূল্য অনধিক ২০ (বিশ) লক্ষ টাকা।
		জয়েন্ট কমিশনার অব কাস্টমস	পণ্যের মূল্য অনধিক ১৫ (পনের) লক্ষ টাকা।
		ডেপুটি কমিশনার অব কাস্টমস	পণ্যের মূল্য অনধিক ১০ (দশ) লক্ষ টাকা।
		এসিস্ট্যান্ট কমিশনার অব কাস্টমস	পণ্যের মূল্য অনধিক ৫ (পাঁচ) লক্ষ টাকা।
		রাজস্ব কর্মকর্তা	পণ্যের মূল্য অনধিক ২ (দুই) লক্ষ টাকা।



নং	মামলার প্রকৃতি	কর্মকর্তাগণের পদবী	অধিক্ষেত্র ও ক্ষমতা
(১)	(২)	(৩)	(৪)
২।	কাস্টম হাউস এবং কাস্টমস স্টেশনসমূহে কার্গো ঘোষণায় উল্লিখিত কোনো পণ্য পাওয়া না যাওয়া বা কম পাওয়ার ক্ষেত্রে ন্যায়নির্ণয়ন, যাহাতে কেবলমাত্র ধারা ১৮১ এর উপ-ধারা (১) এর টেবিলের কলাম (১) এর ক্রমিক নম্বর ১১ এর বিপরীতে, যথাক্রমে, কলাম (৩) ও (৪) এর এন্ট্রি (৩) এর অধীন জরিমানা আরোপনীয়।	কাস্টম হাউস অথবা, ক্ষেত্রমত, কাস্টমস স্টেশনে কার্গো ঘোষণার ক্লিয়ারেন্সের দায়িত্বে ভারপ্রাপ্ত ডেপুটি কমিশনার অথবা এসিস্ট্যান্ট কমিশনার অব কাস্টমস।	পণ্যের মূল্য সীমাহীন।

(২) উপ-ধারা (১) এ উল্লিখিত টেবিলে যাহা কিছুই থাকুক না কেন, বোর্ড, সরকারি গেজেটে প্রজ্ঞাপন দ্বারা, কোনো বিশেষ কর্মকর্তার অথবা কোনো শ্রেণির কর্মকর্তার অধিক্ষেত্র এবং ক্ষমতা হ্রাস বা বৃদ্ধি করিতে পারিবে।

(৩) বোর্ড, সরকারি গেজেটে প্রজ্ঞাপন দ্বারা, যেই ক্ষেত্রে উপ-ধারা (১) এর টেবিলে অধিক্ষেত্র এবং ক্ষমতা প্রদর্শিত হয় নাই, সেই ক্ষেত্রে যে কোনো কাস্টমস কর্মকর্তার উপর অধিক্ষেত্র নির্ধারণ এবং ক্ষমতা অর্পণ করিতে পারিবে।

২১৫। পণ্য বাজেয়াপ্তি বা জরিমানা আরোপের পূর্বে কারণ দর্শানো নোটিশ জারি।—এই আইনের অধীন কোনো পণ্য বাজেয়াপ্তিকরণ অথবা কোনো ব্যক্তির উপর জরিমানা আরোপের কোনো আদেশ প্রদান করা যাইবে না, যদি না পণ্যের মালিককে, যদি থাকেন, অথবা উক্ত ব্যক্তিকে,—

- (ক) যেই কারণের উপর ভিত্তি করিয়া পণ্য বাজেয়াপ্তি বা জরিমানা আরোপের প্রস্তাব করা হয় তাহা লিখিতভাবে অথবা, যদি সংশ্লিষ্ট ব্যক্তি লিখিত সম্মতি প্রদান করেন, মৌখিকভাবে অবহিত করা হয়;
- (খ) প্রস্তাবিত ব্যবস্থা গ্রহণের বিরুদ্ধে যথাযথ কর্মকর্তা কর্তৃক নির্ধারিত যুক্তিসঙ্গত সময়ের মধ্যে লিখিতভাবে অথবা, যদি সংশ্লিষ্ট ব্যক্তি ইহা প্রদানের জন্য তাহার অগ্রাধিকারের বিষয়ে লিখিতভাবে অবহিত করেন, তাহা হইলে মৌখিকভাবে ব্যাখ্যা প্রদানের সুযোগ প্রদান করা হয়; এবং
- (গ) ব্যক্তিগতভাবে বা কোনো পরামর্শকের মাধ্যমে অথবা যথাযথভাবে ক্ষমতাপ্রাপ্ত এজেন্টের মাধ্যমে শুনানীর সুযোগ প্রদান করা হয়:

তবে শর্ত থাকে যে, উক্ত পণ্যের মালিক অথবা সংশ্লিষ্ট ব্যক্তি অপরাধ স্বীকার করিলে, প্রদত্ত আদেশের বিরুদ্ধে তাহার আপীলের অধিকার ক্ষুণ্ণ না করিয়া, তাহাকে কারণ দর্শানো নোটিশ জারি ব্যতীত প্রদত্ত কোনো আদেশ গ্রহণ করিতে সম্মত আছেন মর্মে লিখিত অনুরোধের প্রেক্ষিতে কোনো পণ্য বাজেয়াপ্ত করিয়া, অথবা কোনো ব্যক্তির উপর কোনো জরিমানা আরোপ করিয়া, প্রদত্ত আদেশের ক্ষেত্রে, এই ধারার বিধান প্রযোজ্য হইবে না।

২১৬। **জরিমানা ও দন্ডের পরিমাণ নির্ধারণ।**—এই আইনে উল্লিখিত, ক্ষেত্রমত, জরিমানা ও দন্ডের সর্বোচ্চ পরিমাণ সাপেক্ষে, সংশ্লিষ্ট কর্মকর্তা বা বিচারক কর্তৃক, সংশ্লিষ্ট ঘটনা ও পরিস্থিতির ভিত্তিতে এবং অপরাধের মাত্রা ও তীব্রতা অনুযায়ী উপযুক্ত জরিমানা বা দন্ডের পরিমাণ নির্ধারিত হইবে।

২১৭। **তামাদির মেয়াদ।**—(১) প্রতারণা হইতে উদ্ধৃত অপরাধ ব্যতীত, এই আইনের অধীন, কোনো জরিমানা আরোপ বা পণ্য বাজেয়াপ্ত সংক্রান্ত কোনো আদেশ প্রদান করা যাইবে না, যদি না সংশ্লিষ্ট ঘটনা ঘটিবার তারিখ হইতে ৩ (তিন) বৎসরের মধ্যে ধারা ২১৫ এর অধীন প্রয়োজনীয় নোটিশ জারি করা হয়:

তবে শর্ত থাকে যে, জরিমানার ক্ষেত্রে সংশ্লিষ্ট ব্যক্তির বাংলাদেশে অনুপস্থিতি এবং বাজেয়াপ্তির ক্ষেত্রে সংশ্লিষ্ট পণ্য লুকাইয়া রাখিবার ক্ষেত্রে উক্তরূপভাবে তামাদি গণনা প্রযোজ্য হইবে না।

(২) ধারা ৪২ এ উল্লিখিত ক্ষেত্র ব্যতীত, শুল্ক, কর ও চার্জ দাবীর ক্ষেত্রে প্রাসঙ্গিক তারিখ হইতে ৩ (তিন) বৎসর অতিক্রান্ত হইবার পর, কোন শুল্ক ও কর বা অন্যান্য চার্জের জন্য দাবীনামা জারি বা বিজ্ঞপ্তি প্রদান করা যাইবে না।

ব্যাখ্যা।—উপ-ধারা (২) এর উদ্দেশ্য পূরণকল্পে, “প্রাসঙ্গিক তারিখ” অর্থ—

(ক) ধারা ১০৩ এর অধীন শুল্ক ও কর সাময়িকভাবে নিরূপিত হইলে, চূড়ান্ত শুল্ক নিরূপণের পর শুল্ক সমন্বয় করার তারিখ;

(খ) শুল্ক ও কর বা অন্যান্য চার্জ ভুলক্রমে ফেরত প্রদান করার ক্ষেত্রে, উহা ফেরত প্রদানের তারিখ; এবং

(গ) অন্য যে কোনো ক্ষেত্রে, পণ্য ছাড়ের তারিখ।

(৩) যদি ধারা ১৮১ এর উপ-ধারা (১) এর টেবিলের কলাম (১) এর ক্রমিক নম্বর ৯ এর বিপরীতে কলাম (৩) এর এন্ড্রিতে উল্লিখিত কোনো অসত্য বিবৃতির কারণে কোনো শুল্ক ও কর বা অন্যান্য চার্জ আরোপ না করা বা কম আরোপ করা বা ভুলক্রমে ফেরত প্রদান করার জন্য এই আইনের অধীন কোনো অপরাধ সংঘটিত হয়, তাহা হইলে এই ধারার অধীন কোনো নোটিশ জারির ক্ষেত্রে কোনো সময়সীমা থাকিবে না।

২১৮। **বাজেয়াপ্তকৃত পণ্যের পরিবর্তে জরিমানা পরিশোধ।**—(১) এই আইনের অধীন কোনো পণ্য বাজেয়াপ্তকরণের আদেশ প্রদানকারী কর্মকর্তা পণ্য বাজেয়াপ্তির পরিবর্তে যেরূপ উপযুক্ত বিবেচনা করিবেন পণ্যের মালিককে সেইরূপ জরিমানা পরিশোধ করিবার জন্য ঐচ্ছিক বিকল্পের সুযোগ প্রদান করিতে পারিবেন:

তবে শর্ত থাকে যে, উক্ত জরিমানার পরিমাণ এই আইনের ত্রয়োবিংশ অধ্যায়ে সংশ্লিষ্ট অপরাধের বিপরীতে আরোপযোগ্য জরিমানার পরিমাণ হইতে অধিক হইবে না।

(২) এই ধারার কোনো কিছুই কোনো আইনের দ্বারা অথবা অধীন আমদানি নিষিদ্ধ কোনো পণ্যের ক্ষেত্রে প্রযোজ্য হইবে না।

(৩) এই ধারার অধীন পণ্য বাজেয়াপ্তির পরিবর্তে আরোপিত কোনো জরিমানা উক্ত পণ্যের ক্ষেত্রে প্রদেয় কোনো শুল্ক ও চার্জ এবং পণ্য বাজেয়াপ্তির জন্য অতিরিক্ত কোনো জরিমানা আরোপিত হইয়া থাকিলে উহা তাহার অতিরিক্ত হইবে।

২১৯। **বাজেয়াপ্তকৃত সম্পত্তি সরকারের উপর ন্যস্ত হওয়া।**—এই আইনের অধীন কোনো পণ্য বাজেয়াপ্ত করা হইলে উহা অবিলম্বে সরকারের উপর ন্যস্ত হইবে এবং বাজেয়াপ্তি আদেশ প্রদানকারী কর্মকর্তা বাজেয়াপ্ত পণ্য গ্রহণ করিবেন এবং দখলে লইবেন।

২২০। **অনুমতি ব্যতীত প্রস্থান করিবার বা আনয়নে ব্যর্থতার জন্য জরিমানা আরোপ।**—(১) কোনো যানবাহন পোর্ট ক্লিয়ারেন্স বা লিখিত অনুমতি ব্যতীত প্রস্থান করিলে অথবা, জাহাজের ক্ষেত্রে, ধারা ১৫ এর অধীন নিযুক্ত কোনো স্টেশনে উহা আনয়ন করিতে নির্দেশ প্রদানের পর উহা আনয়ন করিতে ব্যর্থ হইলে, সংশ্লিষ্ট যানবাহনের ভারপ্রাপ্ত ব্যক্তির বিরুদ্ধে যে জরিমানা আরোপিত হইবে, উহার ন্যায়নির্ণয়ন উক্ত যানবাহন যেই কাস্টমস স্টেশনে অগ্রসর হয় অথবা যেস্থানে উহা অবস্থান করে সেই স্থানের যথাযথ কর্মকর্তা করিতে পারিবেন।

(২) যেই কাস্টমস স্টেশন হইতে যানবাহনটি উক্তরূপে প্রস্থান করিয়াছে বলিয়া বর্ণিত হয় সেই স্টেশনের উপযুক্ত কর্মকর্তা কর্তৃক স্বাক্ষরিত বলিয়া দাবীকৃত কোন প্রত্যয়নপত্র, উক্ত প্রস্থান অথবা আনয়নে ব্যর্থতার ক্ষেত্রে বর্ণিত ঘটনার দৃশ্যমাণ প্রমাণ হিসাবে গণ্য হইবে।

২২১। **সংক্ষিপ্ত বিচার করিবার ক্ষমতা।**—ফৌজদারী কার্যবিধির ধারা ২৬০ এর উপ-ধারা (১) এ বর্ণিত অপরাধসমূহ সংক্ষিপ্ত পদ্ধতিতে বিচার করিবার জন্য ক্ষমতাপ্রাপ্ত কোনো জুডিশিয়াল ম্যাজিস্ট্রেট উপযুক্ত বিবেচনা করিলে, বাদীর আবেদনক্রমে, এই আইনের অধীন কোনো অপরাধ, সংশ্লিষ্ট পণ্যের মূল্য ৫ (পাঁচ) হাজার টাকার অধিক না হইলে, উক্ত কার্যবিধির ধারা ২৬২ এর উপ-ধারা (১) এবং ধারা ২৬৩, ২৬৪ ও ২৬৫ এর বিধানাবলী অনুসারে সংক্ষিপ্ত বিচার করিতে পারিবেন।

২২২। **জুডিশিয়াল ম্যাজিস্ট্রেটের জন্য বিশেষ ক্ষমতা।**—ফৌজদারী কার্যবিধিতে যাহা কিছুই থাকুক না কেন, এই আইনের বিধানাবলী সাপেক্ষে, এতদবিষয়ে সরকার কর্তৃক বিশেষভাবে ক্ষমতাপ্রাপ্ত কোনো প্রথম শ্রেণির জুডিশিয়াল ম্যাজিস্ট্রেট এই আইনের অধীন কোনো অপরাধের জন্য ৫ (পাঁচ) বৎসরের অধিক কারাদন্ড এবং ১০ (দশ) হাজার টাকার অধিক অর্থদন্ড প্রদান করিতে পারিবেন।

২২৩। **জরিমানা বা অর্থদন্ড পরিশোধ অপেক্ষমান অবস্থায় পণ্য আটক।**—(১) যখন কোনো পণ্যের ক্ষেত্রে, ক্ষেত্রমত, জরিমানা বা অর্থদন্ড আরোপ করা হয় অথবা কোনো জরিমানা বা অর্থদন্ড আরোপ বিবেচনাধীন থাকে তখন উক্ত জরিমানা বা অর্থদন্ড পরিশোধ না হওয়া পর্যন্ত মালিক কর্তৃক উক্ত পণ্য অপসারণ করা যাইবে না।

(২) যখন কোনো পণ্যের ক্ষেত্রে কোনো জরিমানা বা অর্থদন্ড আরোপ করা হয়, তখন উক্ত জরিমানা বা অর্থদন্ডপরিশোধ অনিষ্পন্ন থাকিলে যথাযথ কর্মকর্তা একই মালিকের মালিকানাধীন অন্য কোনো পণ্য আটক করিতে পারিবেন।

২২৪। **বৈধ কর্তৃত্ব, ইত্যাদি প্রমাণের দায়ভার।**—যখন কোনো ব্যক্তি এই আইনের অধীন কোনো অপরাধ সংঘটিত করিয়াছেন বলিয়া অভিযোগ করা হয় এবং প্রমাণ উত্থাপিত হয় যে বৈধ কর্তৃত্ববলে অথবা আপাতত বলবৎ কোনো আইনের দ্বারা অথবা অধীন নির্ধারিত কোনো পারমিট, লাইসেন্স অথবা অন্য কোনো দলিলপত্রবলে তিনি কোনো কার্য করিয়াছেন কিনা অথবা কোনো কিছু দখলে ছিলেন কিনা, তখন উক্তরূপ কর্তৃত্ব, পারমিট, লাইসেন্স অথবা দলিলপত্র যে তাহার দখলে ছিল উহা প্রমাণের দায়ভার তাহার উপর বর্তাইবে।

২২৫। **কতিপয় ক্ষেত্রে দলিলপত্র সম্পর্কে প্রাক-প্রমাণ (Presumption)।**—যেই ক্ষেত্রে কোনো ব্যক্তি এই আইনের অধীন কোনো দলিলপত্র উপস্থাপন করেন অথবা কোনো ব্যক্তির তত্ত্বাবধান বা নিয়ন্ত্রণ হইতে কোনো দলিলপত্র আটক করা হয়, এবং উক্ত দলিলপত্র অভিযোগকারী কর্তৃক উক্ত ব্যক্তির বিরুদ্ধে সাক্ষ্য হিসাবে পেশ করা হয়, সেইক্ষেত্রে জুডিশিয়াল ম্যাজিস্ট্রেট,—

(ক) উক্ত ব্যক্তি উহার বিপরীতে কিছু প্রমাণ করিতে না পারিলে,—

(অ) উক্ত দলিলপত্রের বিষয়বস্তু সত্য বলিয়া গণ্য করিবেন;

(আ) উক্ত দলিলপত্রের স্বাক্ষর এবং প্রতিটি অংশ, যাহা কোনো বিশেষ ব্যক্তির হাতে লিখিত বলিয়া মনে করা হয় বা যাহা কোনো বিশেষ ব্যক্তি কর্তৃক স্বাক্ষরিত বা হস্তলিখিত বলিয়া যুক্তিসঙ্গত ভাবে অনুমান করেন, তাহা উক্ত ব্যক্তির হাতের লেখা বলিয়া গণ্য করিবেন, এবং কোনো দলিলপত্র সম্পাদন বা সত্যায়নের ক্ষেত্রে যেই ব্যক্তি উহা সম্পাদন বা সত্যায়িত করিয়াছেন বলিয়া মনে করা হয় সেই ব্যক্তি কর্তৃক উহা সম্পাদিত বা সত্যায়িত হইয়াছে বলিয়া গণ্য করিবেন;

(খ) যথাযথভাবে স্ট্যাম্পযুক্ত না হওয়া সত্ত্বেও উক্ত দলিলপত্র যদি অন্যভাবে সাক্ষ্য হিসাবে গ্রাহ্য হয়, তাহা হইলে উহা সাক্ষ্য হিসাবে গ্রহণ করিবেন।

২২৬। **দন্ডদেশের নোটিশ প্রদর্শন করা।**—(১) চোরাচালানের অপরাধে কোনো ব্যক্তির দন্ডদেশ হইবার পর সরকার তাহাকে তাহার ব্যবসাস্থলের, যদি থাকে, ভিতরে বা বাহিরে অথবা ভিতর এবং বাহির উভয় দিকে দন্ডদেশ প্রাপ্তির তারিখ হইতে কমপক্ষে ৩ (তিন) মাসকাল অব্যাহতভাবে সরকার কর্তৃক নির্ধারিত নম্বর, আয়তন ও অক্ষরে দন্ডদেশ সম্পর্কিত তথ্য সম্বলিত নোটিশ প্রদর্শন করিতে বাধ্য করিতে পারিবে;

(২) যদি কোনো ব্যক্তি উপ-ধারা (১) এ উল্লিখিত বাধ্যবাধকতা প্রতিপালন করিতে ব্যর্থ হন, তাহা হইলে তিনি এই আইনের অধীন প্রথম যেই অপরাধের জন্য দন্ডিত হইয়াছেন সেই অপরাধের অনুরূপ প্রকৃতির আরও একটি অপরাধ সংঘটন করিয়াছেন বলিয়া গণ্য হইবে।

(৩) যদি দন্ডদেশ প্রাপ্ত কোনো ব্যক্তি উপ-ধারা (১) এ উল্লিখিত কোনো বাধ্যবাধকতা প্রতিপালন করিতে অস্বীকার করেন বা ব্যর্থ হন, তাহা হইলে এতদবিষয়ে সরকারের লিখিত আদেশ দ্বারা ক্ষমতাপ্রাপ্ত যে কোনো কর্মকর্তা উক্তরূপ কোনো অস্বীকৃতি বা ব্যর্থতার ক্ষেত্রে যেই কার্যধারা গ্রহণ করা হইতে পারে তাহা ক্ষুণ্ণ না করিয়া উপ-ধারা (১) এর বিধান অনুসারে উক্ত ব্যক্তির ব্যবসাস্থলের ভিতরে অথবা বাহিরে অথবা ভিতর অথবা বাহির উভয় দিকে নোটিশ আঁটিয়া দিতে পারিবেন।

(৪) যদি কোনো ক্ষেত্রে সরকার এই মর্মে সন্তুষ্ট হয় যে উপ-ধারা (১) বা (৩) এর বিধান অনুযায়ী নোটিশসমূহের প্রদর্শনীতে দন্ডিত ব্যক্তির দন্ডদেশ সম্পর্কিত তথ্য উক্ত ব্যক্তির কারবারে জড়িত অন্যান্যদের ফলপ্রসূভাবে নজরে আসিবে না, তাহা হইলে সরকার উক্ত বাধ্যবাধকতার পরিবর্তে অথবা ইহার অতিরিক্ত হিসাবে দন্ডিত ব্যক্তিকে তাহার ব্যবসায়ে ব্যবহৃত দ্রব্যাদিতে নির্ধারিত নম্বর, আয়তন ও অক্ষরে দন্ডদেশের বিবরণ সম্বলিত মুদ্রিত একটি নোটিশ অনূন ৩ (তিন) মাস সময়ের জন্য প্রদর্শন করিতে বাধ্য করিতে পারিবে।

(৫) কোন ব্যক্তি উপ-ধারা (৪) এ উল্লিখিত বাধ্যবাধকতা প্রতিপালনে ব্যর্থ হইলে, তিনি এই আইনের অধীন প্রথম যেই অপরাধে দন্ডিত হইয়াছিলেন, তাহার অনুরূপ প্রকৃতির আরও একটি অপরাধ সংঘটন করিয়াছেন বলিয়া গণ্য হইবে।

২২৭। **দন্ডদেশ প্রকাশ করিবার ক্ষমতা।**—সরকার যদি এই মর্মে সন্তুষ্ট হয় যে, চোরাচালান সম্পর্কিত অপরাধে কোনো ব্যক্তির দন্ডদেশ এবং এতদসম্পর্কিত বিবরণ প্রকাশ করা আবশ্যিক তাহা হইলে উহা সরকারি গেজেটে প্রকাশ করিতে পারিবে।

২২৮। **কারাদন্ডের খরন।**—এই আইনের অধীন কোনো অপরাধের জন্য প্রদেয় কারাদন্ড, জুডিশিয়াল ম্যাজিস্ট্রেটের সুবিবেচনাপ্রসূত ইচ্ছাক্রমে বিনাশ্রম বা সশ্রম হইতে পারিবে।

২২৯। **কতিপয় ব্যক্তি কর্তৃক তথ্য প্রদানের কর্তব্য।**—(১) এই আইনের অধীন কোনো অপরাধ সংঘটনের অথবা উক্তরূপ কোনো অপরাধ সংঘটনের কোনো চেষ্টা বা সম্ভাব্য চেষ্টা কোনো ব্যক্তি জ্ঞাত হইলে তিনি উক্ত সংবাদ যথাশীঘ্র সম্ভব নিকটতম কাস্টমস স্টেশনের অথবা কাস্টমস দপ্তরের ভারপ্রাপ্ত কর্মকর্তার নিকট অথবা যদি এইরূপ কোনো কাস্টমস স্টেশন বা কাস্টমস দপ্তর না থাকে, তাহা হইলে নিকটতম থানার ভারপ্রাপ্ত কর্মকর্তার নিকট লিখিতভাবে সংবাদ প্রদান করিবেন।

(২) থানার ভারপ্রাপ্ত কর্মকর্তা উপ-ধারা (১) এ উল্লিখিত কোনো সংবাদ প্রাপ্ত হইলে, যথাশীঘ্র সম্ভব, উহা নিকটতম কাস্টমস স্টেশনের অথবা কাস্টমস দপ্তরের ভারপ্রাপ্ত কর্মকর্তাকে অবহিত করিবেন।

## পঞ্চবিংশ অধ্যায়

### বিকল্প বিরোধ নিষ্পত্তি

২৩০। **বিকল্প বিরোধ নিষ্পত্তি।**—(১) এই আইনের অন্য কোনো বিধানে যাহা কিছুই থাকুক না কেন, ধারা ২৩১ এ সংজ্ঞায়িত এবং বর্ণিত কোন বিরোধের ন্যায়নির্ণয়ন অথবা নিষ্পত্তি সংশ্লিষ্ট কাস্টমস কর্তৃপক্ষ অথবা কমিশনার অব কাস্টমস (আপীল) অথবা আপীল ট্রাইব্যুনাল অথবা বাংলাদেশ সুপ্রীমকোর্ট এর নিকট নিষ্পন্নানীয় অথবা অনিষ্পন্নানীয় থাকা অবস্থায় উক্ত বিরোধের সহিত সংশ্লিষ্ট কোনো আমদানিকারক বা রপ্তানিকারক বিরোধটি এই আইন ও তদধীন প্রণীত বিধি দ্বারা নির্ধারিত পদ্ধতিতে বিকল্প বিরোধ নিষ্পত্তি প্রক্রিয়ায় নিষ্পত্তির জন্য সংশ্লিষ্ট কর্তৃপক্ষের নিকট আবেদন করিতে পারিবেন এবং এই আইনের ন্যায়নির্ণয়ন অথবা আপীল বিষয়ক বিধানের অধীন কার্যধারা সম্পন্ন হওয়ার পূর্বে বিকল্প বিরোধ নিষ্পত্তি প্রক্রিয়ার ব্যবস্থা গ্রহণ করিতে হইবে।

(২) বোর্ড, সরকারি গেজেট প্রজ্ঞাপন দ্বারা, বিরোধ নিষ্পত্তির আবেদন প্রক্রিয়াকরণের জন্য, সময়ে সময়ে, এক বা একাধিক কাস্টমস স্টেশন অথবা কাস্টমস দপ্তর নির্ধারণ করিতে পারিবে।

২৩১। **বিকল্প বিরোধ নিষ্পত্তির জন্য বিরোধের সংজ্ঞা এবং আওতা।**—(১) এই অধ্যায়ের উদ্দেশ্য পূরণকল্পে, “বিরোধ” অর্থ কোনো মামলা বা কার্যধারা যাহা—

(অ) কোনো আমদানিকৃত পণ্যের কাস্টমস মূল্যায়ন সম্পর্কিত অথবা কাস্টমস মূল্যায়ন এবং এইচ.এস. শ্রেণীবিন্যাস সম্পর্কিত জরিমানা আরোপের ক্ষেত্রে প্রযোজ্য; এবং

(আ) এই আইনের অধীন গঠিত কোনো কাস্টমস কর্তৃপক্ষ বা কমিশনার অব কাস্টমস (আপীল) অথবা আপীল ট্রাইব্যুনাল বা বাংলাদেশ সুপ্রীম কোর্টসহ কোনো আদালতের নিকট নিষ্পন্নানীয়।

(২) উপ-ধারা (১) এ যাহা কিছুই থাকুক না কেন, বিকল্প বিরোধ নিষ্পত্তি প্রক্রিয়ায় নিম্নবর্ণিত বিরোধ নিষ্পত্তি করা যাইবে না, যথা:—

(ক) প্রতারণা বা ফৌজদারী মামলা;

(খ) নিষিদ্ধ, নিয়ন্ত্রিত বা চোরাচালানকৃত পণ্য আটক এবং বাজেয়াপ্তি সংক্রান্ত বিরোধ;

(গ) মানিলন্ডারিং এর অভিযোগ সংক্রান্ত বিরোধ;

(ঘ) আমদানিকৃত পণ্যের শ্রেণীবিন্যাস সম্পর্কিত বিরোধ; এবং

(ঙ) পণ্যের বর্ণনা, পরিমাণ, এবং এইচ.এস. কোডের অসত্য ঘোষণা, দলিলপত্র জালিয়াতি, আমদানি এবং রপ্তানি নীতি লংঘন অথবা কাস্টমস বন্ডেড ওয়ারহাউস লাইসেন্সিং অথবা বন্ড সম্পর্কিত শর্তসমূহ লংঘনপূর্বক শুল্ক এবং কর ফাঁকির অভিযোগ সংক্রান্ত বিরোধ।

২৩২। **সহায়তাকারী নিয়োগ।**—বিকল্প পদ্ধতিতে বিরোধ নিষ্পত্তির উদ্দেশ্যে বোর্ড সহায়তাকারী (facilitator) নিয়োগ অথবা নির্বাচন করিতে পারিবে।

২৩৩। **বিকল্প বিরোধ নিষ্পত্তি সংক্রান্ত কার্যক্রম ও পদ্ধতি।**—বিকল্প বিরোধ নিষ্পত্তির উদ্দেশ্যে সহায়তাকারী নিয়োগ, বিরোধ নিষ্পত্তির জন্য আবেদন প্রক্রিয়া ও নিষ্পত্তি, নেগোসিয়েশন ও নিষ্পত্তির সময়সীমা, সিদ্ধান্ত প্রদান, মতৈক্য বা নিষ্পত্তির কার্যকারিতা, আপীলের সময়সীমা বিষয়ক প্রয়োজনীয় কার্যক্রম ও পদ্ধতি বিধি দ্বারা নির্ধারিত হইবে।

২৩৪। **মামলা বা আইনগত কার্যধারা বারিত।**—এই অধ্যায়ের অধীন বিকল্প বিরোধ নিষ্পত্তি প্রক্রিয়ার সাথে সংশ্লিষ্ট কোনো ব্যক্তির বিরুদ্ধে সরল বিশ্বাসে গৃহীত কোনো কার্যক্রম অথবা সম্পাদিত কোনো মতৈক্যের জন্য কোনো আদালত, ট্রাইব্যুনাল অথবা কর্তৃপক্ষের নিকট কোনো দেওয়ানী বা ফৌজদারী মামলার কার্যক্রম গ্রহণ করা যাইবে না।

## ষষ্ঠবিংশ অধ্যায়

## আপীল এবং পুনরীক্ষণ

২৩৫। কমিশনার অব কাস্টমস (আপীল) এর নিকট আপীল।—(১) পদমর্যাদায় কমিশনার অব কাস্টমস এর নিম্নের কোনো কর্মকর্তা কর্তৃক, ধারা ১০৪ অথবা ধারা ১২৯ এর অধীন প্রদত্ত সিদ্ধান্ত বা আদেশ ব্যতীত, এই আইনের অধীন প্রদত্ত কোনো সিদ্ধান্ত বা আদেশ দ্বারা কোন ব্যক্তি সংক্ষুব্ধ হইলে, তিনি উক্ত সিদ্ধান্ত বা আদেশ সম্পর্কে অবহিত হইবার তারিখ হইতে ৩ (তিন) মাসের মধ্যে কমিশনার অব কাস্টমস (আপীল) এর নিকট আপীল করিতে পারিবেন:

তবে শর্ত থাকে যে, কমিশনার অব কাস্টমস (আপীল) যদি এই মর্মে সন্তুষ্ট হন যে, আপীলকারী উপরি-উক্ত ৩ (তিন) মাস মেয়াদের মধ্যে আপীল দায়ের করা হইতে যুক্তিসঙ্গত কারণে বাধাপ্রাপ্ত হইয়াছেন, তাহা হইলে তিনি পরবর্তী ২ (দুই) মাস অতিরিক্ত মেয়াদের মধ্যে আপীল দায়ের করিবার জন্য অনুমতি প্রদান করিতে পারিবেন।

(২) এই ধারার অধীন প্রত্যেক আপীল, বিধি দ্বারা নির্ধারিত পদ্ধতিতে আপিলের ভিত্তিসমূহ উল্লেখপূর্বক, প্রতিপাদন করিতে হইবে।

(৩) অন্য কোনো আদালতে গ্রহণযোগ্য হউক বা না হউক, কমিশনার অব কাস্টমস (আপীল), তদ্বিবেচনায় কার্যধারাকে সহায়তা করিতে পারে এমন কোনো বিবৃতি, দলিল, তথ্য বা বিষয়কে, বিচার কার্যধারা চলাকালীন যে কোনো সময়ে সাক্ষ্য হিসাবে গ্রহণ করিতে পারিবেন।

২৩৬। আপিলের পদ্ধতি।—(১) আপীলকারী শুনানির ইচ্ছা ব্যক্ত করিলে কমিশনার অব কাস্টমস (আপীল) তাহাকে শুনানীর সুযোগ প্রদান করিবেন।

(২) কোনো আপিলের শুনানিতে কমিশনার অব কাস্টমস (আপীল) আপিলের কারণসমূহে উল্লেখ করা হয় নাই এমন কোনো কারণ আপীলকারীকে উল্লেখ করিবার অনুমতি প্রদান করিতে পারিবেন, যদি তিনি এই মর্মে সন্তুষ্ট হন যে, উক্ত কারণ আপিলের কারণসমূহ হইতে বাদ যাওয়া ইচ্ছাকৃত অথবা অযৌক্তিক ছিল না।

(৩) কমিশনার অব কাস্টমস (আপীল) যেরূপ প্রয়োজন হইতে পারে সেইরূপ অধিকতর তদন্ত করিয়া যেই সিদ্ধান্ত বা আদেশের বিরুদ্ধে আপীল করা হইয়াছে উহা বহাল রাখিয়া, পরিবর্তন করিয়া অথবা বাতিল করিয়া যেরূপ উপযুক্ত বিবেচনা করিবেন সেইরূপ আদেশ প্রদান করিতে পারিবেন:

তবে শর্ত থাকে যে, প্রস্তাবিত আদেশের বিরুদ্ধে আপীলকারীকে কারণ দর্শানোর যুক্তিসঙ্গত সুযোগ প্রদান না করিয়া, জরিমানা বা বাজেয়াপ্তকরণের পরিবর্তে, জরিমানা বৃদ্ধি করিয়া অথবা অধিকতর মূল্যের পণ্য বাজেয়াপ্ত করিয়া অথবা ফেরতের ক্ষেত্রে অর্থ হ্রাস করিয়া কোনো আদেশ প্রদান করা যাইবে না:

আরও শর্ত থাকে যে, যেই ক্ষেত্রে কমিশনার অব কাস্টমস (আপীল) এই অভিমত পোষণ করেন যে, কোনো শুল্ক ও কর আরোপ করা হয় নাই অথবা কম আরোপ করা হইয়াছে অথবা ভুলবশতঃ ফেরত প্রদান করা হইয়াছে, সেই ক্ষেত্রে আপীলকারীকে প্রস্তাবিত আদেশের বিরুদ্ধে ধারা ২০৩ এ নির্ধারিত সময়সীমার মধ্যে কারণ দর্শানোর নোটিশ প্রদান না করিয়া অনারোপিত, কম আরোপিত অথবা ভুলবশতঃ ফেরত প্রদত্ত কোনো শুল্ক পরিশোধে বাধ্য করিয়া কোনো আদেশ প্রদান করা যাইবে না।

(৪) কমিশনার অব কাস্টমস (আপীল) এর আপীল নিষ্পত্তির আদেশ লিখিত হইবে এবং উহাতে বিচার্য বিষয়ে সিদ্ধান্ত এবং সিদ্ধান্তের জন্য যুক্তিসমূহ লিপিবদ্ধ থাকিবে।

(৫) আপীল নিষ্পত্তির পর কমিশনার অব কাস্টমস (আপীল) তৎকর্তৃক প্রদত্ত আদেশ আপীলকারী, ন্যায়নির্ণয়ন কর্তৃপক্ষ এবং সংশ্লিষ্ট কমিশনার অব কাস্টমসের নিকট প্রেরণ করিবেন।

(৬) আপীল প্রাপ্তির তারিখ হইতে ২ (দুই) বৎসর সময়ের মধ্যে কমিশনার (আপীল) উহা নিষ্পত্তি করিবেন।

(৭) যদি উপ-ধারা (৬) এ উল্লিখিত সময়সীমার মধ্যে যদি কমিশনার (আপীল) আপীল নিষ্পত্তি করিতে ব্যর্থ হন, সেক্ষেত্রে বোর্ড কমিশনার (আপীল) এর আবেদনক্রমে উক্ত সময় অনূন ৬ (ছয়) মাস বর্ধিত করিতে পারিবেন।

(৮) উপ-ধারা (৭) অনুযায়ী বর্ধিত সময়সীমার মধ্যে আপীল নিষ্পত্তি না হইলে, আপীলটি মঞ্জুর করা হইয়াছে বলিয়া গণ্য হইবে।

২৩৭। **বোর্ড কর্তৃক ভুল, ইত্যাদি সংশোধনের ক্ষমতা।**—(১) বোর্ড এই আইন অথবা তদধীন প্রণীত বিধির কোনো বিধান অনুযায়ী প্রদত্ত কোনো আদেশের নথিপত্র হইতে দৃশ্যত প্রতীয়মান কোনো ভুল অথবা অশুদ্ধতা উক্ত আদেশ প্রদানের ১ (এক) বৎসরের মধ্যে স্বতঃপ্রবৃত্ত হইয়া অথবা কোনো ব্যক্তির আবেদনক্রমে সংশোধন করিতে পারিবে:

তবে শর্ত থাকে যে, জরিমানা বৃদ্ধি করিতে অথবা অধিকতর পরিমাণ শুল্ক ও কর প্রদানে বাধ্য করিতে পারে এইরূপ কোনো সংশোধন, উক্ত সংশোধন দ্বারা ক্ষতিগ্রস্ত হইতে পারে এমন ব্যক্তিকে ব্যক্তিগতভাবে অথবা তাহার নিকট হইতে যথাযথভাবে ক্ষমতাপ্রাপ্ত কোনো কৌশলি বা অন্য কোনো ব্যক্তির মাধ্যমে শুনানীর সুযোগ প্রদান না করিয়া, করা যাইবে না।

২৩৮। **নিষ্পন্নাদীন আপিলের ক্ষেত্রে দাবীকৃত শুল্ক ও কর বা আরোপিত জরিমানা জমা।**—(১) কোনো ব্যক্তি, কাস্টমসের নিয়ন্ত্রণাধীনে নাই এমন পণ্যের ক্ষেত্রে দাবী সম্পর্কিত কোনো সিদ্ধান্ত অথবা আদেশের বিরুদ্ধে অথবা এই আইনের অধীন আরোপিত কোনো জরিমানার বিরুদ্ধে ধারা ২৩৫ বা ধারা ২৪১ এর অধীনে আপীল করিবার অভিপ্রায় পোষণ করিলে তিনি আপীল দায়ের করিবার সময়ে অথবা আপীল কর্তৃপক্ষ তাহাকে অনুমতি প্রদান করিলে আপীলটি বিবেচনার পূর্বে যে কোনো পর্যায়ে দাবীকৃত শুল্ক ও করের ১০ (দশ) শতাংশ অথবা আরোপিত জরিমানার ১০ (দশ) শতাংশ যথাযথ কর্মকর্তার নিকট জমা প্রদান করিবেন:

তবে শর্ত থাকে যে, উক্ত ব্যক্তি জরিমানার উপরোল্লিখিত সম্পূর্ণ পরিমাণ অর্থ জমা প্রদানের পরিবর্তে উহার ৫০ (পঞ্চাশ) শতাংশ জমা প্রদান করিতে এবং অবশিষ্ট অর্থ যথাযথ পরিশোধের জন্য কোনো তফসিলী ব্যাংক হইতে গ্যারান্টি দাখিল করিতে পারিবেন:

আরও শর্ত থাকে যে, যদি কোনো বিশেষ ক্ষেত্রে আপীল কর্তৃপক্ষ এইরূপ অভিমত পোষণ করে যে, দাবীকৃত শুল্ক ও কর অথবা আরোপিত জরিমানা জমা প্রদান আপীলকারীর জন্য অথবা কষ্টের কারণ হইবে, তাহা হইলে উহা বিনাশর্তে অথবা তাহার বিবেচনায় উপযুক্ত শর্ত আরোপ সাপেক্ষে উক্ত জমা প্রদানের প্রয়োজনীয়তা হইতে আপীলকারীকে অব্যাহতি প্রদান করিতে পারিবেন:



আরও শর্ত থাকে যে, ধারা ৪১ অনুযায়ী উক্ত ব্যক্তি, উক্ত ধারার অধীন অবহিত করা হইয়াছে, কিন্তু পরিশোধিত হয় নাই এমন কোনো শুল্ক বা করের উপর ধার্যকৃত সুদ, এই আইনের অধীন কোনো আপীল দাখিল বা নিষ্পত্তাধীন বিবেচনা ব্যতিরেকে, পরিশোধের জন্য দায়ী থাকিবেন, যদি না আপীলে ইহা চূড়ান্তভাবে নির্ধারিত হয় যে, উক্ত অপরিশোধিত পরিমাণ যথাযথভাবে আরোপিত হয়নি।

(২) যদি কোনো আপীলের উপর এই সিদ্ধান্ত হয় যে উপরি-উক্ত শুল্ক ও কর বা জরিমানার সম্পূর্ণ অথবা উহার যে কোনো অংশ আরোপযোগ্য ছিল না, তাহা হইলে যথাযথ কর্মকর্তা আপীলকারীকে উক্ত অর্থ অথবা, ক্ষেত্রমত, অংশবিশেষ ফেরত প্রদান করিবেন।

২৩৯। **বোর্ডের নথিপত্র, ইত্যাদি তলব এবং পরীক্ষা করিবার ক্ষমতা।**—(১) বোর্ড স্বতঃপ্রবৃত্ত হইয়া এই আইনের অধীন কোনো কার্যধারার নথিপত্র, উহাতে বোর্ডের অধঃস্তন কোনো কর্মকর্তা কর্তৃক প্রদত্ত সিদ্ধান্ত অথবা আদেশের বৈধতা বা ন্যায্যতা সম্পর্কে সন্মুখ হইবার উদ্দেশ্যে, তলব এবং পরীক্ষা করিতে পারিবে এবং তৎসম্পর্কে যেরূপ বিবেচনা করিবে সেইরূপ আদেশ প্রদান করিতে পারিবে:

তবে শর্ত থাকে যে, অধিকতর মূল্যের পণ্য বাজেয়াপ্তকরণের কোনো আদেশ অথবা বাজেয়াপ্তির পরিবর্তে জরিমানা বৃদ্ধির কোনো আদেশ অথবা কোনো অর্থদণ্ড আরোপের বা বৃদ্ধির কোনো আদেশ অথবা অনারোপিত বা কম আরোপিত কোনো শুল্ক ও কর পরিশোধে বাধ্য করিয়া কোনো আদেশ, উহা দ্বারা ক্ষতিগ্রস্ত হইতে পারেন এইরূপ ব্যক্তিকে উহার বিরুদ্ধে কারণ দর্শানোর সুযোগ প্রদান না করিয়া এবং ব্যক্তিগতভাবে অথবা তাহার নিকট হইতে যথাযথভাবে ক্ষমতাপ্রাপ্ত কোনো কৌসুলী বা অন্য কোনো ব্যক্তির মাধ্যমে শুনানীর সুযোগ প্রদান না করিয়া, প্রদান করা যাইবে না।

(২) কোনো কাস্টমস কর্মকর্তার কোনো সিদ্ধান্ত অথবা আদেশ সম্পর্কিত কার্যধারার নথিপত্র উক্ত সিদ্ধান্ত বা আদেশ প্রদানের ২ (দুই) বৎসর অতিবাহিত হইবার পর উপ-ধারা (১) এর অধীন তলব এবং পরীক্ষা করা যাইবে না।

২৪০। **আপীল ট্রাইব্যুনাল।**—(১) সরকার যেইরূপ প্রয়োজনীয় বিবেচনা করিবে সেইরূপ সংখ্যক টেকনিক্যাল ও জুডিশিয়াল সদস্য সমন্বয়ে, এই আইনে আপীল ট্রাইব্যুনালের উপর অর্পিত ক্ষমতা প্রয়োগ এবং কর্তব্য পালনের জন্য কাস্টমস, এক্সাইজ এবং মূল্য সংযোজন কর আপীল ট্রাইব্যুনাল নামে একটি ট্রাইব্যুনাল গঠন করিতে পারিবে।

(২) বোর্ডের সদস্য পদে অথবা কাস্টমস এন্ড এক্সাইজ ক্যাডারের কমিশনার বা সমপদমর্যাদার অন্য কোনো পদে কমপক্ষে ১ (এক) বৎসর চাকুরী করিতেছেন বা করিয়াছেন এইরূপ কোনো ব্যক্তি আপীল ট্রাইব্যুনালের টেকনিক্যাল সদস্য পদে নিয়োগ লাভের যোগ্য হইবেন।

(৩) বাংলাদেশে জেলা ও দায়রা জজ পদে চাকুরী করিতেছেন অথবা অতিরিক্ত জেলা ও দায়রা জজ পদে কমপক্ষে ০২ (দুই) বৎসর চাকুরী করিয়াছেন, এইরূপ কোনো ব্যক্তি আপীল ট্রাইব্যুনালের জুডিশিয়াল সদস্য হিসাবে নিয়োগ লাভের যোগ্য হইবেন।

(৪) সরকার আপীল ট্রাইব্যুনালের টেকনিক্যাল সদস্যগণের মধ্য হইতে একজনকে উহার প্রেসিডেন্ট নিয়োগ করিবে, যাহার কাস্টমস এবং সংশ্লিষ্ট বিষয়ে বাস্তব অভিজ্ঞতা রহিয়াছে।

২৪১। **আপীল ট্রাইব্যুনালের নিকট আপীল।**—(১) যে কোনো সংক্ষুব্ধ ব্যক্তি নিম্নের যে কোনো আদেশের বিরুদ্ধে আপীল ট্রাইব্যুনালে আপীল দায়ের করিতে পারিবে, যথা:—

- (ক) ধারা ১০৪ বা ধারা ১২৯ এর অধীন প্রদত্ত কোন সিদ্ধান্ত বা আদেশ ব্যতীত কমিশনার অব কাস্টমস, বা কমিশনার অব কাস্টমস (বড) বা ডিরেক্টর জেনারেল (শুল্ক রেয়াত ও প্রত্যর্পণ) বা কমিশনার অব কাস্টমস এর সমপর্যায়ের কোন কর্মকর্তা কর্তৃক ন্যায়নির্ণয়ন কর্তৃপক্ষ হিসাবে প্রদত্ত কোনো সিদ্ধান্ত বা আদেশ; অথবা
- (খ) নির্ধারিত তারিখের অব্যবহিত পূর্বে ধারা ২৩৫ অথবা ২৩৬ এর অধীন কমিশনার অব কাস্টমস (আপীল) কর্তৃক প্রদত্ত কোনো আদেশ।

(২) কমিশনার অব কাস্টমস যদি মনে করেন যে কমিশনার অব কাস্টমস (আপীল) কর্তৃক নির্ধারিত তারিখের অব্যবহিত পূর্বে ধারা ২৩৫ বা ২৩৬ এর অধীন প্রদত্ত কোনো আদেশ বৈধ বা ন্যায্য নহে, তাহা হইলে তিনি যথাযথ কর্মকর্তাকে তাহার পক্ষে উক্ত আদেশের বিরুদ্ধে আপীল ট্রাইব্যুনালে আপীল করিবার নির্দেশ প্রদান করিতে পারিবেন।

(৩) যেই আদেশের বিরুদ্ধে আপীল দায়ের করা হইবে সেই আদেশ যেই তারিখে কমিশনার অব কাস্টমস অথবা আপীলকারী অন্য পক্ষ কর্তৃক গৃহীত হয় সেই তারিখ হইতে ৩ (তিন) মাসের মধ্যে আপীল দায়ের করিতে হইবে।

(৪) যেই পক্ষের বিরুদ্ধে আপীল দায়ের করা হইয়াছে সেই পক্ষ আপীল দায়েরের নোটিশ প্রাপ্তির ৪৫ (পঁয়তাল্লিশ) দিবসের মধ্যে, যদি সংশ্লিষ্ট আদেশ বা উহার কোনো অংশের বিরুদ্ধে নিজেও আপীল পেশ করিয়া থাকেন তাহা সত্ত্বেও, বিধি দ্বারা, নির্ধারিত পদ্ধতিতে প্রতিপাদন করিয়া আপীলাধীন আদেশের যে কোনো অংশের বিরুদ্ধে একখানি প্রতি-আপত্তির স্মারক দাখিল করিতে পারিবেন এবং উক্ত স্মারক ট্রাইব্যুনাল কর্তৃক উপ-ধারা (৩) এর অধীন দায়েরকৃত আপীল হিসাবে নিষ্পত্তি করা হইবে।

(৫) আপীল ট্রাইব্যুনাল উপ-ধারা (৩) বা (৪) এ উল্লিখিত সময়সীমা অতিবাহিত হইবার পর কোনো আপীল গ্রহণ করিতে অথবা প্রতি-আপত্তির স্মারক দাখিল করিবার অনুমতি প্রদান করিতে পারিবে, যদি ট্রাইব্যুনাল এই মর্মে সন্তুষ্ট হয় যে উক্ত সময়ের মধ্যে উহা উপস্থাপন না করিবার যথেষ্ট কারণ রহিয়াছে।

(৬) আপীল ট্রাইব্যুনালের নিকট আপীল, এতদুদ্দেশ্যে প্রণীত বিধি দ্বারা নির্ধারিত ফরম এবং পদ্ধতিতে, প্রতিপাদন করিয়া দায়ের করিতে হইবে এবং উহার সহিত দাবীনামা, আমদানি শুল্ক ও কর এবং সুদ বা জরিমানা আরোপের তারিখ নির্বিশেষে নির্ধারিত তারিখে বা তৎপর দায়েরকৃত আপীলের ক্ষেত্রে নিম্নরূপহারে ফিস সংযুক্ত করিতে হইবে, যথা:—

- (ক) আপীল সংশ্লিষ্ট মামলায় কোনো কাস্টমস কর্মকর্তা কর্তৃক আরোপিত আমদানি শুল্ক ও কর ও সুদ এবং দাবীকৃত জরিমানার পরিমাণ যেই ক্ষেত্রে ১ (এক) লক্ষ টাকা বা উহার কম হয়, সেই ক্ষেত্রে ফিস এর হার ৩০০ (তিনশত) টাকা;
- (খ) যেই ক্ষেত্রে উক্তরূপ আরোপিত আমদানি শুল্ক ও কর ও সুদ এবং দাবীকৃত জরিমানার পরিমাণ ১ (এক) লক্ষ টাকার অধিক হয়, সেই ক্ষেত্রে ফি এর হার ১২০০ (এক হাজার দুই শত) টাকা:

তবে শর্ত থাকে যে, কমিশনারের পক্ষ হইতে দায়েরকৃত আপীল বা প্রতি-আপত্তি স্মারকের ক্ষেত্রে কোনো ফিস প্রদেয় হইবে না।

(৭) আপীল প্রাপ্তির তারিখ হইতে ২ (দুই) বৎসর সময়ের মধ্যে আপীল ট্রাইব্যুনাল কর্তৃক আপীল নিষ্পত্তি হইবে।

(৮) যদি উপ-ধারা (৭) এ উল্লিখিত সময়সীমার মধ্যে আপীল নিষ্পত্তি না হইলে, আপীল ট্রাইব্যুনাল কর্তৃক আপীলটি মঞ্জুর করা হইয়াছে বলিয়া গণ্য হইবে।

২৪২। **আপীল ট্রাইব্যুনালের আদেশ।**—(১) আপীলের সহিত সংশ্লিষ্ট পক্ষসমূহকে শুনানীর সুযোগ প্রদান করিয়া আপীল ট্রাইব্যুনাল যেই সিদ্ধান্ত বা আদেশের বিরুদ্ধে আপীল করা হইয়াছে উহা বহাল রাখিয়া, পরিবর্তন করিয়া অথবা বাতিল করিয়া যে রূপ উপযুক্ত বিবেচনা করিবে ইহার উপর সেইরূপ আদেশ প্রদান করিতে পারিবে অথবা যেই কর্তৃপক্ষ উক্ত সিদ্ধান্ত বা আদেশটি প্রদান করিয়াছে সেই কর্তৃপক্ষের নিকট আপীল কর্তৃপক্ষ যে রূপ সঙ্গত বিবেচনা করিবে সেইরূপ নির্দেশসহ মামলাটি প্রয়োজনমত অধিকতর সাক্ষ্য গ্রহণপূর্বক নূতনভাবে ন্যায়নির্ণয়ন অথবা সিদ্ধান্তের জন্য ফেরত প্রদান করিতে পারিবে।

(২) উপ-ধারা (১) এ প্রদত্ত কোনো আদেশের নথিপত্র হইতে পরিদৃষ্ট কোনো ভুল সংশোধনের উদ্দেশ্যে আপীল ট্রাইব্যুনাল আদেশের তারিখ হইতে ১ (এক) বৎসরের মধ্যে যে কোনো সময়ে উক্ত আদেশ সংশোধন করিতে পারিবে এবং কমিশনার অব কাস্টমস অথবা আপীলের অন্য পক্ষ কর্তৃক কোনো ভুল ইহার নজরে আনয়ন করা হইলে উক্তরূপ সংশোধন করিতে পারিবে:

তবে শর্ত থাকে যে, শুদ্ধ বৃদ্ধি করিতে অথবা প্রত্যর্পণ হ্রাস করিতে অথবা অন্য পক্ষের দায় বৃদ্ধি করিতে পারে আপীল ট্রাইব্যুনাল কর্তৃক এইরূপ কোনো সংশোধনী উক্ত পক্ষকে নোটিশ প্রদান ও ব্যক্তিগত শুনানীর সুযোগ প্রদান না করিয়া করা যাইবে না।

(৩) আপীল ট্রাইব্যুনাল এই ধারায় প্রদত্ত প্রত্যেক আদেশের কপি কমিশনার অব কাস্টমস এবং আপীলের অন্য পক্ষকে প্রেরণ করিবে।

(৪) ধারা ২৪৫ এ যে রূপ বিধৃত রহিয়াছে সেইরূপ ব্যতীত ট্রাইব্যুনাল কর্তৃক আপীলের উপর প্রদত্ত আদেশ চূড়ান্ত বলিয়া গণ্য হইবে।

(৫) আপীলকারী, বিচারাধীন কোন আপীল মামলায়, আপীলাধীন কোন আদেশ স্থগিতাদেশ চাহিয়া আপীল ট্রাইব্যুনালের নিকট আবেদন করিতে পারিবে এবং সে মোতাবেক আপীল ট্রাইব্যুনাল উক্ত আবেদন বিবেচনা করতঃ উহার উপর স্থগিতাদেশ প্রদান করিতে পারিবে।

২৪৩। **আপীল ট্রাইব্যুনালের পদ্ধতি।**—(১) আপীল ট্রাইব্যুনালের ক্ষমতা এবং দায়িত্ব প্রেসিডেন্ট কর্তৃক ইহার সদস্যগণের সমন্বয়ে গঠিত বেঞ্চসমূহ কর্তৃক প্রয়োগ এবং পালন করা হইবে।

(২) উপ-ধারা (৩) এবং উপ-ধারা (৪) এর বিধান সাপেক্ষে, একটি বেঞ্চ একজন টেকনিক্যাল এবং একজন জুডিশিয়াল সদস্য সমন্বয়ে গঠিত হইবে।

(৩) অন্যান্য বিষয়ের মধ্যে শুল্কের হার বা শুল্কায়নের জন্য পণ্যের মূল্য বিষয়ক কোনো প্রশ্নের নিষ্পত্তি সম্পর্কিত সিদ্ধান্ত অথবা আদেশের বিরুদ্ধে কোনো আপীলের শুনানী প্রেসিডেন্ট কর্তৃক এতদুদ্দেশ্যে গঠিত বিশেষ বেঞ্চে গৃহীত হইবে এবং এইরূপ বেঞ্চের সদস্য সংখ্যা দুইজনের কম হইবে না, যাহার মধ্যে কমপক্ষে একজন টেকনিক্যাল সদস্য এবং একজন জুডিশিয়াল সদস্য অন্তর্ভুক্ত হইবেন।

(৪) আপীল ট্রাইব্যুনালের প্রেসিডেন্ট বা তৎকর্তৃক ক্ষমতাপ্রাপ্ত অন্য কোনো সদস্য, তিনি যেই বেঞ্চের সদস্য সেই বেঞ্চে বরাদ্দকৃত কোনো মামলা এককভাবে নিষ্পত্তি করিতে পারিবেন, যাহাতে—

- (ক) ধারা ২১৮ অনুযায়ী পণ্যের মালিককে পণ্য বাজেয়াপ্তির পরিবর্তে বিমোচন জরিমানা প্রদানের সুযোগ ব্যতীত বাজেয়াপ্তকৃত পণ্যের মূল্য; অথবা
- (খ) শুল্ক হার নির্ধারণ বা শুল্কায়নের জন্য মূল্য নিরূপণের সহিত জড়িত কোনো প্রশ্ন ব্যতীত অন্য কোনো বিরোধযুক্ত মামলা যেইক্ষেত্রে বিচার্য বিষয় অথবা বিচার্য বিষয়ের প্রসঙ্গে হয় সেইক্ষেত্রে জড়িত শুল্কের পার্থক্য বা জড়িত শুল্ক; অথবা
- (গ) জড়িত জরিমানার পরিমাণ—

এক লক্ষ টাকার অধিক নয়।

(৫) সিদ্ধান্ত গ্রহণের ক্ষেত্রে বেঞ্চের সদস্যগণের মধ্যে কোনো মতপার্থক্য দেখা দিলে সংখ্যাগরিষ্ঠের অভিমতের ভিত্তিতে সিদ্ধান্ত গ্রহণ করা হইবে; কিন্তু যদি সদস্যগণ সমভাবে বিভক্ত হন, তাহা হইলে তাহারা মতপার্থক্যের বিষয়সমূহ লিপিবদ্ধ করিয়া উহা প্রেসিডেন্টের নিকট প্রেরণ করিবেন, যিনি স্বয়ং বিষয়টির শুনানী গ্রহণ করিবেন অথবা ট্রাইব্যুনালের অন্যান্য এক অথবা একাধিক সদস্যের শুনানীর জন্য উহা প্রেরণ করিবেন এবং উক্ত ক্ষেত্রে ট্রাইব্যুনালের যে সকল সদস্য মামলার প্রারম্ভিক পর্যায়ে বা পরবর্তীতে শুনানী গ্রহণ করিয়াছেন তাহাদের সকলের সংখ্যাগরিষ্ঠ অভিমত অনুসারে চূড়ান্ত সিদ্ধান্ত গ্রহণ করা হইবে।

(৬) এই আইনের বিধানাবলী সাপেক্ষে ক্ষমতার প্রয়োগ এবং দায়িত্ব পালন সম্পর্কিত সকল বিষয়ে, আপীল ট্রাইব্যুনাল ও বেঞ্চসমূহের অধিবেশনের স্থানসহ কার্যপদ্ধতি নির্ধারণ করিবার ক্ষমতা উক্ত ট্রাইব্যুনালের থাকিবে।

(৭) নিম্নবর্ণিত বিষয়ে দেওয়ানী কার্যবিধির অধীন একটি দেওয়ানী আদালত যেইরূপ ক্ষমতা প্রয়োগ করিতে পারে আপীল ট্রাইব্যুনালও এই ধারার অধীন সেইরূপ ক্ষমতা প্রয়োগ করিতে পারিবে, যথা:—

- (ক) উদঘাটন এবং পরিদর্শন;
- (খ) কোনো ব্যক্তির উপস্থিতি নিশ্চিত করা এবং তাহাকে শপথ বাক্য পাঠ করাইয়া পরীক্ষা করা;
- (গ) হিসাব বহি এবং অন্যান্য দলিলপত্র উপস্থাপনে বাধ্য করা; এবং
- (ঘ) কমিশন জারি করা।

(৮) আপীল ট্রাইব্যুনালের কার্যধারা দণ্ডবিধির ধারা ১৯৩ ও ২২৮ এর মর্মানুযায়ী এবং ধারা ১৯৬ এর উদ্দেশ্যে বিচার বিভাগীয় কার্যধারা হিসাবে গণ্য করা হইবে এবং আপীল ট্রাইব্যুনাল ফৌজদারী কার্যবিধির ধারা ১৯৫ এবং ষষ্ঠবিংশ অধ্যায়ের উদ্দেশ্যে একটি দেওয়ানী আদালত হিসাবে গণ্য হইবে।

২৪৪। **হাইকোর্ট বিভাগে আপীল।**—ধারা ২৪৩ এর অধীন কোনো আদেশ জারির তারিখ হইতে ৯০ (নব্বই) দিবসের মধ্যে কমিশনার অব কাস্টমস অথবা অন্য পক্ষ উক্ত আদেশের বিরুদ্ধে হাইকোর্ট বিভাগে আপীল দায়ের করিতে পারিবেন।

২৪৫। **অন্য দুইজন বিচারক কর্তৃক হাইকোর্ট বিভাগে শুনানি গ্রহণ।**—(১) হাইকোর্ট বিভাগের অন্যান্য দুইজন বিচারক সমন্বয়ে গঠিত বেঞ্চ ধারা ২৪৪ এর অধীন দায়েরকৃত আপীলের শুনানি গ্রহণ করিবে এবং সংখ্যাগরিষ্ঠ বিচারকের অভিমতের ভিত্তিতে সিদ্ধান্ত গৃহীত হইবে।

(২) উপ-ধারা (১) এর অধীন কোন আপীলে সিদ্ধান্ত গ্রহণের ক্ষেত্রে যদি বিচারকগণের মধ্যে কোনো সংখ্যাগরিষ্ঠতা না হয়, তাহা হইলে বিচারকগণ আইনের যে বিষয়ে মতপার্থক্য হইবে তাহা বিবৃত করিবেন এবং অতঃপর হাইকোর্ট বিভাগের অন্য এক বা একাধিক অন্য বিচারক কর্তৃক উক্ত বিষয়ের উপর শুনানি গ্রহণ করা হইবে এবং বিষয়টি সম্পর্কে প্রথম শুনানি গ্রহণকারী বিচারকগণসহ সংখ্যাগরিষ্ঠ বিচারকগণের অভিমতের ভিত্তিতে সিদ্ধান্ত গৃহীত হইবে।

২৪৬। **আপীলের উপর হাইকোর্ট বিভাগের সিদ্ধান্ত।**—(১) যেইক্ষেত্রে ধারা ২৪৫ এর অধীন আপীল দায়ের করা হইবে সেইক্ষেত্রে হাইকোর্ট বিভাগ উহাতে উত্থাপিত বক্তব্যসমূহের এবং উহার সহিত যেমন প্রয়োজনীয় গণ্য হয় তেমন আনুষঙ্গিক অন্যান্য বক্তব্যসমূহের প্রশ্নে সিদ্ধান্ত গ্রহণ করিবে এবং উহার উপর বিচারাদেশ প্রদান করিবে।

(২) হাইকোর্ট বিভাগ ইহার বিচারাদেশে আপীলের কোনো পক্ষের উপর কোনো ব্যয়ের বিষয়ে রায় প্রদান করিতে পারিবে।

(৩) উপ-ধারা (১) এর অধীন প্রদত্ত বিচারাদেশের একটি কপি উক্ত বিভাগের কোনো কর্মকর্তার সীল এবং স্বাক্ষরযুক্ত করিয়া আপীল ট্রাইব্যুনালে প্রেরণ করা হইবে।

২৪৭। **হাইকোর্ট বিভাগে প্রেরণ করা সত্ত্বেও পাওনা অর্থ আদায়, ইত্যাদি।**—হাইকোর্ট বিভাগে প্রেরণ করা সত্ত্বেও ধারা ২৪৩ এর উপ-ধারা (১) এ প্রদত্ত আদেশের ফলে সরকারি পাওনা অর্থ উক্তরূপ আদেশ অনুযায়ী প্রদেয় হইবে।

২৪৮। **কপির জন্য ব্যয়িত সময় হিসাব বহির্ভূত।**—আপীল অথবা আবেদনের জন্য এই অধ্যায়ে নির্ধারিত সময়সীমা গণনার ক্ষেত্রে যেই দিন আদেশের নোটিশ জারি করা হয় এবং যদি আপীলকারী অথবা আবেদনকারী পক্ষকে আদেশের নোটিশ জারি করিবার সময়ে আদেশের কপি সরবরাহ না করা হইয়া থাকে, তাহা হইলে উক্ত আদেশের কপি সংগ্রহ করিতে যেই সময়ের প্রয়োজন হয় সেই সময় গণনা বহির্ভূত থাকিবে।

২৪৯। **ক্ষমতাপ্রাপ্ত প্রতিনিধির মাধ্যমে উপস্থিতি।**—(১) এই আইনে যাহা কিছুই থাকুক না কেন, আইনের অধীন ব্যক্তিগতভাবে উপস্থিত হইতে বাধ্য হওয়া ব্যতীত অন্যান্য ক্ষেত্রে যখন কোনো ব্যক্তি এই আইন বা তদধীন প্রণীত বিধিমালার অধীন কোনো কার্যধারা উপলক্ষে কোনো কাস্টমস কর্মকর্তা, আপীল কর্তৃপক্ষ, বোর্ড বা সরকারের সম্মুখে উপস্থিত হওয়ার অধিকারী অথবা উপস্থিত হইতে বাধ্য হন, তখন তিনি উক্ত কার্যধারা উপলক্ষে এতদুদ্দেশ্যে তাহার নিকট হইতে লিখিতভাবে ক্ষমতাপ্রাপ্ত সংক্ষুব্ধ ব্যক্তির কোনো আত্মীয় বা তদকর্তৃক নিযুক্ত কোনো ব্যক্তি অথবা কোনো আদালতে ওকালতি করিবার অধিকারী কোনো আইনজীবী বা এতদুদ্দেশ্যে প্রণীত বিধিমালায় সংজ্ঞায়িত এবং লাইসেন্সকৃত কোনো কাস্টমস পরামর্শক, যিনি উপ-ধারা (২) এর অধীন অযোগ্য হন নাই, এর মাধ্যমে উপস্থিত হইতে পারিবেন।

(২) সরকারি চাকুরী হইতে বরখাস্তকৃত কোন ব্যক্তি উপ-ধারা (১) এর অধীন কোনো ব্যক্তিকে প্রতিনিধিত্ব করিতে পারিবেন না; এবং যদি কোনো আইনজীবী বা কাস্টমস পরামর্শক, তিনি যেই পেশার অংশ সেই পেশার সদস্যদের বিরুদ্ধে শৃংখলামূলক ব্যবস্থা গ্রহণে ক্ষমতাপ্রাপ্ত কর্তৃপক্ষ কর্তৃক, কোনো কাস্টমস কার্যধারা সংশ্লিষ্ট অসদাচরণে দোষী সাব্যস্ত হন অথবা যদি অন্য কোনো ব্যক্তি কমিশনার অব কাস্টমস কর্তৃক উক্ত অসদাচরণে দোষী সাব্যস্ত হন, তাহা হইলে কমিশনার অব কাস্টমস এই মর্মে নির্দেশ প্রদান করিতে পারিবেন যে উক্ত সময় হইতে তিনি উপ-ধারা (১) এর অধীন কোনো ব্যক্তির প্রতিনিধিত্ব করিবার অযোগ্য হইবেন:

তবে শর্ত থাকে যে,—

- (ক) যুক্তিসঙ্গত শুনানির সুযোগ প্রদান না করিয়া কোনো ব্যক্তি সম্পর্কে উক্ত নির্দেশ জারি করা যাইবে না;
- (খ) কোনো ব্যক্তির বিরুদ্ধে উক্ত নির্দেশ জারি করা হইলে তিনি উহা প্রাপ্তির তারিখ হইতে ১ (এক) মাসের মধ্যে নির্দেশটি বাতিল করিবার জন্য বোর্ডের নিকট আপীল করিতে পারিবেন; এবং
- (গ) সংশ্লিষ্ট ব্যক্তি কর্তৃক উক্ত নির্দেশ প্রাপ্তির তারিখ হইতে ১ (এক) মাস পর্যন্ত অথবা আপীল দায়ের করা হইলে উহা নিষ্পন্ন না হওয়া পর্যন্ত উক্তরূপ কোনো নির্দেশ কার্যকর হইবে না।

২৫০। **সরকার কর্তৃক নথিপত্র, ইত্যাদি তলব এবং পরীক্ষা করিবার ক্ষমতা।**—সরকার স্বতঃপ্রবৃত্ত হইয়া অথবা কোনো সংক্ষুব্ধ ব্যক্তির আবেদনক্রমে এই আইন বা তদধীন প্রণীত বিধির অধীন কোনো আদেশ সংক্রান্ত কার্যধারার নথিপত্র, আদেশ প্রদানের ১ (এক) বৎসরের মধ্যে উক্ত আদেশের বৈধতা বা ন্যায্যতা সম্পর্কে সন্তুষ্ট হওয়ার উদ্দেশ্যে তলব ও পরীক্ষা করিতে পারিবে এবং উক্তরূপ পরীক্ষান্তে দৃশ্যত প্রতীয়মান কোনো ভুল বা অশুদ্ধতা সংশোধন করিয়া তৎসম্পর্কে উহা যেরূপ বিবেচনা করে সেইরূপ আদেশ প্রদান করিতে পারিবে:

তবে শর্ত থাকে যে, অধিকতর মূল্যের পণ্য বাজেয়াপ্তকরণের কোনো আদেশ, বা বাজেয়াপ্তকরণের পরিবর্তে জরিমানা বৃদ্ধির কোনো আদেশ, অথবা কোনো অর্থাভঙ্গি আরোপের কোনো আদেশ বা অধিকতর পরিমাণ শুল্ক পরিশোধের কোনো আদেশ, উহা দ্বারা ক্ষতিগ্রস্ত হইতে পারেন এইরূপ ব্যক্তিকে উহার বিরুদ্ধে কারণ দর্শানোর সুযোগ প্রদান না করিয়া এবং ব্যক্তিগতভাবে অথবা তাহার নিকট হইতে যথাযথভাবে ক্ষমতাপ্রাপ্ত কোনো কৌশলী বা অন্য কোনো ব্যক্তির মাধ্যমে শুনানির সুযোগ প্রদান না করিয়া, প্রদান করা যাইবে না।

২৫১। **আদালতের এখতিয়ার বারিত।**—কোনো কাস্টমস কর্মকর্তা কর্তৃক প্রদত্ত কোনো সিদ্ধান্ত প্রদান না করিয়া বা আদেশের বিরুদ্ধে সংক্ষুব্ধ ব্যক্তি কর্তৃক কমিশনার (আপীল) অথবা, ক্ষেত্রমত, আপীল ট্রাইব্যুনালের নিকট আপীল না করিয়া এবং উহার উপর কমিশনার (আপীল) অথবা আপীল ট্রাইব্যুনালের সিদ্ধান্ত বা আদেশপ্রাপ্ত না হইয়া দেওয়ানী আদালতে কোনো আপীল দায়ের করা যাইবে না।

## সপ্তবিংশ অধ্যায়

## বিবিধ

২৫২। যানবাহন এবং পণ্যের উপর কাস্টমস নিয়ন্ত্রণ।—এই আইনের উদ্দেশ্য পূরণকল্পে, উপযুক্ত কর্মকর্তা যে কোনো সময় কোনো কাস্টমস এলাকার মধ্যে অবস্থিত যে কোনো ভবন, কাঠামো বা যানবাহনে কোনো ওয়ারেন্ট ব্যতিরেকে প্রবেশ করিতে এবং তল্লাশি চালাইতে পারিবেন।

২৫৩। মোড়ক খোলার এবং পণ্য পরীক্ষা, ওজন বা পরিমাপ করিবার ক্ষমতা।—যথাযথ কর্মকর্তা আমদানি বা রপ্তানির জন্য কাস্টমস স্টেশনে আনয়ন করা কোনো পণ্যের যে কোনো মোড়ক বা কন্টেইনার খুলিতে এবং যে কোনো পণ্য পরীক্ষা, ওজন অথবা তিনি যেইরূপ উপযুক্ত মনে করেন সেইরূপ পরিমাণ বা সম্পূর্ণ পণ্য নির্ধারিত পদ্ধতিতে, স্থানে ও সময়ে পরিমাপ এবং আটক করিতে পারিবেন এবং এতদুদ্দেশ্যে যেই যানবাহনে পণ্য আমদানি করা হইয়াছে বা রপ্তানি করা হইবে উহা হইতে উক্ত পণ্য নামাইতে পারিবেন।

২৫৪। পণ্য বিক্রয়ের পদ্ধতি এবং বিক্রয়লব্ধ অর্থের বিলিবন্দেজ।—(১) যেইক্ষেত্রে বাজেয়াপ্তকৃত পণ্য ব্যতীত অন্য কোনো পণ্য এই আইনের অধীনে বিক্রয় করিতে হইবে, সেইক্ষেত্রে উহা মালিককে যথাযথ নোটিশ প্রদান করিয়া প্রকাশ্য নিলামে বা টেন্ডারের মাধ্যমে অথবা ব্যক্তিগত প্রস্তাবের মাধ্যমে বা মালিকের লিখিত সম্মতিক্রমে অন্য কোনো পদ্ধতিতে বিক্রয় করা হইবে।

(২) বিক্রয়লব্ধ অর্থ নিম্নবর্ণিত উদ্দেশ্যে উহাদের ক্রম অনুসারে বিলিবন্দেজ করা হইবে, যথা:—

- (ক) প্রথমত, বিক্রয়ের ব্যয়সমূহ পরিশোধ করিতে;
- (খ) অতঃপর, পণ্যের উপর প্রদেয় ফ্রেইট অথবা অন্যান্য চার্জসমূহ, যদি থাকে, পরিশোধ করিতে, যদি পণ্যের তত্ত্বাবধানকারী ব্যক্তির নিকট উক্ত চার্জসমূহ সম্পর্কে নোটিশ প্রদান করা হইয়া থাকে;
- (গ) অতঃপর, উক্ত পণ্যের উপর সরকারকে প্রদেয় কাস্টমস শুল্ক, অন্যান্য কর এবং পাওনা পরিশোধ করিতে; এবং
- (ঘ) অতঃপর, উক্ত পণ্যের হেফাজতকারী বা জিম্মাদার (custodian) ব্যক্তির পাওনা চার্জসমূহ পরিশোধ করিতে।

(৩) অবশিষ্ট, যদি থাকে, পণ্যের মালিককে এই শর্তে প্রদান করা হইবে যে, পণ্য বিক্রয়ের ৩ (তিন) বৎসরের মধ্যে তিনি উহার জন্য আবেদন করিবেন অথবা উক্তরূপ না করিবার জন্য পর্যাপ্ত কারণ দর্শাইবেন।

২৫৫। **সরকারি পাওনা আদায়।**—(১) যখন কোনো ব্যক্তি কর্তৃক কোনো আমদানি শুল্ক ও কর এই আইনের অধীন সরকারকে প্রদেয় হয় অথবা কোনো ব্যক্তির বিরুদ্ধে কোনো জরিমানা আরোপিত হয় বা কোনো ব্যক্তির উপর আমদানি শুল্ক ও কর, জরিমানা হিসাবে প্রদেয় অপরিশোধিত কোনো অর্থ অথবা এই আইন, বিধিমালা বা আদেশের অধীন সম্পাদিত কোনো বন্ড, সিকিউরিটি, গ্যারান্টি অথবা অন্য কোনো ইন্সট্রুমেন্টের অধীন প্রদেয় কোনো অপরিশোধিত অর্থ পরিশোধের আহবান জানাইয়া কোনো দাবীনামা জারি করা হয় এবং উক্ত আমদানি শুল্ক, কর, জরিমানা বা অন্যান্য পাওনা উহা পরিশোধের জন্য নির্ধারিত অথবা নির্দেশিত সময়ের মধ্যে পরিশোধ করা না হয় তখন যথাযথ কর্মকর্তা যে কোনো সময়ে—

- (ক) উক্ত কর্মকর্তা বা সরকারের কর্তৃত্বাধীন, নিষ্পত্তাধীন বা নিয়ন্ত্রণাধীন থাকিতে পারে উক্ত ব্যক্তির এইরূপ প্রাপ্য বা পাওনা অর্থ কর্তন করিতে পারিবেন বা কর্তন করিতে অন্য কোনো কাস্টমস কর্মকর্তাকে বাধ্য করিতে পারিবেন;
- (খ) উক্ত অর্থ সম্পূর্ণ পরিশোধ বা আদায় না হওয়া পর্যন্ত উক্ত ব্যক্তির মালিকানাধীন কোনো পণ্য সমুদ্র বন্দর, বিমানবন্দর, অন্য কোনো কাস্টমস স্টেশন অথবা বন্ডেড ওয়ারহাউসে কাস্টমসের নিয়ন্ত্রণ হইতে খালাস বন্ধ করিতে পারিবেন;
- (গ) যেই ব্যক্তির নিকট হইতে উক্ত আমদানি শুল্ক ও কর, জরিমানা বা অন্য কোনো অর্থ-আদায়যোগ্য বা পাওনা হয়, তাহার নিকট অন্য কোনো ব্যক্তির কোনো অর্থ পাওনা থাকিলে শেষোক্ত ব্যক্তিকে লিখিত নোটিশ প্রদান করিয়া উহা হইতে নোটিশে উল্লিখিত পরিমাণ অর্থ বা উহা আদায়যোগ্য বা পাওনা অর্থের পরিমাণ হইতে কম হইলে উক্তরূপ অর্থের সম্পূর্ণ পরিমাণ নোটিশ প্রাপ্তির ৭ (সাত) দিনের মধ্যে অথবা উক্ত কর্মকর্তা কর্তৃক অনুমোদিত বর্ধিত সময়ের মধ্যে উক্ত কর্মকর্তার নিকট পরিশোধের জন্য বাধ্য করিতে পারিবেন;
- (ঘ) উক্ত ব্যক্তির মালিকানাধীন এক্সাইজ শুল্কযোগ্য বা মূল্য সংযোজন করযোগ্য পণ্য অথবা পণ্য প্রস্তুতকরণে ব্যবহৃত কোনো স্থাপনা, যন্ত্রপাতি এবং সাজসজ্জা অথবা ফ্যাক্টরী বা বন্ডেড ওয়ারহাউসে রক্ষিত অন্য কোনো পণ্য ক্রোক এবং বিক্রয়পূর্বক আদায় করিতে যথাযথ এক্সাইজ কর্মকর্তা এবং মূল্য সংযোজন কর কর্মকর্তাকে ব্যবস্থা গ্রহণের জন্য বাধ্য করিতে পারিবেন ;
- (ঙ) উক্ত ব্যক্তির মালিকানাধীন কোনো পণ্য কাস্টমস কর্তৃপক্ষের নিয়ন্ত্রণাধীন থাকিলে উহা আটক এবং বিক্রয় করিয়া উক্ত অর্থ আদায় করিতে অথবা অন্য কোনো কাস্টমস কর্মকর্তাকে আদায়ের ব্যবস্থা করিবার জন্য বাধ্য করিতে পারিবেন;
- (চ) যেই ব্যক্তির নিকট উক্ত আমদানি শুল্ক ও কর বা জরিমানা বা অন্য কোনো অর্থ আদায়যোগ্য বা পাওনা হয় কোনো তফসিলী ব্যাংককে তাহার অর্থ জমা রহিয়াছে এইরূপ একাউন্ট, নোটিশ প্রাপ্তির পর অবরুদ্ধ করিতে বা উহা অপরিচালনাযোগ্য করিতে লিখিত নোটিশ প্রদান করিতে পারিবেন।



(২) দেওয়ানী কার্যবিধির অধীন অর্থ আদায়ের ক্ষেত্রে দেওয়ানী আদালতের যেইরূপ ক্ষমতা রহিয়াছে, এই আইনের বিধানাবলি সাপেক্ষে, বকেয়া কর আদায়ের উদ্দেশ্যে ক্ষমতাপ্রাপ্ত কাস্টমস কর্মকর্তার সেইরূপ একই ক্ষমতা থাকিবে।

২৫৬। **সরকারি পাওনা অবলোপনের ক্ষমতা।**—যেইক্ষেত্রে এই আইন বা তদধীন প্রণীত বিধির অধীন কোনো শুল্ক ও কর অথবা অন্য কোনো অর্থ কোনো ব্যক্তি কর্তৃক সরকারের নিকট পরিশোধযোগ্য হয় অথবা কোনো ব্যক্তির বিরুদ্ধে কোনো জরিমানা আরোপ করা হয় এবং উক্ত শুল্ক ও কর, জরিমানা অথবা অন্যান্য অর্থ নির্ধারিত সময়ের মধ্যে পরিশোধ করা না হয় এবং উক্ত ব্যক্তির দেউলিয়াত্বের বা নিখোঁজ হওয়ার বা অন্য কোনো কারণে উক্ত শুল্ক ও কর, জরিমানা বা অন্যান্য অর্থ ধারা ২৫৫ তে উল্লিখিত পদ্ধতিতে তাহার নিকট হইতে আদায় করা না যায় অথবা আদায়যোগ্য নয়, সেইক্ষেত্রে বিধি দ্বারা নির্ধারিত পদ্ধতিতে উক্ত শুল্ক ও কর, জরিমানা বা অন্যান্য অর্থ সরকার যেরূপ উপযুক্ত বিবেচনা করে সেইরূপ সমুদয় অথবা আংশিক অবলোপন করিতে পারিবে:

তবে শর্ত থাকে যে, অন্য কোনো আইনে যাহা কিছুই থাকুক না কেন, সরকারি পাওনা অবলোপনের পর যদি প্রমাণ হয় যে, দায়ী ব্যক্তি বা প্রতিষ্ঠানের কোনো সম্পত্তি নূতনভাবে উদ্ভব হইয়াছে বা ইতিপূর্বে সরকারি অর্থের দায়-দেনা হইতে মুক্ত হওয়ার জন্য সংশ্লিষ্ট ব্যক্তি বা প্রতিষ্ঠান স্বীয় সম্পত্তি অসং উদ্দেশ্যে অন্য কোনো ব্যক্তি বা প্রতিষ্ঠানের নিকট হস্তান্তর করিয়া দেউলিয়া হইয়াছেন, তাহা হইলে উক্ত সম্পত্তির ওপর সরকারি পাওনা আদায়ের নিমিত্তে অগ্রাধিকার সৃষ্টি হইবে এবং তাহা এমনভাবে আদায়যোগ্য হইবে যেন নূতনভাবে উদ্ভূত বা অসং উদ্দেশ্যে হস্তান্তরিত সম্পত্তির গ্রহীতার ওপর সরকারি পাওনা পরিশোধের সম্পূর্ণ দায়িত্ব অর্পিত হইয়াছে।

২৫৭। **ওয়ার্ক ব্যবহার বাবদ প্রদেয় ফি বা মজুদকরণ ফি।**—কমিশনার অব কাস্টমস কর্তৃক, সময়ে সময়ে, নির্ধারিত মেয়াদ উত্তীর্ণ হইবার পর, কোনো কাস্টম হাউস, কাস্টমস এলাকা, জেটি বা অন্য কোনো অনুমোদিত অবতরণ স্থান বা কাস্টম হাউস অঙ্গানের কোনো অংশে রাখিয়া যাওয়া বা আটক রাখা পণ্য ফি পরিশোধের আওতাধীন হইবে, এবং তিনি উক্ত ফি এর পরিমাণ নির্ধারণ করিতে পারিবেন।

২৫৮। **কাস্টমস দলিলের সার্টিফিকেট এবং নকল ইস্যু সরবরাহ।**—এসিস্ট্যান্ট কমিশনার অব কাস্টমস পদমর্যাদার নিম্নে নহেন এমন কোনো কাস্টমস কর্মকর্তা যদি এই মর্মে সন্তুষ্ট হন যে, আবেদনকারী কোনো প্রতারণা করেন নাই বা তাহার প্রতারণা করিবার কোনো অভিপ্রায় নাই, তাহা হইলে কোনো ব্যক্তি আবেদন করিলে এবং বোর্ড কর্তৃক এতদুদ্দেশ্যে নির্ধারিত ফি পরিশোধ সাপেক্ষে, উক্ত কর্মকর্তার ঐচ্ছিক বিবেচনায় তাহাকে কোনো সার্টিফিকেট, কার্গো ঘোষণা, পণ্য ঘোষণা অথবা অন্য কোনো কাস্টমস দলিলপত্রের সার্টিফিকেট বা অনুলিপি সরবরাহ করা যাইবে।

২৫৯। **করণিক ত্রুটি, ইত্যাদির সংশোধন।**—সরকার, বোর্ড বা কোনো কাস্টমস কর্মকর্তা কর্তৃক এই আইনের অধীন প্রদত্ত কোনো সিদ্ধান্ত বা আদেশে কোনো করণিক বা গাণিতিক ত্রুটি বা দুর্ঘটনাজনিত অসাবধানতা বা বিচ্যুতি হইতে উদ্ভূত ত্রুটি থাকিলে সরকার, বোর্ড বা উক্ত কর্মকর্তা বা, ক্ষেত্রমত, তাহার স্থলাভিষিক্ত উত্তরসূরী, যে কোনো সময়ে, উক্ত ত্রুটি সংশোধন করিতে পারিবেন।

২৬০। **কাস্টম হাউস এজেন্টের লাইসেন্স।**—যদি কোনো ব্যক্তি বিধি দ্বারা নির্ধারিত পদ্ধতিতে প্রদত্ত লাইসেন্সধারী না হন, তাহা হইলে উক্ত ব্যক্তি কোনো কাস্টমস স্টেশনে কোনো যানবাহনের প্রবেশ বা উক্ত স্থান হইতে উহার প্রস্থান বা কোনো পণ্য আমদানি বা রপ্তানি অথবা ব্যাগেজ সম্পর্কিত কোনো কার্যক্রম পরিচালনার জন্য এজেন্ট হিসাবে কার্য সম্পাদন করিতে পারিবেন না।

২৬১। **এজেন্ট কর্তৃক, প্রয়োজনে, কর্তৃত্ব দাখিল।**—(১) যখন কোনো ব্যক্তি অন্য কোনো ব্যক্তির পক্ষে কোনো কাস্টমস কর্মকর্তার সঙ্গে কোনো নির্দিষ্ট কার্য সম্পাদনের অনুমতির জন্য উক্ত কর্মকর্তার নিকট আবেদন করেন তখন তিনি আবেদনকারীকে যেই ব্যক্তির পক্ষে কার্য সম্পাদন করা হইবে তাহার নিকট হইতে লিখিত কর্তৃত্ব দাখিল করিতে বাধ্য করিতে পারিবেন, এবং উক্ত কর্তৃত্ব দাখিল করিতে ব্যর্থ হইলে এইরূপ অনুমতি প্রদানে অসম্মতি প্রদান করিতে পারিবেন।

(২) কোনো ব্যক্তি বা বাণিজ্যিক প্রতিষ্ঠানের করণিক, কর্মচারী বা এজেন্ট উক্ত ব্যক্তি বা প্রতিষ্ঠানের পক্ষে কাস্টম হাউসে কার্য সম্পাদন করিতে পারিবেন:

তবে শর্ত থাকে যে, উক্ত ব্যক্তি বা প্রতিষ্ঠানের কোনো সদস্য এইরূপ করণিক, কর্মচারী বা এজেন্টকে উক্ত কার্য সম্পাদনের জন্য ক্ষমতাপ্রাপ্ত যথাযথ কর্মকর্তার নিকট সনাক্ত না করিলে এবং এইরূপ করণিক, কর্মচারী বা এজেন্টকে উক্ত ব্যক্তি বা ফার্মের পক্ষে উক্ত কার্য সম্পাদনের ক্ষমতা প্রদান করিয়া লিখিত এবং যথাযথভাবে স্বাক্ষরিত লিখিত কর্তৃত্ব উপরি-উক্ত কর্মকর্তার নিকট জমা প্রদান না করিলে তিনি এইরূপ করণিক, কর্মচারী বা এজেন্টকে আমলে লইতে অস্বীকার করিতে পারিবেন।

২৬২। **প্রিন্সিপাল এবং এজেন্টের দায়।**—(১) ধারা ২৬০ ও ২৬১ এর বিধানাবলি সাপেক্ষে, এই আইনের অধীন কোনো পণ্যের মালিক কোনো কিছু করিতে বাধ্য বা ক্ষমতাপ্রাপ্ত হইলে উক্ত মালিক কর্তৃক এতদুদ্দেশ্যে, স্পষ্টভাবে বা অব্যক্তভাবে (in an implied manner), ক্ষমতাপ্রাপ্ত ব্যক্তিও উহা করিতে বাধ্য বা ক্ষমতাপ্রাপ্ত হইবেন।

(২) যদি উপ-ধারা (১) এর অধীন ক্ষমতাপ্রাপ্ত কোনো এজেন্ট কর্তৃক কোনো কিছু করা হয়, তাহা হইলে, ভিন্নরূপ কিছু প্রমাণিত না হইলে, যিনি উক্ত এজেন্টকে এইরূপ করিবার ক্ষমতা প্রদান করিয়াছেন, তাহার জ্ঞাতসারে ও সম্মতিক্রমে উহা করা হইয়াছে বলিয়া গণ্য হইবে এবং এই আইনের অধীন উক্ত কার্যধারার জন্য তিনি এইরূপে দায়ী হইবেন যেন তিনি নিজেই উহা করিয়াছেন।

(৩) এই আইনে ভিন্নরূপ কিছু না থাকিলে, উপ-ধারা (১) এর অধীন ক্ষমতাপ্রাপ্ত কোনো এজেন্ট, যে ব্যক্তির নিকট হইতে এইরূপ ক্ষমতা প্রাপ্ত হন, সেই ব্যক্তির ন্যায় একই অধিকার, বাধ্যবাধকতা এবং দায় থাকিবে:

তবে শর্ত থাকে যে, যেইক্ষেত্রে এজেন্টের ইচ্ছাকৃত কার্য, অবহেলা বা ত্রুটির কারণ ব্যতীত অন্য কোনো কারণে কোনো শুল্ক আরোপিত না হইয়া থাকে অথবা কম আরোপিত হয় বা ভুলক্রমে ফেরত প্রদত্ত হয়, সেইক্ষেত্রে এজেন্টের নিকট হইতে উক্ত শুল্ক আদায় করা হইবে না।

(৪) উপ-ধারা (১) এর অধীন ক্ষমতাপ্রাপ্ত কোনো এজেন্টকে এই আইনের অধীন প্রয়োজনীয় বা প্রদত্ত কোনো নোটিশ, যে ব্যক্তি উক্ত এজেন্টকে এইরূপ ক্ষমতা প্রদান করিয়াছেন, উক্ত ব্যক্তিকে উহা প্রদান করা হইয়াছে বলিয়া গণ্য হইবে, যদি উক্ত এজেন্ট স্পষ্টভাবে বা অব্যক্তভাবে উক্ত নোটিশ গ্রহণের জন্য ক্ষমতাপ্রাপ্ত হইয়া থাকে।

২৬৩। **ব্যবসায়ের নথিপত্রের সংরক্ষণ।**—(১) প্রত্যেক লাইসেন্সধারী, আমদানিকারক, রপ্তানিকারক বা তাহাদের এজেন্ট বোর্ড কর্তৃক নির্ধারিত পদ্ধতিতে ৩ (তিন) বৎসর মেয়াদের জন্য নথিপত্র সংরক্ষণ করিবেন বা করিবার ব্যবস্থা গ্রহণ করিবেন।

(২) উপ-ধারা (১) এ উল্লিখিত প্রত্যেক ব্যক্তি কোনো কাস্টমস কর্মকর্তা যেভাবে এবং যখন করিতে বলিবেন সেইভাবে এবং তখন অবশ্যই—

- (ক) নথিপত্র এবং হিসাবপত্র কাস্টমস কর্তৃপক্ষের নিকট লভ্য করিবেন;
- (খ) নথিপত্র এবং হিসাবপত্রের অনুলিপি প্রয়োজনমত সরবরাহ করিবেন ; এবং
- (গ) এই আইনের অধীন উদ্ভূত কোনো বিষয়ের সহিত সংশ্লিষ্ট ক্ষেত্রে কাস্টমস কর্মকর্তা কর্তৃক জিজ্ঞাসিত যে কোনো প্রশ্নের উত্তর প্রদান করিবেন।

(৩) যেইক্ষেত্রে উপ-ধারা (২) এর উদ্দেশ্য পূরণকল্পে ইলেকট্রনিক বা অন্য কোনো যন্ত্রের মাধ্যমে তথ্য লিপিবদ্ধ বা সংরক্ষণ করা হয় সেইক্ষেত্রে লাইসেন্সধারী, আমদানিকারক, রপ্তানিকারক অথবা তাহাদের এজেন্ট কোনো কাস্টমস কর্মকর্তার অনুরোধক্রমে উপ-ধারা (২) এর আবশ্যিকতা পূরণকল্পে যন্ত্রটি পরিচালনা করিবেন অথবা করিবার ব্যবস্থা করিবেন।

(৪) উপ-ধারা (২) এবং উপ-ধারা (৩) এর উদ্দেশ্য পূরণকল্পে ধারা ১১০ এর অধীন নিয়োগকৃত অডিট এজেন্সী এবং উক্ত এজেন্সীর কোনো কর্মচারী কাস্টমস কর্মকর্তা হিসাবে গণ্য হইবেন।

২৬৪। **স্বর্ণ, ইত্যাদির ব্যবসা নিয়ন্ত্রণ।**—সরকার, গেজেটে প্রজ্ঞাপন দ্বারা, বাংলাদেশ সীমান্ত বা উপকূল-রেখা হইতে ১৫ (পনের) মাইলের মধ্যে স্বর্ণ বা রৌপ্য বা মহামূল্যবান পাথরের ব্যবসা অথবা স্বর্ণ বা রৌপ্য বা মহামূল্যবান পাথরের তৈরী অলংকারের ব্যবসা বা উহাদের সহিত সম্পর্কিত ব্যবসা নিয়ন্ত্রণ করিতে পারিবে।

২৬৫। **কতিপয় দলিলপত্রের উপর অর্থ আদায়।**—যদি কোনো ব্যক্তি কাস্টমসের উদ্দেশ্য পূরণের ইনভয়েস হিসাবে ব্যবহৃত অথবা ব্যবহারের অভিপ্রায়ে কোনো ইনভয়েস বা কাগজপত্র জ্ঞাতসারে প্রস্তুত করেন বা বাংলাদেশে আনয়ন করেন অথবা উহা প্রস্তুত বা আনয়ন করিবার ব্যবস্থা বা কর্তৃত্ব প্রদান করেন অথবা উহার সহিত অন্যভাবে জড়িত থাকেন, যাহাতে কোনো পণ্য উহার জন্য প্রকৃত পরিশোধিত বা পরিশোধযোগ্য মূল্য অপেক্ষা অধিক বা কম মূল্যে ঘোষণা বা চার্জ করা হয় অথবা যাহাতে পণ্য অসত্যভাবে বর্ণিত হয়, তাহা হইলে উক্ত ব্যক্তি, তাহার প্রতিনিধি বা স্বত্বনিয়োগী কর্তৃক উক্ত পণ্যের মূল্য বাবদ বা উহার কোনো অংশ বাবদ কোনো অংকের অর্থ আদায়যোগ্য হইবে

না, এবং উক্ত পণ্যের সম্পূর্ণ বা আংশিক মূল্যের জন্য প্রস্তুত, প্রদত্ত বা সম্পাদিত কোনো বিল অব এক্সচেঞ্জ, নোট বা অন্য জামানতের উপরেও কোনো অংকের অর্থ আদায়যোগ্য হইবে না, যদি না উক্ত বিল অব এক্সচেঞ্জ, নোট বা অন্য জামানত নোটিশ ব্যতীত বিবেচনার জন্য উহার প্রকৃত মালিকের আয়ত্তে থাকে।

২৬৬। **কতিপয় ক্ষেত্রে শুল্ক মওকুফ এবং মালিককে ক্ষতিপূরণ প্রদান।**—যেইক্ষেত্রে কোনো পণ্যের মালিকের অভিযোগের ভিত্তিতে ওয়ারাহাউস হইতে শুল্ক পরিশোধ ব্যতীত উক্ত পণ্য অপসারণের সহিত জড়িত থাকার অপরাধে কোনো কাস্টমস কর্মকর্তা দন্ডিত হন, সেইক্ষেত্রে উক্ত পণ্যের উপর সম্পূর্ণ শুল্ক মওকুফ করা হইবে, এবং কমিশনার অব কাস্টমস উক্ত অপরাধের দ্বারা মালিকের যে ক্ষতি সাধিত হইয়াছে বিধি দ্বারা নির্ধারিত পদ্ধতি অনুযায়ী উহার উপযুক্ত ক্ষতিপূরণ প্রদান করিবেন।

২৬৭। **অবহেলা বা ইচ্ছাকৃত অবহেলার প্রমাণ ব্যতীত ক্ষতিপূরণ প্রদেয় হইবে না।**—কোনো কাস্টম হাউস, কাস্টমস এলাকা, ওয়ারফ অথবা অবতরণ স্থানে সংরক্ষিত বা বৈধভাবে আটক কোনো পণ্য কোনো কাস্টমস কর্মকর্তার তত্ত্বাবধানে থাকাকালে উহার কোনো ক্ষতি বা অনিষ্ট হইলে, উক্ত পণ্যের মালিক কোনো কাস্টমস কর্মকর্তার নিকট হইতে কোনো ক্ষতিপূরণ দাবী করিতে পারিবেন না, যদি না ইহা প্রমাণিত হয় যে, উক্ত কর্মকর্তার চরম অবহেলা বা কোনো ইচ্ছাকৃত কার্যের ফলে উক্ত ক্ষতি বা অনিষ্ট সংঘটিত হইয়াছে।

২৬৮। **আদেশ, সিদ্ধান্ত, ইত্যাদি জারি।**—এই আইনের অধীন কোনো আদেশ, সিদ্ধান্ত, সমন বা নোটিশ—

(ক) যাহার জন্য অভিপ্রেত তাহাকে বা তাহার এজেন্টকে প্রদান করিয়া অথবা উহা তাহার বা তাহার এজেন্টের নিকট প্রাপ্তি স্বীকার সহকারে রেজিস্ট্রিকৃত ডাকযোগে প্রেরণ করিয়া; অথবা

(খ) দফা (ক) এ উল্লিখিত কোনো পদ্ধতিতে জারি করা না গেলে, কাস্টম হাউসের নোটিশ বোর্ডে আঁটিয়া দিয়া—

জারি করা যাইবে

২৬৯। **দেওয়ানী আদালতে মামলা দায়ের বারিত।**—বোর্ড বা সরকার কর্তৃক কাস্টমস শুল্ক বা কর ধার্য, আরোপ, অব্যাহতি, শুল্কায়ন বা আদায় সম্পর্কিত কোনো আদেশ বা, ক্ষেত্রমত, সিদ্ধান্তের বৈধতা বা যথার্থতা নিরূপণের উদ্দেশ্যে কোনো দেওয়ানী আদালতে কোনো মামলা, মোকদ্দমা বা আর্জি দায়ের করা যাইবে না।

২৭০। **এই আইনের অধীন সরল বিশ্বাসে কৃত কর্ম সংরক্ষণ।**—এই আইন বা তদধীন প্রণীত বিধির অধীনে সরল বিশ্বাসে কৃত অথবা অভিপ্রেত কোনো কার্যের জন্য সরকার বা কোনো সরকারি কর্মকর্তার বিরুদ্ধে কোনো দেওয়ানী বা ফৌজদারী মামলা অথবা অন্য কোনো আইনগত কার্যধারা দায়ের করা যাইবে না।

২৭১। **শুল্ক ফাঁকি বা আইনের লংঘন উদ্ঘাটনের জন্য পুরস্কার।**—(১) এই আইন বা আপাতত বলবৎ অন্য কোনো আইনে ভিন্নরূপ যাহা কিছুই থাকুক না কেন, বোর্ড, নিম্নবর্ণিত ব্যক্তিগণকে, উপ-ধারা (২) এর বিধান সাপেক্ষে, বিধি দ্বারা নির্ধারিত পদ্ধতি, পরিস্থিতিতে এবং পরিমাণে, পুরস্কার মঞ্জুর করিতে পারিবে, যথা:—

- (ক) কাস্টমস শুল্ক ফাঁকি বা ফাঁকি প্রচেষ্টা অথবা এই আইন বা আপাতত বলবৎ অন্য কোনো আইন, যাহার অধীনে কোনো কাস্টমস কর্মকর্তা, কর বা অন্যান্য রাজস্ব আদায়ে ক্ষমতাপ্রাপ্ত, এর কোনো বিধানের লংঘন সম্পর্কিত বিষয়ে কাস্টমস কর্তৃপক্ষের নিকট সংবাদ প্রদানকারী কোনো ব্যক্তিকে;
- (খ) কোনো কাস্টমস কর্মকর্তা বা অন্য কোনো সরকারি সংস্থা অথবা স্থানীয় কর্তৃপক্ষের কর্মকর্তা বা কর্মচারীকে, যিনি কাস্টমস শুল্ক ফাঁকি বা ফাঁকি প্রচেষ্টা বা এই আইন অথবা অন্য কোনো আইনের লংঘন উদ্ঘাটন করেন।

(২) উপ-ধারা (১) এর অধীন পুরস্কার মঞ্জুর করা যাইবে, যদি উক্ত উপ-ধারায় উল্লিখিত সংবাদ সরবরাহ, কাস্টমস শুল্ক ফাঁকি বা ফাঁকি প্রচেষ্টা অথবা আইন লংঘন উদ্ঘাটনের বা উন্মোচনের ক্ষেত্রে নিম্নবর্ণিত কার্য ফলপ্রসূভাবে সমাপ্ত হয়, যথা:—

- (অ) ফাঁকি বা ফাঁকি প্রচেষ্টা অথবা লংঘনের ঘটনার সহিত সংশ্লিষ্ট পণ্য বা অন্য কোনো বস্তু জব্দ এবং বাজেয়াপ্ত হয়; অথবা
- (আ) এই আইন বা আপাতত বলবৎ অন্য কোনো আইনের অধীন আরোপযোগ্য কাস্টমস শুল্ক বা অন্য কোনো রাজস্ব আদায় অথবা সংশ্লিষ্ট আইনের অধীন আরোপিত অর্থদন্ড বা জরিমানা আদায় হয়; অথবা
- (ই) ফাঁকি বা ফাঁকি প্রচেষ্টা অথবা লংঘনের জন্য দায়ী ব্যক্তির বিরুদ্ধে অভিযোগ দায়ের বা তাহার উপর দন্ড আরোপিত হয়।

২৭২। **কাস্টমস কর্মকর্তা এবং কর্মচারীগণকে আর্থিক প্রণোদনা পুরস্কার।**—এই আইন বা অন্য কোনো আইনে ভিন্নরূপ যাহা কিছুই থাকুক না কেন, বোর্ড, আমদানি পর্যায়ে উদ্বৃত্ত রাজস্ব আদায়ের একটি অংশ সকল কাস্টমস কর্মকর্তা এবং কর্মচারী এবং বোর্ডের কর্মকর্তা ও কর্মচারীগণকে বিধি দ্বারা নির্ধারিত পদ্ধতি, পরিস্থিতি এবং পরিমাণে, আর্থিক প্রণোদনা হিসাবে পুরস্কার প্রদান করিতে পারিবে:

তবে শর্ত থাকে যে, কোনো নির্দিষ্ট আর্থিক বৎসরে আর্থিক প্রণোদনা পুরস্কার প্রদান করিতে হইলে উক্ত বৎসরে আমদানি পর্যায়ে রাজস্ব আদায় সরকার কর্তৃক নির্ধারিত লক্ষ্যমাত্রা অতিক্রম করিতে হইবে।

২৭৩। **আইনগত কার্যধারার নোটিশ।**—এই আইন বা তদধীন প্রণীত কোনো বিধিমালার বিধান অনুসরণের অভিপ্রায়ে কোনো কিছু করার জন্য কোনো কাস্টমস কর্মকর্তা বা অন্য কোনো ব্যক্তির বিরুদ্ধে এই আইন দ্বারা বা ইহার অধীন প্রদত্ত কোনো ক্ষমতা প্রয়োগ বা আরোপিত কোনো কর্তব্য

পালনের লক্ষ্যে দেওয়ানী মামলা দায়ের ব্যতীত অন্য কোনো কার্যধারার ক্ষেত্রে অবশ্যই উক্ত কর্মকর্তা অথবা ব্যক্তিকে প্রস্তাবিত কার্যধারা এবং উহার কারণসম্বলিত ১ (এক) মাসের লিখিত প্রাক-নোটিশ প্রদান করিতে হইবে, এবং উক্ত ঘটনা সংঘটিত হইবার ১ (এক) বৎসর অতিবাহিত হওয়ার পর উক্ত কার্যধারা দায়ের করা যাইবে না।

২৭৪। **সিদ্ধান্ত প্রদান।**—(১) কোনো ব্যক্তি এই আইন বা তদধীন প্রণীত বিধির প্রয়োগ সম্পর্কিত কোনো বিষয়ে সিদ্ধান্ত প্রদানের জন্য, বিধি দ্বারা নির্ধারিত পদ্ধতিতে, যথাযথ কর্মকর্তার নিকট আবেদন করিতে পারিবেন।

(২) যথাযথ কর্মকর্তা, উপ-ধারা (১) এর অধীন কোনো আবেদন প্রাপ্ত হইলে, বিধি দ্বারা নির্ধারিত পদ্ধতিতে, সিদ্ধান্ত গ্রহণ করিবেন এবং সিদ্ধান্তের কারণ উল্লেখপূর্বক উহা অনতিবিলম্বে আবেদনকারীকে অবহিত করিবেন যাহাতে তাহার আপিল করিবার অধিকারের বিষয়টি উল্লেখ থাকবে।

(৩) উপ-ধারা (২) এর অধীন প্রাপ্ত সিদ্ধান্ত দ্বারা কোনো ব্যক্তি সংস্কৃত হইলে তিনি উক্ত সিদ্ধান্তের বিরুদ্ধে ধারা ২৬১ এর বিধান অনুযায়ী আপিল করিতে পারিবেন।

(৪) যেইসকল ক্ষেত্রে কোনো ব্যক্তির অনুকূলে উপ-ধারা (১) এর অধীনে প্রদত্ত সিদ্ধান্ত বাতিল হইবে বা যথাযথ কর্মকর্তা কর্তৃক যে কোনো সময়ে প্রত্যাহার করা যাইবে, সেইসকল ক্ষেত্রসমূহ এবং উহাতে অনুসৃত পদ্ধতি এই ধারার উদ্দেশ্য পূরণকল্পে প্রণীত বিধি দ্বারা নির্ধারিত হইবে।

২৭৫। **অগ্রিম রুলিং।**—(১) কোনো ব্যক্তি, কোনো পণ্যের কাস্টমস শুল্ক নির্ধারণের উদ্দেশ্যে সংশ্লিষ্ট পণ্যের ট্যারিফ শ্রেণিকরণ ও অরিজিন বিষয়ে, অগ্রিম রুলিং যাচনা করিয়া বোর্ডের নিকট আবেদন করিতে পারিবেন এবং বোর্ড তদনুযায়ী সংশ্লিষ্ট বিষয়ে রুলিং প্রদান করিতে পারিবে।

(২) এই ধারার অধীন অগ্রিম রুলিং প্রদানের সময়সীমা, রুলিং বিবেচনার ক্ষেত্রে শর্ত ও সীমাবদ্ধতাসহ আনুষঙ্গিক বিষয়াদি বিধি দ্বারা নির্ধারিত হইবে।

(৩) এই ধারার অধীন প্রদত্ত যে কোনো অগ্রিম রুলিং, সংশ্লিষ্ট বিষয়ে, আবেদনকারী ও সকল কাস্টম কর্মকর্তার উপর বাধ্যতামূলক হইবে।

**ব্যাখ্যা।**—এই ধারার উদ্দেশ্য পূরণকল্পে, ‘অগ্রিম রুলিং’ বলিতে কোনো আবেদনপত্রে উল্লিখিত কোনো পণ্য আমদানির পূর্বে, বোর্ড কর্তৃক কোনো আবেদনকারীকে প্রদত্ত কোনো লিখিত সিদ্ধান্তকে বুঝাইবে, যাহাতে উক্ত পণ্য আমদানির সময় কোনো কাস্টমস কর্মকর্তা উক্ত পণ্যের ক্ষেত্রে কিরূপ আচরণ (treatment) করিবেন তাহার উল্লেখ থাকিবে।

২৭৬। **অনুসন্ধান এবং অনুসন্ধান কেন্দ্র।**—(১) বোর্ড, উহার প্রাপ্ত সম্পদসীমার মধ্যে, এই আইন ও তদধীন প্রণীত বিধিমালার সহিত সম্পর্কিত তথ্যের উপর যুক্তিসংগত অনুসন্ধানের উত্তর প্রদান, এই আইনের অধীন সাধারণ ব্যবহারের জন্য জারীকৃত প্রজ্ঞাপন, সার্কুলার, আদেশ ও অন্যান্য দলিল প্রদান, এবং আমদানি, রপ্তানি ও ট্রানজিট প্রক্রিয়ার সহিত সম্পর্কিত প্রয়োজনীয় ফরম ও দলিল প্রদানের জন্য বোর্ডে বা কাস্টমস স্টেশনে এক বা একাধিক অনুসন্ধান কেন্দ্র প্রতিষ্ঠা ও চালু রাখিবে।

(২) উপ-ধারা (১) এর অধীন প্রতিষ্ঠিত অনুসন্ধান কেন্দ্র, কোনো ইচ্ছুক ব্যক্তির, ইলেকট্রনিক আকারে বা অন্য কোনোভাবে, আবেদনের প্রেক্ষিতে, যুক্তিসংগত সময়ের মধ্যে, ক্ষেত্রমত, ইলেকট্রনিক আকারে, সংশ্লিষ্ট অনুসন্ধানের উত্তর প্রদান এবং সংশ্লিষ্ট ফরম ও দলিল প্রদান করিবে।

২৭৭। **সিদ্ধান্তের কপি।**—এই আইনের অধীন কোনো কাস্টমস কর্মকর্তা কর্তৃক গৃহীত কোনো সিদ্ধান্তের বিষয়ে সরাসরি আগ্রহী কোনো ব্যক্তি কর্তৃক পেশকৃত কোনো আবেদনের প্রেক্ষিতে, কাস্টমস কমিশনার বা তদকর্তৃক ক্ষমতাপ্রাপ্ত কোন কর্মকর্তা, বোর্ড কর্তৃক নির্ধারিত সময়ের মধ্যে এবং নির্ধারিত ফি প্রদান সাপেক্ষে উক্ত সিদ্ধান্তের একটি সত্যায়িত অনুলিপি সরবরাহ করিবেন।

২৭৮। **গোপনীয় তথ্য ব্যবস্থাপনা।**—(১) উপ-ধারা (২) এ উল্লিখিত ক্ষেত্র ব্যতীত অন্য কোনো ক্ষেত্রে, কোনো কাস্টমস কর্মকর্তা বা বোর্ড বা সরকারের কোনো কর্মকর্তা, কর্মচারী বা এজেন্ট কর্তৃক এই আইনের অধীন কোনো কর্তব্য সম্পাদনকালে সংগৃহীত গোপনীয় প্রকৃতির বা গোপনীয়তার ভিত্তিতে প্রদত্ত সকল তথ্য, উক্ত গোপনীয় তথ্য সরবরাহকারী ব্যক্তি বা কর্তৃপক্ষের লিখিত সম্মতি ব্যতীত, প্রকাশ করা যাইবে না।

(২) তথ্য অধিকার আইন, ২০০৯ (২০০৯ সনের ২০ নং আইন) এর অধীন তথ্য প্রকাশের বাধা-নিষেধকে ক্ষুণ্ণ না করিয়া, এবং বাংলাদেশ পক্ষভুক্ত হইয়াছে এমন কোন আন্তর্জাতিক চুক্তি বা এগ্রিমেন্ট অনুযায়ী তথ্যের উচ্চ পর্যায়ের সুরক্ষা আরোপের ক্ষেত্র ব্যতীত, কমিশনারের নিম্নে নহেন এমন কোনো কাস্টমস কর্মকর্তা নিম্নলিখিত কর্তৃপক্ষের নিকট গোপনীয় তথ্য প্রকাশের অনুমতি প্রদান করিতে পারিবেন, যথা:—

- (ক) কোন আইনগত কার্যক্রম সম্পর্কিত বিষয়ে ক্ষমতাপ্রাপ্ত বা বাধ্যবাধকতা রহিয়াছে এমন কোনো বিচারিক কর্তৃপক্ষ;
- (খ) নিম্নলিখিত উদ্দেশ্য পূরণকল্পে সরকারের যথাযথ কর্তৃপক্ষ, যথা:—
  - (অ) এই আইনের অধীন কৃত কোনো অপরাধ বা বাংলাদেশে সংঘটিত হইলে অপরাধ হইতে পারে এমন কোনো কার্য অথবা কারাদন্ডে দন্ডনীয় অন্য কোনো অপরাধের প্রতিরোধ, আটক, তদন্ত, আইনগত কার্যধারা ও শাস্তি প্রদানকারী কর্তৃপক্ষ;
  - (আ) সীমান্ত নিরাপত্তা সুরক্ষার সহিত জড়িত কর্তৃপক্ষ;
  - (ই) জনস্বাস্থ্য বা জননিরাপত্তা সুরক্ষার সহিত জড়িত কর্তৃপক্ষ;
  - (ঈ) মানিলন্ডারিং, সন্ত্রাস ও সন্ত্রাসে অর্থায়ন প্রতিরোধের সহিত জড়িত কর্তৃপক্ষ;
- (গ) কোন আন্তর্জাতিক চুক্তি বা এগ্রিমেন্ট অনুযায়ী বিদেশের কোনো যথাযথ কর্তৃপক্ষ।

২৭৯। **পরামর্শ।**—বোর্ড এই আইন এবং তদধীন প্রণীত বিধির বাস্তবায়ন সম্পর্কিত বিষয়ে বাংলাদেশ ট্যারিফ কমিশনসহ সংশ্লিষ্ট অন্যান্য সরকারি সংস্থা ও বেসরকারি খাতের নিকট হইতে নিয়মিতভাবে পরামর্শ গ্রহণ করিবে।

২৮০। **বিধি প্রণয়নের ক্ষমতা।**—(১) এই আইনের উদ্দেশ্য পূরণকল্পে, বোর্ডের সহিত পরামর্শক্রমে সরকার, সরকারি গেজেটে প্রজ্ঞাপন দ্বারা, বিধি প্রণয়ন করিতে পারিবে।

(২) উপ-ধারা (১) এর সামগ্রিকতাকে ক্ষুণ্ণ না করিয়া, দ্বিতীয় তফসিলে উল্লিখিত যে কোন বা সকল বিষয়ে বিধি প্রণয়ন করা যাইবে।

২৮১। **বিশেষ বিধান।**—এই আইনের অন্যত্র যাহা কিছুই থাকুক না কেন, বোর্ডের সহিত পরামর্শক্রমে সরকার, সরকারি গেজেটে প্রজ্ঞাপন দ্বারা, Bangladesh Export Processing Zones Authority Act, 1980 (Act No. XXXVI of 1980) এর অধীন প্রতিষ্ঠিত ইপিজেডসমূহ, Bangladesh Economic Zones Act, 2010 এর অধীন স্থাপিত অর্থনৈতিক অঞ্চলসমূহ, Bangladesh Hi-Tech Park Act, 2010 এর অধীন প্রতিষ্ঠিত হাইটেক পার্কসমূহ এবং অনুরূপ কোন বিশেষায়িত অঞ্চলসমূহের জন্য কাস্টমস সংশ্লিষ্ট স্বতন্ত্র ও পৃথক বিধিমালা প্রণয়ন করিতে পারিবে।

২৮২। **প্রকাশনা।**—সরকার এই আইনের অধীন প্রণীতব্য সকল বিধির প্রকাশনা নিশ্চিত করিবে:

তবে শর্ত থাকে যে, জরুরি পরিস্থিতিতে বা অন্য কোনো গুরুত্বপূর্ণ কারণে কারণ উল্লেখপূর্বক কোনো বিধি প্রকাশের ক্ষেত্র ব্যতীত, অন্যান্য ক্ষেত্রে যে কোনো বিধি, উহা কার্যকর হইবার অনূন্য ৩০ (ত্রিশ) দিন পূর্বে প্রকাশ করিতে হইবে:

আরও শর্ত থাকে যে, এই আইন বা বিধির অধীন প্রণীতব্য কোনো আদেশ, প্রজ্ঞাপন, সার্কুলার, ফরম অথবা অন্যান্য তথ্য, ব্যাখ্যা বা সিদ্ধান্ত, যতদূর সম্ভব, অবিলম্বে ইলেকট্রনিক মাধ্যমে সহজলভ্য করিতে হইবে।

২৮৩। **আদেশ, ফরম, নোটিশ, ব্যাখ্যা বা সার্কুলার জারির ক্ষমতা।**—বোর্ড বা, ক্ষেত্রমত, কমিশনার অব কাস্টমস (বন্ড) বা কমিশনার অব কাস্টমস (মূল্যায়ন ও অভ্যন্তরীণ নিরীক্ষা) বা অন্য কোনো কমিশনার অব কাস্টমস বা ডিরেক্টর জেনারেল, তাহাদের স্ব স্ব এখতিয়ার অনুযায়ী এই আইন বা তদধীন প্রণীত বিধির বিধানাবলী প্রতিপালনের জন্য প্রয়োজনীয় আদেশ, ফরম, নোটিশ, ব্যাখ্যা বা সার্কুলার জারি এবং প্রকাশ করিতে পারিবে।

২৮৪। **অসুবিধা দূরীকরণ।**—এই আইনের কোন বিধান কার্যকর করিবার ক্ষেত্রে কোন অসুবিধা দেখা দিলে, উক্তরূপ অসুবিধা দূরীকরণের জন্য সরকার, এই আইনের বিধানাবলীর সহিত সঙ্গতিপূর্ণ হওয়া সাপেক্ষে, প্রয়োজনীয় আদেশ জারি করিতে পারিবে।

২৮৫। **ইংরেজীতে অনূদিত পাঠ প্রকাশ।**—এই আইন প্রবর্তনের পর সরকার, প্রয়োজনবোধে, সরকারি গেজেটে প্রজ্ঞাপন দ্বারা, এই আইনের ইংরেজিতে অনূদিত একটি নির্ভরযোগ্য পাঠ (Authentic English Text) প্রকাশ করিতে পারিবে:

তবে শর্ত থাকে যে, বাংলা ও ইংরেজি পাঠের মধ্যে বিরোধের ক্ষেত্রে বাংলা পাঠ প্রাধান্য পাইবে।



২৮৬। **রহিতকরণ এবং হেফাজত।**—(১) এই আইন কার্যকর হইবার সঙ্গে সঙ্গে Customs Act, 1969 (Act No. IV of 1969) বলিয়া উল্লিখিত, রহিত হইবে।

(২) উপ-ধারা (১) এর অধীন রহিত হওয়া সত্ত্বেও, উক্ত Act এর অধীন—

- (ক) কৃত কাজ-কর্ম বা গৃহীত ব্যবস্থা এই আইনের অধীন কৃত বা গৃহীত হইয়াছে বলিয়া গণ্য হইবে;
- (খ) এই আইন কার্যকর হইবার তারিখে অনিষ্পন্ন কার্যাদি, যতদূর সম্ভব, এই আইনের বিধান অনুসারে নিষ্পন্ন করিতে হইবে:

তবে শর্ত থাকে যে, এই আইন প্রবর্তনের পূর্বে উক্ত Act এর অধীন নির্ধারিত কোনো আবেদনপত্র পেশের অথবা কোনো আপীল বা রিভিশন দায়েরের সময়সীমার মেয়াদ অবশিষ্ট থাকিলে, উক্ত মেয়াদ অব্যাহত থাকিবে।

- (গ) আরোপিত কোনো শুল্ক, ফিস বা অন্য কোনো পাওনা, এই আইন প্রবর্তনের অব্যবহিত পূর্বে অনাদায়ী থাকিলে, উহা উক্ত Act এর বিধান অনুযায়ী এমনভাবে আদায় করিতে হইবে এবং কোনো বিষয় অনিষ্পন্ন থাকিলে, উহা উক্ত Act অনুযায়ী এমনভাবে নিষ্পন্ন করিতে হইবে যেন উক্ত অপঃ রহিত হয় নাই;
- (ঘ) চলমান মামলাসমূহ এমনভাবে নিষ্পন্ন করিতে হইবে যেন উক্ত Act রহিত হয় নাই;
- (ঙ) প্রণীত সকল বিধি, প্রদত্ত সকল আদেশ, জারিকৃত সকল প্রজ্ঞাপন বা নোটিশ, এই আইনের বিধানাবলীর সহিত সামঞ্জস্যপূর্ণ হওয়া সাপেক্ষে, রহিত বা সংশোধিত না হওয়া পর্যন্ত, এমনভাবে বলবৎ থাকিবে যেন উহা এই আইনের অধীন প্রণীত, প্রদত্ত বা জারিকৃত হইয়াছে;
- (চ) গঠিত কোনো বন্দরের ট্রাস্টি বা বন্দর কর্তৃপক্ষ এমনভাবে উহার অবশিষ্ট মেয়াদ পর্যন্ত কার্যক্রম পরিচালনা করিবে যেন এই আইন কার্যকর হয় নাই:

**তফসিলসমূহ****প্রথম তফসিল****[ধারা ২৬(১) দ্রষ্টব্য]****(পৃথকভাবে মুদ্রিত)****দ্বিতীয় তফসিল****(ধারা ২৮০ দ্রষ্টব্য)**

- (১) কাস্টমস কর্মকর্তাদের ক্ষমতা প্রয়োগ এবং দায়িত্ব পালন সম্পর্কিত বিষয়াবলী।
- (২) কাস্টম শুল্ক ও কর পরিশোধ এবং পরিশোধের সময় সংক্রান্ত বিষয়।
- (৩) সমুদ্র পথে আমদানিকৃত, রপ্তানিকৃত এবং পরিবাহিত পণ্য অবতরণ এবং জাহাজীকরণের উদ্দেশ্যে কাস্টমস বন্দর এবং অনুমোদিত অবতরণ স্থান সম্পর্কিত বিধি-বিধান এবং এইরূপ বন্দর ও অবতরণের স্থানের সীমানাসহ যে সকল পণ্য অবতরণ বা জাহাজীকরণ করা হবে তার তালিকা সম্পর্কিত বিষয়।
- (৪) সড়ক ও রেলপথে পণ্য আমদানি ও রপ্তানির স্থানসমূহ এবং সড়ক পথে যেই রুটে পণ্য আমদানি ও রপ্তানি হইবে তদ্বিষয়।
- (৫) অভ্যন্তরীণ কাস্টমস স্টেশনসমূহ (যেস্থানে কাস্টমস শুল্ক করা হইবে) সংক্রান্ত বিষয়াদি।
- (৬) আমদানিকৃত বা রপ্তানিতব্য নিষিদ্ধ পণ্য আটক এবং বাজেয়াপ্তির জন্য কার্যধারা সংক্রান্ত বিধান এবং উক্ত পণ্যের সহিত সম্পর্কিত তথ্য যাচাই, মালিক বা অন্য পক্ষকে প্রদেয় নোটিশ, উক্ত পণ্যের হেফাজত বা খালাসের জন্য জামানত, সাক্ষ্যের পরীক্ষা, সংবাদদাতা কর্তৃক ভুল সংবাদ সরবরাহ করিবার কারণে ব্যয় এবং ক্ষতিপূরণ প্রদান সংক্রান্ত বিষয়।
- (৭) পরবর্তীকালে রপ্তানির উদ্দেশ্যে আমদানিকৃত বা বিধিতে উল্লিখিত পণ্যের উৎপাদন, প্রস্তুতকরণ, প্রক্রিয়াজাতকরণ, মেরামত বা পুনসংযোজনে ব্যবহার্য পণ্য বা উপকরণ সম্পূর্ণ বা আংশিক শুল্ক পরিশোধ ব্যতিরেকে খালাস প্রদান করিবার ক্ষেত্রসমূহ।
- (৮) আমদানিকৃত এবং রপ্তানিতব্য পণ্য চালানে দলিলাদির সত্যতা প্রতিপাদনসহ পণ্যের কায়িক, রাসায়নিক, বিশেষজ্ঞ পরীক্ষা বা সত্যতা প্রতিপাদন, নন-ইন্ট্রুসিভ ইন্সপেকশন, উক্তরূপ পরীক্ষা বা যাচাই এর জন্য পণ্য নির্বাচন এবং ঝুঁকি ব্যবস্থাপনা সম্পর্কিত ক্ষেত্রসমূহ।
- (৯) বাংলাদেশী জাহাজের মালিকানাধীন নৌকা এবং অনধিক একশত টন বিশিষ্ট অন্যান্য নৌযান মার্কযুক্তকরণ, নিয়ন্ত্রণ করা এবং উহার উপর বিধি-নিষেধ আরোপ করা এবং লাইসেন্সের জন্য ফি এবং কার্গো বোটের নিবন্ধন।

- (১০) ধারা ১২৫ এর অধীন বিশেষভাবে নিয়োজিত কাস্টমস্ কর্মকর্তা ওয়্যারহাউসে মালিকের সহগামী হওয়ার ক্ষেত্রে ব্যয় দাবী করা এবং কোনো পণ্যের মালিককে ধারা ১২৬ এর বিধান অনুসারে উহাদের বিলিবন্দেজের অনুমতির জন্য দাবীকৃত ফি।
- (১১) সময়সীমাসহ ওয়্যারহাউসে পণ্য প্রস্তুতকরণ এবং অন্যান্য কার্যক্রম পরিচালনা সংশ্লিষ্ট বিষয়াদি।
- (১২) শুল্ক পরিশোধ ব্যতিরেকে পণ্যের ট্রানশিপমেন্ট এবং ট্রানশিপমেন্ট নিষিদ্ধকরণ, নিয়ন্ত্রণ ও বিধি-নিষেধ এবং এতদবিষয়ে কাস্টমস কর্মকর্তার ক্ষমতা ও ট্রানশিপমেন্ট ফি।
- (১৩) ধারা ১৬০ এর অধীন ফ্রাস্ট্রেটেড (frustrated) কার্গো রপ্তানি।
- (১৪) বিদেশী ভূখন্ডের মধ্য দিয়া বাংলাদেশের এক এলাকা হইতে অন্য এলাকায় পণ্য পরিবহণ; এবং উক্তরূপ পণ্য গন্তব্যে যথাযথভাবে পৌঁছাইবার জন্য শর্তাবলী।
- (১৫) শুল্ক পরিশোধ ব্যতিরেকে কোনো বিদেশী ভূখন্ডে পণ্য ট্রানজিটের জন্য শর্ত এবং বিধি-নিষেধ প্রয়োগ।
- (১৬) যাত্রী এবং ক্রু ব্যাগেজ, উক্ত ব্যাগেজের সংজ্ঞা, ঘোষণা, তত্ত্বাবধান, পরীক্ষা, শুল্কায়ন এবং খালাস ও উক্ত ব্যাগেজের ট্রানজিট ও ট্রানশিপমেন্ট এবং উক্ত ব্যাগেজ অথবা উহার অন্তর্ভুক্ত কোনো নির্দিষ্টকৃত শ্রেণীর পণ্য যে পরিস্থিতিতে এবং শর্তাবলীর অধীন শুল্ক হইতে অব্যাহতি পাইবে এবং উক্ত অব্যাহতির পরিমাণ।
- (১৭) প্রাপ্যতা সীমার অতিরিক্ত নগদ মুদ্রা বা কারেন্সি নোট, স্বর্ণ, ডায়মন্ড, মূল্যবান ধাতু এবং মূল্যবান পাথর উপযুক্ত কর্তৃপক্ষের নিকট রিপোর্টিং ব্যতীত বাংলাদেশে আনয়ন বা বহির্গমন সংক্রান্ত।
- (১৮) আমদানিকৃত বা রপ্তানিতব্য পণ্যের মূল্যায়ন পদ্ধতি সংক্রান্ত বিধি-বিধান, আমদানিকারক বা রপ্তানিকারক কর্তৃক পণ্যের যথাযথ মূল্যায়নের জন্য প্রয়োজনীয় তথ্য দাখিল, এবং তৎকর্তৃক সংশ্লিষ্ট পুস্তক ও দলিলপত্র উপস্থাপন, আমদানিকারক কর্তৃক যে অর্থ বা সম্পদ দ্বারা পণ্য অর্জিত হইয়াছে উহার উৎস, প্রকৃতি এবং পরিমাণ সম্পর্কিত বা যে বিবেচনার জন্য এবং যে পন্থায় উহা বিক্রয় করা হইয়াছে তৎসম্পর্কিত তথ্য সরবরাহ।
- (১৯) পানাহার অনুপযোগী (denatured) স্পিরিট নির্ধারণ, এবং স্পিরিটের রাসায়নিক পরীক্ষা এবং পানাহার অনুপযোগীকরণ।
- (২০) প্রত্যর্পণ সম্পর্কিত বিষয়াদি, ব্যবহৃত পণ্যের ক্ষেত্রে প্রত্যর্পণ, উক্ত পণ্যের উপর যেই প্রত্যর্পণ ফেরত প্রদান করা হইবে সেই শুল্কের পরিমাণ, কোনো নির্ধারিত পণ্য অথবা পণ্যশ্রেণীর উপর প্রত্যর্পণ নিষিদ্ধকরণ, প্রত্যর্পণ পরিশোধের জন্য শর্তাবলী, যে মেয়াদের মধ্যে উক্ত পণ্য অবশ্যই রপ্তানি করিতে হইবে উহা সীমিতকরণ, যে সময়ের মধ্যে প্রত্যর্পণ দাবী করা যাইবে উহা সীমিতকরণ।

- (২১) বন্দর ছাড়পত্র বা যানবাহনের প্রস্থান সম্পর্কিত বিষয়াদি, খোল উন্মুক্ত করিবার অনুমতি সম্বলিত বিশেষ পাশ মঞ্জুর, রপ্তানি কার্গো ঘোষণা এবং অন্যান্য দলিলপত্র অর্পণের জন্য এজেন্ট কর্তৃক জামানত দাখিলের ক্ষেত্রে জাহাজের মাস্টারকে বন্দর ছাড়পত্র মঞ্জুর করা সম্পর্কিত শর্তাবলী।
- (২২) ডাকযোগে পণ্য আমদানি বা রপ্তানির সহিত সংশ্লিষ্ট বিষয়াদি, উক্তরূপ আমদানিকৃত বা রপ্তানিতব্য পণ্যের পরীক্ষা, শুল্ক নিরূপণ, খালাস, ট্রানজিট বা ট্রানশিপমেন্ট।
- (২৩) যেই উপকূলীয় পণ্যের রপ্তানি এই আইন বা অন্য কোনো আইনের অধীন শুল্কযোগ্য বা নিষিদ্ধ, উহাদের বাংলাদেশের বাহিরে নেওয়া প্রতিরোধ, কোনো জাহাজের উপরে উপকূলীয় পণ্য দ্বারা আমদানিকৃত বা রপ্তানি পণ্যের প্রতিস্থাপন প্রতিরোধ, নির্ধারিত বন্দরসমূহে বা উহাদের মধ্যে কোনো নির্দিষ্টকৃত শ্রেণীর পণ্য সাধারণভাবে পরিবহন নিষিদ্ধ করা।
- (২৪) ধারা ২১১ এর অধীন কোনো কারখানা বা ইमारতে দায়িত্বরত কর্মকর্তা কর্তৃক প্রয়োগযোগ্য ক্ষমতা।
- (২৫) এজেন্টকে লাইসেন্স প্রদান; লাইসেন্সের ফরম এবং উহার জন্য প্রদেয় ফি, লাইসেন্স মঞ্জুর করিবার উপযুক্ত কর্তৃপক্ষ, লাইসেন্সের বৈধতার মেয়াদ, লাইসেন্সধারীর যোগ্যতা, জামানত প্রদানসহ লাইসেন্সে প্রযোজ্য শর্তাবলী এবং বিধি-নিষেধসমূহ লাইসেন্সধারীর উপর অর্হদন্ড আরোপ বা লাইসেন্স স্থগিত বা বাতিল করিবার পরিস্থিতি এবং অর্হদন্ড বা লাইসেন্স স্থগিত বা বাতিলের বিরুদ্ধে আপীল।
- (২৬) যেই ব্যবসা নিয়ন্ত্রণের জন্য ধারা ২৬৪ এর অধীন প্রজ্ঞাপন জারি করা যাইবে সেই ব্যবসা সংশ্লিষ্ট বিষয়াদি এবং উক্ত ব্যবসায় নিয়োজিত ব্যক্তি কর্তৃক হিসাব পত্র এবং নথিপত্র সংরক্ষণ, ও তথ্য সরবরাহ সংক্রান্ত।
- (২৭) ধারা ২৭১ এর অধীন পুরস্কার।
- (২৮) ধারা ২৭২ এর অধীন আর্থিক প্রণোদনা পুরস্কার।
- (২৯) কাস্টমস অফিস, কাস্টমস স্টেশন অথবা সরকারি ও লাইসেন্সপ্রাপ্ত ওয়ারহাউস এর কার্যক্রম পরিচালনার জন্য খোলা রাখার দিন ও সময় নির্ধারণ সংক্রান্ত এবং কোনো কাস্টমস বন্দর, বিমান বন্দর এবং স্থল বন্দরে পণ্য অবতরণ, জাহাজীকরণ এবং বোঝাইকরণের সময় নির্ধারণ সংক্রান্ত।
- (৩০) নির্ধারিত সময়ের বাহিরে, জাহাজের মাস্টার বা তাহার এজেন্ট অথবা বিমানের ক্ষেত্রে বিমান চালক অথবা তাহার এজেন্ট বা যানবাহনের ক্ষেত্রে ভারপ্রাপ্ত ব্যক্তি অথবা আমদানিকারক, রপ্তানিকারক অথবা তাহাদের প্রতিনিধি কর্তৃক অনুরোধের ভিত্তিতে, কাস্টমস অফিসার কর্তৃক সেবা প্রদানের কারণে, কাস্টমস অফিসারকে ওভারটাইম পরিশোধের হার এবং উক্ত ওভারটাইম অনুমোদনের শর্তাবলী সম্পর্কিত বিষয়।

- (৩১) বাংলাদেশের জলসীমায় উপকূলীয় পণ্য পরিবহনকারী জাহাজের উপর কাস্টমস কর্মকর্তাদের নিয়ন্ত্রণ সংক্রান্ত বিষয়।
- (৩২) সরকারী এবং লাইসেন্সপ্রাপ্ত ওয়ারহাউসে পণ্য জমা দেওয়া, তত্ত্বাবধান এবং ওয়ারহাউস হইতে পণ্য অপসারণ সংক্রান্ত এবং ওয়ারহাউস সংক্রান্ত ব্যবস্থাপনা এবং নিয়ন্ত্রণ সম্পর্কিত বিষয়।
- (৩৩) লাইসেন্স ইস্যুসহ তৎসংক্রান্ত পদ্ধতি (এজেন্ট লাইসেন্স ব্যতীত)।
- (৩৪) ওয়ারহাউস ব্যতীত অন্যান্য ক্ষেত্রে, লাইসেন্স এবং পারমিট ফি সংক্রান্ত।
- (৩৫) লাইসেন্সপ্রাপ্ত ব্যক্তি কর্তৃক রেজিস্টার, দলিলাদি এবং হিসাবপত্র সংরক্ষণ ও সংরক্ষণ পদ্ধতি সংক্রান্ত।
- (৩৬) লাইসেন্স অথবা পারমিটের অধীনে পণ্য আমদানি, রপ্তানি এবং অপসারণ সংক্রান্ত।
- (৩৭) রপ্তানি প্রক্রিয়াকরণ অঞ্চল (Export Processing Zone), অর্থনৈতিক অঞ্চল (Economic Zone) ও হাই-টেক পার্ক (Hi-Tech Park) এবং অনুরূপ বিশেষায়িত অঞ্চল সংক্রান্ত।
- (৩৮) আমদানিকৃত, রপ্তানিতব্য পণ্যের প্যাকেজে যেই পদ্ধতিতে চিহ্নিতকরণ এবং নম্বর প্রদান করা হইবে এবং যেই পদ্ধতিতে ইনভয়েস প্রস্তুত করা হইবে তৎসংক্রান্ত বিষয়।
- (৩৯) কোনো অনুমোদিত কাস্টমস বন্দর অথবা স্টেশনের মাধ্যমে পণ্যের চলাচল নিয়ন্ত্রণ অথবা সম্পূর্ণরূপে বা শর্তসাপেক্ষে নিষিদ্ধকরণ সংক্রান্ত।
- (৪০) শুল্কযোগ্য বা নিয়ন্ত্রিত পণ্য মোড়কজাতকরণের পদ্ধতি এবং শুল্কযোগ্য, শুল্কমুক্ত ও নিয়ন্ত্রিত পণ্য একই মোড়কে মোড়কজাত না করা সংক্রান্ত বিষয়াদি।
- (৪১) রপ্তানি পণ্য পরিবহনের উদ্দেশ্যে ব্যবহার্য কন্টেইনারের মানদণ্ড (Standard) সংক্রান্ত।
- (৪২) শুল্কমুক্ত বিপণী পরিচালনা সংক্রান্ত বিষয়াদি।
- (৪৩) অথোরাইজড ইকোনমিক অপারেটর সম্পর্কিত।
- (৪৪) খালাসোত্তর নিরীক্ষা (Post Clearance Audit) সংক্রান্ত।
- (৪৫) আপীল ও রিভিউ দায়ের ও নিষ্পত্তি সংক্রান্ত পদ্ধতি।
- (৪৬) রিফান্ড আবেদন দাখিল, গ্রহণ ও তাহার নিষ্পত্তি সংক্রান্ত বিষয়াদি।
- (৪৭) ন্যায় নির্ণয়ের উদ্দেশ্যে কারণ দর্শানো নোটিশ ও দাবীনামা জারি।
- (৪৮) এই আইনের বিধানাবলী কার্যকর করিবার জন্য প্রয়োজনীয় অন্য কোনো বিষয়।

- 
- (৪৯) গ্যারান্টি সংক্রান্ত বিষয়াদি।
- (৫০) সেইফগার্ড ডিউটি সংক্রান্ত বিষয়াদি।
- (৫১) ইনওয়ার্ড ও আউটওয়ার্ড প্রসেসিং সংক্রান্ত বিষয়াদি।
- (৫২) শুল্কায়ন ও পুনঃশুল্কায়ন সংক্রান্ত বিষয়াদি।
- (৫৩) রসদ ও ভান্ডার সামগ্রী সংক্রান্ত বিষয়াদি।
- (৫৪) ইলেক্ট্রনিক পদ্ধতিতে পণ্য ছাড়করণের পদ্ধতি ব্যবহার সংক্রান্ত বিষয়াদি।
- (৫৫) বিকল্প বিরোধ নিষ্পত্তি সংক্রান্ত বিষয়াদি।
- (৫৬) সরকারের পাওনা আদায় অবলোপনের ক্ষমতা সংক্রান্ত বিষয়াদি।
- (৫৭) শুল্ক ফাঁকি অথবা আইনের লংঘন উদঘাটনের জন্য পুরস্কার সংক্রান্ত বিষয়াদি।
- (৫৮) অগ্রিম রুলিং সংক্রান্ত বিষয়াদি।
- (৫৯) কাস্টমস কর্মকর্তা ও কর্মচারীগণের আর্থিক প্রণোদনা সংক্রান্ত বিষয়াদি।

## উদ্দেশ্য ও কারণ সম্বলিত বিবৃতি

বাংলাদেশের আন্তর্জাতিক বাণিজ্য তথা আমদানি-রপ্তানির ক্ষেত্রে কাস্টমস ব্যবস্থাপনা আন্তর্জাতিক মানে উন্নীত করার লক্ষ্যে সরকার তথা জাতীয় রাজস্ব বোর্ড কর্তৃক গৃহীত বহুমুখী সংস্কার ও আধুনিকায়ন কার্যক্রমের অংশ হিসেবে কাস্টমস সংক্রান্ত আন্তর্জাতিক উত্তম চর্চা (International Best Practices) অন্তর্ভুক্ত করে ইংরেজি ভাষায় প্রণীত বিদ্যমান Customs Act, 1969 এর পরিবর্তে বাংলায় একটি আধুনিক কাস্টমস আইন প্রণয়ন করার প্রয়োজনীয়তা দীর্ঘদিনের। এ প্রয়োজনীয়তা অনুধাবন করে বাংলাদেশ সরকার বাংলা ভাষায় নতুন কাস্টমস আইন প্রণয়নের উদ্যোগ গ্রহণ করে।

২। আন্তর্জাতিক বাণিজ্যে কাস্টমস সংক্রান্ত আইন, বিধি, পদ্ধতি, আনুষ্ঠানিকতা প্রভৃতির ব্যবস্থাপনা স্বচ্ছ, দ্রুত ও ব্যয়সাশ্রয়ী করার লক্ষ্যে বিশ্ব কাস্টমস সংস্থার তত্ত্বাবধানে আন্তর্জাতিকভাবে গৃহীত মান সংক্রান্ত কনভেনশন (Revised Kyoto Convention (RKC) এবং SAFE Framework of Standards (FOS) অনুযায়ী আমদানি ও রপ্তানি পণ্যের Supply Chain এর নিরাপত্তা নিশ্চিতকরণসহ বিশ্ব কাস্টমস সংস্থা (WCO) এর নেতৃত্বে আন্তর্জাতিকভাবে গৃহীত কাস্টমস ব্যবস্থাপনা সংক্রান্ত বিধি-বিধান সন্নিবেশিত করে নতুন আইন করার প্রয়োজনীয়তা দেখা দিয়েছে। উল্লেখ্য, পৃথিবীর অধিকাংশ দেশ ইতোমধ্যে উল্লিখিত দুটো কনভেনশন বাস্তবায়ন করেছে। তাছাড়া ইতোমধ্যে সম্পাদিত Trade Facilitation Agreement এর প্রাসঙ্গিক কতিপয় ধারাও বাংলাদেশের কাস্টমস এ্যাক্ট-এ অন্তর্ভুক্তিকরণের আবশ্যিকতা দেখা দিয়েছে। বিদ্যমান কাস্টমস এ্যাক্টকে আরো সহজ, স্বচ্ছ, জবাবদিহিমূলক, যুগোপযোগী করাসহ বাংলা ভাষায় প্রণয়নের মাধ্যমে আমদানি ও রপ্তানিকারকসহ সকল অংশীজনদের সহজ সেবা প্রদান নিশ্চিত করার লক্ষ্যে "কাস্টমস আইন-২০১৯" মহান জাতীয় সংসদে উপস্থাপন করা হচ্ছে।

**আহম মুস্তফা কামাল**

ভারপ্রাপ্ত মন্ত্রী।

**ড. জাফর আহমেদ খান**

সিনিয়র সচিব।

মোঃ তারিকুল ইসলাম খান, উপপরিচালক, বাংলাদেশ সরকারী মুদ্রণালয়, তেজগাঁও, ঢাকা কর্তৃক মুদ্রিত।

মোঃ আব্দুল মালেক, উপপরিচালক, বাংলাদেশ ফরম ও প্রকাশনা অফিস, তেজগাঁও,

ঢাকা কর্তৃক প্রকাশিত। website: www.bgpress.gov.bd